

G. HADDONI LEGVM  
DOCTORIS, S. REGINÆ

Elisabethæ à supplicum libellis,

*lucubrationes passim col-  
lectæ, & editæ.*

*Studio & labore Thomæ  
Hatcheri Cantabrigiensis.*

**Ad lectorem.**

*Ne queras lector, cur quæ iuueniliter olim  
Scripserat Haddonus, publica facta legas.  
Omnia coniunxi, quia mel, quia succus in illis,  
Et condita suo quæq; lepore iuuant.*

**LONDINI,**

*Apud Gulielmum Serefum.*

**1567.**



IN D. GVALTERI HADDONI PRÆ.  
clarissimas lucubrationes, per Thomam Hatche-  
rum collectas, epigramma Ioannis  
Freri medicinæ doctoris.

E Loquium quis non Ciceronis laudet, & artem,  
Quis non Nasonis nobile carmen amet?  
Cui non Sedulius, Prudentius atq; Iuencus  
In pretio? Quis non scripta vetusta probet?  
Quemlibet istorum quis non miretur? Et unum  
Haddonum cunctis quis neget esse parem?  
Atqui si nimium cuiquam dixisse videbor,  
Hæc legat, & dictum dixerit esse parum.  
Hisq; ita quod fruimur, magni est, Hatchere, laboris  
Omne tui, & laudes, quas decet, inde feres.  
Nam quantum Hipparcho debet, studiosus Homeri,  
Tantum doctorum turba Latina tibi.

In eadem, Abrahamus Hartwellus.

I Udicio variant docti, indoctiq; ferendo:  
Indocto citius fulmen ab ore venit.  
Forsan erit qui te lasciuo iudicet ore,  
Haddone, eloquij pieriduniq; decus:  
Forsan is eloquio, si sit certare necesse,  
Non asinos possit, non superare boues.

+ a -  
- w. t.  
- t. t.

CLARISSIMO VIRO D. GV.

lielmo Cecilio equiti, serenissimæ reginæ

*Elisabethæ, cum à secretis, tum à consi-*

*lijs, & academix Cantabrigiæ can-*

*cellario dignissimo.*



TSI NON IG-

norem, præstantissime vir,

occultas esse hominum vo-

luntates, multiplices senten-

tias, & cogitationes propè

infinitas, adeò vt de plerisq;

eorum iudicare non minus

sit periculosum, quàm diffi-

cile omnibus satisfacere, qui has à me collectas or-

natissimi Haddoni lucubrationes perlecturi sunt:

me tamen neq; periculi magnitudo, neq; rei difficul-

tas, quicquam deterrere potuerunt, quo minus quod

liberè ante aliquot annos cœpi facere, id nūc libèter

perficerè. Dum enim Cantabrigiæ in collegio regio,

excussis diligenter, & euentilatis monumentis, illud

in primis scire desyderarem, quantum singuli, regijs

illustrissimi Henrici sexti impensis ad pietatem, ab-

solutamq; scientiarum cognitionem enutriti, literariã

## EPISTOLA

rempub. non solum vita, sed & scriptis illustrassent:  
 comparatisq, quorum potui, ingeniorum commenta-  
 tiunculis, præstitisse vnum omnibus Haddonum  
 perspicerem: magna profectò voluptate perfusus re-  
 liquas illius commentationes peruolutandi, cōplures  
 undiq, dispersas, & dissipatas conquisiui. Quarum  
 cum vsus multiplex sit, eloquentia tanta, vt & alli-  
 cere lectorem, & detinere possit, fructus tam im-  
 mensus, vt ad plurimos deriuari potius, quàm in an-  
 gustis musæi nostri spatij delitescere debeant, victus  
 etiam studiosorum quorundam clamoribus, & im-  
 portunitate, qui editionem à me flagitabant: eas ego  
 tandem non multò minori cura, fortassè etiam ma-  
 iori labore excusas diuulgo, quàm ab ipso authore  
 primùm sunt aut excogitatæ, aut mandatæ chartis.  
 Ut enim typographiæ molestias, quæ me potissimum  
 affligerunt, prætermittam, & de illo verè, sed bre-  
 uiter, vt res se habet, loquar, inter præclaras illius  
 virtutes, quibus docti viri, & eloquentis nomen con-  
 sequutus est, illa non fuit sanè antebac, nec adhuc  
 est, minima, quòd paruo tempore, minimoq, negotio  
 res maximas sciēter, & artificiosè pertractare pos-  
 set.



## DEDICATORIA.

*set. Cantabrigiensis autem alumni foetus isti, Cantabrigiae, ut plurimum, nati & vestiti, nemini, meo iudicio, aptius possunt, aut debent quidem iustius consecrari, quam Cantabrigiensis academiae summo ornamento: hominis in regio collegio alti, & educati, quod Ioannis Langtoni, academiae olim cancellarij, rogatu fundatum est, quam praesenti academiae cancellario, qui de regio collegio praeclare, de vniuersa academia optimè meritus est: disertis viri, & ingenio excellentis, quam ei, qui tam multa atq; magna, non solum eloquentiae, & acuminis, sed consilij etiam, atq; sapientiae testimonia dedit, quanta amorem sui ipsius incredibilem apud prudentissimos, admirationem sempiternam apud omnes iampridem excitarunt. Has ergo lucubrationes, clarissime Cecili, tam multis nominibus, sub foelicissimo nominis tui patrocinio in lucem exeuntes ita suscipias, ut quomodo rei ipsius rationem vehementer es approbaturus, ita officij, & obseruantiae monumentum hoc erga te meae, non improbasse videare. Vale. Londini. 20. Nouembris. 1567.*

Tuae dignitatis studiosissimus,

Thomas Hatcherus.

THOMAS WILSONVS LEGVM

doct̃or, Thomæ Hatchero suo.

S. D. P.



Micè facis, & peraman-  
ter, mi Hatchere, quòd  
tam diligentem te osten-  
dis in perquirendis orna-  
tissimi Haddoni lucubra-  
tionibus omnis generis.  
Nam cum is Cantabri-  
giæ lumen, & ornamen-  
tum, suauissimo sapè sermone suo, & dicen-  
di præstantia, omnes nos in admirationem sui  
traxisset: iam tua opera effectū est, vt ob ocu-  
los ponantur nostros, multa eius præclarè di-  
cta, ab aspectus nostri iudicio huc vsque longè  
remotissima. Cum verò oculorum iudicium  
acutius sit, & certius, quàm sensus aurium, &  
ea maximè animis affigantur nostris, quæ ocu-  
lorum commendatione nobis traduntur: tu  
certè tua industria illa nobis legenda exhibes  
monumenta, quæ nos sapè, & tam auidè olim  
auribus

auribus arripuimus, quæ nunc fortassis euola-  
uerunt, vt ea nimirum, quæ audiendo com-  
plecti, aut retinere vix olim possemus, nunc  
intuendo planè, & ob oculos ponendo, perpe-  
tuò teneremus. Apum industria ex varijs flo-  
ribus mel colligit, & in fauum recondit. Tu  
sparsim collecta, & è tenebris eruta in vnum  
segregas locum, vt gustum præbeant suauissi-  
mū, & omnibus se videnda, atque adeo arripi-  
enda, offerre videantur. Et hac quidem tua in-  
dustria, multorum colliges beneuolentias, &  
eorum omnium emereberis fauorem, & gra-  
tiam, quorum animi ad virtutis studium, & ad  
dicendi facultatem, vllō modo incitantur. Nā  
qui hunc tuum laborem reprehendit, impro-  
bus est, qui non agnoscit, ingratus, qui pro-  
bat, humanus, qui imitatur, vir bonus meritò  
dici potest. Vale. Ex Xenodochio a-  
pud sanctam Katherinam iuxta  
turrim Londinensem,  
Calendis Iulij.

1567.



# INDEX ORATIONVM

G. Haddoni.

|                                 |        |                                 |     |
|---------------------------------|--------|---------------------------------|-----|
| De laudibus eloquentiæ.         | fol. 1 | De obitu D. Martini Bucerii.    | 84  |
| In admissione Bacchalaureorum   |        | De obitu Suffolciensiu fratru.  | 89  |
| Cantabrigiensium, oratio.       | 9      | Exhortatio ad literas.          | 109 |
| De laude scientiarum.           | 17     | Oratio habita Cantabrigiæ, cum  |     |
| Oratio theologica.              | 36     | ibi inter ceteros visitator re- |     |
| Oratio, quâ habuit, cum exordi- |        | gius versaretur.                | 134 |
| retur legû interpretatione.     | 57     | Ad pueros Aetonenſes.           | 141 |

## INDEX EORVM; AD QVOS

missæ sunt epistolæ.

|                                 |         |                                |     |
|---------------------------------|---------|--------------------------------|-----|
| Carolo Brandono, duci Suffolci- |         | Cuidam nobili.                 | 207 |
| ensi.                           | 148     | Hieronymo Oſorio.              | 210 |
| Duci Northumbriensi.            | 159.    | Roberto Dudleio, comiti Leice- |     |
| Ioanni Checo, equiti.           | 162     | ſtriæ.                         | 268 |
| Georgio Deio, Cireſtrenſi epis- |         | Thomæ Smitho, equiti.          | 279 |
| copo.                           | 169     | Gualtero Haddono.              | 282 |
| D. Richardo Coxo, eleemoſyna-   |         | Prætori Galliæ.                | 311 |
| rio regio.                      | 165     | Thomæ Henneagio.               | 321 |
| Thomæ Wilſono.                  | 193-344 | Ioanni Sturmio.                | 346 |

I

G. HADDONI,  
Legum doctoris, serenissimæ re-  
ginæ Elisabethæ à supplicum libellis, de  
laudibus eloquentiæ, oratio.



Ericles Græcus ora-  
tor excellens, tempus  
optimū administra-  
torem consiliorū esse  
dicebat. Quod ego  
quia præclare dictū  
esse videbam, id ipse  
sequutus sum, & ex-  
plicandi Ciceronis, & eiusdem intermittē-  
di consilium ex tempore cepi. Nam cum  
mea facultas qualis ea cunq; fuit, priorum  
desuetudine commentationum nostrarum  
inaruisset, multisq; depressa difficultatibus  
propemodum concidisset, cumq; Cicero  
multorum eo tempore virorum optimis,  
& eruditissimis vocibus requireretur, mihi  
præclarissimum diligentie meæ tempus da-

ri videbatur, in quo meus singularis fructus cum aliorum non sanè nulla commoditate coniunctus esset. Itaq; vehementer inclinatis ingenij viribus & corporis id facere cæpi, de quo firmus nunq̃ antè cogitauerā, vt me ipse publicè quemadmodum possem erudirem, & si quos fortè mea vox alios instituire potuit. In quo licet tantū non profecerim quantum volebam, tamen actum & aliquantum quidem à me tum est, & plus id multò fuisset, si quem primū eramus ingressi cursū tenere potuissemus. Verū sequuti sunt illi dies, in quibus vel nullam omnino, vel dimidiatam oportebat, & curtā esse meam industriam, incurrentibus transuerfim in eam occupationibus aliarum rerum. Deflexi igitur paulū de via, nullo certè tēdio aut inertia, sed quòd impediri me viderem, & is ego essem, qui facilius inchoata possem absolvere, q̃ interrupta contexere. Nunc autem rursus otium primū, & summum est, & totum tempus huiusmodi,



modi, nullum vt ipsi melius, aut aptius excogitare possimus. Cōticescūt enim publica penè omnia studia, nihilq; aliud magno-  
perè est quod nos conturbet. Quarè sequa-  
mur iterum liberamam temporis solutissi-  
mamq; rationem, in qua magis etiam mihi  
q̄ antehac elaborandum est. Etenim quam-  
diu cū ex alijs locis alij, tūm ex hac ipsa  
fede duo singulares viri, mei praeceptores  
audiebantur, minus mihi curandum fuit  
quantū ingenio meo consequeretur: nunc  
& ceteri cōquiescunt, & excellētissimæ vo-  
ces praeceptorum meorum non illę quidem  
filent, nec enim filere possunt, aut debent,  
sed absunt isto loco. Nām altera publicis  
præst nostris rebus, altera mandata floren-  
tissimi principis instituendæ adolescentiæ  
est. Horum igitur sūmorum virorum ad-  
mirabilis eloquentiæ memoriam hoc ipso  
in loco custodire debemus, in quo nata ipsa  
magna ex parte nutritaq; fuit, & ita nobis  
in hoc munere versandum est, vt cum rati-

one videamur hanc scholam reſerauiſſe. Poſſunt aliæ cauſæ mei laboris eſſe videri, ſed nullæ profectò ſūt, præter hanc temporis, quam oſtendi, & communis vtilitatis, ſi qua communis ad vos vtilitas ex me peruenire poteſt. Quapropter adſimus animis (optimi viri) reuertamurq; Ciceronis ad intermiſſam eloquentiam, non parua rem ô dij boni, ſed nimirum omniũ maximam, & maximis dignam ſtudijs noſtris. Nam ſi uè quis homines conſiderauerit eloquẽtia præditos, innumerabiles occurrent, & maximi viri: ſi uè res aſpexerit eloquẽtię præſidio geſtas, admirabiles reperientur: ſi uè reſpub. in quibus eloquentia vigerit, florentes eas, & præſtantes alijs omnibus intelliget fuiſſe. Nec enim quiſq; olim Romę vir magnus fuit, vt ex omnibus rei-pub. temporibus Cicero repetit, quin eloquentiẽ ſtudio ſe daret, in qua licet plurimi permagni fuerint, tamẽ principes in dicendo. Cræſſus, Antonius, & Cicero quales & quàm

quàm diuini extiterunt. Crassus ipsū Con-  
fulera Romanū, & totam eius societatem  
itā viribus eloquentiæ fregit, vt totum illis  
Senatum infestum redderet. Antonius im-  
missos à Mario ferocissimos homines, ad se  
cum irruentes videret, ferrumque strin-  
gentes: tamen illorum barbaros animos o-  
ratione suauissima sic deliniuit, vt illum cō-  
tingere vel nollent, vel non possent, donec  
alter cæcus, & amēs ira irrupisset, & adhuc  
orantē oppressisset. Cicero tāta vi iudiciū a-  
nimos feriebat, vt propterea rex appellatus  
sit, quia regnabat in causis, & meliorē sem-  
per suā videri sentētiam eloquētia perfecit.  
Pericles Athenis imperans, quia plurimū  
dicendo valebat, vniuersam Græciam ful-  
gure, & tonitruo permiscere dictus est. De-  
mosthenes tantum eloquentiæ suæ præstan-  
tia consequebatur, vt illius arbitrio bellum  
& pacem Athenienses cum ceteris suscipe-  
rent. Et in his duobus potentissimis totius  
orbis terrarum imperijs eloquentia tam



vehementer regnavit, ut quemadmodum  
ceteris rebus pub. hæ duæ præstiterunt, sic  
istis ipsis ea semper optimo iure præesset.  
Quod si viros ab eloquentia separaveri-  
mus, & locos, & eam ex rebus sibi circum-  
fufis ponderemus, inuenietur genere præ-  
clara, partibus illustris, usu necessaria, diu-  
turnitate stabilis, & ambitu suæ naturæ dif-  
fusissima. Primum enim omnis ex animo  
est, & ex illa diuina mentis particula, quam  
intellectum appellant. Itaq; non sine causa  
Tullius, difficillimā hanc, & maximi laboris,  
& plurimarum rerum, & exquisitissimorū  
ingeniorum esse disputat. Partes habet ge-  
neris simillimas rationē, & orationē, quibus  
duobus vniuersa perfectio nostræ naturæ  
continetur. Nec enim orator nisi sapiens  
intelligi potest. Sermo disertum, scientia  
prudentem, vtrumq; coniunctum eloquē-  
tiam constituit. Ex quo nata vox Antonij  
est, qui cum esset ipse vir eloquentissimus,  
disertos se quam plurimos, eloquentē penē  
nemi-

neminem ait cognouisse. Et præclarissimè  
Cicero, nihil esse furiosius plurimis, & op-  
timis verbis nulla subiecta sententia. Iam  
si quantum vtendum sit, quaq; re spectari  
solet: equidem nec aqua, nec igni pluribus  
in locis vtimur quàm eloquentia, quæ men-  
tis interpret lingue dominatur, & intelli-  
gentia multiplicum rerū conformata, alijs  
ore promit, quod ipsa secum mente per-  
uidit. Nunq̃ igitur eloquentia caret vllus  
locus, nisi caret idem viris. Et os instituit e-  
loquentia, sine quo totius reliquæ societas  
humanæ vitæ muta censenda est. Nec solū  
viris, sed temporibus etiā optimis eloquen-  
tia apta ipsa ex se est. Bellū enim quoniā vi-  
geritur, alienum ab humanitate mutuorū  
officiorū in vita est. Pax omni genere ple-  
na fructus, & cōmoditatis, eloquētia floret.  
Et quanq̃ vere Cicero duas esse res existi-  
met, quæ nos in sūmo dignitatis gradu col-  
locant, quarū alterā ponit rem militarem,  
alterā eloquentiam: tamen animorū quàm

corporum, & orationis quàm telorū, magis ingenua dignaque homine victoria est. Postremò sicut viris, & temporibus, sic rebus plurimis, & præstantissimis eloquentia se permiscet. Arithmetica suis constricta numeris tenetur: Mathematicus ad pulverem & radium excubat: Astronomia cœlo suspēsa syderibus inhiat: Geometria terræ affixa est: Musica solis in auribus tinnit: sola vis eloquentiæ per omnia genera scientiarum tranans, ea varijs orationum delicijs pellicit, & eximium illis ornatum inducit, ut eas primùm amare velimus, deindè cognoscere possimus. Sed institutum mihi non est eloquentiā laudare, primùm, quoniam id facere nisi qui ipse eloquens sit, nemo potest, deindè quòd id alij fecerint, & in primis Cicero, vndè peti malim quàm ex me, si quid in hoc genere vobis placet. Ista paucissimis breviter attigi, nè parvam vobis ad audiendum causam esse putaretis, est autem ea certè maxima. Nam diuinis-

sima



suma certè res est eloquentia, nec ullus alius eloquentiæ magister cum Cicerone comparari potest, & Ciceronis eloquentiæ summa laus orationum est, & orationū hæc est præstantissima: quam partim audistis qualis sit, ad reliqua nūc si placet, attendite.

GVALTERI HADDONI IN ADMIS.

sione Bacchalaureorum Cantabrigienſium,

Anno Domini. 1547. oratio.

**M**Os gestus est voluntati vestræ (grauissimi viri.) Quam enim ad rem suffragijs vestris adhibebamur, eam sumis procurauimus nostris diligentijs. Peragrauimus per indoles vestræ iuuentutis, tentauimus eorū acumen, & scientiā, consideraui-  
mus quantum tempus ferebat, quam spē, quam facultatem singuli secum ad hūc ordinem afferebant, in quem à nobis coop-  
tādi sunt. Quæ tanta nobis occurrerunt, vt optare sanè maiora liceret, expectare vix tanta possemus. Itaque summa sit hæc nostræ sententiæ: nonnullos ex hijs gregibus

B.1.

adoles-

adulescentum vestrorū admiramur, multos laudamus, probamus plurimos, reprehendimus paucissimos, repudiamus omnino neminē. Quapropter vt seges, quæ spicis vberioribus, & crebris est, licet auenarum non nihil aspergatur: & ueluti mercatura quanquam aliquid nonnunquam damni contrahit, tamen maximis cumulata lucris, fructuosa iudicari solet: & quoniam ex eo quod maximas partes continet, latissimèq; funditur tota res appellatur: literarum hanc quasi sementem in academia confitam, vobis copiosissimam, & optimam esse renuntiamus, neq; tamen perpurgatissimā quidē illam, sed maximorū fructuum participē, expertē prorsus omnis iacturę. A nobis excussæ sunt, & ventilatæ segetes, vos (vt frugicolonos decet) eas in academix gremiū, tanquā in horreum infundite, respectantes subindē, nè voluptatum in illis erugines innascentur, nè turbo leuitatis eas quasi tempestatis quatiat, nè ignaui fuci obtorpentes,

pentis, earum succum omnem, & suauitatem exugant. Messis sanè præclara est, & fertilis: nos immissi vestris studijs eam parauimus: subsequitur nostrum in colligendo, cõponendoque laborem, in seruando, vestra fides, & in vtendo, sapientia. Quod si futurum est, repromittimus nihil istorũ secus quàm nos volumus, academia postulat, & vos expectatis. Atque hæc quidem oratio cõmuni satisfecit, & præsentì nostro muneri. Sed priuatæ charitati meæ, qua totam academiam comprehendo, non satisfacit. Admonet me vestra celebritas, admonet hoc tempus, admonet ante omnia hic locus in quo insisto, vobiscum vt agam, & deseri has scholas sinatis, & quasi priuatas relinqui, quas nomine publicas, beneficijs publicis, institutione publica, doctorũ, & artium, maiores nostri ad publicam vtilitatem totius reip. fundauerunt. Quæ tot modis peruulgatæ sunt, quarum tam multiplex ratio cõmunitatis est, eas nolite pa-



ti in hac solitudine iacere, qua iam diu ob-  
soluerunt. Nunquam affluentior acade-  
mia fuit, nunquam numerosior mea me-  
moriam, quam nunc est, nunquam desertio-  
res hæ scholæ fuerunt, nunquam magis so-  
litariae. Nam ad tantas angustias, & ad tam  
insignem paucitatem redacti sunt, vt vix  
singulis magistris, relictæ sint singuli audi-  
tores. Quod quoniam intelligo quanto di-  
cam cum dolore meo, sentire etiam videor,  
quanto vos id cum pudore vestro audiat. Nec  
mirum est, si in eo commouemur, fit  
enim sine vlllo exemplo, aut ratione. Nam  
omnis illa philosophorum veteris memo-  
riæ turba, quæ nos maximè amamus, maxi-  
meque sequimur, cuiusque nos quàm si-  
millimos esse volumus, magistris se sciëntia-  
rum cuiusque generis dedit, & in publi-  
cis gymnasijs cõterebatur. Ratio verò quæ  
potest adferri, cum in actionibus, in officijs,  
in tota deniq; vita publicas res semper pri-  
uatis anteponimus, cur hoc ipsum in litera-  
rum

rum studijs & exercitationibus eodẽ modo fit? Hoc in loco tacitè mihi à quibusdam occurri potest, magis homines domesticis, & suis studijs, quàm externis, & alienis delectari iolere. At nimirum hoc rectè dicunt, solere homines, non oportere etiam. Etenim hæc oratio est se plus quàm satis, alios non satis amantiũ. Qui si docti sunt, cur non doctrinã, cùm priuatim, & certis, tũ etiam publicè, & omnibus, proponi, & assumi volunt? Si indocti, non se domesticis parietibus semper occulāt, sed foras prospectent, & has scholas forum, sibi ludum esse putent. Quod si literarum domesticarum ratio satis commoda sit, tamen quæ inuidia est, hãc institutionem publicam accedere, ad quam qui se multũ assueuerũt, & qui in hoc quasi forum literarum, & palestra descendunt, non solum maiore venient scientia, & ingenio ad discendum, sed etiam presentiore animo, vsu firmiore, prõptiore audacia. Quapropter quantum interest in-

ter veteranos milites, qui sub pellibus sæpè excubarunt, in castris ponendis, in Vallo extruendo multùm versati sunt, qui ferire ipsi hostem didicerunt, & contra eius impetum in armis stare, & in vniuersa reliqua occupatione militari, se ipsi prouoluerunt: & inter tyrones qui nunquàm hostẽ, nunquàm castra, nunquàm pugnas, aut arma viderunt: quo fit, vt cum in hæc inciderint, animo simul & corpore cōcidant, timeant omnia, circumspectent, & tanq̃ præcipitati in insidias, aut in nouum quendam orbem delati, cohorrescant, & nulla in parte consistant: simillima est ratio horum in studijs doctrinæ delicatiorum tyronum, qui cum secessus, angulos, & vmbracula consecrati sunt: solem hunc, & puluerem publicarum scholarum, & disputationũ, quasi campi, & armorũ ferre non possunt. Ita quæ reluctantes videmus, & repugnantes eos cùm à nidis suis dimouentur, & in luce caligentes vt Cerberum ab inferis abstractũ, aut



aut hoc nomen si nimis durum est; vt Endimionem in monte Cario post infinitos annos expectatū. Ignoscite orationi meæ, fortassis nimis vehementi, certè quidē nimis veræ. Cur enim stant hæ scholæ? cur eas maiores nostri tā amplas esse voluerūt? vt tam pauci ingrederentur? cur tam paritas? vt penè præterirentur? cur tā firmas, & egregia specie? nulli vt concursus essent? vt tam rarò viderentur? cur tot in hijs doctores collocati sunt? vt cum parietibus colloquerentur, aut ipsi secū? quæ mens? quæ cogitatio? qui sēsus maiorū nostrorū in hijs rebus fuit? quos si laudamus in eo plenissimè, quòd hæc eximia literarum domicilia construxerunt: cur non reprehendimus eos, qui ab hijs communibus studiorum sedibus se abalienant? Vt alia omnia præteriantur, Henricus octauus diuinissimæ memoriæ rex, cur & veteres fundauit, & nouas doctrinas magnificentissimis sumptibus suis ad illas adiunxit? an vt domi nos

abderemus? ut domesticis, & priuatis cogitationibus inuoluti, nos ipsos à publica schola abduceremus? Si publicum excellentissimi regis beneficium in hijs omnibus fuit, cur eo non publicè vtimur? si non fuit, cur eo quasi publicum esset tantoperè gloriamur? Sed finis sit, nè vel nimis audax in publica, vel nimis impudēs in priuata causa fuisse videar. Quanquam hoc profiteor, & etiam atque etiam testificor, meam me non agere, sed publicā causam. Quid enim si non audior, neque alios doceo, qui audire ipse alios, & ab ipsis discere malim, si queam. Et ego quanquā non abūdo studijs auditorū, tamē illis non magnoperè careo, quoniam non desydero quidē. Academiae in eo laus, academiae splendor, academiae gloria agitur, mea quidē sentētia, quam si probatis vos quorū interest, facite quod vobis optimū videbitur. Si aliter est, ignoscite timori meo, qui nisi tātus fuisset, quātus est, totum hunc locum silētio facillimè præteruehi potuissē.

G. HADDONI DE LAVDE SCIEN-  
tiarum oratio, habita Oxoniæ.

ET si non sus Mineruam, ineptè tamen  
quisquis Mineruam docet, inquit Varro  
ad Ciceronem, & Atticum. Quapropter  
ipse sus, id si sumam mihi, vos vt doceam,  
tot circumfusas mihi Mineruas, nō ineptus  
in eo, sed planè amens videri possẽ. Sed non  
tantum mihi arrogo, nec vobis derogo, vos  
vt discipulos postulem, quos magistros nō  
recusem. Verum ad hunc me sermonẽ im-  
pulsit, præceptor priuatim meus, præposi-  
tus idẽ separatim vestris studijs, literarum  
cõmunis patronus, vir perfectissimus om-  
ni genere laudis. D. Coxus. Qui, quomo-  
do prius viuẽdi, discẽdi, sentiẽdi, sic author  
mihi hoc tẽpore loquendi fuit. Cuius cum  
tantum pondus verborum, & vitæ sit, vt  
multum ipse ex se valeat, talem cõplexus  
est causam, vt ipsa propter se videatur adiri  
debere. Quare cū gratissima mihi præcep-  
toris præclariss. voluntas semper fuerit, ad-

C.I.

huc



huc sit, & posthac fore debeat, etiam in operarum occupatione minutissimarum, in hoc rerum genere, quod mihi propositum est, sum admodum ei libenter obsequutus. Caput enim huius meæ ad vos orationis esse voluit, de laude scientiarum. Magnam rem, ô dii boni, & maximam vnā ex omnibus, & nostris studijs dignissimā. Sed alterius nimirum temporis, & maioris cuiusdam ingenij, quā nostrum est, aut fortasse esse potest. Verū tentemus sanè, quoniam ad id trusi sumus, & si nihil erit, iniquitatē acculatote mei præceptoris, cuius imperium fuit in hac re, meā facilitatem laudatote, qui malim ingenij laudem, & eruditionis amittere, quā humanitatis, & officij. Quanquā illa quanta sit in hijs apparere non potest, rebus sanè summis, sed remotis ab omni contentione, & temporis perexigui. Quapropter ista præceptis euoluam, fretus intelligentia vestra, & huic subitæ diffidens, & propè fortuitæ orationi meæ.

meæ. In qua, licet Cātabrigia me mea multum, diuque iactauerit, tamen hæc nouorū hominum, nouorū locorum noua forma terret oculos meos, qui, quocūque inciderint, nihil vident illorum, in quibus longo iam tempore conquierunt. Sed vt id agatur ad quod adsumus : audite optimi viri, si causā audiēdi esse putatis, quemadmodum apud vos sanè doctissimos, de doctrina, semidoctus ipse, percurram. Qui non præceptis vos insequor, vt erudiam, sed adhortationem adfero, vos vt ipsi erudiri velitis. Neque ad illos hæc meæ voces sunt, qui iam ipsi præceptores grauissimarum disciplinarum alijs esse possunt, quales plerosque vestrū reor: sed adolescētes affari volo, quorū imbecillitas ætatis, & ingenij, sapientū, & doctorū constituenda moderatione est. Quanq̃ neminem illorū, qui studia literarū amāt, poeniteret eius sermonis, in quo notæ quædam doctrinæ insunt, & cuius, ad amplificandā dignitatem disciplinarum, iter est,

C.2.

est, quod hac oratione nostra sequimur  
quidem certè, quantum assequamur vestris  
studijs intelligetur. Quæ licet hactenus  
magna fuerint, si maiora posthac erūt, rectè  
nos loquutos, optimè vos omnes fecisse, ex-  
istimabunt. Ad quārē, vt maioribus animis  
& erectioribus venire possitis, primū cog-  
noscite, vel cognitū potius id sanè prius me-  
cū, si libet, recognoscite, multiplex hoc ani-  
mal, acutū, memor, plenū rationis, & confi-  
lij, quod hominem dicimus, præstantissima  
quadam ac diuina conditione generatum  
esse, ex quo, consequitur appetitus in il-  
lo rerum bonarum & naturæ conuenienti-  
um. Placet autem ijs, quorum acutissima  
philosophiæ ratio mihi videri solet, tria re-  
rum expetendarum esse genera, quorū prin-  
ceps est honestas, quam vtilitas cōsequitur,  
tertio in loco voluptas inducitur. Hijs sunt  
tanquam augustissimi fōtes ad omnes na-  
turæ nostræ cogitationes, per istarum quasi  
regionū vias, vniuersę actiones nostræ vitæ  
sic



sic peragrant, nullum vt studium, nulla vt cura, nullus vt sensus noster, expers istorū sit. Quid enim ad vllam, vel animi, vel corporis rationem cadit, in quo non confectamur naturam rei præclaram ex se, vel eandem coniunctam, aut cum fructu, aut cum delectatione. In primo genere sunt honestates, virtutes, & officia. In secundo commodorum, quæ mercedem adferunt ex se consequentem, vt ex honoribus authoritas, ex opibus abundantia, ex amicitijs familiaritates, & quę reliquę sunt opportunitates huius generis. In voluptate sunt tertia, & vltima, suaues, & ingenuę nostrorum animorū oblectationes, quales ex vera gloria sūt, & rectè factis, & partim ex studio scientiarum, ventilationeque nature, quam Cicero pabulum modò animi, modò cibum humanitatis appellat. Nec expectare debetis, vt vllas vobis exponam mercenarias utilitates sordidorum hominum, aut illorū delitias, qui corporibus immerfi, voluptatis

naturam ad titillationem sensuum referūt. Huiusmodi prætereantur importuna belluæ. Si nos animum omninò tueamur, & à sensibus cogitationes abducamus, & respectemus paulisper ad mētē, interiorē nostri partem, inueniemus in hijs doctrinarū studijs, ad quæ segregamur, non vnum aliquod ex illis tribus generibus quæ ponebā, in quo multum est, sed concursum quendā ad literas ipforum trium, de quibus dum paucissimis loquor, quæso diligenter, vt facitis, attēdite. Primum virtus sumatur, cuius præstantia singularis est. Hanc Cicero quadripartitam efficiens, faciem eandem, & formam honesti vocat, quā Aristot. conscindit minutius. Sed quotuplex sit virtus, ad id quod nos agimus, nihil interest, qualis sit videamus. Est autē habitus, naturæ modo, rationi consentaneus. O diuitem virtutis, & auream supellectilem. Hijs rebus cōstat omnibus, sine quibus singulis, vita nostra nulla esse potest. O literarum excellen-  
tissi-

tissimam, & planè diuinam conditionem, quibus exornantur, & perpoliuntur hæc virtutis membra præclarissima. Naturæ enim egregiè multa inchoantē doctrina formans, & erudiens, tandem perficit, memoriam, difficilem sepè ad cōprehēdendū, lubricam semper ad tenendum, & facilè etiā labentem, præcepta literarum confirmant, eadem & latentem quoq; in re inueniunt, inuentam constringūt, constrictā sic obseruāt, vt nulla via possit euolare. Iam ratio nisi doctrinæ præceptis alta, educatāq; foret, esset illa quidem ortu præclaro & generoso, sed ad exitum propè nullum venire posset. Quin cum longius progressa ratio est, & ex literis adiumenta sibi adsciuit, ac intrauit penitūs in rerum naturam, ex eo virtus effici solet. Itaque Stoici, commodissimè virtutem appellant perfectam rationē. Magna laus, & planè summa nostrarū artium, quibus id efficitur, cuius causa cæteras res omnes efficere solemus. Quapropter agite



vos, virtutis splendor & honesti mouet. Per disciplinarū cognitionē, vobis iter ad ea est. Nec enim suscipi sanè possūt, nisi sciatur cuiusmodi sint. Scientia autem earum omnibus his literarum fontibus pronoscitur. Neque nos id conturbet, quòd à Platone positum est, virtutē doceri non posse. Nimirum ea parte non docetur, qua collocatur in vsu vitæ, sed ad primos animorum motus, & tanquā incunabula virtutum, nisi certa præcepta dentur, nè nomen quidem virtutū, quale sit, apparere potest. Ex prudentia licet id intelligere, cuius vis cum per reliqua permeat, hæc nobis sola nominetur. Eam Cicero definit, bonorum, & malorum, vtrorumque scientiam. Scientiam audimus, scientiæ vox in auribus nostris insonat. Demus igitur operam, vt eam perquiramus ex arte, & doctrina, si quidem virtus nobis, aut honestas chara est. Hæc sine illis penè nulla esse possunt. Illa si erunt magna, hæc in vobis maxima consequentur.

tur. Aut omninò rectè Socrates, qui nihil virtutem esse voluit nisi prudentiã, aut optimè Aristoteles, & Cicero, qui perspersã in omnibus rectè factis prudentiam esse voluerunt. Quorum vtrolibet efficitur, aut solis literis, aut maximè, & præcipuè vti debere: quoniam prudentia omnis, ex commendatione nostrorum studiorũ est. Quapropter vt concludatur iste locus, iudicia nostra, tanquã oculos, exacuamus, vim excitemus omnẽ mentis, vt Socratem ipsum sequuti, principem sanè omnium scientiarum, consequamur illius & honestatem, quẽ, quomodò mirifica fuerit in illo, sic nobiscum ad summã laudẽ peruenire possit, si in literis conteramur, præstantissimis omnium generum vitę magistris. Sequitur utilitas, quam futilem, & temporariam cætera dant, veram, solidam, expressam, sola nobis studia nostra relinquunt. Nam forma, vires, sanitas, opes, agri, villæ, vestes, pecora, quæque solent eiusmodi rerum emo-

D.I.

lumenta

lumenta commemorari, ex pecore orta, ad corpus referuntur, & in eo terminantur. Itaque corpora, quemadmodum in perpetuo motu sunt: sic horum commodorum omnia membra mutabilia sunt, tota incerta ratio, & illorum est ipsa possessio periculosissima. Contra quæ si vellem dicere, disertus esse possem, quoniam in illorum exagitanda leuitate, philosophi suos libros referferunt. Sed ista, ut contemnenda, contemnamus, & ad illas nos referamus animorum amœnitates, ex quibus veri fructus, & stabiles percipiuntur, quos cum reperiemus, à literis non discefferimus. Nam, quæ pōdus, & estimationem habent, aut à natura donantur, aut à fortuna accommodantur, aut proficiscuntur ab animo. Naturæ munera sunt illa quidem fundata præclarissimis initijs. Sed nisi moderatio quædam cultus adhibeatur ad ea doctrinæ, vel nullos ferunt fructus, vel spinas procreant, & herbas infrugiferas, ut optima sæpè natura, nisi literis, & artium



tium disciplinis cōteratur, in maxima perueritate sit. Iā, de fortuna, difficile est, prout temeritas illius postulat, dicere. Cicero de tota illius leuitate, & inconstātia, verissimè videtur lenisse, & grauissimè nos admonuisse, cū fortunam dicit, & ipsam cecā esse, & eos cæcos efficere, quos amplexa est. Superfūt animi bona, mens, intellectus, ratio, sapientia, ars, quorum omnis ratio, literis, & doctrina continetur. Hæc bona licet verissimè appellare, quoniam meliores, instructiores, munitiores, denique beatiores reddunt eos, à quibus firmè sunt cōprehenso. Nullis temporibus, nullis negocijs, nullis casibus excluduntur, sēper præsto sunt, semper vigent, omnibus causis, omnibus locis se impartiunt, res prosperas ornant, res aduersas solantur. Mœstos recreant, afflictos erigunt, propè mortuos ad vitam reuocāt. Multūm videor dicere, nec tamen multo secus est, quā dico. Cum enim animus cuiusque, is est quisque, vt Pla-

toni visum est, philosophorū deo: cur non  
viuere quodāmodo dicamus eos, quorum  
artes, consilia, deliberationes, scientiæ, toti  
denique animi viuunt in pectoribus homi-  
num, in literis custodiuntur. Huc igitur a-  
nimos nostros propè adducamus, huc cu-  
ræ, studia, commentationes, vigiliæ nostræ  
allaborent, vt literis excellamus & doctri-  
na. Quod si perfecerimus, præmia iam vi-  
detis, prosperitatem animorum florentissi-  
mam, & refertissimam omni foelicitate,  
post mortē, nominis memoriam, aut diu-  
turnam, aut eternam, quasi alteram vitam.  
Quæ si confyderare libet in alijs quanta fu-  
erint, facillimum est ex verisimilibus phi-  
losophorum temporibus repetere. The-  
mistoclis exiliū, tali viro luctuosissimum,  
doctrinæ vis sustentauit. Dionysium de re-  
gia fortuna depressum, literæ recreauerūt.  
Posidonij æstus, & ardores in toto corpo-  
re furentes, doctrina mitigauit. Ciceronē  
deformatum exilio, egestate, ruinis omni-

um fortunarum, senem planè laborantem,  
& ærumnosum, literæ sustentauerunt.  
Literæ Socratem in medijs cruciatibus,  
atque adeo in media morte, non solum  
moerentem leuauerunt, sed etiam mori-  
entem exhilarauerunt. Huic igitur doctri-  
næ, his studijs, his artibus, animi nostri se  
dedant, cum his cogitationibus dies no-  
ctesque mentes nostrę habitent, in his præ-  
ceptis animus noster si multum se, & as-  
siduè peruoluerit, nulli terrores ex anima-  
bunt illum, nullæ illum ægritudines con-  
ficient, nullæ libidines inflammabunt, nul-  
læ delectationes languidis liquefacient vo-  
luptatibus, sed iunctus deo fursum erit, neq;  
foras spectans, ab externis rerum euentis  
relegabitur, neque quicquam ad se credet,  
præter seipsum, pertinere. Quā animorum  
tranquillitatem, quidam philosophorum,  
plenam tot commoditatibus, felicitatem  
voluerunt ipsam appellare. Nos iunctis, &  
cumulatis animorum reliquis bonis, quorū



omnes copiae, & vbertates in literis insunt, omnibus partibus completam, esse beatissimam & ipsi iudicabimus, & id si tempus ferret, aliquantulum quidem ostendere possemus. Sed iam posita literarum & honestissima natura, & utilitate summa, restat voluptas, quam ex rebus optimis, & maximis, maximam, & optimam percipi necesse est. Nam si res externas, ad sensus nostros suauitate affluentes, libenter accipimus, & in eis commouemur, quam in animis nostris letitiam, quantum gaudium, imò quātos applausus, quantos triumphos excitari necesse est, quum placata ipsa tibi mens, compressis, & sedatis perturbationum facibus, incredibili vi sua, per coelum, per mare, per terras tacite peragrans, & tota ipsa in se reflexa, nonnulla recondit, cogitat, ratiocinatur, refellit, deliberat, proponit, & reliquis utitur, perfruitur omnibus diuinissimis intellectus, & rationis muneribus. Et philosophati quidem satis iam antè de hac re fuimus.

mus. Philosophorum vitam, testem adferimus nostræ orationis. Pythagoras priscae memoriæ vir, qui Græciâ primus illustravit, vitam hominû quasi mercaturam esse dicebat, in qua multæ essent, & variæ concursiones hominum, agentium, ruentium, moliētiumq; pro cuiusq; ingenio, & facultate. Vnum esse genus hominû literis inuolutû, qui philosophi dicuntur. Hos ab omnibus seclusos forensibus, & peruulgatis aliorum occupationibus, tanquam arbitros, & iudices sedere alienorû operum, nulla ipsos cura huiusmodi rerû impeditos, sed in libera, & soluta rerû cogitatione, sua studia defigētes. Hoc & ipse Pythagoras aureum ociû tenuit, & post illum innumerabiles alij. Democritus, vir magnus in primis, tanto studio incensus est, vt oculis se ipse priuaret, ne cursus, quò ferebatur ad doctrinâ, impediretur. Quid vnû cōmemorē? Chorus à Cicerone recensetur eorum, qui discendi cupiditate elati, in perpetuas se pe-

regrinationes eiecerūt. Zenocratem commemorat, Crantorem, Arcesilam, Aristotelem, Theophrastum, Zenonem, Cleanthem, Chrysippum, Antipatrum, atque addit innumerabiles alios, ut infinitam intelligatis, & immensam doctrinae voluptatē. Cuius suauitate si principes philosophi sic allekti sunt, ut nonnulli, posthabitis omnibus, in his doctrinarū studijs se posuerūt, alij tam longē progressi sūt, ut partim patriam, partim sensus ipsi suos, & salutem contemnerent: vos exaggerate, & extruite animos vestros, & tripartitam hanc à me breuiter conclusam doctrinae praestantiam confectemini. Vos (inquā) quibus non perpetuae peregrinationes suscipiendae sunt, quod nobiles olim philosophi fecerunt, sed quibus domi, & in his sedibus, atq; adeo in his ipsis vestigijs, in quibus nunc sumus, doctrina proponitur, & inculcatur. Omnia vobis diuinitus suppeditata sunt, non solum expectatione aliorum, sed votis etiam vestris  
ma-



maiora. Nam, siue quis aspexerit ad authorem huius principis domicilij literarum, regiam maiestatem, nihil sol vnquam vidit collustratum tot ornamentorū luminibus, & tantis tum belli, tum pacis artibus explēdescēs, tam absoluta rerum omniū prosperitate florens, siue decanum reuerendissimum consideraue- rit, præceptorem meum, quantum in illo pietatis, quantum eruditionis, quantum in pectore roboris, & nervorum, quantum in gerendis rebus alacritatis & laboris, quantum authoritatis in voce, suauitatis in ore, comitatis in moribus, quantum constantiæ & officij in tota vita perspicitur. Verū de illo, quoniā adest, dicam nihil, in quo sentio, quantum orationis meæ ornamentum perdiderim. Cætera quæ animo lustrare possū, omnia occurrant ampla, excelsa, angusta, regalibus ap- tissima institutis. Quare vos exquisitissimum est, aut nos potius, si ego ad numerum vestrum aggreger, dare operam, vt quoniam

E.I.

quidem

quidem mūnificentie regalis participes futuri sumus, respub. vicissim nōnullos laboris, & industriæ nostræ fructus percipiat. Hæc autē si aliqua esse apparebunt, luculentissimis compensabuntur. nostris emolumentis. Non his se finibus, regie maiestatis excellens beneficentia tenebit. Magnæ erant, quæ antegressa sunt, maiora videmus præsentia, licet futura nobis expectare maxima. Semper de suis regia maiestas querit, ecquid agant? ecquid in illis spei? ecquid facultatis insit? de suis seper ad se mitti cupiet regia maiestas, quos ornat, vt viua fratur gloria sui immortalis beneficii. Semper in rep. suos disseminabit, vt in omnium auribus, & oculis, testimonium excellentissimi, & magnificentissimi operis collocetur. Aderit, qui nunc adest, reuerēdissimus in Christo pater, Ioannes Lincolniensis, qui, nisi hoc regale beneficium admodum amaret, literas diligeret, vos non negligeret, nunquā his annis vir, hoc tempore se  
in

in viam dedisset. Igitur tantum sibi laboris pater grauisissimus assumpsit, vt curriculum hoc videret vestrorum ingeniorum. Idem cursus vestros ad literas, regiæ maiestati vehementer commendabit. Iam reuerend. in Christo pater, Oxoniensis, qui exacta ætate, & vt videtur, corpore confecto huc adrepsit, vos quasi alumnos suæ senectutis, ad laudem literarum, & honestatis florentes cum videbit, omnem in vestris studijs operam, gratiam, authoritatem suã cōsumet. Aderit decanus vester, & fortassis etiam noster, præceptor certè meus, vir omni ratione præstantissimus. Is hortatu suo, regiã maiestatem, non lãguentem, cōmouebat, sed currẽtem incitauit, vt vestrorũ cōmodorũ rationem haberet. Reliquus iste flos vestrarum vicinitatum, quem circa vos esse videtis, vestris virtutibus, vestris scientijs, quomodo nunc inchoatis, & viuentibus adhuc inculcat: sic maturas easdẽ, & perfectas, omni charitate sua cōprehẽ-

E.2..

det.



det. Denique lumina huius ornatissimæ academix, quomodò nunc se in domũ vestram intruserunt, ita posthac collustrata eadem luce vestrorum ornamentorum, & amabunt, & præsidijs suorũ cõsiliorum adiuuabunt. Quapropter iterum vos ad extremum appello, vos (inquam) appello, regalem stirpem, regalem familiam, regalem et domum, & iuventam, vt omnium memores harum rerum, quas ostendi, & horũ virorum, quos adesse cernitis, vniuersas expromatis vires animorum vestrorũ, vt tales aliquando sitis, quales regia maiestas expectat, decanus vester reuerendis. optat, tota respub. sperat vos esse futuros.

G. HADDONI ORATIO THEOLOGICA, habita in regio collegio.

EX ingenijs hominum natis inuentis, & quomodò Paulus vocat, ex humana sapientia, difficilis transitus in scholã theologorum est. Cuius summam auctoritatem deus, fidẽ Apostoli, varietatẽ turba doctorum

rum effecit. Sed quoniam quidem ad hoc genus sermonis ingrediendum est, iam nos statim in viam demus, ut quò nostra necessariò pergit, eò celerrimè perueniat oratio. Verùm anteq̃ in medium descendimus certamen istarum rerum, quædam præmunienda nostræ sunt consequuturè disputationi, mea ne scientia, qualis sit, ignoretur. Est autē non mea, sed Pauli sententia, perscripta verbis apertissimis ad Romanos. Nulla igitur nunc est condemnatio his qui insiti sunt Christo Iesu, qui non iuxta carnē versantur, sed iuxta spiritum. Qui licet certus sermo sit, quoniam ex Paulo est, tamen euoluatur à nobis, ut propius aspici possit, & vehementius ad animos nostros affigi. Sūnam enim continet nostræ salutis, in quam maximis studijs omnes inquirere debent. Paulus autem, quoniam se ipse intellexit optimè, suam ipse doctrinam facillimè declarabit. Itaque Paulum adhibeamus ad Paulum, hoc est, cum spiritu sancto spiritū

E.3.

sanctum

sanctum iungamus. Hac enim ratione, cum-  
mulata veritas erit illustrior. Vt autem v-  
trunq̃ue possit intelligi, quàm nobis infœ-  
lix pater Adamus, infœlicē hereditatem  
reliquerit, & in quantam nos possessionem  
veræ gloriæ deus per dominum nostrum  
Iesum Christum miserit, illos primùm lo-  
cos consyderemus, qui statum vtriusq̃; cō-  
tinent nostri temporis, quales hi sunt ali-  
quot, ex infinitis Pauli. Omnes peccaue-  
rūt, & destituuntur gloria dei. Iustificantur  
autem gratis, per illius gratiā, per redemp-  
tionem, quæ est in Christo Iesu, quem pro-  
posuit deus reconciliatorem per fidem, in-  
terueniēte ipsius sanguine, ad ostensionem  
iustitiæ suæ, propter remissionem præteri-  
torum peccatorum, quæ deus tolerauit ad  
ostendendam iustitiam suam in præsentī, in  
hoc, vt ipse sit iustus, & iustificās eum, qui  
est ex fide Iesu. Cōferta sententia dei bene-  
ficijs est, & ordine procedit diuinæ sapien-  
tiæ. Primùm enim peccatum ostenditur,  
quemad-



quemadmodum ad omnes permanarit,  
tum huic communi naturæ nostræ vulnere,  
gratia, tanquā oleum saluberrimum, infū-  
ditur. Quod nos remediū, quia nec mune-  
ribus euocare, nec vlla cōparare reliqua fa-  
cultate nostra poteramus, gratis allatum ad  
nos per dominum nostrum Iesum Christū  
fuit, aduectus autē pretiosissimus thesau-  
rus est diuinæ clementiæ, pretiosissimo san-  
guine Iesu Christi, nec vlla comprehendi-  
tur alia parte nostrorum animorum, nisi fi-  
de, nos vt lautissimū redemptionis nostræ  
pretium, excellentissimo nuncio perlatū,  
diuinissima vi mētis nostræ susciperemus.  
Sequitur autē hæc omnia est, vt nobis pec-  
cata cōdonarentur, deus ostenderet quem-  
admodū & ipse iustus esset, iustosq; redde-  
ret omnes eos, quorū fides in sāguinem Ie-  
su Christi cōferretur. Sic & morbū ista sē-  
tentia videmus peccatū, & morbi remediū  
gratiā, authorem gratiæ deum, eiusdē ad-  
ministrū gratiæ Iesum Christum, mercedē  
porro

porrò gratiæ Iesu Christi sanguinem, huius verò mercedis finem, partim dei iustitiam, partim nostrorum veniã peccatorum. Auditis, quàm angustè Paulus vniuersas nostrę religionis opes referferit. Easde tamen stipat alijs in locis angustius, cuiusmodi ferè sunt isti. Deus excitauit Iesum dominum nostrum à mortuis, qui traditus fuit propter peccata nostra, excitatus est propter iustificationem nostri. Rursus. Nã si, cum inimici essemus, recõciliati fuimus deo per mortem filij eius, multò magis reconciliati seruabimur per vitam ipsius. Et iterum Paulus. Per vnum hominem peccatum in mundum introijt, & sic in omnes homines mors peruasit. At non vt peccatum, ita donum. Nam si vnus delicto multi mortui sunt, multò magis gratia dei, & donum per gratiam, quæ fuit vnus hominis Iesu Christi, in multos exuberauit. Addit etiam planius. Itaque sicut per vnus delictum propagatum est malum in omnes homines

homines ad condemnationem : ita & per  
vnius iustificationem, propagatur bonum  
in omnes homines, ad iustificationem vitæ.  
Quibus verbis, cum sublata sit omnis con-  
demnatio peccatorum, inducta verò, &  
constituta merito sanguinis Iesu Christi ve-  
nia : quid est, quod in hac causa dici possit  
apertius? Est equidem apertius certè nihil,  
sed amplius certè quidem aliquid. Nec e-  
nim satis est, vt sciamus, quomodo nos ipsi,  
cum peccatis euertissemus, erecti, perpur-  
gatiq; Iesu Christi sanguine fuerimus, nisi  
nos vt inferamur Iesu Christo, quātum in  
nobis est, prouiderimus, nisi perrexerimus  
in Pauli doctrina, non vt iuxta carnem ver-  
semur, sed iuxta spiritum. Nam quomodo  
Paulus idem interrogat, qui mortui sumus  
peccato, quomodo posthac viuemus in eo-  
dem? An ignoramus, quòd quicunq; bap-  
tizati sumus in Christum Iesum, in mortē  
eius baptizati sumus? Sepulti igitur sumus  
cum illo per baptismum in mortem, vt  
F. I. quem-



quemadmodum excitatus est Christus ex mortuis per gloriā patris, ita & nos in nouitate vitę ambulemus. Equissimū enim est, in quo Paulus progreditur, vt si mortui sumus cū Christo, credamus quòd & viuemus cum illo, scientes, quòd Christus excitatus à mortuis, non amplius moritur. Nā quòd mortuus fuit peccato, mortuus fuit semel, quòd autem viuit, viuit deo. Ita & nos reputemus nos ipsos mortuos quidem esse peccato, viuentes autem deo per Christum Iesum dominum nostrum. Nam si morte Christi contra terrores demonum, & infernorum nos munire velimus, morte Christi discenda etiam vitę innocentia est. Sanguinem enim cum abolendis impendit vitijs, tum renouandis virtutibus. Ex quo Pauli nata cōclusio est: nunc verò (inquit) manumissi à peccato, serui autem facti deo, habetis fructum vestrum, sanctificationē, finem autem, vitam æternam. Etenim authoramentū peccati mors, donum autem dei

dei vita æterna per Christū Iesum dominū  
nostri. Non igitur claudicemus in officio,  
sed exædificemus absolutā & perfectā no-  
strę religionis formam, cuius in eo summa  
est, ut sanguine Christi nos primū ad sa-  
lutem reuocatos, deindē puram ad vitam,  
& integros mores inuitatos esse sciamus,  
tum illa pugna nobis exorietur spiritus  
contra carnem, de qua Paulus comme-  
moratā se suscepta. Non enim quod volo  
hoc facio, sed quod odi, hoc ago. Porro, si  
quod non volo, ego hoc facio, non iam ego  
perpetro illud, sed inhabitans in me pecca-  
tum. Caro, & spiritus inter se perpetuò di-  
micant. Hanc nos dissensionē placare non  
possumus (insidet enim intimis implicata  
sensibus nostris) sed nostrę partes sunt a-  
uersandi carnem, è carneq; nos euoluendi,  
spiritū amplectendi, spiritusq; semper in  
studijs commorandi. Eijcere nos ex socie-  
tate carnis non possumus, sed abducenda  
mens quā longissimē, diuinarum rerum

cogitationibus ab ea est, vt si caro se vehementissimè commoueat, nullā tamen habeat animorum nostrorum assensionem. Ita cōmigrabimus in Pauli naturam, cuius de se talis est oratio: Delectat me lex dei secundum internum hominem, sed video aliam legem in membris meis rebellantem legi mentis meæ, & captiuum reddentem me legi peccati, quæ est in membris meis. Hanc nos intestinam seditionem spiritus, & carnis, ex natura nostra non possumus extrudere, nec enim Paulus potuit, odisse licet, imò indignari, imò execrari. Paulum enim audimus frementem his verbis: Miser ego homo, quis me eripiet ex hoc corpore morti obnoxio? Sed ita contra carnē exardescere debemus, vt datū nobis à deo spiritum sanctum meminerimus, qui quoniam mentem in officio suo continet, agnoscendum hoc dei beneficium est, yberri-  
mè gratiā suam aspergentis. His enim verbis Paulus se reuocat: Gratias ago deo per  
Iesum



Iesum Christum dominum nostrum. Itaq;  
idem ego, mente quidem, seruo legi dei,  
carne verò, legi peccati. Cum autem nos  
ipsi sic cōstituerimus, carnis vt tumultuan-  
tis minimam, spiritus ad deum inuitantis  
maximam rationē habere possimus: tum  
in medium peruenimus illum Pauli locū,  
quem ego feci proprium huius temporis,  
nulla vt nunc sit condemnatio his, qui insiti  
sunt Christo Iesu, qui non iuxta carnē ver-  
santur, sed iuxta spiritum. Attexuntur cau-  
sæ. Nam lex spiritus vitæ per Iesum Chri-  
stū, liberū me reddit à iure peccati, & mor-  
tis. Etenim quod lex præstare non poterat,  
ea parte, qua imbecillis erat per carnē, hoc  
deus, proprio filio misso sub specie carnis  
peccato obnoxia, præstitit, ac de peccato  
cōdēnauit peccatū per carnē, vt iustificatio  
legis impleretur in nobis, qui non secundū  
carnem versamur, sed secundum spiritum.  
His verbis sciri potest, totum spiritus ne-  
gotium esse, qui cum influit ad reliquam a-

nimorum pietatem, carnis stimulos elidit,  
& nos iungit deo. Nam Pauli consequen-  
te sententia, si Christus in nobis est, cor-  
pus quidem mortuum est propter pecca-  
tum, spiritus autem vita est propter iusti-  
ficationē. Is autē spiritus cū in animis se no-  
stris effert, testimoniū spiritui nostro dat,  
quòd simus filij dei. Paulus autem argumē-  
tatur, nos, si filij dei simus, eodem modo  
hæredes esse, hæredes quidem dei, cohære-  
des autem Christi. Quem ad locum omni  
dignitate præstantem, cum semel ascende-  
rimus, tum reliquum Pauli cursum facilli-  
mè tenebimus, & colligemus, quòd deus,  
quos prædefinierit, eosdē vocarit, & quos  
vocarit, eos iustificarit, quos iustificarit, hos  
& glorificarit, tum & illis Pauli interroga-  
tionibus nos ipsi venditabimus, qui pro  
prio filio non pepercit, sed pro nobis om-  
nibus tradidit illum, quā fieri potest, vt non  
cum eodem omnia nobis donet? Quis in-  
tētabit crimina aduersus electos dei? Deus  
est

est qui iustificat, quis ille qui condemnet?  
Christus est qui mortuus est, imò qui susci-  
tatus est, qui etiam est ad dextram dei, qui  
& intercedit pro nobis. Christus igitur, cū  
nostra causa mortuus fuerit, & se ipse susci-  
tauerit: qui moriuntur cum illo, cum illo  
confurgent, & vt Pauli verbis concludam,  
siquidem cum illo patimur, cum illo glo-  
rificabimur. Exposui primam Pauli sentē-  
tiā, perpetuo contextu Pauli sententiarū, in  
quo nihil præter studium veritatis sequutus  
sum. Nunc eodē instituto secundā breui-  
simè complectar. Neque volentis est, neq;  
currentis, inquit Paulus, sed misereantis dei.  
Quem multi durū sermonē, & iniquum,  
ego mollem & humanissimum esse iudico.  
Spoliare nos electione videtur, & iudicio.  
Non est ita. Sed eò refert omnia, quò refe-  
renda sunt, & vndè nos vniuersas sumi-  
mus opes totius nostræ facultatis. Detrahit  
nobis inuentorum nostrorum laudem, &  
actionum, imò dei verū robur, & infinitā  
ostendit



ostendit potentiam, qua, sicut Paulus ait, viuis, & mortuis dominatur. Quare non tantū nobis ipsi tribuamus, vt decedere nobis credamus, quod ad deum accedit, vt imminutam in eo nostram gloriā existimemus, in quo dei dilatatur honor. Frangamus hos spiritus, sedemus hanc arrogantiam, huiusmodi cohibeamus animorum elationem, confiteamur cum Paulo de nobismet ipsis, quod creaturæ sumus vanitati subiecte, non volentes, sed propter eum, qui subiecit nos sub spe. Quæ sententia patefactum est, non solū quomodo vani sumus, & nulla nostra voluntas est: sed etiam quemadmodū spe nos consolari debemus misericordiæ dei. Quæ spes, si firmè nostris sensibus comprehensa fuerit, consequetur in nobis, quod in epistola Pauli sequitur, spiritus auxiliabitur infirmitatibus nostris. Siquidē hoc ipsū, quid oraturi simus, vt oportet, non nouimus, verū ipse spiritus intercedit pro nobis, gemitibus inenarrabilibus. Ecce nobis

ex Paulo nostras vires, fari ipsi rectè non possumus, nisi ora nostra deus diducat. Ecce voluntatē, ecce cursū. In quo prophetæ clamor etiam est: A, a, a, puer ego sum, & nescio loqui. Verba si nostra non sunt, quomodo nostras esse res dicemus? & si in sermone spiritus nos erudit, voluntatem multò magis, & cursum ab eo adiuuari necesse est. Adiuuat autem, & vchemētèr, sed quomodo Paulus his verbis explicat: Sciamus autē quòd hijs qui diligunt deū, omnia simul adiuumenta sunt in bonum, nimirū his qui iuxta propositum vocati sunt. Cuius vocationis exempla primū, deindè rationem à Paulo discite. Et primū quidem Paulus ipse sumatur, deindè, etsi poterant alij plurimi, tamen his contenti sumus, quibus ille vsus est. Paulus igitur cum esset voluntate teterrima, cursu ferretur ad omnē impietatem incitatissimo, tamen iniectis à deo frænis coercitus est, & obtorto collo pertractus ad veram dei religionem, & vt

nihil in eo præter dei decretum inesse videremus, vas electionis appellatus est. In hoc igitur pretiosissimo vase, quod deus selegit, nos ipsi collocemus, & eius cum exemplo, tum doctrina videamus, quantum nobis emetiendum sit, quantumque deo reservare debeamus. Is igitur, hac in re, sic concionari pergit. Non omnes qui sunt ex Israel, sūt Israel, neq; qui sunt semen Abrahami, statim omnes filij: sed per Isaacū nominabitur tibi semen, hoc est, non qui filij carnis, hi filij dei, Sed qui sunt filij promissionis, recensentur in semen. Tumultuemur quantum volumus, imò quantum possumus, imò quantum volumus posse videri, voluntates intēdamus, & cursus. Non quia semen Abrahami sumus, salutem eò consequemur. Nisi ad Isaacū aggregati fuerimus, dei beneficijs excidimus. Sed plura licet, & apertiora eiusdem generis. Non dum enim natis pueris, cum neque boni quippiam fecissent, neque mali, vt secundum electionem

propo-



propositum dei maneret, non ex operibus, sed ex vocante dictum est illi, maior seruiet minori. Nouum, & plenum admiratione iudicium dei, fateor. Sed quoniā dei iudiciū est, & verum est, & in eo debemus acquiescere, præsertim cum vox adiuncta sit, ore missa dei ad Mosen: Miserabor cuiuscunq; misereor, & cōmiserabor quēcunq; cōmiseror. Tandem igitur abeamus ipsi à nobis, si non Pauli, saltē authoritate dei verborum. Non enim est volentis, neque currentis, sed miserentis dei, quemadmodum deus de se ipse testificatus est. Ita q; coram deo procumbamus, vt nos, quoniam quidē omnes illius vasa sumus, velit misericordiæ suæ vasa potius, & honoris esse, quàm indignationis, & contumeliæ. Nostrum enim, præter spem, nihil est, quanq̃ nec ea aliqua est, nisi cum ex misereunte deo est. Nā verissimè Paulus: Quod quærit Israel, hoc non assequutus est, sed electio consequuta est. Reliqui verò excæcati sūt, quemadmo-

dum scriptum est: Dedit eis deus spiritum  
conpunctionis, oculos, vt non videant, &  
aures, vt non audiant vsque ad hodiernum  
diem. Israel, peculiaris dei populus, non as-  
sequutus est quod quærebat, sed electio vi-  
guit: ita nos frustra quærimus præter ele-  
ctos, reliqui enim excæcamur, quanq̃ nisi  
misericordie deo, ne quærere quidem possu-  
mus. Omnibus enim sensibus, vt audistis,  
cōstricti tenemur. Deus igitur dignetur a-  
perire oculos nostros, qui solus aperit librū,  
& nemo claudit, claudit & nemo aperit.  
Conclusit enim deus omnes homines sub  
incredulitatem, vt omnium miseretur.  
Quod deus cur ea ratione fecerit, exquire-  
re non debemus, admirari possumus, & ex-  
clamare cum Paulo: O profunditatem di-  
uitiarum, & sapientiæ, & cognitionis dei.  
Quàm inscrutabilia sunt iudicia eius, & im-  
peruestigabiles viæ eius? Quis enim cog-  
nouit mentē domini, aut quis illi fuit à con-  
silijs? Aut quis prior dedit illi, & reddetur  
ei?

ei? quoniam ex illo, & per illum, & in illū  
omnia. Ex deo omnia, nihil igitur ex nobis,  
per illum omnia, per nos autē nihil, in illum  
omnia, in nos verò nihil. Neque enim qui  
plantat est aliquid, neque qui rigat, sed qui  
dat incrementum deus. Plantatione, rigati-  
one, voluntates, & cursus intelliguntur no-  
stri, quæ apud Paulū nullo in numero sunt.  
Ex quo etiam illud est: diuisiones donorū  
sunt, sed idem spiritus, & diuisiones mini-  
steriorū sunt, & idem deus, & diuisiones o-  
perationum sunt, sed idem est deus efficiēs  
omnia in omnibus. Agnoscamus igitur  
nostram imbecillitatem, & editas in natura  
nostra ruinas, acclinemus nos ad deum, &  
cum Paulo dicamus: Gratia dei sumus,  
quod sumus. Nam vt in eodē est, non ido-  
nei sumus ex nobis ipsis, cogitare quicq̃,  
tanquam ex nobis ipsis: sed si ad aliquid i-  
donei sumus, id ex deo est. Eant igitur qui  
voluntates, & cursus, & multa sibi tribuunt  
sua: velint, & currāt suo periculo, mihi mi-



nimè curioso homini, dei sermo satisfacit,  
& Pauli. Imò nos omnes optimum est, vt  
ferociam animorum nostrorum contun-  
damus, & si nihil à nobis rectè cogitari pos-  
se, sententia Pauli didicimus, multò minus  
fieri credamus aliquid nostris viribus, in  
quo quicquam insit boni. Teneamus Euā-  
gelij certissimam doctrinam, quòd omnia  
cum sūma fecerimus, inutiles serui simus,  
& nostris non possumus etiam excellētissi-  
mis factis consistere. Consyderemus Da-  
uidis animum, non vnus è multis, sed inter  
omnes singularis viri, de quo cum sacra  
scriptura commemoret, quòd rex, & pro-  
pheta fuerit, & eximia quadam dei gratia  
maximas ad res assumptus: tamen repudia-  
ta, proiectaque suæ facultatis, & opum vni-  
uersa fiducia, vehementissimè dei miseri-  
cordiā expetiuit, & verbis amplissimis eam  
prosequutus est, quomodo nos etiam face-  
re debemus, vt prophetæ diuinissimi diui-  
nissimum sensum, & orationē retineamus.

Nam

Nam si Dauidis non erat volentis, aut currentis, sed miserentis dei (quemadmodum ipse de se testis est) nos, cū in illo, quod magnum erat, satis non esset, id cum minimum in nobis sit, nihil esse credamus. Itaque deus misereatur nostri, non nostri nos, & benedicat nobis, quoniam vox eius fuit ad Abrahamum: Benedicentur in semine tuo omnes gentes. Illuminet vultum suum super nos. Illos enim ipsi non possumus ad deum tollere squalidos, & obscuros, nisi donū hoc perfectum, vt dicitur, à patre luminum descendat, & non ipsi proficiamus, sed deus misereatur nostri, vt cognoscamus in terra viam, non nostram, sed tuam, & in omnibus gentibus salutare, non nostrum, sed tuū. Dei viæ sunt, dei salutes, dei cognitio, dei voluntas, & cursus. Et cum dei sint, confiteantur, non de se quicq̃, sed confiteantur tibi populi deus, confiteantur tibi populi omnes. Omnes enim, Pauli doctrina, deus conclusit sub peccato, vt omnium misereretur.

retur. Quare lætentur, & exultent gentes, non vllis suis, sed summis, & infinitis dei beneficijs, quoniam nostræ nullæ sunt, nisi parendi partes: tu, ô deus, iudicas populos æquitate, & gentes in ea dirigis. Quod quia veritas fert, & certissimū est: vehementer, & iterum atque iterum confiteantur tibi populi deus, confiteātur tibi populi omnes, terra dedit fructum suum. Terra culta quidem, arata, confita, rigata nostris operis, sed neque qui plantat est aliquid, neque qui rigat, sed solus qui dat incrementum deus. Benedicat igitur nos deus, & quidem deus noster, hoc est, qui potentiam illius, & opes agnoscimus: benedicat nos, nō iam nostros, sed dei deus, & metuant eum omnes fines terræ. Non metuimus eos, qui corpora lædunt, sed metuamus eum, hoc est, deum, cuius vis solius verbi, & voluntatis, ea est, ut animā possit ad inferos trudere. De cuius dictum est multiplici cursu, & infinito: si ascendero ad cœlum tu ibi es, & si descendero



dero ad infernum, ades, & de manu tua nemo potest eruere. Nos igitur ad dei voluntatē, & nutum nostra referamus, quanquā non nostra, sed dei cūcta præsidia corporis, & animæ, qui sic nostri misertus est, vt filium suum vnigenitum daret pro nobis, in quo, salus erit omni credenti, per dominum nostrum Iesum Christum. Amen.

G. HADDONI ORATIO, QVAM

habuit, cum Cantabrigiæ legum interpretationem ordiretur.

CAius in iuris disciplina perfectus vir. ff. de orig. Iu. Ci. li. j. viam, & aditum quasi quendam præfationis, adiungendum in explicatione legum esse censet. Quem tamen ita sumi vult, vt non alienā, & otiosam particulam attexuisse, sed mēbrum quoddam naturale, & suum inseruisse videamur. Homo nimirum acutus, & multum prudens, iuris scientiam, maximam vnā ex omnibus, & amplissimā, ornamento legitimo, & concesso denudari vult, & tamen hoc ip-

H. i.

sum

sum quod adhiberetur, tam aptum ex legibus, & cum illarum institutis cohærens esse voluit, vt multum ex eo reliquis interioribus legum rationibus præmuniretur. Cuius ego præstantissimi doctoris, si tam facultatem possim assequi, quam sequi sententiã cupio, non solum illius in hoc tempore sermonem, sed multo magis intelligentiam vobis repræsentarem, & perficerem, auditores, vt qua ex re singularis ad vos delectatio perueniret, ex eadem fructus vberissimos caperetis. Vos enim profecto, vos estis, quorum ego literis, & ingenijs omnia deberi summa semper existimaui, vos estis quorum in oculis, & auribus semper habitauimus, vos estis à fortuna, vel potius à deo mecum in omni consuetudinis ratione coniuncti. Quorum nisi morum suauitatem amplexus fuisset, iudiciorum æquitatem appendissem, vniuersam conuictus formã adamassem, non me tam facile quisquam à vobis digredientem, quasi pilam retorisset.

Euocauit

Euocauit aliena me cupiditas, mea me voluntas reuocauit. Discedens aliorū auctoritatem sequutus sum, rediens aliorum sententias ad animum meum inflexi. Profectus sum inuitus, & penè meipsum fugiens: ita cupidè recurri, studium vt in eo meum facile cerneretur. Nunc autem renouatam, & varietate meorum temporum multiplicatam superiorem ad vos deferens meam beneuolentiam, rursus ad vos influens, rursus in cōmunibus his sedibus nostris apparens, recentem quandam, & eximiam deponco vestram charitatem, & gratiam, & simul petitionem ad vos adfero, plenissimā (quomodo mihi videtur) equitatis, & officij. Talis autem est, vt, quem non auersati estis rhetorem, non repudiastis philosophū, nec adolescentem spreuistis, eundem, Haddonum vestrum, cognoscatis virum, & iurisconsultum, non sanè satis absolutū, imò fortassè vix inchoatum quidem, cupiditate tamen incensum, & vt arbitror, non



reprehendēda, docendi illos, qui volūt discere, & discendi ex illis, qui docere possunt. Quæ qualis vniuersa sit hac in re mea ratio, vobis vt videri possit, exponam vobis qua via peruenerim in hanc iuris scientiam, quemadmodum in ea me collocarim, qua ex parte, & quomodo me vobis in hoc genere sum ostēsurus. Quod dum breuissimè percurro, diligenter (vt soletis) quæso ad me attendite. Ego cum in hac sentētia perpetuò mansissem, quam vel natura puer arripueram, vel adolescens aliorum libris, & exemplis collegeram, tantum vt in literis processisse viderer, quantum vobis optimis probare possem, & eruditissimis viris: has scholas quasi ludum, vestras aures, & oculos mihi magistros esse putavi. Quare non magnis sanè, nec maturis temporibus meis, maximè fuerunt, & laboriosissimè cōmentationes meæ: quas ego licet contemnebā, (vt sanè contemnendæ fuerunt) vestrorum tamen fauore iudiciorū ita sustentabantur,

vt earum me poenitere non debeat. Itaque creuit vestris studijs occupatio mea, nec in eo me defatigari passus sum, in quo vos tam alacres esse videbam. Cum autem aliquot iam annos in hoc literarum foro contererer, & in hisce vestris disputationum curriculis volitarem, & tantum in eo consensum vestrum commouissem, quantum non doctrina mea postulabat, quæ perexigua fuit, & adhuc est, sed quantum humanitas vestra dabat, quam semper summam fuisse recorder: subito tranauit huc ad vos, incredibili bonorum omnium lætitia, doctorum infinitis plausibus, sempiterno & immortali academici commodo, communis noster excellentissimus præceptor D. Smithus, quæ ego virum honoris causa nomino, & hæc academia dum erit, natum fuisse lætabitur. Ita enim in ea vixit, huiusmodi gessit, tanto ingenio, tam exquisitis literis, tanta grauitate, & sapientia per omnes eius partes peragrauit, vt adhuc academia stet, plurimis eius,

& diuinissimis institutis. Hunc ego virum propter literas admirabar, propter mores diligebam, propter grauitatem reuerabar, propter sapientiã venerabar, & quoniam in vno thesauro tot ornamẽta cõcurrissent, quot in regione sepẽ integra vix sparsim reperiuntur, quasi numen quoddã illũ considerabam, euẽturum fore sperans, quod etiam euenit, vt illum si diligentẽr obseruarem, non nihil mihi de suo ingenio, & scientia aspergeret. Itaque cum ad illum ventitarem, cum alia mecum multa, tum illud in primis, ius vt ciuile vellem agnoscere, præclarissimam esse scientiam, confertam philosophia, non expertem eloquentiæ, cõseruatricem reip. permanentẽ per omnia, iustitiæ matrem, alumnam æquitatis, dignã principibus, dignam regibus. Intrauit in animum meũ facilẽ sermo tam præstantis viri, cuius ego tantam authoritatem orationis esse putabam, vt singula verba, singula testimonia esse putarem. Ex illo tempore,  
nun-



nunquam ego quidem iurisconsultus, sed  
nec vnquā alienus à iuris studio fui. Nam  
& ille meus me præceptor, quasi sol, institu-  
tionum suarū luminibus non nihil colora-  
bat, & mecum ipse in vmbra cum eram ali-  
quando, sic erā, vt Scipionis Africani exē-  
plo solus non essem, cum esse viderer maxi-  
mè. In quo mihi laudem nullā assumo, re-  
prehensionē, & insectationē illorum repel-  
lo, qui nulla cogitatione, nullo studio, me  
tanquam somno excitatum, ad leges expli-  
candas clamant obrepere. Qui si me paulò  
noissent propius, & interiorē meam cō-  
mentandī rationem, aut æquiores in hoc  
genere forent, aut iniquiores essent in reli-  
quarum disciplinarum scientia, quam ego  
sanè nullam, alij, atque adeo hi ipsi certè  
quidē, aliquam in me esse iudicant. Nam si  
librorum euolutio, scriptura frequēs, con-  
tinuæ assensiones, authorum inter se cōpa-  
ratio, sententiarū de omnibus rebus omni-  
um percurfiones, sic in se doctrinæ laudem  
conti-

continēt, vt ab his qui absit, eam amittat, tacendū mihi, atq; abeundum est auditores. Quis enim ego sum? aut quid in me horū, ō dij boni, aliquādo fuit, aut esse potest? Equidem attendor à vobis nonnunquam vt orator, interdū tanquam philosophus, nec vlla est alia disciplina, de qua nō aliqua vox à me missa sit, & tamen solus Cicero sumebatur ad omnia, nec is subtiliter inspectus, sed animaduersus leuissimè. Quod non dico, latebram vt ignauiae quæram, vel meæ, vel aliorum: sed vt ista vel nihil esse sciatis, quæ in me aliqua putantur, vel illa si sunt aliqua, legum in me scientiam desperari non debere. Nec aliorum vigilias reprehendo, meum ocium indicans, nec meum huiusmodi ocium pono, quod sine negotio sit, aut esse sanè possit. Abdi in angulū, raptari per infinitam librorum vim, exorbere continuis multorum dierum lucubrationibus immodicam voluminum immensitatē, ingurgitare se in cupiditatem inexplabilem

bilem omnia perquirendi, quæ in quaque re  
occurrere possunt: hæc omnia præclaræ cu-  
iusdam diligentia sunt, & curiosæ assidui-  
tatis, quam laudare fortasse omnes debent,  
sequi certè omnes non possunt. Ego medi-  
ocri contentus sum illarum animaduersio-  
ne, quas in quaque re necessarias esse reor,  
& malo aliquid salutis seruiens nescire vide-  
ri, quàm dum omnes vndique minutias cõ-  
sector, valetudinẽ, & vitam in illis ponere.  
Cuius authorem sententiæ habeo Cicero-  
nẽ ipsum, & Ciceronis discipulum excel-  
lentem, Longolium. Sed id hoc tempore  
non ago, studiorum vt rationem meorum  
exponam, quæ nulla in me, præclarissima  
in plerisq; vestrum est, & vt diu sit exopto.  
Quapropter ad ius civile pergamus, ad  
quod quo modo deductus fuerim, quoniã  
accepistis, nũc vt in vestro leges conspectu  
constituam, intelligite. Quem locum vtinã  
silentio præteruehiliceret, facerem libentẽ  
quod Cicero poetas Romanos factitare di-  
cebat,



cebat, ut si quod perfusū reip. moerore tēpus illis occurreret, id ne attingerent. Exhorresco certē memoriam huius pub. calamitatis acadamiæ nostrę. Nunquam huiusmodi tenebrę studijs inductę sunt, nunquam plaga, tam vehemēs, omnibus disciplinis inuecta est. Checum antea videramus, socium in omni laudis genere Smithi nostri, à nobis ad aulam euocatum. Quę suspiria? qui gemitus? facilē principem ut in omni scientia virum amisisse videremur, etsi minimē sanē nos illum amissimus, qui, tanquam adhuc nobiscum esset, causis omnibus nostris inseruit, & vniuersam facultatis, & gratiæ suę vim cōmoditatibus nostris impertit. Is vir cū à nobis dimotus esset, & ad Smithum nostra resp. se quasi firmissimū quendam murū acclinasset, illi se cōmodaret, in illum incumberet, subito, quasi tempestate quadā, & is à nobis ablatusest, & ad illam dignitatem sublatus, quā nostris rebus valdē opportunā sentiemus, atque

atque adeò sentimus. Sed tamen pectus illud sapientia plenum, & literis, ex quo, tanquam oraculo, responsa iuris, & æquitatis dabantur, illa fortis & oratoria vox ad omnes studiorum nostrorum partes usque resonans, illi spiritus, ardor, motus, illa denique; omnis vndique; perfecta virtus, quæ vlla cogitatione informari potest, longius ab oculis & auribus nostris peregrinatur, quàm voluntates, & etiam necessitates nostræ ferunt. Divinus enim ille profectò vir, atque; adeò deus, ore, literis & consilio fuit, & quibus alij rebus singulis censebantur, in illis eius ingenium vniuersis elaborauerat. Quis ex nostris hominibus eloquentia præstabat? Equidem Checus dum aderat, potuit addubitari, quoniam illos, quasi Crassum, & Antonium, semper in omnium laudum societatem includebã. Sed altero sublato, dubitatio omnis, mea quidem sententia, sublata est. Quis perfectus in philosophia? Smithus. Quis in Mathematicis? Smithus.

Quis in iure civili? Smithus. Itaque Smithus cum nominabatur, non hominem, sed omnis quasi concursus quendam humanitatis, & artium citabamus. Quapropter latior fuit hæc plaga, quam rebamur, longius repit, atque adeo intima reip. nostræ viscera cruciat. In alijs interdum aliquid, in multis multa decedebant, Smithus secum abstulit omnia. De cuius viri maximis, & infinitis ornamentis quoties cogito, vereor ne in patriam dicam impiè, quod in studia nostra dicam piè. Dicendum tamen est. Vtinam te deus, o præceptor, nobiscum aliquandiu colligauisset, consitum fuisset inter nos civile ius, herbescere breui cæpisset, ac euirescere. Reliquis purgationibus vteremur, & facilioribus scientijs, florentiorem omnibus modis academiam haberemus. Sed quoniam ille recto cursu contendit ad gloriam, dignitatem, & communem omnium salutem, eum sinamus, ita ut est, & ad id nos demus, ut si non parem, quam vix optare ausim,



ausim, tamen eximiam, & aliorum expectatione dignam virtutem, & doctrinam, in communes has sedes proferamus, ut minimè oblitivideamur tam præclari viri, qualem utinam alium ætas nostra nobis posset ostendere. Crassus, & Antonius euolarunt, non solum suis, sed etiam maiorum suorum temporibus præstantes. Succrescunt inter nos Cicerones, Hortensij, Cæsares etiam, Sulpitij, Catuli, Scæuolæ. Decedens Smitthus me vobis discipulum commendauit, minimè certè Seruium, imò ne scribā quidem Flauium, quem tamen ille aliquo in numero esse putaret, & vestra in eo se iudicia sequi crederet. Quapropter adsum ad fontes iuris patefaciendos, ad reserandas legum venas, ad constituendam controuersarum formularum varietatem. Adsum non ille vetus Ciceronis, sed quidam nouus Iustiniani alumnus. Adsum non cupiditate profitendi, quod non didici, sed verecundia negādi, quod à me flagitabatur. Ad-

sum non præceptor vobis datus, sed discipulus inter vos Smithi collocatus. Adsum non electus vnus ex omnibus, qui optimè possem, sed relictus vnus ex omnibus, qui non nollem in hac doctrina, cursum, quem possim, tenere. Deniq; adsum præsentifacultate minima, spe & præparatione maxima, studio penè nullo, voluntate planè eximia. Quæ si qui ex vobis ad se accommodari velint, meam vobis operam, diligentiam, & assiduitatē defero. Qui recusant, si id contemptu faciunt, nimis seipso amant, si odio, me non satis, si tædio, valdè lauti sunt, si pertinacia, nimium sunt rustici, si ocio, cessatores, si negotio, turbulenti, illos excipio præstanti doctrina viros, & grauissimis occupationibus implicatos, quibus non dare me, sed ab illis veniam accipere conuenit. Nunc, quoniam demonstratum est, quæ me causa iureconsultum effecerit, & quidem huius iureconsultum temporis, & loci (liceat enim in doctrina rudi, nomen usurpare

pare sciētiæ) tertium est, & extremū, vt viā,  
& iter meorū inuentorum vobis proponā,  
quibus per legum æstus & fluctus cum ipse  
tranare constitui, tum alios traducere, qui  
mecum vela dare cogitant. Quod autem  
sapientissimus poeta nautis præcepit in dif-  
ficili, scopulosoq; mari iactatis, vt sub litto-  
ra se colligerent, & nauem remis leuiter  
propellerent, ne si nimium concitato cur-  
su ferrentur, allisi ad saxa seipsi euerterent:  
idem nobis capiendum est consilium, in his  
efferuescentibus legum fretis, vt per insti-  
tutiones, quasi littora, tranquillo cursu per-  
reptemus, ne cæca quadam, & præcipiti te-  
meritate elati, tumultuantium inter se de-  
cretorum, & constitutionum, veluti fluctu-  
um, vi, & impetu obruamur. Nec consilij  
nos huius pudere debet. Regium enim, &  
plus quam regium est, Iustiniano nimirum  
ipso imperatore profectū, & repetitum ab  
eodem, vt planè ita sentire videatur. Nam  
Inst. de iustitia & iu. . . His igitur generali-  
tèr



tèr cognitis, hæc sententia ponitur, & Iustinianus ad. ff. præfatus, eandem iterat. Accurtius in ea tam vehemēs, & copiosus est, vt eodem modo perfectū ius, institutionū quatuor libris, esse credat, quo rerum natura, quatuor elementorum cōcursu, deuincitur. Et tam mirificus in hac re iureconsultorum consensus fuit, vt quorum sūma celebritas nominis, & scientiæ putatur, illorum scriptis maximè frequentatam omnem institutionum iuris rationem esse videamus. Itaque Märtianus sexdecem voluminibus hunc locum patefecit. Vlpianus eūdem duobus astrinxit. Paulus & suos ad idem argumentum duos attulit. Caius pro se tres adiecit. De quibus libans omnibus, has Iustinianus institutiones perpoliuit, ex ipsis legum visceribus repetitas, præclarissimis deriuatas fontibus principū iurecōsultorum, & ex ipsis luminibus fusas, excellentissimorū in iuris disciplina monumentorū. Duces antè vobis nominabā huius doctrinæ,

na, qui cum omnes post se libros instituti-  
onum reliquerint: quale nostrum hoc opus  
esse par est, coagmentatum, & exedifica-  
tum illis præceptionibus, & formulis, quas  
ex optimis authoribus lectissimas, acutissi-  
mi viri putauerunt. Equidem propter ex-  
quisitam elegantiam, introitum aptissimū,  
& quasi vestibulum iuris, has institutiones  
appellare licet, propter firmitatem & ro-  
bur, arcem munitissimam, propter com-  
moditatem, speculam, propter amplitudinē  
& latas vias, regionem & regnum, in quo  
leges, omnem explicant, omnibus modis,  
vim, & potestatem suam. Nam cum infi-  
nita legum varietas, collecta longissimis  
plurimorum scriptorum libris, in recentio-  
rem imperatorum aetatem sic inundauisset,  
ut equitas multitudine potius obruta, quam  
illuminata perspicuitate constitutionum  
esse videretur: Iustinianus adhibitis exqui-  
sitissima scientia viris, licentiosè errantes, &  
tanquam extra ripas affluentes, legum tu-

multuantes turbas, certo quodam ordinis,  
& collocationis vallo circumsepiuit, & om-  
nia superioris ætatis inuentorum, tanquam  
examina, prius per fūdos alienos obuolitā-  
tia, hisce suis aluearijs inclusit, quo modo  
certam ipse sibi possessionem eorum effe-  
cit, & eandem nobis reliquit certissimam.  
Itaque mentes nostras valdè propè ad harū  
institutionum cōsyderationem admouea-  
mus. Corpus enim quoddam modicum  
sunt, ex omnis ætatis immani legū vniuer-  
sitate confectum. Crassus apud Cicero-  
nem, duodecim tabulas non dubitat omni-  
bus bibliothecis antepondere. Nos igitur  
hunc thesaurum, omnibus legum lumini-  
bus abundantissimū, nec duodecim arcta-  
tum, sed multis tabularum millibus collo-  
cupletatum, quantam in se præstantiam ha-  
bere iudicabimus? Frequentatur omnium  
studijs ille Ciceronis planè aureolus liber  
de officijs, at quotam quæso philosophiæ  
præceptor, an partem comprehendens? E-  
picuri



picuri <sup>μυρία δόξα</sup>, Epicurea natio sillabatim edidicerat. Quem tamen librum Cicero vult abijci. Platonis leges ad nouam reip. formam accommodatas, & ipsas etiam admirabiles, quanto ardore studiorū persequimur? Noster autem iste Cicero, rationem officiorum optimam, & excellentissimam afferens, noster iste, non Epicurus, sed veræ foelicitatis in hac vita perfectissimus institutor, & author, noster iste diuinus Plato, non de peregrina quadam coniectans, sed eas, quæ esse possint, & sūt, saluberrimis institutis fundans, quantos in animis nostris motus excitare debet? Equidē has ad vos institutiones mecum afferens, eloquentiam afferō nonnullā, permultum philosophiæ, tantum de iure ciuili, quantum, varietatē omnium iudiciorum, delectatione maxima complere potest. Nam philosophiæ fontibus, qui totum ciuile ius irrigari negant, aut non vident: neque philosophi ipsi, neque iureconsulti sunt, aut si sunt ad-

modum dissimulant. Et qui facundiam in hoc libro desyderant, curiosius id faciunt quàm est necesse, & iuris ciuilis scientiam, qui consecretantur, si populares amant & faciles locos, hi multi, & sanè plurimi hîc occurrent, si luctari libet cum difficultatibus, spinas reperiēt, in quibus subtilitas quanta libet adhibere potest, si ad prisca, & vetera respectare volunt, hîc ortus, & incunabula licet ipsa videre, si recentiora, & propiora temporibus suis, huiusmodi huc multa influxisse animaduertent. Quodrum sanè omnium exempla, facillimum esset ex ipsis institutionibus apponere, sed longum id esset, fietq; melius, cum in res ipsas interpretatio qualiscunq; nostra incurrenit, quam ordiri volumus potissimum ex his libris, vt aliquam, omnes qui vellēt, audiendi causam haberent. Etenim qui noui veniunt ad hanc iuris disciplinam, hîc legum fundamenta cognoscent, quorum in hac doctrina studium inueterauit, & quātis in hoc lo-

co rationes agnoscant, neque quisquam sit tam paruo, & angusto animo, ut hæc nimis altè supra se collocata esse putet, neque tanto fastu, & tam confidenti arrogantiâ, ut hæc nimium subter se subiecta esse credat. Omnis ætas, omnis indoles, hîc inueniet, vel quod addiscat, vel quod recordetur, vel quod expetat. De quo mihi testificandum fuit, propter antegressum in his libris eximium mei præceptoris laborem, quo, licet multos erudierit, tamē præteritus est à pluribus; & si cunctos informauisset, tamen iterari & inculcari indidem, ex quibus tam multiplex fructus exoritur, permagni refert. Neque vero librum sumens eundem, me cum præceptore comparo, quem planè sentio esse incomparabilem, sed exceptas ab illo voces, & sententias (quantū quidem id facere possum) mihi ipse infigā, & vobis ut infigi possint, providebo. Nam cum alia multa diuinitus, tum hoc etiam inprimis, & quidem suum, Smithus secum attulit,

K.3.



tulit, legum vt ipsarum sententias peruo-  
lueret, de turba commentatorum, & com-  
mentariorum minueret, non quòd inter-  
pretes iuris nō perrimatus fuisset (per om-  
nia enim illius acumen peragrauerat) sed  
quòd maiestātē, & numen quoddam iuris  
sibi ex se esse existimaret. Quā ego sentētiā,  
non desidia sequi, sed iudicio probare vide-  
or, ratione stabilitam, & exemplis, & impe-  
ratoris etiam edicto munitam. Etenim or-  
tus, & fontes scientiarum, priscis maiorum  
suorū temporibus, purissimē fluxerunt, sed  
inquinati coeno consequutorū temporū lo-  
quacitatis, & inscitiae, succū & saporē ami-  
serunt omnem proprium, & suū, ac in for-  
didissimas lacunas degenerauerunt. Sic e-  
loquentiae verus gustus, importunorum, &  
assiduorum clamatorum ineptijs obsole-  
uit. Sic dialecticam, sic philosophiam, sic re-  
liquas penē omnes sciētias, pruritibus quidā,  
& scabies audacis inscitiae infecit, sic excel-  
lentissimum hoc studium iuris ciuilis, quod  
since-

sincerissimum esse debuit, & quondam sane fuit, nunc contaminatum & oblitum est peregrinitate verborum & rerum, ut Iustinianus ipse si reuiuisceret, nouum incendium inter hos iuris perturbatores excitaturus sit. Quod genus, à legum contrectatione, quemadmodum, & quanto perè sumouendum sit, ipse pro me Iustinianus dicit, cuius edictum. ff. ad senatum, & omnes po. his verbis, & hac præscriptione est. **HOC** autem, quod & ab initio nobis visum est, cum hoc opus fieri deo adnuente mandabamus: tempestiuum nobis videtur & in præsentì sancire: ut nemo neque eorum, qui in præsentì iuris peritiam habent, neque qui postea fierent, audeat commentarios hisdem legibus adnectere, nisi tantum si velit eas in Græcam vocem transformare sub eodem ordine, eaque consequentia, sub qua & voce Romanæ positæ sunt, hoc quod Græci *κατὰ τὸν αὐτὸν* dicunt, & si qui forsitan per titulorum subtilitatē adnotare maluerint, & ea

tulit, legum vt ipsarum sententias peruolueret, de turba commentatorum, & commentariorum minueret, non quòd interpretes iuris nò perrimatus fuisset (per omnia enim illius acumen peragrauerat) sed quòd maiestatem, & numen quoddam iuris sibi ex se esse existimaret. Quã ego sententiã, non desidia sequi, sed iudicio probare videor, ratione stabilitam, & exemplis, & imperatoris etiam edicto munitam. Etenim ortus, & fontes scientiarum, priscis maiorum suorum temporibus, purissimè fluxerunt, sed inquinati coeno consequutorum temporum loquacitatis, & inscitiae, succum & saporem amiserunt omnem proprium, & suum, ac in fordidissimas lacunas degenerauerunt. Sic eloquentiae verus gustus, importunorum, & assiduorum clamatorum ineptijs obsoleuit. Sic dialecticam, sic philosophiam, sic reliquas penè omnes scientias, pruritus quidam, & scabies audacis inscitiae infecit, sic excellentissimum hoc studium iuris ciuile, quod

since-



sincerissimum esse debuit, & quondam sanè fuit, nunc contaminatum & oblitum est peregrinitate verborum & rerum, ut Iustinianus ipse si reuiuisceret, nouum incendium inter hos iuris perturbatores excitaturus sit. Quod genus, à legum contretatione, quemadmodū, & quantoperè sumouendum sit, ipse pro me Iustinianus dicit, cuius edictū. ff. ad senatū, & omnes po. his verbis, & hac præscriptione est. **HOC** autem, quod & ab initio nobis visum est, cum hoc opus fieri deo adnuente mandabamus: tempestiuum nobis videtur & in præsentī sancire: ut nemo neque eorum, qui in præsentī iuris peritiā habent, neq; qui postea fierent, audeat commentarios hisdem legibus adnectere, nisi tantū si velit eas in Græcam vocem transformare sub eodem ordine, eaque consequentia, sub qua & voce Romanę posite sunt, hoc quod Græci *κατὰ πρότα* dicunt, & si qui forsitan per titulorum subtilitatē adnotare maluerint, & ea

& ea quæ *παράτιλα* nuncupantur, componere. Alias autē legum interpretationes, imò magis peruerfiones, eos iactare non concedimus: ne verbositas eorum aliquid legibus nostris adferat ex confusione dedecus: quod & in antiquis edicti perpetui commentatoribus factum est, qui opus moderate confectum huc atque illuc in vniuersas sententias producentes, in infinitum detraxerunt, vt penè omnē Romanā sanctionem esse confusam cerneret. Quos si passi non sumus: quemadmodum posteritatis admittatur vana discordia? si quid autem tale facere ausi fuerint: ipsi quidem falsitatis rei constituentur, volumina autem eorū omninò corrumpantur. Acerbum, & vehemens edictum (vt audistis) quo, ferreos vultus imperitorum commentatorū imperator verberat, & contundit, elusum tamen (vt scitis) & spretum, summa cum Iustiniani, tum ipsarum legum contumelia. Neque tamen omnes aspernor, etsi videntur

dentur omnes edicto teneri, sed qui id rectè  
facere potuerunt, quales sanè fuerunt plu-  
rimi, multum illis attribuo, reliquorum far-  
raginem inquinatorum doctorū, non ego  
quidē obiurgo ipse deterrimus omniū, sed  
Iustinianus asperrima verborū atrocitate  
damnat, & penè vniuersorum eruditorum  
cohors Iureconsultorum, maledictis figit.  
Ego verò, qui vitupero sanè neminem, lau-  
do plurimos, nonnullos admiror, hanc,  
quantū licet, moderationē tenebo, leges vt  
ipsas imprimis amare videar, deindè ab il-  
lis alienus ne sim, si qui simplicissimè leges,  
& planissimè nobis enarrauerunt. Quam  
vobis sententiam meam, quantum proba-  
turus sum nescio, cupio quidē, & opto ve-  
hementer. Atq; hæc sunt, non sanè omnia,  
sed, quæ tam breui tempore complecti pos-  
sem, penè omnia mei ad leges itineris vesti-  
gia. Nūc à vobis omnibus hoc ad extremū  
requiro, quod, ipse si non rogarem, æquis-  
simum esset mihi concedi, primū vt si ne-



minem odi vestrum, inuideã nemini, multos diligam, quosdam amem, omnes probẽ: labor vt meus, qui inter vos versaturus est, maledictis non infestetur, obtrectatione careat, sermones habeat eiusmodi, quales mea perpetuò transacta vobiscũ studia, videntur exposcere, & iure quodã suo vendicare. Non his æquari me velim, quos libenter agnosco magnos, & magni temporis iureconsultos, ex quibus, nemo mihi aut ignotus, aut iniucundus est, aliquorũ etiam vsum, & familiaritatem expetiui, nec ab illis, nisi inuitus, me disiungam. Itaq; sumant ipsi sibi ad commentãdum, & scribendum, mihi tempus ad discendum dent, & quoniã ita necesse est, docendum etiam. Illos igitur exorabo, maturos in iuris disciplina viros, vt æquitatis sacerdotes, quemadmodum Vlpianus eos appellat, æquitatis vt meminerint suæ: reliquos, initiatos quidem, sed qui in via, & in cursu adhuc sunt, monebo, discipulos vt ipsi se esse sciant, quorũ partes  
discendi

discendi, non calumniandi esse debent. Vos autem, qui mecum, & ex me ius primū audire vultis, vos (inquā) proprius, & omnibus modis meus grex, in omni mecum studio humanitatis enutritus, ab humanitate, quam didicistis tam diū, degenerare tam citō non potestis, vt aliquid non probetis illius, à quo vobis ad hoc vsq; tempus, omnia periucunda ceciderunt. Plenus igitur optima spe, certissima maximorū fiducia vestrorum studiorum: cras ab ipsis institutionū principijs, initium mei laboris sumam. Qui vestris expectationibus si par erit, valdè lætabor, si de facultate fuerit imminutū, præclari conatus, & honestæ voluntatis cōscientia, me ipse sustentabo.

G. HADDONI ORATIO, DE  
obitu D. Martini Bucerii.

**M**Ultæ fortassis auribus, nulla potest oculis maior cōtra terrores mortis disciplina percipi, quàm hoc ipso præsentē funere, luctuosissimo quidem illo, & ærumnosissi-

L.2.

mo,

mo, sed tamen ad communem naturæ nostræ fragilitatem ponderandam, aptissimo. Charissimi patres, & fratres, patrē nostrū & fratrem, excellentissimum doctorem D. M. Bucerum cognouistis viuum, intuemini mortuum, vidistis hominē, cadauer cernitis, audistis theologum præstantissimum, truncum sine sensu contemplamini. Viuus magister erat ad vitam Bucerus, idem mortuus præceptor sit ad mortem. Viuens, & spirans assiduè nos erudiebat ex ecclesiarū, & scholarum pulpitis Bucerus, nunc mortuus clamat ex pheretro, inuocat ex fascijs. Quid clamat? quid docet? quod ferè nunquam meminisse possumus, cum tamen semper in animo inhærere debeat, exuendam hanc mortalem vitam, induendā immortalem, deponendum præsens, & laboriosū tabernaculū, vt sumatur ad æternitatē perpurgatum corpus, denique exeundum ex hoc seculo, vt transferamur in aliud, migrandum ab hominibus, vt iungamur deo.

Quæ



Quæ si nobis omnia debent in omnibus funeribus occurrere, singularis animaduersio in hoc diuinissimo præceptore nostro M. Bucero esse debet. Deus enim naturā eius omnibus doctrinarum luminibus, & virtutum ita compleuerat, vt vnus nostra ætate dignissimus immortalitate videri possit. Recidit tamē ad cineres, vt surgeret ad coronā, & corpore correpsit in terrā, vt spiritu subuolaret in coelū. Nos igitur, nos, fratres, & vehementer quidem allaborare decet, vt excellentissimi præceptoris nostri vitam imitemur, mortē expectemus, subeamus labores, consecremur præmia, toleremus contumelias, ascēdamus ad gloriam. His itineribus præceptor noster antegressus est, eisdem vijs erit nobis subsequendum. Quæ in re, certiorē vt cursum tenere possemus, vtinam tempus, & valetudo mea ferrēt, vt hunc vobis eximium virum particulatim, & omnibus membris expingerem. Sed nō licet. Semimortuus enim de mortuo lo-

quor, de familiari familiaris, amicus de amicissimo. Quapropter & morbus diligentiam impedit, & familiaritas minuit authoritatem, & amicitia vix aliquid conari finit. Magnum enim, & planè incredibile, præceptoris nostri morte, dolorem accepi, neque dubito, quin omnes acceperitis, quibuscunq̃ue vera dei religio, & vitæ honestas curæ est. Nō enim vnus erat ex doctoribus plebeijs, sed singularis ex omnibus theologiæ principibus, nō quē multi laudare possēt, sed quē omnes admirari deberēt, nō quē omnes amici expeterent, sed quem vniuersi inimici reformidarent, non ad quosdam Christianos, sed ad totum Christum, non ad certos homines, sed omne humanū genus adiuvādum, natus, & procreatus. Multūm videor dicere, tamen cum immensitatem eius bonitatis, & doctrine, animo colligo, superat eius doctrina meam orationem, virtus etiā cogitationem. Sed de vita nō loquar, quam licet propius aspicere

cere poteram, propter meam interiorem  
cum eo consuetudinem, tamen nimis mihi  
longum esset, & amicus frustra laudarem,  
quod nemo vnquam ausus est inimicus re-  
prehendere. De literis hoc vnum summa-  
tim ponam, quæ in alijs, singula singulis,  
eain vno pariter vniuersa concidisse. Au-  
gustini fuit in illo acumen, Hieronymi lin-  
guarū varietas, & doctrinæ, disciplina Cy-  
priani, Ambrosij authoritas, Originis sci-  
entia, Chrysostomi in docendo perspicui-  
tas, Bernardi integritas in vita: vel hæc in  
illis priscis ecclesiarum heroibus vberiora  
si fuerunt, vti fuisse confiteor, tamen par-  
ticulas ex omnibus, excellētissimus noster  
Bucerus tanto studio arripuit, tot orna-  
mentis perpoliuit, vt si non vnus cum om-  
nibus, tamen separatim cum singulis com-  
parari possit: aut, in illo augusto veterum  
choro, si non præsideat, in hominibus nostri  
seculi, omnibus ex partibus inter alios e-  
mineat. Sed infinitas eius laudes oratione  
non



nō sequar, ad quas pauci, aut ne pauci quidē peruenire possunt, imitationem eius vitæ & fidei vobis iterum atque iterum diligentissimè cōmendo, ad quas, omnes se, quantum possunt, conformare debent. Quam ad rem si vita Bucerī magnum momentum attulit, mors certè maius afferre debet, qui præsens, & domesticus testis ante oculos iacet, præsens vitæ occidentis, & futuræ nascentis. Bucerus si solus testis est, ne curetis, si maximus, contemnite. Sed Prophetæ mortui sunt, & Apostoli, magnis, & immēsis coetibus, si multitudo spectatur: si dignitas, dominus noster Iesus Christus de gloria diuina seipse depressit, vt non solū mortē, sed eam infamē, & tetram oppeteret, vt primū cōmunis mortis, deindē etiā æternæ vitæ, in illo exemplū cerneremus. Primus igitur ad Christum respectus sit, quem Paulus primitias mortuorum vocat, quoniam primus viam ex morte ad vitam nobis cōmuniuit. Secundus ad Apostolorū,  
&

& martyrum cateruas, quos dominus noster Iesus Christus ex horum corporum gurgustijs, ad æternam perpetuæ fœlicitatis domũ, iisdem itineribus euocauit. Tertiũ in hoc ipso defigatur doctore Martino Bucero, quem ad Apostolorum ordinem aggregare possumus. Cum enim illorum in vita fidem, & doctrinam sequutus sit, non dubito, quin gloriam in morte sit assequutus. His igitur exemplis ita nos ipsos instruamus, & tam altè mentes nostras exaggeremus, semper vt sursum sint. Tum enim fidentibus animis, cum opus erit, ad mortem gradiemur, & ad illam hæreditatem perueniemus, quam deus cõmunis noster clementissimus pater, propter Iesum Christũ omnibus reseruat, qui synceris moribus, & vera fide ad illum confugiunt.

G. HADDONI SVFFOLCIENSES FRATRES, siuè de obitu Suffolciensium fratrum, oratio.

Q Laboriosam, & si non miseram, certè mirabiliter exercitam, tot cumulatã fu-

M.I.

neribus

neribus Cantabrigiam. Graui nos vulnere percussit hyems, æstas, faucios ad terram afflixit. Calendæ Martiæ stantem adhuc academiam nostram, & erectam, vehementer impulerunt, & de priori statu suo depresserunt, Idus Iulij nutantem iam, & inclinatam oppresserunt. Cum magnus ille fidei magister, & excellens noster in vera religione doctor, Martinus Bucerus, frigoribus hybernis congelaciauisset, tantam in illius occasu plagam accepisse videbamus, vt maiorem non solum vllam expectaremus, sed ne posse quidem expectari crederemus. Verum postquam inundantes, & in Cantabrigiam efferuescentes æstiuu sudores, illud præstans, & aureolum par Suffolcensium fratrum, tum quidem peregrinatum à nobis, sed tamen planè nostrum obruerunt, sic ingemuimus, vt infinitus dolor vix vllam tanti mali leuationem inuenire possit. Perfectus omni scientia pater, & certè senex incomparabilis, Martinus Bucerus,



cerus, licet nec reip. nec nostro, tamen suo tempore mortuus est, nimirum etate, & annis, & morbo affecta. Suffolcienses autem, quos ille florescentes ad omnē laudē, tanq̃ alumnos disciplinæ reliquit suę, tam repente sudorū fluminibus absorpti sunt, vt prius mortem illorum fleremus, quam morbum animaduerneremus. O crudelē morbum, ô mortem acerbam, non illis quidē in portum ingressis, & ibi conquiescentibus, sed nobis in vita iactatis, tanq̃ in mari, quibus illorum authoritate, & præsidio carendum erit. Dux enim ipse, licet non dum planē vir, tamen & annis ad iuuentutē penē adoleuerat, & ingenio ad omnes res gerendas ita ematuruerat, vt ex his omnibus nihil illi abesset, quibus illustrem personam vel ornari deceret, vel institui conueniret. Grauis erat sine superbia, comis sine leuitate, docilitate summa, minimo vt studio esset opus, diligentia tamen eiusmodi, quæ naturam posset etiam ex tarditate incitare. Sermo

verò penè omnis, & de doctrina fuit, & cū  
viris doctis, quos & honoratissimæ cura  
matris illi multos circumfuderat, & ipse  
plures humanitate asciuerat sua. Nam cū  
dignitate principibus esset par, tamen ge-  
nerosa quadam ingenuitate animi se cum  
infimis exæquabat, si quidem vllas crudi-  
tionis, aut ingenij notas in illorum oratio-  
nibus inesse intellexisset. Iam congressus,  
nec muti illi erant, nec vulgares, nec rerum  
colloquia ludicarum, aut leuium, sed pro-  
ponebat aliquid semper, de quo & ipse di-  
cebat, vt poterat, & alios audiebat libenter,  
si quid illis in mentem veniret. Oratio fuit  
illius sanè prompta, & explicata, nec se ipsa  
iactans, nec alios excludens, graui quadam  
perfusa modestia, quam, mentis æquabili-  
tate perpetua sic tuebatur, vt nec se ipse  
vnquam desereret in dicendo, nec acerbè  
quenq̃ insectaretur. Reliqua vita, quæ qui-  
dem nobiscum acta est, vel tota literis trans-  
missa, vel illis certè cōdita fuit. Quarū stu-  
dio

dio sic exarserat, vt nec collegia, nec scholas, nec otia, nec negotia, imò nec mensam, imò nec lectum, prorsus illarum expertes esse sineret. Itaqué minimo tempore, maximarum rerum doctrina sic euolauerat, vt eius etiam extemporalem in differendo facultatem multi possent metuere, nemo cōtemnere deberet, laudarent sanè omnes, & admirarentur, quicunq; laude ipsi, aut admiratione digni aliquando sunt habiti. Erunt fortassè, qui vel hæc in illo non fuisse, vel non tanta fuisse credant, quanta meis ego verbis illa facio. Sed hi quicunq; sunt, aut illum ignorauerunt, cuius vera virtus omnem orationis vanitatem repudiabat, aut me profecto non norunt, qui ad publicum tam nobilis personę testimonium, minimè sanè mendacium accommodare velim. Talis igitur certè, talis Henricus ille Suffolciensis fuit, reliquis præstans vniuersis adolescentibus, ipse tum adolescens, & iam appropinquans, vt alijs omnibus viris, ipse vir



anteferretur. Talis illi succreuit frater Carolus, pubescens quidem adhuc, ut in vite gemma, sed qualem nostræ vites gemmā, aut parem vix habent, aut certè pretiosior omnino non habent. Nam illam nostram regalem margaritam, quam nomine nos singulari regiæ maiestatis honoramus, non alicuius urbis, sed totius orbis, nō hominum, sed humani generis, non vnius nationis, sed vniuersæ naturę lumen, & florem, nemo me ita desipere putet, ut aut cōparare cum quoquā velim, omni ex parte incomparabilem, aut nominare penē audeam, nisi magna cura, maiore causa, maximo tempore separatim me ad id præpaue-  
rim. Ad Suffolcienses redeo fratres, qui planè fuerunt huiusmodi, quales illos pono, vel multò maiores etiam. Nam eorum à me sūmatim percursa virtus, campum illum non habet, & cursum collegiorum, & scholarum nostrarum, in quibus liberè excurrens non solum vniuersa cognoscebatur,

tur, sed etiam singulis partibus aspici poterat, & euolui. Deus igitur, noster immortalis pater, cum sua præstanti clementia nobis eximium hoc fratrum par attribuisset, & mater excellentissima, lautissimis institutis illos educauisset, academia deniq; nostra, scientiarum doctrina multiplici perpoliuiisset, & subornatos omnium instrumentis præclarissimarum rerum, respub. iam iam ad se esset euocatura: mirum non est, si mater liberos, & alumnos academia, denique respub. ciues, imò duces potius, cum vix è carceribus adhuc egressi essent, in eodem tempore, & in eodem penè vestigio corruisse dolet, præsertim cum illos quasi turbo quidam subito corripuerit, vt prius mortui cernerentur, quàm morituros quisquam suspicari posset. Atq; hæc quidē, cum procul aspicio, magnā mihi luctus causam, & moeroris habere videntur. Sed cum animū adduxi propius, & penitus in rerum naturam intraui, me ipse castigo, quòd ex animi  
mei

mei mollitia, non ex præscripto rationis de  
casibus humanis existimem. Quid enim  
illis longior vita profuisset? obesse potuit,  
ut obfuit sanè multis, & profecto fortuna  
plus illis aduersa potuit auferre, quàm af-  
ferre prospera. Nunc enim animis optimè  
constitutis, secunda fama, nullis odijs, nul-  
lis æmulationibus, maxima gratia, summis  
omnium studijs, vita quasi somno, soluti  
sunt: quæ, si in terris cunctati essent, diutur-  
nitas temporis, vel minuere illis multa po-  
terat, vel omnino tollere vniuersa. Nam &  
ipsa mutabilis fortuna fertur, & omnia sūt  
eius membra cōmutabilia. Cuius rei penè  
tot sunt testes, quot sunt homines. Itaque si  
fortunæ regnum expectatur, cum opes, cū  
victorias, cum dignitates cogitamus: oc-  
currant egestates, fugæ, sordes, & tenebræ.  
Nam & ista sæper euenire possūt, & sæpè-  
numero summis viris euenisse scimus. Sed  
natura cum ægregiè se in illis ostendisset,  
durū est, quòd ipsa prius se retexebat, quā  
eius



eius pulcherrimis muneribus frui poterāt. Rectè esset, si quidem illis frueremur, quibus maxima ex parte ne vti quidem licet. Nam vt ordiar à sanitate, quæ reliquis spiritum, & vitam impertit, & quæ si locomota est, alia coherere non possunt: sub omnes illa morborum offensiones perpetuò subiecta est, qui aceruatim, & spissè veniunt, vt semper aliquis illorum in vitam nostram transuersus incurrat. Itaque Suffolcien-sibus planè gratulor, qui celeriter vita lapsi sunt. Nam si paulum tardauissent, ad extremum tamen illis occumbendum erat, & interim aut neruorum contractiones illos strinxissent, aut flammæ februm incēdissent, aut frigora distillationum illiquefecissent, aut intendissent tumores, aut tæbes contriuisent. At non fuissent ista fortassis, at esse solent, at non semper, at plerunq̃ue, at non omnibus, at sanè plurimis, at illis non accidissent, at nescimus, at sperari poterat, at metui debebat potius. Nam in toto hoc

N. I.

genere

genere, & in vniuerso siue fortunę strepitu, siue apparatu naturę, sunt illa profecto verissima Ciceronis nostri, non solum oratoris eloquentissimi, sed etiam sapientissimi ciuis, & planę veteratoris in communi vita, plures esse infœlices, quàm fortunatos, & prudentius metuere nos, quàm sperare, tum illud etiam, multo sæpius lachrymatũ esse Priamum in vita, quàm Troilum. Testes affert Cæsarem, & Pompeiũ, qui cum per omnes dignitatum gradus ad maturam ætatem ascendissent, illorum extrema tempora miserabilibus in ruinis iacuerunt, & alter tandem exul à barbaris, alter à necessarijs in senatu trucidatus est. Principes nominamus reip. Romanę, poteramus greges coaceruare reliquorum ordinum. Sed externa prætermittatur, domesticos annales excutiamus, & quoniam à principibus sumus exorsi, commoremur in illis, & quidem vna familia contenti simus. Et quanq̃ patrem poteramus, tamen filiũ sumamus

Edo-

Edouardum tertium, cuius cum adolescē-  
tia Scōtiam fregisset, iuuentus Galliam, &  
omnem Aquitaniam maximis, & conti-  
nuis victorijs peragrauisset, inclinata iam  
& ingrauescens ætas, maximam horum  
partem ornamentorū illi detraxit, & belli  
calamitates, domestico funere nobilissimi  
prīcipis Edouardi filij, cumulauit. Itaq; qui  
iuuenis mori potuisset, ipse rex, & impera-  
tor, & filium relinquens Aquitaniae princi-  
pem, senex tandem mortuus est, rex ille  
quidē, & singulari virtute, sed tamen mul-  
tò minore bellica gloria, & multò maiore  
domestico mœrore. Princeps filius, hæres  
dum vixit patris fortunæ, primas res gestas  
habuit incredibiles, postremas, morbi labe  
deformatas, & seditionis. Richardus secū-  
dus, principis Edouardi filius, & regis ne-  
pos, ad paternos deuolutus est, & auitos ca-  
sus. Nam & puer renunciatus est rex, & in  
regno fœliciter adoleuit. At paulo post ita  
vir præcipitatus, vt priuatus sit mortuus. In



regibus igitur si fortuna sic ludit, & eludit, quātas in populo strages edit? Dicerem si esset necesse, sed satis nos communis vita docet. Illam autem ipsam matrem Suffolcensium, optimam, & præclarissimā mihi cognitam foeminam, sic aliquot anni posteriores exercuerunt, vt minimè sanè dubitem, quin illis si potuisset, libenter fuisset caritura. Quapropter, vt tecum nunc aliquantisper agam, te nunc appello, siue coniux nominari vis mariti ducis, siue mater ducis filij. Si deus optionem tibi dedisset, vt coniux, & mater, vel in illa ætate efferrere ipsa, in qua liberos extulisti tuos, vel funus primum mariti, ita vt euenit, deindè gnatorum, nec coniux ipsa iam, nec mater cereres: si deus (inquam) optionem dedisset, & legere tuam te iussisset conditionem, vtrum sumpsisset? Aut ego tuum non noui tenerum, & indulgētem animum, aut tuorum clades posteriorum temporum, superiorum annorū amissione vel redemisses,  
vel

vel declinauisses. Igitur & alij te condocer-  
faciant, & in primis ipsa ex te disce, quid lō-  
ga series annorum afferat, imò quid auferat  
potius, vt ante dixeram, & præclarè cum  
tuis heroibus actum esse puta, qui in sūma  
rerum omnium prosperitate viuentes, non  
dum vertente fortuna, sic vitam dimise-  
runt suam, vt honore abundantes, & inge-  
nio excellentes, vt literis florentes, & gra-  
tia, nihil haberent inuidiæ, nihil odij, nihil  
simultatis, nihil inimicitiarū, qui suis tem-  
poribus optimis morte, tanq̃ somno conso-  
piti, nec tuum funus viderunt, nec cæteras  
tempestates reformidant, quas, vel suas, vel  
suorum maximas, longior illis dies inuexis-  
set. Quod si non acquiescis adhuc (tuum e-  
nim argumentosum agnosco in differendo,  
& minimè cedens acumen) & externis te  
non commoueri dicis, sed illam te lucem,  
& splendorem animorum desyderare, qui  
tuis in liberis apparuerit, non curare te for-  
tunam, qualis fuerit, aut fuisset, verum pie-

tatem, literas, & reliquam omnem insitam  
bonitatem & amauisse te præsentē, & ab-  
sentem valdè requirere, his te lætatam fu-  
isse interioribus ornamentis iam virescen-  
tibus, & iisdem angere te, tam subitò, & ante  
tempus euulsis, & eradicatis. Hæc, si diser-  
tus contra te, tuus dolor disputabit, breuiter  
illis omnibus, & verè à me occurri potest.  
Venisse tuos liberos ad illū ætatis flexum,  
in quo multi indole excellenti aberrauissēt,  
venisse ad illum lubricum, & præcipitem  
locum, in quo voluptas tot delectationes  
huic ætati profundat, vt prorsus difficile sit  
illarum aliqua, mentem à ratione, & officio  
non detorqueri. Meis nihil horum, inquis,  
accidisset fortassè. Sed tamen nec certò sci-  
ebas, nec illis viuis non metuere poteras. Si  
metuisse neges, tabulis obsignatis tecum a-  
gam, & historiam omnium illorum tem-  
porum tibi replicabo, in quibus piè mecum  
& diuinè loqui solebas, multum tamen &  
vehementer, vt facile te laborare cernerē,  
quo-



quomodo custodienda filiorum tuorum  
pubertas, quibus institutis moderāda, qui-  
bus habenis refrænanda, & deuincienda  
esset. Hanc deus tibi dubitationem exemit,  
hanc sollicitudinē detraxit. Si nescis quan-  
to bono, quā summa fœlicitate tua, agē  
verò, circumspice paulum, alienas familias  
non nihil animo contrecta, videbis quanto  
dolore, quāto gemitu, tum suo, tum suorū,  
quā multæ, & magnæ, diū viuendo dege-  
nerauerint, & in acerbissimas miseras cō-  
trusæ sint. Titus imperator Romanus, Hé-  
rici tui similis in vita, similiter etiam in ado-  
lescētia mortuus est, cuius illa fertur in ipsa  
morte diuinissima vox, se cum ad omnem  
vitam respectaret suam, & in eam intueretur,  
solum in vniuersa rem vnā reperisse,  
cuius se poeniteret. Eandem, aut certè si-  
milē Henricus tuus vocem vsurpare pote-  
rat, & Carolus multò magis. At nec Titus  
potuisset ipse, si longiorem deus illi vitam  
dedisset, nec Suffolcienses potuissent tui.

Nam

Nam & Vespasianus, Titi pater, oppressus à suis, & superiorum temporum multi in initio clarissimi imperatores, longinquitate temporis ita peruertebantur, vt vel ipsi in se incurrerent, vel in propinquorum, aut ciuium sanè suorum vim inciderent. Totum igitur hunc locum ita concludam, Deum non iratum gnatis tuis ante tempus eripuisse vitam, sed clementē, & tempestiuā donauisse mortem. Reddidit enim pro terra, coelum, pro labore, quietem, pro incertis, certa, pro humanis, diuina. Quod si magis distinctè libet, & particulatim agere, cur tumultuaris? Quid vis? Quid quæris? Expectisti liberos? Habuisti. Præclara indole? Fuerunt. Honoratos esse? Maximè. Benè educatos? Optimè. Perfectos omni genere laudis? Ita cogniti sunt. At fuissent maiore gloria, si vixissent. At nunc mortui sunt maxima. At interim terris sublati sūt. Imò in coelum translati sunt. At illorum conuictu cares, et illi tuo. Primum illi te non ca-

rent

rent iuncti deo, ne tu quidem illis cares, nisi  
fortè inuides . Nunc enim pro creatura,  
mortali matre, patrem habent immortalē  
deum, et ipsi prius creature mortales, nunc  
spiritus sunt immortales. Quapropter vni-  
uersam excita pietatem, & gratiam, quæ  
largè tibi deus affudit, & non solum omnis  
tibi cōsidebit & sepelietur dolor, sed etiam  
vehementer lætabere tam breui tempore  
tuos filios mortis terroribus perfunctos  
esse. Ad quos nos quotidie vela damus, etsi  
reflantibus ventis non nihil reiijcimus, inte-  
rim angimur in vita, & tamen paulò post  
eodē erit migrandum, & quidem cum im-  
peditiores erimus, quàm Suffolcienses fu-  
erunt tui . Cum hæc maximè scriberem,  
Henricus Hauardus, Thomæ filius, natu  
maximus, animam agebat, puer ille quidē  
adhuc, sed mansueto puer ingenio, & præ-  
claræ spei, quem si deus ex ærumnis huius  
vitæ nondum gustatis, ad cœlum euocaue-  
rit, an non nepos Troilus iste mortem ha-

O.I.

bebit,



bebit, Priami illius aui Nōrfolciensis vita,  
multò fortunatiorem? Hic in vita riserat  
penè semper, flerat nunquam, nimirum &  
puer, & puerili innocentia. Nōrfolciensis  
senex, exacta etate, quàm magnas, & incre-  
dibiles, diù viuēdo, calamitates hausit? Sed  
satis est domesticorum testiū, & tecum satis  
est sermonis, ô præclarissima Suffolciensis.  
Nunc in his mihi terminetur oratio, quæ  
non sunt propriè tua, sed communia sanè  
omnium. Socrates in gentili sapientia deus,  
cum duceretur ad mortem, æquissimè fe-  
rebat, hoc ipsum prouidens, immensas hu-  
ius vitæ misérias, tū longius etiam euectus,  
non semel, sed sæpè, se dicit velle mori, ter-  
renam vt huius corporis molem, cupidita-  
tum fæcibus oblitam, deponere possit, vt  
Aeacum, & Agamemnonem, & Vlyssē,  
& reliquam commentitiorū turbam hero-  
um apud inferos degentium contem-  
pletur, & cum illis se cōiungat: et nos non pu-  
det, qui christiani esse volumus, tam gra-  
uatè

uatè ad mortem ire, cum nobis non ad fabulosos iudices, sed ad deum patrem, non ad vana delirantium Philosophorum somnia, sed ad Christum, veram æterni patris sapientiam, proficiscendum sit? Iob, exercitissimus in carne nostra communi vir, militiam esse dicit vitam præsentem. Ecquis igitur tam amens est, vt libenter in acie stare velit? vt sèper pugnet? semper in pelibus excubet? præsertim cum tot & tam horribiles vndique circumfusus hostes habeat: interiores, mundū, carnem, & diabolū, exteriores, illos, qui antè à nobis tacti sunt. Intus pugnæ, foris terrores. Clamat Paulus singularis in nostra fide princeps, & nobis denunciare videtur, vt, quantum possimus, ab hoc seculo abalienemur, & semper ad vitam nouam, seculum nouum, terram nouam, vota faciamus. Nostra religio peregrinari præsentem dicit vitam à deo, sursum esse Hierusalē illam optabilē, veram Christianorum patriam. In illa na-

tione regnum est Christi, Martyrum triumphus, omnium corona christianorum militum. Huc omnes nostri maiores vniuersorum temporum, veram secum fidem afferentes, assumpti sunt. Huc recens Martinus Bucerus, noster excellens magister euolauit & recentissimè sequuti magistrum, discipuli Suffolcienses. Illis itaq; gratulemur, collocatis in cœlesti patria. Nos autem in hoc exilio terrestri tumultuantes, semper mortis tempus, hoc est, supremum seruitutis, & primum libertatis nostrę diem patienter expectemus absentem, & cupidè præsentem arripiamus, vt in hac vita legitimè certantes, & laborantes, quantum licet, ad illas enauigemus diuinas oras, & quidem velis pansis. Feremur enim filij ad patrem, creaturæ ad creatorem, exules ad patriam, serui ad libertatem, quam nobis libertatem, deus omnis veræ libertatis author, Iesu Christi respectu, dei, dominiq; nostri, maturè concedat.

G. Had-



G. HADDONI, CANTABRIGI-  
enses, siue exhortatio ad literas.

**Q**Vanquam diù peregrinata valetudo  
mea morborum in cæcomari, vestris  
auribus & oculis abfuit, & vix adhuc nouā  
scholarum lucem aspicere potest: tamen cū  
sanitatis quasdam reliquias, ex ægritudine  
recreatus, tanquam ex grauissimo quodā  
naufragio, recollegerim, eas ipsas, ita vt  
sunt, vobis repræsentandas, & in conspectu  
vestro collocandas esse existimaui. Sum-  
mis enim semper & incredibilibus studijs  
vestris vsus sum, & me rursus infinita que-  
dam cupiditas tenuit vestris in auribus cō-  
mentandi. Quò factum est, vt adolescentiæ  
primū illa priora, deindē iuuentutis hæc  
etiam meæ posteriora tēpora vestris tem-  
poribus omnia transmitterem. Et cum sin-  
gulos ætatis mea gradus animo cōplector,  
nullum à vobis remotum inuenio, nisi quē  
natura, vel morbus disiunxerit. Postrema  
verò pestis hæc corporis, fuit ea sanè teter-

O. 3.

rima

rima omnium. Nam salutaræ naturæ succos exorbuit, & nervos propè omnes mentis elisit. Itaque tam longè hæc calamitas me à vobis abduxit, & in ea tam altè cecidi, pedibus vt ingrediens, animo non consistam, & morbo liberatus, morbi tamen memoria terrear. Quapropter mea grauis hæc, & vehemens cum animi, tum corporis perturbatio, vestra primùm æquitate subleuanda, deindè etiam alacritate adiuuanda, & corroboranda est. In quo duplex vobis consideratio esse debet. Primum erit, illum superiorem, tanto perè probatum vobis Had-donum vestrum, vi morbi fractum, & abiectum, restare quandam adhuc eius quasi effigiem, vtcunq̃ue cohærentem, facultate penè nulla, voluntate sanè non contemnenda. Secundum est, vt hoc ipsum apparens in oculis vestris eius simulachrum, & animis occursans, quantum vobis cunq̃ue exile, & imminutum videtur, tamen propius aspicere velitis, & animis comprehendere.

Quæ

Quæ duo si vestra benignitas largè dabit, & vt solet, primùm maximas pro beneficio vobis gratias agã, deindè grandes etiam & vberes ex assiduitate vestra fructus pollicebor. Quanquam enim intermissa mihi diù, tamen non omnis amissa dicendi ratio est, & licet magna ex parte repressum sit ingenium, tamen non sic omnino depressũ est, vt se rursus non possit attollere, præsertim si flatus aliquis studiorum vestrorum se ostenderit. Ego verò prius excellentissimi præceptoris mei Thomæ Smithi vicarius, nunc regiæ maiestatis beneficiarius sũ, & ætate processi non nihil. Ita quæ si minus sciens ad vos reuertor, tamen, vt arbitror, non minus sapiens, & eloquentiam si fortè minorem afferro, tamen authoritatẽ afferro sanè maiorem. Quapropter antè qui sũ misè loquebar, & vix in alieno munere vocem audebam mittere, nunc meani ipse rem agens, dilatabo spiritus, & liberè vociferabor, & vt ab omnibus exaudiri possim.

Qui



Qui sunt autem isti clamores, aut quæ tandem hæc vociferatio esse debet? Dicam apertè, quoniam necessariò dicendum est, minimè sanè libenter omnes reprehendēs, sed communem potius culpam nostrā confitens, ut ea quamprimùm omnes exoluamur. Languori nimium nos ipsos dedimus, & ignaviæ, scholas in solitudine reliquimus, & vastitate, quas cum maiores nostri communes nominari voluissent, propter liberè comēantes in illis vtrò citroque literas, nostra desidia sic contractæ sunt, & tam insignem ad paucitatem reciderunt, ut quorundam professorum certæ sedes, non vniuersitatis cōmunes scholæ posthac nobis cognominandæ sint. Sed nec in his solū inertia nostra locis delinquit, quanquam grauissimè quidem in his, quoniam publicę quędam studiorum existunt, & ingeniorum officinæ, verum etiam serpit sanè foras, & in collegiorum se latebris occulit. Ingens, & horribile precatum, ô bone deus, & ab

& ab ipso illo deo, quem iuravi fœdère vindicandum, nisi nos ipsi maturè correxerimus. Hic enim deus orbis summus imperator, vnumquemq; nostrum tanquam in propria statione collocavit, vt mutuis officijs communem reip. societatem gubernaremus. Eandem in nobis spem necessariorum pietas insequuta, magnis impensis enutrit. Eandem à nobis diligentiam academia suis incolis stipulata est, & nos iurati spondimus. Eandem vniuersa patria requirit, cum in illa disseminabimur. Et tum quidem aut præstanda nobis erit, aut relinquendum totum hoc humanitatis nomen, in quo studia se nostra semper maximè iactauerunt. Equidem non solum humanitatem hanc nostram doctrinæ propriam, sed ne illam quidem communē omnium hominum retinere possumus, nisi publicam hanc optimarum artium mercaturam ingressi, sic collaboremus, vt ex opibus, & copijs nostris, primum nobis ipsis seponi, deinde etiā

in alios deriuari possit. Meum autem commercium, licet propriè cum legibus, & in iurisconsultorum subsellijs habitet: tamen migret sanè paulisper, & cōticescat illa subtilis, & præcisa legum iustitia, sumatur philosophiæ popularis altera, quæ latis vijs it, & quam Aristoteles quasi Luciferum ad omnes actiones nobis prælucere dicit. Hæc certè ruit omnibus partibus, & vniuersa interit, dum nec prudentiam insequimur, rerum causas inuestigantes, nec fortitudinē confirmamus laborum patientia, nec intemperantiā excludimus animis, otio mollitis. Tria principalia iuris præcepta sunt, ex quibus primum, & maximum est, vt honestè viuamus. Igitur honestas vitæ nisi fortè à vobis aliena est, ne hanc quidem meam de communibus studijs orationem à vobis alienam existimare debetis. Pella tur itaque tandem animis nostris omnis ignauia, tollantur, imò trahantur potius, & funditus eradiceantur desidiosa cessationes. Eijciatur,  
& al-



& asportetur, si nullo alio admonente, at me obtestante & inclamante, monstrum illud multiplex, concretum ex omnium viti-  
tiorū colluie, pestis studiorum, expultrix  
virtutis, vniuersæ nequitiae semen, otium.  
De quo tanq̃ diro quodam, & nefando ve-  
neno loqui non libet, longè exterminetur à  
nostris oris, ablegetur ab omni sensu men-  
tis, & corporis, deportetur aliquò in vlti-  
mas terras, vnde nec nomen quidem ad nos  
vnq̃ redire possit. Ad labores veniamus,  
cōmentationes, vigiliis, & omnis generis  
exercitationes, quibus, tanq̃ saluberrimo  
quodam pastu, mētes reficiuntur, & alun-  
tur. Neque si conuiuebant nostri maiores,  
propterea nobis stertendū erit. Imò verò  
contrà, stertere poterant illi sanè, si volebāt,  
impunè, nobis ne cōuiuere quidē licet sine  
summo scelere. Nam & maximis abunda-  
mus præsidijis omnium disciplinarū, qui-  
bus illi carebant, & optimorum doctorum  
multitudine floremus, quos prior ætas ha-

bere non poterat, & externa nobis adiumenta deus, & plura profudit, & maiora, quàm ex vlla superiorum temporum memoria repeti possunt. Quæ dum particulatim vobis breuiter expono, diligenter quæso, quemadmodũ cœpistis, attendite. Quoniam autem, vt frumentum ex spicis excutitur, sic ex libris eruitur doctrina: primùm illos ipsos videamus, quorum monumentis omnia maximarum artium studia fundata sunt. Illis Cicero suæ eloquentiæ præclarissimam arcem exædificauit. Illis Aristoteles multiplicem acuminis subtilitatẽ limauit. Illis Zeno voluminum suorũ infinitatẽ. Illis Plato philosophiæ varietatem omnem combibit. Illis nata, illis progressa, illis confirmata, & consignata tota doctrinarum ratio est. Manentibus illis, literę diu steterunt, & remanserunt, eisdem post incursione barbarorũ principum obrutis, & deletis, sequutæ sũt miserabiles ignorationis tenebræ, quibus maiorum nostrorum

ætas

ætas oppressa est, & nostra etiam illis infecta erat. Mea enim memoria ranae scholasticæ in sacris scripturis obstrepebant. Totum nostrum ius Accursianorum fœcibus oblitum erat, usque eò, Papinianus ut si reuiuisceret, aut ex seculo priore Scœuola, leges ipsi suas non agnoscerent. Medicinam Arabum scabies ita omnem occupauerat, ut medicinæ ipsi opus esset medico. Philosophiâ, atq; humanitatē adeò omnē transmarinæ sordes inquinatissimorū scriptorū sic contaminauerant, ut nīhil in illis synceri, & salubris succi relinqueretur. Nos autē vndique circumfusi sumus libris excellentissimis doctrinarum cuiusq; generis. Euāgelij lux, diuinis literis explendescit. Iustinianus, in folio sedens, Caiorum, & Paulorum ore ius respondet. Medicinam Galenus, & Hippocrates administrāt. Philosophia, Platonis fluit fontibus, & Aristotelis. In omni verò dicendi ratione, nos & scribendi, Cicero sic expolit, ut Ciceronia-



notum nomen etiam in sermonibus indo-  
ctorum hominum increbuerit. Magna sunt  
haec adiumenta mutorum magistrorum:  
sequuntur illorum, qui loqui ipsi possunt. Et  
quidem illos potissimum ipsos consideremus,  
quorum praesens his temporibus nobiscum ser-  
mo est. Primum sumamus eum, qui de sa-  
cris scripturis ad nos concionatur, quanta  
varietate literarum, quam exquisito iudi-  
cio vir? Secundus sit sane meus qui vicari-  
us fuit, quoniam ius civile secundum nostram  
religionem praestantissimum esse arbitror,  
huius si non optime instituta oratio, at prae-  
clarissime constituta ratio est, multum vi-  
dit, multum legit, & omnino tantum habet  
scientiae, quantum intelligens vir experiun-  
do facilius animaduertet, quam indoctus  
aliquis procul auscultando possit suspicari.  
Atque, hoc in loco, delicias vestras obiurga-  
rem, quod iurisconsultum nisi eloquentem  
audire non potestis, cum in nobis non ver-  
ba spectanda, sed res ponderandae sint. Ve-  
rum

rùm hoc aliàs si opus erit, nunc in viam sanè reuertamur. Medicina præceptorem habet non promptissimè dicentem, fateor, sed subtilissimè profectò scientem. Contemnamus igitur, aut certè nimium non desideremus in illo florem orationis, à quo si absit, non valdè sit requirendus, salubritatē scientiarum expectemus, quæ & in illo est maxima, & nos eam præcipuè sectari debemus. Philosophiam, & rhetoricen tradunt mei familiares, & collegæ, vix vt meū illis domesticum testimonium prodesse possit. Academia igitur testis ipsa esse potest, non solum parati sermonis, & ingenij, sed etiam extemporalis facultatis, quæ in vtroque cernitur. Nam magistrum in dialectica tanquam ignotum hominem prætereo, tamen doctum esse non dubito, quoniam academia rationem illius habuit, cuius iudicium, mihi semper præiudicium esse solet. Iam in linguis tradendis, Hæbraica, duabus illa quidem columnis sustentatur,

iatur, altera vernacula, peregrina altera,  
firma vtraq;, & solida, quomodo narrant,  
ista qui norunt, nam ego non intelligo.  
Græcus verò noster doctor, qualis sit om-  
nes audiuitis, & meminisse potestis, ser-  
mone soluto, & dulci, sciētia magna, & va-  
ria, celeri ingenio, memoria imprimis bo-  
na, denique præstanti etiam extemporali  
facultate. Breuiter, vt videtis, oratio mea  
publicos præceptores nostros præteruecta  
est, quos vberius etiam laudare poteram,  
sed vobis cogniti sunt. Et hæc sint satis ad  
id, quod hoc tempore volumus, nimirum  
vt intelligatis, & libris, & magistris abun-  
dare nos cuiusque generis studiorum, &  
nostram esse dissolutam, & capitalem neg-  
ligentiam, si tales domi nobis procreatas, in  
omnes obuolitātes sensus, & in ipsis infixas  
academiæ nostræ visceribus opportunita-  
tes, oscitabūdi cōtemplemur, & sine aliquo  
insigni fructu nostro, dilabi patiamur. Sed  
ista si fortē domestica fastidimus, & nostra,

nec



nec has doctrinæ vias persequi volumus, nisi magnas ad opes, & summam dignitatē illis proficisci possimus, age verò, nō solūm honestati vestræ, sed etiam ambitioni seruiam. Exeamus igitur aliquandiū ex academiæ spatijs, & quidem rectā pergamus ad aulam, vbi Iupiter ipse præsidet, imperijs, & opibus affluens. Ibi nobilitatis flos primūm nobis occurrit, tam admirabili cupiditate literarum incensus, vt vndique sibi doctrinam, & suis cōgreget. Nam partim ad nos ipsi deuolant, partim ad se nos euocant, penē omnes ita sentiunt, ita loquuntur, ita præ se ferunt, vitam sibi vix hominū videri doctrinarum expertem, frustra que se possessionem agrorum suis liberis, & fūdorum relinquere, nisi sapientiam, & moderationem, artium studijs colligant, quibus rectē facultates suas administrare possint. Ex hoc generoso nobilitatis ardore, non vnus, aut alter, se nobiscum coniunxit, sed integræ aliquot propemodum familiæ

Q. I.

nostram

nostram in academiam infusæ sunt, & discendi causa nostros ad cœtus se aggregauerunt. Rutlandiorum præclara societas fuit, Matrauersi comitatus insignis. Sed Matrauersus ipse singularis inter omnes, & cuius pubertas multorum iuuentutem omni laudis genere transcendebat. Hauardorum adhuc globus cohæret: magna spe Suffolciensium par summum, & excellens, nuper est mortuum. De quibus, cum sua, tum etiam matris honoratissimæ causa, longa mihi sumenda esset oratio, nisi memoria viueret illorum in libris, & nisi separatim in eo, quomodo poteram, elaborauissem. Omni autem hoc sermone nostro videmus effici, minimè nobis illa negligi debere, nostræ tot personæ, tam illustres, quæ tantoperè concupiuerunt, nec præmijs carituras apud parentes artes nostras, quibus pueritiam filiorum suorum imbui voluerunt, & adolescentiam institui. Quid si planè scire volumus, aliquantò adhuc propius

pius intrare licet, & ad illum interiorem ascendere senatū regiæ maiestatis, qui primū eloquentem habet illum Ceciliū, alumnū olim, & incolam nostrum, nunc laudissimum sanè virum, & magno grauissimarum rerum vſu confirmatum. Is autem ita doctrinæ deditus est, & doctis viris, vt in illis, quantū potest, acquiescat, & quod respub. temporis relinquit, totum ad hanc delectationem seuocet, quam penè solam ingenuam, & homine liberali dignam putat. Northamtoniensis cupiditate nostrorū studiorum ita flagrauit, vt ad illa cursū equorum incitaret, nostrisq; subsellijs egregius hæros, hominum nostrorum sermonibus operam dans, se collocaret. Qui cum suos hæredes fortè non haberet, asciuit ex nostris externos, & illorum tenuitatem eximia liberalitate sustentauit. Suffolciensem verò, deus pro Suffolciensi subiecit, tanta rerū omniū similitudine, nihil vt penè intersit, nisi quod in adolescente præclarissi-

Q.2.

mam



mam indolem admirabamur, in viro maturam veneramur, & perfectam virtutem, in illo spem sequebamur, in hoc tenemus ipsam. Reliquis ita confusi sunt omnibus ornamentis, vt non hospes in alienum, sed ipse mortuus Suffolciensis in suum rursus locū immigrauisse videatur. Henrici ambo, & quidem ex eadem domo, ambo doctrina præditi, doctorum cultores sanè præcipui, clemētibus ambo naturis, vterq; munificentia maxima, comitate summa. Quid autē Russellius? quàm benè bonus? quàm piè doctus? quàm constanter Christianus? Iam Northūbriensis etiā, licet planè Musarum voces propter Martis strepitus exaudire non poterat, tamen procul auscultādo tantū arripuit, vt intelligat sanè satis. Et qua in re se non nihil sensit impeditum, in eo filium Varuicensē (adhibito ad hoc ipsum ex nostris peculiari magistro) perpoliuit, præstantem illum iuuenem, non solum omni laude reliqua populari, sed etiam hac

hac nostrarū literarū, & scientiæ. Tum etiā gener est eiusdem ducis Sidnæus, non solū præclaro Musarū, sed etiā amabili Gratiarum choro stipatus. Quod etiā Suffolcien-  
fis in Iana sua prouidit, quæ mihi penè ex animo exierat, cum huiusmodi sit, & ore, & pectore, vix vt ætas, præsertim in illo sexu, tantam eloquentiæ videatur, & prudentiæ coniunctionem habere posse. Sed hanc nobis admirationē minuit lectissimum illud, & lautissimum par regiarum sororū, quarum maior natu Maria, talis omnium cōmemoratione celebratur, qualem in veteri memoria Læliam, aut Corneliam meminisse possumus, nisi quòd huius excellentissimæ virginis vberior commendatio esse debet, quàm illa præclarissimarū fuit matronarum. Alteram ipse vidi præsens præsentem, & veneratus sum, non auream, sed gemmeam potius Elisabetham, oratione tam pura, & suauī, sententijs tam exquisitis, & crebris, comitate tam admirabili, pu-

Q. 3.

dore

dore quodam, & grauitate suffusa, vix vt cū  
ea loquēs, & eius sermonem attendens, ip-  
se loqui quicquam, aut etiam cogitare pos-  
sem. Sed longè mihi maior in fratre stupor  
obrepfit, quem maiestate regia deus inter  
nos elucere voluit, regalibus nimirum, &  
imperatorijs spiritibus puerum, & indole  
tam altè exaggerata, tam celso animo, tam  
eximia conspiratione virtutum vndique  
circumfluentem, tot vndique illuminatum  
ornamentis: vt eius maiestatem temporib;  
bus nostris diuinitus attributam dubitare  
non possimus. Nam quæ separatim in alijs  
illustribus personis singula cōmemorau-  
mus, horum ad regiā maiestatem vniuer-  
forum huiusmodi concursus sunt, vt eius  
habeat melleum os omnem eloquentiam,  
ingenium incomparabile sapientiam, per-  
fecta ratio iudicium, voluntas virtutem,  
diligentia doctrinam, deniq; reliqua om-  
nis præstantia laudem omnibus ex parti-  
bus insignem, & eminentem. Itaqué licet  
pre-



preticus, & fragrans iste fonticulus, occultis venarum vijs meet in toto corpore diffusarum nostræ reipub : tamen seclusis, & sepositis cæteris, nostrorum studiorum riuos tenebimus. Horum igitur tam puris, & altis gurgitibus regiæ maiestatis pubertas innatat, vt nullum, in vniuerso studiorum nostrorum mari, flumen sit, quo non secundissimè feratur. Sūma varietate literarum & aula est, & academia. Sed summā huius summæ varietatis integram, in augustissimo rege nostro licet cognoscere. Nec sine causa cognominamus augustissimum, in quo, maximus ille totius orbis terrarū imperator, Augustus, nō solū exequatus, sed etiā sēpissimè multiplicatus est. Nam ille Romanorum Romanam, noster hic Augustus Angliæ, Romanam primū ipsā exquisitissimè tenet, deindè Grēcā adiūxit, sanè præclarè. Cæteras autem transmarinas infudit, tāta venustate, & copia, singulis vt videatur tanquā vernaculis vti. Tum  
superi-

superior ille veterū temporum Octavius, solam ad bellicā gloriā adolefcebat, ciuile, & literatam laudē, primū vel nullam, vel sanē habebat pertenuē. Noster verò recentiorum iste temporum Edouardus sextus, & ad armorum scientiā magnificis velitationibus prælufit, & in pacis artibus, ac ornamentis sic euolauit, vt nulla maior eorū perfectio, non solū in actionibus apparere, sed ne in animo quidem informari possit. Deus, ō noster deus, qui puerum olim illum excitabas, Octaviū Augustum, quatuordecim annos natum, ad statum Romanæ reip. primū quidem ex cœno seditionis extrahendum, deindē multarum & magnarum terrarum possessionibus amplificandum, affla, & imple, vel pari, vel certē maiori spiritu, nostrum eadem ætate regem, non Octauium, sed quod amplius est, Henrici octauī filium, non iam Augustum, sed quod multò maximum est, augustissimum, puberem adhuc Edouardum sextum

sextum, senibus suis maioribus illustriorē. Hunc, deus, donū tuum, & thesaurum nostrum, tuum militem, nostrum imperatorem, tuum seruum, nostram salutem, tuis ita præsidijs muni, & vndique obsepi, nullū vt calamitatis genus hunc delicatissimum beneficio tuo nobis exortum florem perfringat, sed vt firmis stirpium fibris nexus, tuam primū religionem omnibus partibus constituat, deindē literas in toto regno, leges, & virtutem conferat. Et sanē serit ille quidē indies hæc omnia, & inter nos etiam, & his ipsis in sedibus nostris, in quibus quotidie insistimus. Quamcumque in partem nos commouemus, in regiam munificentia vestigiū ponimus. Regijs impensis linguarū, & artium scientia, pub. in scholis nostris obsolescens, reuirescit. Regijs impensis, solitudine dilabentes, & otio domus, in copiosissimam, & literis refertam societatem commigrauerunt. Regia prouisione leges, regia indulgentia immunitates nobis, &

R. I.

nostris



nostris, reseruamus, & damus. Regia denique sola, secundū deum, & clementia stamus, & munificentia sustentamur, & auctoritate floremus. Neque vnq̃ regia maiestas se nobis immutabit, cum literarū ipsa præcipuam cōmendationem, & summam habeat, cum nobilitatem ad nos aggregari videat, cum omnem senatum interiorē, vel eruditum ipsum, vel eruditionis admiratorem esse intelligat, cum familiam ipsam à doctis habitari, cubiculum etiam à literis foras obsideri, & literis idem intus circumsonare cernat, maximè autem cum magistris vtatur, altero Checo, incola quondā, & academię nostræ inquilino, dii boni quo viro? Quantū in illo faciūdiæ? Nō peregrinioris huius & degeneris, sed illius incorruptæ, veteris, & Ciceronianę, quàm magna & multiplex illi scientia, primū in perceptione linguarum, deindē in disciplinarū cognitione, quarū, quas prophanas, & gentiles dicimus, ita percurrit, & euoluit, vt sacras

cras interim, & proprias nostræ religionis edidicerit omnes, & memoriter teneat. Tū in tam infinita scientia, summissus animus, sui nunq̃, aliorū semper ingenuus laudator, & ad omnes bonos in sūmis occupationibus officiosissima comitas. Breuiter omnia huiusmodi, Cantabrigia sēper vt in illo lætari debeat, regia maiestas diū frui possit, & vt spero, fruetur. Coniunctus est in illo munere, qui literis, & pietate cū Checo coniungitur, Cocus, recondita scientia vir, exquisito literarum iudicio, multiplici doctrina, memoria sanè admirabili. Ceciliū ante bienniū, officij causa, sum ad ædes Coci prosequutus. Quā ibi domum vidi? imo parua quandā potius academiam. Equidē ibi versans, in Tusculanis mihi videbar viuere, nisi quòd fœminarum etiam in hoc Tusculano vigeat industria. Certè quidem in ipso Coco plus reperi salubris, & frugis doctrinæ, plus in liberorum educatione, piorum, & paternorum laborum,

R.2.

quàm

quàm huiusmodi domesticis parietibus videbatur contineri posse. Quoniam igitur artium nostrarum, in nobilitate tam longa series antegressa est, ut eadem regiae maiestati non solum plenissimè circumfusa, sed in illà ipsam vberimè infusa, deindè cum in preceptoribus regijs copiosissimè sit subsequuta: magnam ad extremum, & memorandam disciplinarum nostrarum amplificationem concludi necesse est, si circumfluentibus vndique præsidijs præclarissimorum ordinum omnis generis, & etiam flante fauonio maiestatis regiae, nos etiam continentibus studijs, & perenni labore, veram ad pietatem, & artium optimarum scientià vela demus. Quam in re vestris fractus officijs, & diligentijs, omnem amputabo reliquam orationem, & ad præsentis loci consyderationem vos reuocans, in eo sermonem terminabo. Quam igitur corà vobis nunc scholam teneo, quæ videtis à me hoc tempore vestigia imprimi, in eadem paulò



paulò antè inhabitauerunt, & in eisdem  
vestigijs institerunt duo Cantabrigiensis  
academiæ principes, & Checus, & Smi-  
thus, quos ego meis ita sermonibus semper  
inter se comparaui, neutrum vt in nostris  
studijs altero superiorem, & tamen singu-  
los alijs sanè omnibus anteferendos esse  
putarem. Hi, decursis inter nos paucorum  
annorum spacijs, ad arcem existimationis  
ascenderunt, & iuuenilium inter nos ex-  
antlatorum laborum, magnos, & maturos  
fructus percipiunt. Possem aliorum nomi-  
nibus nostrorum hominum volumen im-  
plere, qui literarum commendatione ma-  
ximas ad dignitates ascenderunt. Sed pro-  
peranti tantum genus ipsum fuit attingen-  
dum, & principes nominandi. Vos & isto-  
rũ imprimis, & cæterorum itineribus op-  
timorum, & eruditissimorum virorum, ad  
virtutem, & doctrinam ingredimini, pri-  
mum, vt deo, deindè etiam regiæ maiestati  
seruiatis, & reipub. postremò vobismetip-

sis honestatem, & academix gloriam afferre possitis.

GVALTERI HADDONI ORATIO,

habita Cantabrigiæ, cum ibi inter alios  
Visitator regius versaretur.

**T**Ristissimi rumores, Cantabrigienses mei, de clade studiorum vestrorum emanauerunt. In quo licet communem omnes boni dolorẽ acceperunt: tamen noster in eo singularis luctus fuit, qui fratres, & familiares vestri sumus. Eandem enim vobiscum matrem academiam agnoscimus, & veneramur, ex eisdem literarum fontibus omnes haufimus, hinc ortus disciplinarum nostrarum videmus, hinc commetationum incunabula contemplamur. Quapropter Vlysses si tantum Ithacam suam, tanquam nidulum in saxo suspensum, dilexit, ut illam immortalitati anteponeret: præstanti nos, & eximia charitate Cantabrigiam complecti debemus, arcem doctrinarum, & columnam omnis humani-  
tatis,

tatis, & scientię præstantissimam. Et profecto fratres ita facimus. Hæ voluntates, hæ cogitationes, hi nostri sensus sunt, vt omni genere laudis florentissimam relinquamus hanc nostram literarum, & artium cõmunem patriam, & semina pietatis in ea conferantur, & virtutis, vt iuuentus rectis salutarium præceptorũ institutis, ad verum dei cultum, & vitæ conuenientem honestatem conformetur. Egregium hoc propositũ, etsi valdè laudabiliter ab excellētissima regina profectũ, et sũma alacritate susceptũ à nobis sit, tamẽ vtiliter ad exitũ procedere nõ potest: nisi quãta clarissimę reginæ propensio fuerit nobis in rebus optimis præcipiendi, nosterq; labor erit separatinĩ easdẽ causas explicandi, tanta vestra sit illas excipiendi facilitas, & voluntas eisdem obsequendi. Frustrà etenim omnis præstantia legum est, nisi studia parentium inueniantur. Cur autem promptè vos ad ea debeatis offerre, de quibus in hoc tempore vobiscum



biscum tractaturi sumus, personarum beneuolentiæ ponderari possunt, quas deus in hoc negotio collocauit. Ortus ex augustissima regina est, quã si verè quis ex vniuersa præstantia cognominari velit, reip. nostræ stellam, lumen muliebris sexus, & planè gemmam orbis terrarum eam vsurpare poterit. Hæc omni genere literarũ, & linguarũ excultissima princeps, studia vestra diligit, vos amat, atq; adeo Cantabrigiense literarũ vetus hoc, & illustre domicilium magni facit, & ab alijs vt celebretur postulat, & disciplinarum vestrarum dignitatẽ amplificare concupiscit. Sæpè sciscitatur à me, quem sola commendatione literarum habet circa se, quantum vniuersa Cantabrigia neruorum habeat, quantum facultatis sit in singulis, quid vnusquisque vestrum vtilitatis ex quaq; disciplina possit ad remp. afferre. In quo licet tam copiose non possum respondere, quàm mea voluntas fert, & merita fortassè vestra requirunt,

rūt, tamen quod sentio planissimè loquor,  
& illam planè delectari vestris laudibus  
intelligo . Quapropter sicut neminem  
Anglia principem vnquam habuit, quem  
literis, & sapientia possimus, & omni re-  
liqua præstantia cum Elisabetha com-  
parare : sic Cantabrigia talem eam pieta-  
tis adepta patronā, & virtutis est, qualem  
nec habuit antehac, nec deinceps arbitror  
aliquando habituram esse . Sequitur illu-  
strissimam reginam cancellarius vester or-  
natissimus, imò verò studiorum, & artiū,  
& inprimis Cantabrigiensis nostræ sedis  
præcipuum, et sanè summum ornamentū.  
Cuius vt omnem excellentiam virtutis, et  
meritorum summatim complectar, equidē  
Anglia nihil illo secundum principem ha-  
bet melius, nihil prudentius, nihil synceri-  
us, nihil denique vestri, vestrarumq; rerū  
omnium amantius. Frequenter nos, prop-  
ter illā, quæ mihi cum eo est, necessitudi-  
nem, inter nos familiariter de statu vestro

commentamur, credite mihi, qui minimè  
certè libenter mentior, nunquam singuli  
magis dilexerunt singulos, quam ille vos a-  
mat vniuersos. Nunquam diligens pater-  
familias studiosius negotia priuatæ do-  
mus procurare visus est, quàm ille nostrā  
hanc, publicam quasi familiam doctrina-  
rum, administrat. Cum hac illius beneuo-  
lencia, deus maximam coniūxit principis  
gratiam, ex quo efficitur, vt tantum vobis  
prodesse velit, quantum possit, possit verò  
quantum profectò velit. Tertio loco su-  
mus hi, quos hīc ante vos astare videtis, fra-  
tres, et domestici sanè omnes. Cocus enim,  
præstantissimus quanquam ipse sibi magi-  
ster fuit, et domū priuatam ludū ad discen-  
dum esse voluit: tamen similitudine studi-  
orum, et assiduitate, planè noster est, et cum  
in illis, tum in omni, digna homine nobili  
scientia, tantum profecit, deniq; nos & ra-  
tiones nostras omnes tam impensè colit, vt  
huiusmodi Cantabrigia suæ laudis alum-  
num,



num, & querere deberet, si deesset, & nunc  
diuinitus datum nunq̃ debet à se dimittere.  
Reliqui, quales fumus (quoniam vobis nō  
fumus ignoti) vestrū est, nō nostrū iudiciū.  
Quales autē cunq̃; fumus, duplicē nobiscū  
cōmendationem afferimus. Vna est, quòd  
ex iisdē huius academix spacijs fumus, ex  
quibus vos existitis, atque adeò ex ipsis illis  
vestigijs, in quibus vos insistitis. Altera est,  
quòd partim adhuc in academix com-  
plexu fumus, partim ab ea tam recens di-  
moti, vt vicens adhuc, & flagrans in nobis  
sit huius communis nostræ matris acade-  
mix studium. Cuni autem hæc om-  
nia vobis ad optimam spem tam abundan-  
ter occurrant, crescat ex hoc tempore ve-  
strorum animorum intermissus ardor, re-  
uiuiscant intermorta literarum studia,  
rursus, tanquam ex noua stirpe, perceptio  
magnarū disciplinarū efflorescat. Quan-  
quam asperum censuræ nomen, & odiosū  
est, tamen nihil sæuum timere, nihil à no-

bis atrox expectare debetis. Descendimus ad medicinā academię languenti faciendā, sed ad hoc, nec ferrū, nec flammam adhibebimus, generosis fomentis vtemur, & mollibus remedijs. Deniq; talem curationem instituemus, qualem necessitudo nostra requirit, qui fratres, & vterini quidem omnes, nimirum ex eadem matre sumus. Vos autem illud ex Hippocrate memineritis, non solū debere medicū ita se gerere, quemadmodum oportet, sed & agrum, & assidentes, & externa. Multum enim ad academię salutem, & vestram interest, ut omnium rerū status, planē nobis, et apertē repræsentetur, ita ut est, ut rectē de nobis & benevolē sentiatis. Sic enim medicinam à nobis libenter sumetis, si iudicabitis amanter à nobis exhiberi. Nos autē omnes (hoc enim pro collegis meis affirmare possum) optimis animis, & præclarissimis voluntatibus ad inspiciendā præsentē rerum vestrarum conditionem accedimus,

vt illam omnibus modis, quantum possumus, meliorem efficiamus. Vobis deus de coelesti sapientia infundat, & submissos spiritus det, vt cogitationes vestras ad intelligendum exacuatis, & vos accommodetis ad illorum consilia, qui propter scientiam cum pietate, & beneuolentia coniunctam, saluberrimè vobis in omni genere officiorum præcipere possunt, & volunt.

## G. HADDONI ORATIO

ad pueros Etonenses.

**M**agnā locus admonitionis vim habet, suauissimi pueri. Nam hæc ipsa cernens, quondam mea, nunc vestra studiorū incunabula, communium memini vestrarum literarum, & vos amo tenentes illum vitæ cursum, in quo vos ipse sum antegressus. Quales enim vos nūc estis, tales nos olim pueri fuimus, et quales nos iam esse cernitis, tales vos dies viros efficiet. Quapropter si nonnullis in personis magna vobis occurrunt, & memorabilia scientiarū, & mo-



rum ornamenta, primū cognoscite principijs illos eisdem esse profectos, quibus vestræ iam ætates fundatæ sunt, deindè collaborate, similis vt progressus vester, & parad extremū exitus esse possit. Etenim hoc valdè sanè verisimiliter affirmare licet, quòd illa, quæ sunt in alijs maxima, nunquam in vobis erunt magna, nisi teneris in his annis vestris, cœperint esse aliqua. Cur autem ad principatum quendam laudis ab hac florentissima schola cōtendendum sit, paucula proponam, nota familiariter. Iucundior enim domesticarum rerum sermo vobis erit, & facilius in memorijs vestris insidebit. Primum autem, & summum est, quòd disciplinam habetis perfectissimam, & descriptissimam, per omnes literarum, & morum vestrorum partes permeantem. Etenim siue libris occupamini, siue iucunditati vos datis, siue foras progredimini, siue domi vos tenetis, siue precamini, siue vescimini, siue quid aliud agitis, vitæ custodes omni-

omnibus in locis dispositos habetis. Omni-  
nò vos commouere non potestis, quin sta-  
tim in aliquam censuræ particulam vesti-  
gium ponatis. Omnes loci pleni vobis of-  
ficiorum vestrorū occurrunt, omnia tem-  
pora, imò vero singula temporum momē-  
ta, certam habent, vel fructuosi studij ratio-  
nem, vel honestæ voluptatis oblectationē.  
Magna laus, & planè summa maiorū ve-  
strorum, qui vestre iuuentutis exercitatio-  
nes, tam sapienter dispertiuerunt. Vos ela-  
borare debetis, ne frustra tam egregia dis-  
ciplinarum, & virtutum adiumenta proui-  
sa sint. Quam ad rem crescet in animis ve-  
stris ardor, & alacritas, si diligenter, & at-  
tentè recordemini, qui, & vndè fitis, qua  
spe, & expectatione hīc collocati, quem ad  
finem reseruati. Nimirum regales ij cætus  
vestri sunt, regale semen estis, regalis fami-  
lia. Quapropter grandes, et vberes fructus  
ferre debetis. Regalibus stipendijs omnes  
militatis. Itaque singularis, & excellens in

vobis discēdi sit assiduitas, vt quantum fuit  
in munificentia principū admirabilitatis,  
& præstantiæ, tantum in literis vestris esse  
possit laudis, & industriæ. Nec frustra vo-  
bis labores erūt suscepti. Quot enim resp.  
dignitatum gradus habet, tot vobis præmia  
studiorum vestrorum præparata sunt. Et, si  
vobis magnū videtur, aurum, & purpurā  
intueri, seruorum greges, instratos equos,  
possessions etiam, et fundos, et cetera vitæ  
partim adiumenta, partim ornamenta: sci-  
tote vestris scientijs, & virtutibus ista quot-  
cunq; sunt, et quantacūq; sunt, deberi sanè  
omnia. Certè quidē in ipsis istis puerilibus  
subsellijs, decanos, collegiorum præfectos,  
iureconsultos, medicos, iudices, episcopos  
etiam, & senatores video. Nunc laborare  
vos aliquādiu non pœniteat, paulò post be-  
nificijs, & emolumentis, honoribus, & or-  
namētis, non solū explebimini, sed etiā ac-  
cumulabimini. Si dubitatis, hæc ipsa contē-  
plamini præsentia tempora, quæ maiorem  
vestris



vestris studijs honorẽ exhibuerunt, quàm vnquam optare ausi estis. Primùm excellētissima regina (qua nunquam sol quicquā in terris vidit speciosius, aut omni genere decorum, et ornamentorum illuminatius) cum vix adhuc in palatio suo constitisset, poëtam ad se vestrum admisit, poëma suscepit, & honorario luculento studia vestra cohonestavit. Deindè senatus, & nobilitatis flos, hæc literarum vestrarum curricula benignissimè visitavit, & indoles vestras, quantum tempus ferebat, degustavit, ad extremum præmijs vos, & laudibus beneficentissimè dimisit. Si capita vos, et lumina reipub. tantum in hac ætatula propter spem literarum nonnullam diligunt: quantum literas ipsas in vobis enatas, & efflorescentes amabunt, cū viri eritis, & singuli, singulis in reip. partibus collocabimini? Sed fortassè tēpus hoc longè vobis abesse videtur. Nō profectò, sed adest, aut propè est, volat enim ætas. Interim disciplinis vestris tot re-

perietis fautores, et virtutibus, quot in Anglia docti reperiuntur, & boni. Separatim autem, & præcipuè vos curabit indulgentissimus vester præfectus, qui vos amat non secus, quàm pater filios, qui vestras cõmoditates putat suas, qui ne viuere quidem deinceps ipse velit, nisi vos vt eruditissimos videat, & optimos. Astat autem ante oculos præceptor sanè laudabilis, qui vestras pueritias informat, ipse iuuenis, in quo magnum vobis solatium propositum est. Etenim ipsi, cum adoleueritis, ad aliorum gubernationem adhibebimini. Postremò me videtis, familiarem vestrum, & alumnũ huius scholæ. Quanquam autem me mei valdè poenitet, nec quicquam in me positum esse sciam, quo magnoperè possitis uti, tamen totum hoc, nescio quid nihili, quod in me est, commodatibus vestris, & opportunitatibus do, dedicoq; . Nec enim quicquam in vita mihi potest optabilius accidere, quàm vt hæc nobilissima literarum

rum sedes, plurimos subministret egregios, & principi seruos, & reipublicæ ciues. Atq; hæc sūt illa paucula, quæ in hoc tēpore volui attingere. Cū ætas se vestra corroborauerit, et ematuruerint animi, plura vobis (si opus erit) & grauiora proferam.

Interim viuite, valete, & crescite, vt deo gloriæ, reip. honori, & vobismetipsis emolumento esse possitis.

*Finis orationum.*

**T. 2.**

**Gual-**



148  
G V A L T E R I H A D D O N I,  
legum doctoris, sereniss. regine Elisabe-  
*thæ à supplicum libellis, Epistolæ, à*  
*Thoma Hatchero Cantabri-*  
*giensi collectæ.*

G. HADDONVS ILLVSTRISSIMO

Henrico Brandono Suffolciensi duci

S. D. P.

PRæstantissime dux, nunquam omninò  
defuturam mihi orationem existima-  
ui. Deest autem profectò. Quibus enim  
verbis te affabor? Gratias agam quod me  
tanti facias? Cōmune, & translatitium est,  
& cum omnia cumulauero, nullam par-  
tem assequar tuorum meritorum. Cuius-  
modi enim est hominem plebeium, & te-  
nuem, & si non omninò abiectum, tamen  
vnum è multis, iacentē in morbo, & cura,  
non solū domi in ipso miseriarum hospitio  
visitari, sed etiam cum erepsissem ex eo,  
quemadmodū potuissem, aduolauisse sta-  
tum tuam omni genere honoris confertam  
perfo-

personam, & discessum meum praesentia tua cohonestasse. Non multū (vt scis) eo tempore sermonis mihi fluxit, tantum de generosissima cogitanti tua natura, prorsus vt reliquū omne officium, non solum intermitterem, sed etiam amitterē. Ex eadem, tacita memoria tuę singularis, & infinitę beneuolentię est, quòd in literis ista nō pono, quę animo firmissimo tenebo. Tandem deus mihi corpus suppeditet, de voluntate spero te dubitaturum non esse, interim absens vota faciam ad doctrinam, & prosperitatem tuam. Hoc etiam non præcipiens quidē (nec enim decet) sed admonens, vt Ciceronis patris ad Ciceronem filium, Suffolciensis matris ad Suffolciensē gnatum, regis etiam, & reip. consilium esse existimes. Disces quā diu voles, tam diu autem velle debebis, quoad te quantum proficias non poenitebit. Nunquam vna fuit tam pretiosa sentētia. Quod facilē tibi probarem, si per partes eam liceret euol-

uere. Sed nec mihi licet, nec ad te opus est, cuius animaduerti tantam discendi nō solum cupiditatem, sed etiam assiduitatem, et constantiam, quanta cum te ipsum in primis, deindē matrem, & remp. olim lætaturam esse confido, & planē iam animo provideo. Morbus vrget, itaq; te dimittam, illud apponens, nec Ciceronem, nec stylum tibi intermittendum. Stylus enim optimus dicendi magister. Si continua Ciceronis lectione confirmabitur, vnus, aut alter annus, talem nobis Suffolciensem afferet, qualis nunquam Haddonus fuit, quem multitudo aliquid esse credit, nimirum ipsa quoniam parum intelligit. Hunc diem maturet deus, vt mater in eo triumphet, quæ cum propter hanc rem tantum capiat laboris, æquum est, vt aliquem ex eo insignē, & præstantem fructum præcipiat. Sanē quidem equissimum est, & tibi non dubito ita videri. Vale, & me dilige absentem, cui tantum præsentī tribuis, vt communis opinio



pinio sit me à te amari. Ego summam, vt  
more meo loquar, tibi seruiam. Vale.

## EIDEM.

Diligenter, & laboriosè fecisti, præstantis-  
sime Suffolciensis, quòd tam celeriter  
ad Ciceronē ingressus es, & benè est, quòd  
votum in illo tuum fuit, vt ita faceres. Meū  
certè mandatum non fuit, consilium fuit,  
cui te parere lætor, nec dubito quin tu læta-  
bere. Dicis valetudinem tuam cursum re-  
tardauisse, quod mihi percomodè accidisse  
videtur. Nec enim te nisi febricula retēta-  
uisset, nos tam incitados impetus videre po-  
tuissēmus. Quòd de te confidis, & pro mea  
salute verba facis, vtrunq̃ue mihi iucun-  
dum est, & te in spe optima esse, & me-  
am esse tibi sanitatem optabilem. De Ci-  
cerone tibi iudicium sumis, aut non sumis  
quidem, sed si detur, videris non recusatu-  
rus. Vtrunq̃ue rectè. Dijudicandum est e-  
nim inter omnes, & omnia. Cuius rei Ci-  
cero

cero nobis ipse grauiſſimus author eſt, & tamen aptū ætati tuæ fuit, & verecundiæ, non ipſum ad tam ſingularem virum irruere, niſi petita venia. Sed eam requirenti quis concedet? Equidem difficile eſt dicere, ſed tamen euomuerunt noſtra tempora quosdam Anticicerones, qui largius quàm tu poſtulabis. Sed tu modeſtè petis, & Ciceronem vberius intelligendi cauſa, non peruerſè calumniandi. Quapropter æquiſſimum eſt rogatui tuo ſatiſſieri. Quemadmodum enim in repub. nemo tam potens ciuis eſſe debet, qui, ſi opus erit, legibus cōuenire non poteſt: ita nec in literarum rep. quiſquam ſic vltra communem omnium ſortem tranſcendat, vt non ingenij, & eloquentiæ, ſi res foret, rationem reddat. Hanc ſemper auitam libertatem noſtri maiores aſſumpſerunt, & eandem nobis, quaſi liberis, hæreditatem reliquerunt. Ita que nec præſtantia te Ciceronis exterreat, quæ modeſto contradicendi ſtudio magis creſcit,  
cum

cum propius noscitur. Nec meum te iudicium de Cicerone perturbet, quod illos contra Ciceronem furiosè clamatores, nō fert: studia discentium amat, & adiuuat, quorum est Ciceronis admiratio, literarū, & eloquentiæ. Nec enim in vllis alijs benè comparatis secus accidere potest. Tandem adfers, in quo maiorem Cicero facundiæ, quàm veritatis rationem habuisse videtur, nec id tamen, nisi pace mea, vis videri audere. Diffidenter tu quidem, aut dissimulāter potius, sed tamen grauitè, & decorè. Quanquam enim nec scientiæ, nec literis, quæ nullæ in me sunt, tamen omnes certè meis rectè defers, & Ciceronis tanta maiestas est, vt nec reprehendi quidem sine honoris præfatione debeat. Sed quid est tandem, in quo non optimè Cicero? Quoniam oratorem perfectum, perfecta doctrinarum omnium cognitione complet. Primum nusquam hoc dicit. Crassus dicit, aut ibi Crassus cum Cicero sit, est etiam An-



tonius, qui Crassum oppugnat. Nullū igitur peccatum Ciceronis ostenditur, qui nihil ipse affirmat, diligentia cernitur infinita, quòd varias doctissimorum hominū conquisitas opiniones in hunc librum coniecerit. Quod libenter ad te ex hac causa allego, quoniam in eo perpetua defensio est vniuersæ Ciceronis philosophiæ. Sed ad hanc ipsam defensionem opus est alia defensione. Nec enim probo, inquis, incertā hanc, & perplexam academiam, mentium nostrarum perturbatricem. Scio ista folere iactari, sed illorum voces sunt, qui vel penitus se ferè alienæ sectæ dediderunt, & ita necessitate constricti tenentur, aut ij sanè sunt, qui nullam sectam ex omnibus benè, planeq; perspexerunt. Hæc ego mihi non postularem vt crederes, nisi cur ita esset afferrem, si paulò essem firmior. Nunc autē ægro vacationem da tantisper, donec reuixero, aut in Ciceronem ipsum intra, & inspice, quod multò melius est, modò eugiles,

giles, & suis eum ponderibus appēdas. Sed  
vehemens es, & pugnare vis, nisi corporis  
rationem haberes, primū tui, deindē etiā  
mei. Facis sapienter, quōd tibi parcis, hu-  
maniter, quōd mihi, pręsertim quum labo-  
rem, vt tu confiteris, grauius, & periculo-  
sius. Nec solum corpore non cohæreo, sed  
ne animo quidem consisto, quem tu quidē  
florere dicis, & vigere, sed ego contrahi  
sentio, & cōcidere. Quod nisi ita esset, hęc  
ipsa neruosius, deindē etiam tanta vberta-  
te, vt copiam, non Atticam illam quidem,  
quam requiris, sed Asiaticam, quantū qui-  
dem ego pręstare possum, facilē agnosce-  
res. Nunc satis erit ad singulas epistolę tuę  
partes separatim respondere, quod non so-  
lum mihi necessarium fuit propter mor-  
bum, sed etiam, vt reor, tibi ad vtilitatem i-  
dem erit commodissimum. Lux enim do-  
ctrinę, & ingenij in disputando, in scriben-  
do, denique in omnibus doctorum con-  
gressibus est, vt aptē, & ordine ad illa ve-

niamus, quæ ab alijs in quocunq̃ue genere sermonis posita sunt. Huius facultatis non viam ostēdi (nec enim tempus aut valetudo mea fert) sed quædam vestigia meis in literis adumbraui, de quibus vt melius existimes, tuas ad te literas remitto. Facilius enim comparatio sententiarum rem iudicabit. Sed hoc omninò prouisum sit, vt postq̃ literas consyderaueris, statim eas rursus eures ad me proficisci. Tuum enim hoc exemplum, quasi tuæ voluntatis obsidem, diligenter reseruabo. Cum enim post vnum, aut alterum annum deus quidem aulicus eris, & ego miser homulus eo fortassè ad repam, tum si per magnum fortunę tuæ strepitum perumpere non potero, aut sumouebor, has pro me literas supplicare iubebo. Rides, & me iocari putas. Sed ego si seriò excludar, seriò ita faciam. Quod breuî mecum fore polliceris, agnosco bonitatem tuam, & quidem iam agnoui, quoniam me superiore nocte visitabas, & si meæ

con-



cōditionis humilitas pateretur, eandē sēpē optare in recognoscere. Nunc præscribam nihil, ne petā quidem, ne nimis ambitiosus esse videar. Hoc profitebor breuiter, te, quoties ad me ventitabis, non solum honori esse summo, verum etiam singulari voluptati mihi fore. Terminas exemplum in salute, quæ licet magnam, & multiplicem delectationem allatura esset, si post tempestatū terrores, & ægitudinis fulmina rursus affulgeret: tamen vtinam sanitatē meam nunquam recuperare, nisi ad hæc duo, eam præcipuē dari velim, primū vt reip. & regio officio, in quo sum, inferuiā, deindē, vt primū matri diuinissimæ, tum tibi etiam, & fratri Carolo me penitus dedam. Obruor enim matris in primis, tum etiā tuis, & familiæ vestræ beneficijs, quàm, sed nihil dicam amplius. Si recollegero me, tum videbo. Conclusa igitur tandem exempla. Tres sunt res, quarum non temporariam, sed æternam mihi veniam peto.

V.3.

Nam

Nam semper peccaturo perpetua venia opus est. Vnum est, vt in his literis, dominationis, & celsitudinis, & cœtera tuæ dignitatis vocabula non expectes. Cum opus erit prolixè, & largè dabo. Nunc cursū nostrū impedirent, et tua tam generosa natura est, talem vt iacturam propter doctrinæ lucrum facilè toleraturus sis. Alterū est, quòd optima, & innocētissima hæc exempla aliquādo clam, aliquando sum apertè calūniatus, quod & nunc faciens, & posthac etiam factururus eodem modo, si tu feres, quoniam ad vtilitatem, et ad eruditionem tuam refero, & te in eo mihi æquissimū fore non dubito. Extremum est, vt si nescio quis ille Haddonus à te expectatus, & ab alijs prædicatus, in meis hīsce literis non apparebit, morbo illum absumptum putes, & hoc eius relictum qualecunq̃ue simulachrū non aspernere. Finis, si vnum adiūxero, te si ad me scripturus sis, quod ego in primis optarem, nisi tibi graue sit, in omnes partes me-

as literas verses, & ventiles, fatis sumastē-  
poris, & singula perrimeris. Nam rectissi-  
mè Cicero cogitationē subitam, & fortui-  
tam damnat, meditatam, & accuratam ve-  
hementissimè laudat. Scio quid dices, ni-  
mirum ignaviæ me latebram quærere. Sed  
non est ita profectò, nec secus loquor quàm  
sentio, nec quicquam est in hac re aliud, nisi  
quod ad officium meum, & etiam volun-  
tatem tuam pertinere credo, nihil vt eorum  
prætermittam, quibus tu plus scientiæ col-  
lecturus sis. Itaque faciam quod potero.  
Vale.

## EPISTOLA AD ILLVSTRISSIMVM

ducem Northumb. academiae nomine scripta.

MAGNAM præstantiam tribuit tibi deus,  
tum animi, tū corporis, illustris. Nor-  
thumbriensis, & eam in excelso dignitatis  
loco collocavit, vt omnibus reipub. parti-  
bus lucere possit. Nam & terra, & mari,  
domi, & foris, in bello, & in pace, tua  
sic industria vigit: vt & maritimi labores  
cum



cum terrestribus, & domesticę laudes cum  
externis, & bellorum tempestates cum pa-  
cis temporibus contendant, nec planè sciri  
possit, vtrum plus te foris hostes metuant,  
an domi ciues amēt. Vtrum melior in acie  
sis imperator, an senator in prætório. Qua-  
propter tua cum multiplex virtus tam latè  
manet, & per omnem rempub. permeans,  
integros alijs fontes patefaciat: nobis, vti  
speramus, riuulos suę benignitatis aperiet,  
nostram parvam hanc, sed non parui mo-  
menti literarum rempub. consilio reget, sa-  
pientia moderabitur, authoritate defendet.  
Qua tuę clementię fiducia, summum tibi  
nostrum magistratum, summo consensu  
nostro mandauimus. Qua in re voluntates  
nostras percenseri volumus, non munus  
appendi. Nec enim tibi licet ex nobis cres-  
cere, nos à te quidē amplificari possumus.  
Quod si nobis negas, da sanè literis, quibus  
si non annuis petentibus, at concede sup-  
plicibus. Tuę summę sunt opes, nostrę dif-  
ficul-

ficultates maximæ, non opes dicimus ex  
arca, sed authoritatem ex actis. Quæ cum  
immortalitate digna sint, nostris artibus  
etiam erunt, in quibus theatrum inest cla-  
rissimum, & ad posteritatē vsq; resonans.  
Ordine venimus, procurata iam abste re-  
liqua repub. Disciplinarū igitur hanc no-  
stram, tempore postremam, dignitate pri-  
mam ad te venientem, & tibi se offerentem  
causam, si prius ignorabas nunc cognosce,  
si prius intellexeras, recognosce. Doctrina-  
rum ad duces cura pertinet, rerum nempè  
præstantissimarum ad nobiles personas. I-  
taque nostras literas, clientes tuas ad te in-  
tromitte: quarum si dignitatem sustenta-  
ueris, illarum monumentis vicissim deco-  
rabere, magnaque dans illis adiumenta  
presentium temporum, maiora rursus ab  
ijsdem accipies futurorum, & æternitatis.  
Studiorum nostrorum laxa linguas, ut illis  
tua fama feratur, quæ cæterorum illustrata  
laudibus ornamentorum, hoc solum desy-  
derat

derat magnificum ex artibus nostris testimonium. Extrue tandem, & ædifica præclarissimè inchoatā maximis rebus gestis tui nominis celebritatem, quæ, cum ex castris in senatum profecta sit, ex senatu sanè in academiam prospectet, rerumque ciuiliū prouisione collectam gloriam ad literarum lucē accendendā exhibeat, quæ tota diffusa regno communes ab omnibus tenebras auferens, ac à te elata clarissimum tibi splendorem, et tuæ familiæ afferet. Deus omni rerum prosperitate tuum honorē cumulet. Vale.

G. HADDONVS IOANNI

Checo, equiti aurato. S. D. P.

QVo die vester ad nos Acrus accessit, vir eo loco dignissimus, in quo iam est, eodem ipso die, atque adeò eadem propè hora, tuus Chrysostomus de fato sex orationibus pertractans mecum fuit, ornatissime Chece. Maximum iste liber mihi desyderium attulit tuæ vocis, tuæ consuetudinis,

tui



tui ingenij, quæ sanè omnia mirabiliter hoc scriptum, tanquam effigies quædam animi tui, repræsentauit, vt non tam mihi vox in hac disputatione Chrysostomi, quàm tua sonare videatur. Ita confertum totum hoc volumen est præclarissimis de deo sententijs, tam elegans est earum collocatio, tam apta rebus verba, tam venustæ translationes, tam familiares, et iucundę narrationes, tantus argumentorum contextus, tanta totius orationis cum causa consensio. Quæ nimirum omnes proprię virtutes sunt, partim naturæ, partim studij, partim scientiæ tuæ. Sed te laudari nihil attinet, à me præfertim, qui nec id ita facere possum, quemadmodum fieri debet, tuisque sic laudibus afficior, vt maiorem mihi dolorem ex eo, quòd te tali viro carendum est, afferant, quàm voluptatem, quòd te talem esse cognouerim. Id enim præstantissimũ conari ostendere, quo cum olim plurimum usus sis, iam egeas eodem, nec habere possis,

videtur hominis esse, suam vel ignorantis, vel amplificantis miseriam, quorum alterum hebes, alterum amentia plenum est. In quo mea, quàm ceterorū, conditio durior est. Quoniam alij quantū in literis excelleres, & ingenio videbant. Ego non ista solum, sed etiam interiora perspexeram diffusa per omnes vitę tuę partes ornamenta. Quę tum accuratē contemplans, quāta in te essent, magis eadem nunc requiro, minus ineptias, leuitates, & inscitias multorū fero nostrorum hominum. Sed quoniam hoc aut fœlicitati tuę debebatur, vt ibi potissimum esses, vbi latissimē manare tua diligentia in remp. posset, aut infœlicitati nostrę, tuum vt diuinū os amitteremus, quasi tubam clarissimam omnis disciplinę, minuenda nobis cura est, ne si grauissimē cōturbemur, aut remp. non satis, aut nos ipsi nimiam videamur amare. Optimē tuus Plato sensit, naturales quasdam rerump. conuersiones esse, nos vt commutatus nostrarum

strarum rerum status admodum commo-  
uere non debeat. Et quanquam corpustu-  
m abreptum nobis est, tamen humanitas,  
ingenium, studium, eloquentia, literæ, no-  
stris intersunt cōmunibus omnium scho-  
lis, & priuatis singulorum intimis cogita-  
tionibus. Studium, & humanitatem tuam  
Billus imitatur, Carrus verborum eloquē-  
tiam, & tantum in ijs profecerunt, quantū  
tu sanè probare velles, si Demosthenis al-  
terum causam tractantem, alterū suas au-  
dires. Sed hæc, & alia, quanq̃ sunt in illis  
maxima, tamen omnia quia non adsunt,  
& te magis admiror, qui meas aures imple-  
re solitus es, & his ipsis quanquam valdè  
lætor, tamen in illis acquiescere non possū.  
Itaque cum in Carrum ante aliquot dies  
incidissem, fui asperior, non quod illum nō  
amein, iuuenem me herculè optimum, &  
eloquentissimum: sed quòd ea lautitia sim,  
nihil vt feram, in quo deesse aliquid videat-  
ur. In quo facio sanè impudētissimè. Nam



alijs condono nihil, ipse peccans interim omnia. Sed de me nihil. Pergam ad alios. Christopheronus dialogum in scenā effudit, vt ebrij crapulas solent in mensam. Verbis textus fuit valdè bonis, & plerisque sententijs. Erant enim nō ex Cicerone, sed quod propius, & melius est, ipsius Ciceronis. Facetias de suo asperfit, non illas quidē Ciceronis, sed Epicuri potius. Conuitorū acerui, satyrā vt agnosceres, aut veterē comœdiam, expertem tamen omnis salis, & aculeorum. Quid queris? Non potuit melius, siquidem optimum est ipsum sibi constare, & esse quenquam sui simillimū. Pro cancellarium (nam rei nouæ nouum imponendum est nomen) assumpsimus D. Parkerum, cuius tu grauitatē, consilium, & literas nosti, nos etiam experimur. Catonem, aut Quintum Fabium in illo renatum putes. D. Smithus conserit inter nos literas omnis generis, ius ciuile docet, ad philosophiæ causas accedit, medicos etiam tentat

tentat nouos nostros, exemplo diui Pauli, fit omnibus omnia, fructū vt afferat omnibus. Recordus quidā exortus est apud nos medicus, vir humanitate singulari, scientia multorū opinione summa, mea verò mediocri. Is, vt olim Aristoteles, turpe esse putat tacere, et alios pati dicere. Tu græca nosti. Quapropter comitia instituit his ipsis tēporibus magna vulgi expectatione, mea penè nulla. Nam & ipse, & reliqui, quorū præcipue partes sunt, sentiunt forsan optimè, sed eloqui nō possunt. Pikeringus autem noster, qui ad illos oppositus est, non ignoras in quo genere sit. Sed quid hæc ego ad te, quasi ea tibi curæ sint, aut esse debeāt, posito maiores ad res gerendas, et cogitandas. Equidem ita est, & tamen vel singulari tua fretus humanitate, vel immensa quādā cupiditate tecum colloquendi, vix vllū ad te scribendi finem facere possem, nisi me tempus deficeret, aliaque difficultas impediret. Hoc tamen addendum est, iucundissi-

alijs condono nihil, ipse peccans interim omnia. Sed de me nihil. Pergam ad alios. Christopherfonus dialogum in scenā effudit, vt ebrij crapulas solent in mensam. Verbis textus fuit valdè bonis, & plerisque sententijs. Erant enim nō ex Cicerone, sed quod propius, & melius est, ipsius Ciceronis. Facetias de suo asperfit, non illas quidē Ciceronis, sed Epicuri potius. Conuictiorū acerui, satyrā vt agnosceres, aut veterē comœdiam, expertem tamen omnis salis, & aculeorum. Quid quæris? Non potuit melius, siquidem optimum est ipsum sibi constare, & esse quenquam sui simillimū. Pro cancellarium (nam rei nouæ nouum imponendum est nomen) assumpsimus D. Parkerum, cuius tu grauitatē, consilium, & literas nosti, nos etiam experimur. Catonem, aut Quintum Fabium in illo renatum putes. D. Smithus conserit inter nos literas omnis generis, ius ciuile docet, ad philosophiæ causas accedit, medicos etiam tentat



tentat nouos nostros, exemplo diui Pauli, fit omnibus omnia, fructū vt afferat omnibus. Recordus quidā exortus est apud nos medicus, vir humanitate singulari, scientia multorū opinione summa, mea verò mediocri. Is, vt olim Aristoteles, turpe esse putat tacere, et alios pati dicere. Tu græca nosti. Quapropter comitia instituit his ipsis tēporibus magna vulgi expectatione, mea penè nulla. Nam & ipse, & reliqui, quorū præcipue partes sunt, sentiunt forsan optimè, sed eloqui nō possunt. Pikerinus autem noster, qui ad illos oppositus est, non ignoras in quo genere sit. Sed quid hæc ego ad te, quasi ea tibi curæ sint, aut esse debeāt, posito maiores ad res gerendas, et cogitandas. Equidem ita est, & tamen vel singulari tua fretus humanitate, vel immensa quādā cupiditate tecum colloquendi, vix ullū ad te scribendi finem facere possem, nisi me tempus deficeret, aliaque difficultas impediret. Hoc tamen addendum est, iucundissi-

cundissimū id mihi fuisse, quòd abs te laudatus fuerim, sed latinè malle. Nunc enim interpreti credendū mihi de meipso fuit. Et græcè quenquam laudare, qui græcè nesciat, quale tandem esse putas? Ego me probari reor, tu fortassè reprehendis. Serio me puduit inscitiae meae, daboque operam ut meas ipse posthac laudes intelligā. Frater meus, quomodo potest, te salutat. Plus faceret, si plus auderet. Meam impudentiā vides, quē nihil pudet. De D. Coxo memineris, quid ante scripserim. Is vnus ex omnibus est, quē mihi fauere peruelim, & tamen idem solus est ex omnibus, quem ad id meis literis inuitare nequeam. Nescio magis illum amemne, an reuerear. Vtrūq; certè est. Cluium quæso vestrum meo nomine saluta, & illi mea fide omnia de fratre suo optima promitte, quantum quidem præsentia video. Nam soli futura dii sciūt. Tongum etiam saluta. Ignosce meis literis, fufis festinantissimè, & me dilige. Vale. Ex regio

regio collegio, pridie festum diui Matthie.  
Epitaphium attexui libro tuo subito quodam animi calore fufum, quod hîc subijciendum esse putaui. Rursus vale.

*Diuus Iôannes Chrysostomus aurea græca  
Fundere quod posset, nomen suscepit ab auro.  
Noster Iôannes sit nomine Checus eodem,  
Aurea qui græcis verbis dat verba latina.*

REVERENDO IN CHRISTO PATRI

Georgio Deio Cicestrensi episcopo, et collegij regij

Cantabrigiæ præposito, vicepræpositus, & seniores regij collegij,

S. D. P.

**N**Ec expectata nobis, nec vsitata tibi literarû tuarû seueritas, inscriptarum vicepræposito, sed scriptarum (vt videtur) ad nos omnes, animos nostros valdè fregit. Itaque communiter respondendû esse putauimus communi, vel expostulationi, vel (vt mollissimè loquamur) exhortationi tuæ. Complectemur autè paucis, vt dominatio tua planè intelligat, nihil magis nos

Y. I.

inui-



inuitos facere, quàm à te cum dissentire cogimur. Quanquam à te non dissentimus, ne tibi quidem respondemus, sed illorum criminationibus, qui tuam mentem per se placatam, & tranquillam falsis rumoribus, quasi quodam turbine, contra nostras salutare causas, & cogitationes excitauerunt. Primum Missas dominatio tua dimissas arguit, & nos confitemur. In eo recessum esse dicis ab institutis nostræ domus, & nos largimur. Sed easdem Missas solitarias, ut erant, & soliuagas recedere didicimus à pietate nostræ religionis, nec tuam dominationem de eo dubitare credimus. Equidem institutiones regię non dubitant, quarum præscripto de Missis non videtur nobis permissum, nisi quibus intexta sit corporis & sanguinis Christi communicatio, quæ cum in vna possit vberrimè disper-  
tiri, multitudinem ociosam, nec (ut usurpabatur) satis piam summouimus. Neque nobis ipsi fuimus authores huius rei; sed

voces

voces ad nos ex aula permanauerunt tam plenæ fidei, & authoritatis, vt tua dominatio si præsens adfuisset, eas repudiare nec potuisset, nec voluisset. Quare nullum in hoc negotio peccatū nostrū ostēditur, qui maturè potius, quàm serò, cum laude, potius quàm cū ignominia, cum primis, potius quàm cū postremis, regiorum edictorū sententiā, & sermone, & exemplo sancitā, quātūm licet, imitamur: manifesta vanitas illorum coarguitur, qui temerè nos, & præter leges hæc tentauisse dominationi tuæ renunciauerunt. Sed nouum est, & legis de eo verba non extant. Equidem nouitatis inuidiam rei salubritas tollit. Neq; nos tam altè sterimus, vt cæteros ferè possit omnes, nos nō possit excitare veritatis vox, nec tam superbi sumus, vt tales doctores recusemus, quales in hac causa dati sunt, nec tam nullis iudicijs sumus, vt literas ibi legis, & apices expectemus, vbi legis mens qualis sit appareat, ac legislatorum voluntas cuiusmodi

fit non ignoretur. Sed interim authoritas institutorum nostræ domus atteritur, ac etiam fides in periculum nostra venit. Equidem in aures tuæ dominationis ita videmus infusurratum esse, sed æquitas tua, si præses rem cognosceret, facilius nos liberaret. Nec enim quascunque minutias edictorum nostrorum, si communis noster consensus aut immutauerit, aut inflexerit, gratuitum in eo periurium versatur, quomodo tua dominatio nimis truci vocabulo posuit. Sed vel publicus quidam error est, si inscitia nostra sit, vel etiam communis quædam laus est, si correctio sit in eo cuiuscunque peruersitatis. Itaque cum pugnare videremus multis modis hanc Missarum solitariarum frequentationem cum rescriptorum regionum formulis, incidimus hanc in angulos correpentem, & seuocatam ad se pietatem, & tenebras obsolescentium errore vetustatis decretorum nostrorum, recentium luce regionum oraculorum perfudimus.



mus. In quo non periuri, sed pij, non dissipatores, sed custodes nostrarum constitutionum fuisse videmur. Nec tibi sanè ipsi aliter videremur, si præsens ista vidisses, nō absens audisses. Obijcis Missas &c. De Missis respondemus. Ad cetera tacendum est, quoniam nihil à te de illis positum est. Aliud nominas, non nostrum grande peccatum, sed grande mendacium illius, quid ad te attulit, disputari à nobis impie, & turbulente, cum gravissima tenerarum conscientiarum vulneratione, & singulari nostræ domus infamia. Vehemens, & horribilis oratio, sed quam academiae libertas respuit, modestia nostrorum hominum refutat. Nam ut omnia cuiusque generis in disputationibus nostris liberè possint inquiri, regium in hoc diploma nobis indultum pro nobis causam dicit, quod hac percriptione ad academiam nostram est, ut veritatis querenda causa omnes omnium controversiarum angulos excutiamus, modò per-

tinacia nostris sermonibus absit, adsit lenitas. Nos verò nec anxietatis causam infirmis conscientijs, nec infamiae nostro collegio dedimus, sed nostram ad veritatis iter allaborantem assiduitatem, si vel indoctorum hominum impudentia, vel impudentium hominum inscitia falsis maledictis ad huiusmodi prauitatem detorserit: dominationis tuae charitatē, doctrinā, & mansuetudinē obtestamur, ne cogamur aliena vitia praestare, ne plus credas alienis, quàm tuis, aut paucis, quàm omnibus. Quòd dominatio tua requirit, vt reponantur ea quae loco mota sunt: equidem adeò dominationē tuam amamus, & reueremur, vt omninò tua in potestate futuri simus. Sed rursus tanta sapientia dominationem tuam esse cognoscimus, tanta doctrina, tanta pietate, vt ista si propius aspiceres, & oculis tuis, nō alienis: certò sciamus voluntatem te tuam esse commutaturum. Quapropter agnoscimus (vt par est) in hac causa te iudicem, sed

sed appellamus. Quemadmodum inquis?  
 à te absente, ad presentem, ab ignaro rerum  
 nostrarum, vel non rectè in illis instituto,  
 ad scientem, & planè videntem qua via in  
 his omnibus processum sit. Interim vindit-  
 cias secundum libertatē petimus, post, quæ  
 præsens sentias, ad ea sic nos accommoda-  
 bimus, vt nec reuerentiæ, nec officij partes  
 in nobis vllas desyderaturus sis. Vale, &  
 dominationem tuā diutissimè incolument  
 nobis seruet Iesus Christus. Cantabrigiæ  
 28. Maij, è collegio regio.

G. HADDONVS ORNATISSIMO VIRO

D. Coxo regio cleemosynario. S. D. P.

QVo tempore Smithus noster tecū fuit,  
 (ornatus. præceptor) reuersus ad nos,  
 mihi narrauit, cum alia multa, tum illud in-  
 primis, quomodo de me subquestus sis,  
 quòd ad te literas illi non dedissem. In quo  
 licet valdè commouebar, tamen non tam  
 mihi molestum fuit, meum à te officium  
 desyderari, quàm iucundum fuit, tam ve-  
 hementer



liementer illud requiri. Nam quibus rebus  
facile caremus, illis cum adsunt non multū  
delectamur, & quæ cum absunt, dolorem  
afferunt, illorū nos præsentia iuuare solet.  
Itaque maximum iam, & singularem, ex  
facultate scribendi fructum cepi, cum te  
meas literas intelligam velle videre, quod  
aut iudicio facis, quo nihil ad existimationē  
meā aptius esse potest, aut amore, quo ni-  
hil est optabilius, aut utroq; , quod tale est,  
ut id optare vix auisim. Quicquid autem e-  
rat, mos certē gerendus voluntati fuerat  
tuæ, nec in eo tuæ debebam expectationi  
deesse, in quo plurimum ipsa illa expectatio  
beneuolentiæ cōtinebat. Nec ego tibi pro-  
fecto tum deeram, neq; officio meo, sed fi-  
des nūcio defuit, qui cum Oxoniū te dixis-  
set abesse, & diu abfore, causa scribendi ad  
absentem nulla esse videbatur, non scri-  
bendi non sanē nulla ratio fuit. Præsertim  
cum multa tempora viderem esse tibi satis-  
faciendi, nec si non satisfactū esset, tam ægrē  
crederem

crederem te laturum fore. Sed nimirum plus meum tibi debet ingenium, quàm putaram, & ego tuæ plus humanitati debeo, quàm cogitari potest. Itaque nullum tempus prætermittam posthac ad te scribendi. Impendeant vndiq; negotia, cogitationes, studia, occupationes omnis generis, difficultates perrumpã omnes, & hoc orationis exiguo munere defungar, exiguo sanè per se, sed ita demùm ingens esse potest, si studij tui magnitudine, ita, quemadmodũ videtur, crescat. Exeat, si qua fuit, exeat ex ore tibi, et ex animo superioris negligentia mei silentij, temporis illius obliuiscere taciturnitatem, vniuersam hanc culpam multiplicato, & subindè repetito studio dandarum ad te literarum emetiar. Quid enim per hæc ipsa studia, de quibus loquor, possum agere diuinius, quàm vt tecum in sermonẽ quàm sæpissimè veniam, à quo, si queam, abesse nunquam velim? Sed cupiditatem, & conatum quendam meũ, meis ad te ver-

sibus planè videre potuisti, quibus si cogi-  
tatis interesse potuisses, & scriptis, potius  
miserabilis illa tibi scriptio mea visa fuisset,  
quàm ingratum silentium. Nec tu magis  
animum meum videre potuisti, quàm ego  
tuum perspexi tuo te dignissimo carmine,  
quo me remuneratus es. Ignosces nimia  
cuidam, vel letitiæ meæ, vel leuitati, vel glo-  
riæ, vel nimijs aliorum studijs. Sed vt res  
gesta est, dicam. Cum Tius domum à te  
venisset, eodemq; tempore aliquot hone-  
sti, & docti viri, officij causa ( vt fit ) me-  
cum essent, visendi me, cōsolandiq; gratia:  
Tius apertus, minimeq; curiosus vir, meas  
literas exprompsit, & indidem aliquid à te  
dixit ad me inesse. Cum suam quisque cō-  
iecturam afferret, cupidissimè resigno lite-  
ras. Inspicio, percurro versus iterum, atque  
iterum, idque eo vultu feci, minimè vt ob-  
scurum esset, quemadmodum illis affectus  
essem. Concurritur ab omnibus, postula-  
tur vt legā. Lego minimè grauatè, primùm  
mea,



mea, dein tua. Tollunt manus, statim clamores, partim admirantium acumen tuorum carminū, partim elegantiam, partim venustatem relatorum ad verba verborū, partim humanitatem. Ego vocibus assentiebar omnium, immoderata quadam elatus lētitia, quōd tuam viderem tantam laudem summa cum honestate mea coniunctam esse. Extortum est mihi tuum exemplar, transfusum in chartas infinitas, passim tuum ingenium prędicatur, passim tuus filius legor, consignatus iam tuus amor erga me, testimonio luculētissimo tuorum verbum, sic in vulgus exijt: vt me non diligere posthac non possis, sine aliqua tuę constantię iactura. Sed cur, inquis, ostendisti? Imō non ostendi solum, sed etiam ostentaui. Si cur id fecerim rogas, equidem, vt ante dixi, nimia vel lētitia, vel gloria, vel inscitia, vel quauis alia re. Quod enim tantam vim habebat, vt magna meę ægritudinis ex eo leuatio fieret (quod profectō factum est) id

ego non predicarem: de eo non gloriarer: id ipse pre me non ferrem. Ego vero, & audissimè quidem, & adhuc hac ipsa contra molestias vtor præstâtissima medicina. Ignosco magna iam ex parte febris meæ, quæ nostrū licet congressum impediuerit, tamē carmine nos tali coniunxit, quale diuturnā memoriam, & plenā charitatis habiturum est. Ingens acerbitas cruciatus ex morbo fuit, sed propterea tolerabilis fuit, quoniam per omnium corpora perreptabat. Quod remedium, etsi Cicero proprium esse vult inuidentiæ, malis vt alienis lætemur, tamen hoc natura bonis etiam affert, non quidem vt alios calamitosos esse velint, sed vt illos mærores minus sentiant, quibuscum alios conflictari vident. Morbus igitur hanc solationē habebat, quod cōmunis erat, versiculi singularē, & eximiam hanc afferebāt lætitiā, quod eos ita ad me scripsisses, quomodo scribere solebas ad neminem. Academia nostra febre propemodum vniuersa

con-

conflagrauit, aliquot etiam flammis ardorum exusti sunt. Quos non nomino, quoniam tibi ignoti erant, præter fortè Wygamū, quem tuorum temporum fuisse reor, aut paulò recentiore. Regiā is theologiā apud nos edifferebat. Cur enim regia non appelletur, pro qua rex mercedem pendit? Utinam aliquis hoc loco dignus illi succedat in orationem. Certè nostra tempora contexta perpetuis morbis, & funeribus, voces desyderant plenas deo. Sed ut de me dicam, tam vehementer exæstuaui, mors ut mihi doloris morsibus optabilis redderetur. Nunc ex igne fum eiectus, sed fumo tamen, & cineribus obtegor, vix ut vllā ad perfectā salutē viā prospicere queā. Quod multo ferrem æquius, nisi magis matrem impenfarum magnitudinis tæderet, quàm me tædet ægritudinis morborum. Perferuntur enim indies ad me, cum matris ipsius literis, tum aliorū vocibus huiusmodi querelæ illius. Ecquando tempus erit, cum



tibi ipse sumptus suppeditabis? Ecquando vir hoc onere me leuabis, quo cæteri matrē adolefcētes leuant? Amici prædicātur, ingenium celebratur, literę magnum tibi nomē attulerunt, ego tamen semper exhaurior. Nimirum funduntur inanes soni, res non subest, frustrā tuū tempus, frustrā meæ opes abierūt. Has muliebres querelas minimè fortassè iustas, mihi tamen grauissimas, quoniam matris sunt, tu (mi præceptor) sedita, vel aliquo mihi procurato beneficio certę possessionis, vel eo si dignus non videor, at sanè oratione interim, si matrē nactus fueris. Vix vnus est è multis, qui facta verbis exæquare velit, tu solus ex omnibus es, cuius vincit humanitas orationem, non tuā modò propriam, sed omnem sanè omniū. Itaque taciturna fretus hac tua munificentia, spe me sustentabo sequuturi ex te aliquando fructus, quē mihi cum tribues, & matris sollicitudini tribues, & tuę glorię, et, si non literis, at certè studio literarum meo,  
nec

nec minimo, nec infœlicissimo. Vale. Că-  
tabrigiæ, ex regio collegio.

EIDEM.

NImium mea cupiditas festinauit (ex-  
cellentissime præceptor) immenso quo-  
dam elata te videndi studio. Quare factum  
est, vt in medium peruenirem concursum  
tuarum occupationum. Quod etsi tu, pro-  
pter infinitam occultabas, cum prudētiam,  
tum humanitatem tuam: tamen id mihi  
multis ex rebus facillimum erat cognosce-  
re. Quanquam igitur grauem me tibi fore  
dolebam, tamen beneuolentia me tua val-  
dè recreauit, quæ maior in tuis fuit grauif-  
simis negotijs, quàm aliorum summo in o-  
tione solet existere. Causa mei fuit itineris,  
primùm vt te viderem, quem tam libenter  
video, tempus vt omne longissimum esse  
credam, in quo à te absum, deindè tuam vt  
illam suauissimam, & eruditissimam vocē  
iamdiu peregrinatam ab auribus meis cō-  
prehen-

prehenderem. Hoc enim tempus esse sciebam, in quo principes audirēt nostræ religionis. Sed cum nec interrogādo potuissē exquirere, nec ex te scire liceret, cum tamē id (quantum meus pudor ferebat) vehementer agerem, quando tuæ partes certō possint expectari: vel hominum ignoratione, vel nimio pudore meo, vel taciturnitate tua, factum est, vt maximum mei laboris fructum amitterem. Nec enim parua fueram incensus cupiditate te audiendi, quem & puer, et adolescens ipse per me, & nunc vir ex aliorum ore admiror. Neque enim tua meas aures oratio, quanquā præsentes preteruecta est, omninō potuit effugere. Emanarunt enim ad nos, et adhuc per academiam disseminantur oracula sacrae scripturae, nō minus libero prompta, quam pio pectore tuo. Qua in re singularis foelicitas diuinæ cuiusdam tuæ moderationis est, omnium se iudicio probantis. Non enim hi solum, qui recto pede ad euangelium  
ince-



incedunt (scripturam enim sacrā suis verbis citandam esse reor) te maximi faciunt, sed etiam illa secta, quæ contrarijs institutis utitur, tuæ doctrinæ satis æqua est. Itaque mirificus est omnium consensus de tua pietate, & scientia, nec ulli ferè sermones nostrorum hominum, tuæ sunt expertes postremæ concionis, quæ licet talis perferatur sermone communi omnium, qualem eam ex te esse conuenit, tamen doleo me, qui sū alumnus disciplinæ tuæ, præsentē non fuisse testem tuæ sapientiæ. Non ista do tuis auribus, mi præceptor. Quē enim possim, cum mea sit aperta natura, tua sit singularis seueritas? Sed tua cum incredibilis beneuolentia longas requirat meas, & frequentes literas, cur non verissimarum colloquia nostra sint, & grauissimarum rerum? aut, quod tibi facere gloriosissimum est, cur non idem mihi sit iucundum dicere? Mihi quidem cum ex hoc ipso, tum ex reliqua præclarissimè instituta vita tua non

solum voluptas est ad recordādum. sed exemplum etiam ad imitandum, & tanquam formula proponitur ad viuendum, ad quā, si possem accedere, nihil requiri possit amplius. Sed de te satis, præsertim ad te. Nunc de me dicam. Postquam à te digressus sum, tædio iam affectus, & vrbis, & aulæ, in quibus nihil penè videram eorum, quæ volebam, præter te, propemodum inuitus ad Hertfordiam diueri, literas tuas ad principem D. Checo dedi, contra sententiā fortasse tuam, certè contra voluntatē meam, sed aliter me facere pudor non finit meus. Checus autē, vt semper ipse sui similis esset, principi literas ostendit, & in certo me loco posuit, in quo facultas esset cum videndi, tum affandi principem, cui de te tribus verbis percontanti, suauiter tamen, & perbeneuolē, cum paucissimis satisfecisse, perfecta legatione, statim domum cogitabam. Pridiē veneram, & summo rogatu Francisci cuiusdam, indolem ducis Suffolciæ tētaui,

taui, meherculè sciti pueri in primis, & dignissimi te præceptore. Quod supererat temporis illius diei, cum Aero & Tongo consumpsi, viris humanissimis, & vt videbantur, peramicis meis. Cum Checo multum non fui, quoniam vehementer occupabatur, vt apparebat. Postridiè cum princeps prætergressus fuisset, vt dicere cæperam, Checus ad me rediens, mecum agere cepit, vt illo die secum essem. Ego cum viderem illum plenissimum esse negotijs, et nihil ibi prætereà esse, quod magnoperè agerem, postpositis omnibus Cantabrigiam deuolaui, latebram tum animi, tum fortunarum mearum angustijs conuenientissimam. Et huiusmodi meum à te domum iter fuit, te, principe, & Checo visis & salutatis foelix, ceteris in rebus non nimis opportunum. Sed quid ego tecum, ista? quasi tua quicquam intersit, ego quid in via cōmodi senserim, aut incommodi. Primum quod Cicero dicit in philosophiæ studio fi-



eris solere, qui multum in eo viderit, ut reliqua consecetur: idem in beneuolentia mihi positum, & amore videtur, ut cuius maximis in rebus curam suscipimus, eius etiam ignorare nolimus reliqua qualēcunq; fortunam. Deinde Crassus in Ciceronis oratore mihi sapienter affirmare videtur, illū non debere liberum hominem esse putari, qui non interdum, omni solutus opere, nihil agat. Itaque solitos esse Scauolam, & Lælium, grauissimos viros, à reip. muneribus interquiescentes, mirabiliter repuerascere, & omni se iucunditati dare. Quo propemodum exemplo te præsens animaduerti, cum animum relaxare velles, nō quidem nihil agere, sed aut velitationē illā Croci cum Lelando perridiculā, vel reliquas Oxonienses nugas (ita enim profectò sunt) euoluere, nouū ut afferre possis, & ardens, ac multiplicatum studium ad maximarum causarum reipub. tractationem. Quapropter in vacatione grauissimorum

morum munerum quando tibi posthac otioso libet esse, non intempestiuè minutijs hisce nostris ad reficiendam mentem tuam abuti potes, minus profectò, tum ludicris, tum indoctis, quàm illa sunt, quæ tu nonnunquam animi causa ludens legis. Seriò, mi præceptor, ad te scribens, cum id copiosissimè facere velim, propter immensâ voluptatem tecum colloquendi, nullarum rerum sententiâ iuuenire possum, pondus habentem, dignum grauitate tuarum aurium. Gratiarum autem agendarum, aut exacuendi literis, & renouandi tui erga me studij ratio penitus sublata est, partim superiorum magnitudine tuorum meritorû omnè vincentiû meâ orationē, partim futurorû spe, non solû sermone, sed etiâ cogitatione mea præstantiorû. Ad hâc expectationē propriè meam, & ad cômunem reip. & religionis nostræ commoditatem, deus tantû tibi temporis det, quantû exoptatissimû tibi, reip. fructuosissimû, dei deniq; ip-

fius voluntati videbitur aptissimum fore.  
Vale. Ex regio Cantabrigiensi collegio.

EIDEM

VELlem quidem comitijs nostris interfuisse, ornatiss. præceptor, cum tua non nihil, tum maximè nostra causa. Nam hūc ipsum locum, & tempus vidisses, grauissimos testes excellentis et oris, & ingenij tui, & in illis ipsis academix nostræ spatijs constitisses, in quibus tam clara sunt impressa doctrinæ tuæ vestigia, nulla vis ut vllius rei tanta possit esse, tui memoriam nominis ut ex mentibus hominum euellat. Præterea nostram academiam, & illius instituta longo iam tempore internissa recognouisses. Et quanquam duos audiuisti principes tū dicendi, tum intelligendi, Smithum, qui nobiscum adhuc est, & Checum qui tecum viuit, qui profectò tales fuerūt, & sūt, ut nullus cum illis comparari possit nostrorum hominum, ne externorū quidem  
mea



mea sentētia, tamen Smithum rursus, tanquam Socratem audiuiſſes, aliorum loquacitatem interrogatiunculis irretientem, & maximas philosophiæ causas magna grauitate, summaq; scientia concludentem. Audiſſes præter illum nonnullos, quorum tu fortassis indolem laudare voluiſſes, & in illis ego tibi tuus discipulus occurriſſem, non qualem tot annorum studio, tuis informatum optimis institutis eſſe oportebat, sed qualem omnes ferunt, aliqui etiam laudant, vt doctum virum, omnes confitentur discipulum te præceptore dignum aliquādo poſſe fore. Iſta nonnullam tibi voluptatem vniuerſa fortassis attuliſſent, viro non solum eccellente doctrina, quod omnes ſciunt, sed aliorum etiam studio, quorum tibi literę perſpectę ſunt, quomodo ego ceteris vberius intellegere potui. Tua verò præſentia, ſi in hoc tempus incidiſſet, cum alijs periucundum id omnibus accidiſſet, tum meum in eo præcipuum, & ſanè mirifi-

rificum gaudium fuisset . Nec enim debeo, nec possum ignorare, cum vniuersam admirabili quodam amore nostram academiam comprehendas, quantum tamen mihi seposueris singularis, & infinitæ gratiæ, quam licet ipsam exæquare non possū, tamen voluntatem tibi profectò emetiar, quod etiam quomodo potuissem, propius ostendissem, si propius ad nos accessisses. Sed cum alia te maiora teneant, quæ nobis, & rebus nostris omnibus anteferenda sunt, non solum illis tibi non abeundum fuit, sed ne contingenda quidem à nobis erant, nec à me certè fuissent, nisi Checus, cui negare non possum, has à me literas ad te postulauisset . Quod eò non dico, quòd quicquam mihi iucundius sit, quàm ad te scribere (iucundissimum enim id est certè quidem, & semper erit, & ita, nihil vt aliud cum eo comparari possit) sed quòd timeo, ne meæ literæ quoniam in concursū quendam occupationum tuarum venturæ sunt, molestiam

molestiam tibi exhibeant. Ego vero cum de meis superioribus literis recorderer, cuiusmodi fuissent, magnam in illis metus causam inueni, quam nunc augere nolueram, nisi Checi voluntas intercessisset rogantis, aut authoritas potius iubentis. Nihil autem illis aliud à te peto, nisi primum ut illis ignoscas, ipsis fufis à me properanter, et secus quàm ad te decet, deindè, ut existimes, me te, ut præceptorem venerari, amare ut patrè, & ita videre cupere, ut huic vni rei omnia postponam. Me measq; res omnes commendo tibi, non ut sollicitudinem tibi aliquam ex illis obijciam, sed ut ea agas, si quæ sunt huiusmodi, ut nullo labore tuo, meis fructibus maximis effici possint. Vale. Cantabrigiæ, ex regio collegio.

G. HADDONVS THOMAE

VWilfotio S. D. P.

CVm antè te tantum diligerem, mi Wilfone, quantum tu intelligere potuisti, tamen crescit studium meum, studio tuo,  
Bb.i. quod



quod in tuis literis ita se effert, ut nullum  
penè maius intelligi possit. Videram antè  
strictum, & quasi per transfennam, indolem  
tuam, eiusque veluti formā quandam sum-  
mè probavi. Nunc omnibus ingenij parti-  
bus sic te ipse euoluisti, ut qualem ego te a-  
liquando fore sperarem, talè propè te iam  
esse intelligā. Quapropter danda tibi post-  
hac opera est, ne tempus hoc, in quo nunc  
es, quod ad maximas, & præclarissimas res  
adipiscendas tibi datum est, huiusmodi stu-  
dijs abeat, quibus maxima pars adolescen-  
tum, ætatis tuæ, se occupat. Si non magis te  
amarè, magis probarè, quàm cæteros, non  
magis istuc tibi, quàm cæteris præciperem.  
Nunc cum ea, quæ sunt in alijs mediocria,  
partim natura, partim diligens quædam  
optimorum authorum animaduersio in te  
summa effecerit, auget tua præstantia ti-  
morem meū, quoniam hoc multo iam re-  
rum usu sæpè vidi, foelicibus ingenijs, cu-  
iusmodi tuum esse reor, & planè scio, mul-

tas insidias tendi solere. Cōtra quas vt celeriter, et maturè te munire possis, aliquot tibi non praecepta solum ex libris, sed monita communis vsus ex vita tradam, quibus si tantum vtī velis, quantū debes, & quantū certè vis, illorum utilitas non his primis temporibus tuis definietur, sed in omnem reliquam etatem tuam hærebit. Quoniam autem te scire volo, quātam ad me tua scripta voluptatem attulerunt, & posthac vt alacrior ad scribendum sis, per omnes epistolæ tuæ locos peragrabo, neque profectò committam, vt tua vincat industria meam diligentiam. Primum igitur quòd me tam abundanter laudas, & te ipsum abijcis, facis in eo perhumaniter. Nam immenso quodam studio me exornandi tā longè vectus es, vt veras laudes tuas tibi ipse detraheres, & mihi falsas affingeres. Quia in re licet mendacium inerat apertum tuum, modestamen, & beneuolè mentiris esse visus es. Maximum autem ornamentum in ad-

olefcente pudore est. Quo fit, ut ipse sibi displicens, placeat alijs. Et in hac ætate tua præcipuam quandam commendationem habet, de se nihil ipsum gloriose loquentem, alios multum, & sæpè suis sermonibus celebrare velle. Nam cum omnis arrogantia odiosa est, ut ait Cicero, tum eruditionis, & ingenij longè odiosissima. Quo vitio si quis iuuenis animum suum tam vehementer disuixerit, ut contrariam rationem admirandi alios, seipsum extenuandi suscipere possit, quomodo tu facere mihi visus es, infinitam benevolentia vim isto modo colliget. Quare tuus de me tā honorificus sermo, mihi iucundissimus fuit, nō quòd ego dignus eo sim, sed quòd is annis, & ingenio tuo dignissimus fuerit. Itaque præceptum hoc Isocratis ad extremū te perpetuò tenere velim, ut amicitiam à laude, odium à reprehensione semper oriri putes. Omnibus enim ingeneratus quidam amor sui est, ex quo non solum id habemus, ut ipsi

nobis



nobis chari simus, & proprijs laudibus fa-  
ueamus, sed etiam illos vt arctissima bene-  
uolentia comprehendamus, quorum voce  
nostrarum rerum gloriosa commemora-  
tio proficiscitur. Quapropter hęc alios lau-  
dandi consuetudo, cum maioribus nostris  
tribuitur, officium, in focijs, gratitudo, in  
his qui sunt inferiores, humanitas appella-  
tur. Ipsa verò per se, quacunq; ingreditur,  
plena semper fauore, summaq; gratia est.  
Hęc autem tam diu non disputo, me post-  
hac vberius vt laudes, qui nunc etiam ni-  
mium a te prædicor: sed vt hanc quasi ma-  
chinam ad commouendas hominum vo-  
luntates adhibeas. Ausim enim affirmare,  
nō tam doctus, quàm quòd maius est, ex-  
pertus, nullam esse maiorem illecebram ad  
hominum vndique conquirenda studia,  
quàm pudor iste modestus est, de quo lo-  
quutus sum. Ego verò te quibusdam præ-  
ceptis non solum ad doctrinam, sed etiam  
ad vitam nunc insequor vt erudiam. Non

enim quia te ipse diligo, cæteris te inuisum  
esse velim, sed quemadmodum mihi cha-  
ruses, itidem alijs te, dignis tuo studio viris,  
omnibus esse cupio. Quanquam & aliud  
hoc in loco velim intelligi, de quo post a-  
pertius in illo literarum tuarum angulo,  
qui proprius tui amoris est. Nūc te sequar  
ad beneficia mea, quæ tu multò plura facis,  
& præstantiora, quàm reuera fuerunt. Sed  
nimirum nouis, & magnis afficiendus es,  
qui veterum memoriam, & exiguorū me-  
ritorum tam diligenter, & officiosè seruas.  
Et hîc gratitudo, quàm apta sit ad hominū  
voluntates alliciendum, allectas retinendū,  
immenſa de eo possit oratio sumi, sed inge-  
nium tuum video, meas occupationes re-  
cordor, et ad reliqua propero. Tantum hoc  
dico voluisse me, & adhuc velle, omnia tibi  
summa tributa, quæ à me possunt ad te pro-  
ficisci, nec me prius ab hac voluntate dis-  
cessurum, quàm tu à tuo, quo nunc esse vi-  
deris, animo discesseris. Equidem paucissi-

mi sunt, & semper fuerunt, quibus egregiè  
fari (plebeium enim nihil me vehementer  
iuuat) sed quos semel animo complector,  
ab illis nulla me res distrahere potest. Nihil  
enim periculosius in amicitiarum societate  
reor esse, quàm veteribus relictis, ad novos  
vitæ socios deuolare. Nam inconstantia  
magnam ipsa in se leuitatē habet, subitaque  
consuetudinis, & vsus nostri commutatio,  
plena maximarum rerum offensione est.  
Quauquam nos certè tot modis discludi-  
mur, vt paucissimis rebus coniungi possi-  
mus. Verum quoties tempus, res, locus fe-  
rent, promitto me nulli parti commodorū  
tuorum vnquam defuturum esse, nisi tibi  
ipse defueris, hoc est, nisi me, meaꝫ opera  
uti nolis. Quòd literas tanquā obsides tuæ  
voluntatis ad me dedisti, rectè quidem id  
ordineꝫ fecisti, nec maius tuum in illis  
mittendis studium fuit, etsi fuit certè ma-  
gnum, quàm meum erit in suscipiendis,  
tuendis, conseruandisꝫ. Comprehendā  
illas



illas omni beneuolētia, nec vnquam longē  
à me abire sinam. Tu meas ad te nunc pro-  
fectas, siue nuncias, siue obsides, siue admi-  
nistras meæ sententię, fac vt pari indulgētia  
tractes, ne, si tu semel eas à te dimiseris, in  
alienas fortē manus perueniant, & ibi sint,  
vbi ego eas minimē esse velim. Serio te ad-  
moneo, meas vt literas omnium auribus, et  
oculis, omnibus modis segreges, quarum  
etsi genus honestissimum esse vides, tamen  
suspiciones, & linguas hominum vitare  
non poterunt, si emanarint, adeò cogita-  
tiones omnium, & sermones occupat, par-  
tim inuidia, partim voluptas quædam alio-  
rum voces, & facta subauscultandi, pessi-  
meq; interpretandi. Qua igitur in re diu-  
turnus me rerum vsus erudiuit, id tu ex  
me disce, non solum sic vt scribas, & etiam  
ita viuas, laudes vt omnes, sequare paucos,  
arrideas multis, fidas penē nemini, audias  
alios diu & sæpē, dicas ipse raro & breui-  
ter, amoris signa plurimis ostēdas, amoris

verani

veram familiarem, & intimam coniunctionem, vel cum nullo suscipias, vel vnus is sit, quo velis, & possis solo ad omnia vti. Nam si cum multis te colligaueris, infinita sequuntur incommoda. Primum illis vniuersis seruiendum, quibus te semel dedisti, nec tuis institutis viues, sed alienis, quod si causa discordiæ coeperit inter vos, vt in multitudine fieri necesse est, tum familiaritatis, sermonum, & totius reliquæ consuetudinis vestræ poenitebit. Illi superioris fiducia societatis, quantum possunt, & sciunt, tantum volunt & audent, tu prioris metu coniunctionis, etiam in causa meliore tua cogêris obmutescere. Tum illud quâti est, tecum vt ipse viuas, & summa libertate tū dicendi, tum sentiendi fruire, videns aliorum interim & ridens in vtroq; turpissimā seruitutem. Ego certè me non libenter abdā in angulum, sed in coetu frequenter esse velim, & ita esse, non vt grauis videar, aut acerbus cuiquam, sed iucundus, & suauis

omnibus. Tu verò si vulgò te patefeceris, & naturam tuam denudaueris, in omnium incurres, vel dicacitatem, vel odium, vel reprehensionem, vel contemptum. Plurima sunt huius generis, sed omnia non possum vno tempore complecti. Quare totam hanc rem verbo concludam, meum ingenium, literas, vsum, existimationem, studium, me denique totum, quanti esse putas, tanti præceptum hoc meum tibi fit, familiares vt plurimos habeas, & quot voles, amicum vnicum, isq; talis sit, vt possis eum tanquam teipsum diligere. Sic in tuto semper omnis vitæ tuæ status collocabitur, & dulcissimum amici tui fructum vberimè percipies. Eum igitur vnum tibi solum dem amicum, quicum te oblectes, omnia communices, in cuius vfu mori, & sermonis conquiescas. Fortassis expectas vt dicam qualis esse debeat, quemque ego eum potissimum esse velim. Equidem optimum optarem, & amantissimum tui, sed  
iudi-



iudicium tuæ voluntatis liberum, & integrum in eo sumendo esse debet. Nam nec assiduitates, nec officia, nec authoritates, nec consilia, nec vlla res alia præter amorē tibi debet amicum seligere. Valent hæc alijs in locis, & singula proprias commoditates habent. In amico deligendo nihil præter voluntatem, studium, amorem, sequi par est. Quem igitur libenter vides, de quo libenter audis, quicum semper esse velis, si queas, cuius mores, ingenium, nomen, & totam formam omnium rerum vehementissimè probas, quem ægrè præsentem deseris, de quo absente frequenter cogitas, quem omni animo, sententia, mente intueris, hunc tibi potissimum, teque huic amicū designauerim, qui si non adhuc apparet, expecta donec apparuerit. Ex illo enim cumulus lætitiæ, solatium ægritudinis, alacritas in vita, ardor ad literas, delectatio rerum præsentium, spes futurarū, iucundissima recordatio præteritarū, omnis deniq;

ſyncera voluptas factorum, & dictorum  
omnis generis exiſtet. Interim donec talis  
inciderit, in libros, & literas te inuolue,  
quod non ita dico, quaſi te velim in cubi-  
culi tenebris, tanquam in ſolitudine quadā,  
iacere, ſed vt quacunq; ingrederis, animū,  
mentem, ingenium in perpetua commen-  
tatione literarum deſigas. Nec enim, crede  
mihi, libris inſpiciendis, & contrectandis,  
nec multitudine lectionis, nec diuturna  
commoratione in eiſdem locis, nec vlla tali  
re doctrina comparatur, ſed agitationis cu-  
iuſdā animi, memoriæ, cogitationis etiam,  
& intimi ſermonis mentiū noſtrarum totū  
hoc negotium eſt. Quapropter egregiè  
Cicero, viris eruditis viuere eſt cogitare.  
Lege igitur nec multa, nec diu, ſed multū,  
& ſæpè, & optimos authores, & in his ea,  
quæ ſunt optima. Totū tempus reliquum,  
vel audiendis alijs, vel antegreſſi proprij  
ſtudiij tacitis quibuſdam, & attentis cogi-  
tationibus tranſmitte. Quæ ſi feceris, om-  
nia

nia hac ipsa ratione consequeris, quæ vis. Nunc ad illam venio luculentissimam conditionem, in qua non solum literas, quibus admodum delector, sed te ipsum etiam quem plurimi facio, mihi offers. Equidem hanc ego conditionem, nisi certa quadam alia conditione mea, non accipio, quæ talis est, ut si quidem meus esse velis, totus in potestatem meam peruenias, nec alium habeas præter me, quem tanquam me ames. Magua sunt quæ tu dicebas in isto loco, cum ad me scriberes, & hæc nimirum maxima sunt, quæ nunc à te requiro. Iungamus igitur magna maximis, aut omnem coniunctionis spem abijciamus. Tuarum literarum quicunque modus fuerit, mihi sanè semper erit idem iucundissimus. Nec id cures, quòd instituens ad omnia respondere, multa præterierim. Factum enim hoc est, partim alijs occupationibus meis, quarum aliquis ad te fructus, si velis, paulò post perueniet, partim studiorum



tuorum consyderatione, quibus diu te meis literis auertere nolebam, partim vt nouis posthac argumentis vtar ad te scribendi. Quapropter tu styli hunc vsum ne intermitte. Nam alijs, aut crudus, aut occupatus fortassis ero, tibi quidem certè semper respondebo, siue ad me scribenti, siue me amanti, siue ad me venienti, siue de me cogitanti. Tu certè quantum me amabis, tātum ad me venies, scribes, tantum loquere mecum & viues, & iniussus hæc audacter omnia mecum familiarissimè tractabis. Hæc igitur quò maiora, vberioraq; erunt, eò me impensius à te diligi credā. Quantum autē ab his proprijs amicitiae muneribus abfueris, tantum ego te à veri amici natura abesse iudicabo. Vale. Ex Musæo.

EIDEM.

LIteræ tuæ ad me peruenerunt, in quibus gratissimum mihi fuit studium tuū, tum erga doctrinam, tum erga me. Communis  
enim

enim laus est honestorum adolescentum  
velle erudiri, propria verò tuæ beneuolen-  
tiæ est, quòd ex me potissimùm discere vis.  
Excusas multis verbis, quòd non antè ad  
me scripseris, & promittis te in hac re dili-  
gentem fore. Vtrumque facis modestè, &  
perhumaniter, quòd & de tua negligentia  
confiteris, & te ipse ad officium reuocas.  
Quanquam negligentes in eo propriè di-  
ci non possumus, quod necessariò non fit,  
nec vlla prætermissio officij in illis rebus  
est, ad quas liberis consilijs sine imperio, ac  
vi accedimus. Quare non tu quidem in-  
gratus fuisti, qui hactenus nō scripseris, sed  
valdè officiosus es, quia iam scribere cœ-  
pisti. Vale.

## CVIDAM NOBILI.

QVòd mihi liberorum tuorū curam po-  
tissimùm mandare voluisti, præclaris-  
sime vir, valdè tanto delectabar tuo stu-  
dio. Nam, et summa profectum est tua hu-  
ma-

manitate, quem nunquam vidisses, illum  
 tanti facere, vt ad tuos instituendos filios  
 assumeretur, & mihi gloriosum ad famam  
 est, me cæteris à te præpositum in hoc mu-  
 nere. Nec leue cuiquam tuum iudicium  
 videri potest, quod præter authoritatem,  
 quam habet maximā, cum literarum sci-  
 entia coniunctū est. Nam & aptissima di-  
 gnitati veritas est, & omnibus sui partibus  
 ea tibi qualis sit, doctrinæ præceptis intelli-  
 gitur, vt nec aberrare velis à recto, quoniā  
 honore plenus es, nec possis, eruditus in-  
 stitutis optimarum disciplinarum. Meæ  
 durissimæ sunt partes, qui cogor rem ho-  
 nestissimam maximo negare studio tuo,  
 cum omnia minimè debeam tuæ volunta-  
 ti concedere. Nec profectò meus animus  
 à tuo dissidet, nec ferè quisquā est, quē ope-  
 ra mea malim vti, quàm te. Sed ea ratio tē-  
 porum est expectationis partim meæ, par-  
 tim amicorum, vt tecum esse non possim.  
 Quod si cætera omnia essent, vt vellemus,

cor-

maximè, in  
 falior.



corpore iam diu sic affectus sum, nullum ut  
vsum mea tibi vel summa diligentia possit  
afferre. Quare pudori meo veniam dabis,  
qui si maximè valerem, parentum spei, &  
honoratissimorum promissis amicorū me-  
orum inservire deberem, & me nunc ægro  
facillimè carebis, quoniam ita si ad te acce-  
derem, quemamodū nunc sum, grauis po-  
tius, quàm utilis tibi fore. Quod proximū  
fuit, quodque tam vehementer cupere vi-  
debaris, ut alium tibi cōmendarem dignū  
eo loco, in quo à te ponēdus esset, in eo me-  
am exprompsi tantam industriam, quanta  
maxima potuit his temporibus esse. Vnus  
erat de cuius singulari probitate morum,  
excellentibus literis, meo periculo tibi po-  
teram affirmare, quocum egi summa cō-  
tentione tecum ut esse vellet. Sed ille nulla  
ratione persuaderi potuit, siue quòd otium  
academię, negotio fructuosissimo præferat,  
siue quòd illius verecundia, strepitum aulę  
reformidet, siue quòd aliud vitę genus, vel

Dd. I.

aptius

aptius fore credit, vel magis amat. Cæteros conuenire multos non poterā, quia nec satis dabatur temporis, & cura corporis me ad se perpetuò reuocabat, et mihi constitutum est, nullum tibi dare, nisi te dignū adoleſcentē. Post firmior, diligentissimè queram, & si prouisum interim tibi non erit, aliquem inueniam talem, qualem eum oportet esse, tuorum qui gnatorum pueritiā informet, & qualis ex academia, mea cōmēdatione ad te proficisci debeat. Interim me, meamque facultatem vniuersam tuæ voluntati deditissimam scias esse, & fore. Vale. Ex regio collegio Cātabrigiæ, octauo die Nouembris.

G. HADDONVS HIERONYMO

Oſorio Luſitano. S. D.

**L**Egi, Hieronyme, tuam epistolam, quæ licet excellentissimæ sit Angliæ reginæ separatim inscripta, tamen scripta videtur ad omnes: quoniam typis propagata, publicè per hominū oculos peruagatur. Magnus

gnus es tu quidem verborum ac sententiarum architectus, & in eo tibi multum superfisti, quòd vir priuatus, terra, marique diiunctus, nostrarumque rerum insolens, regalem maiestatem tam fidenter affatus sis, quòd legum dignitatem minueris, quòd generatim nationem nostram, impiæ cuiusdam, & inuidiosæ nouitatis ream feceris. Itaque mihi abs te ignosci æquum est, si vir Anglicus, regalis maiestatis alūnus, & Anglicorum institutorum intelligens, tibi respondeam, & paulò tecum agam liberius, nulla offensione animi, nulla diffetionis acerbitate: sed vt errorem de Angliæ statu tuū, falsis rumorū insusurrectionibus collectū corrigā, & aliorum opiniones emendē, quas tuum fortasse scriptū deprauauit. Vt autē planè cognoscas iracundia me non effe ferri, sed officio cōmoueri, genus scribendi tuum magna mihi commendatione dignū videtur, & tibi gratias ago, quòd cum hac facultate sis, qua es, regalem maiestatem lau-



dibus extuleris, cuius licet excellentiæ perfectio sit omni tuo sermone superior: tamen exornatū eloquentia, sanè gloriosum est externum testimonium. De Monarchia philosopharis non inscien-ter, & de præstantia religionis accuratè concionare, sed vnum est tuum in vtroque nonnullum peccatum, quòd nota per se satis nimium inculcas, & in rebus non dubijs orationem adhibes minimè necessariam. Hanc oratio tua quasi viā sibi præmunien-tem, sensim ad id delabitur, quod præcipuè tibi fuit institutū, vt religionē peruellas, quam à nobis receptam esse credis. Atque hūc, in ipso introitu, vel callidè dissimulas, vel ignorance consuetudinis nostræ ruis, cum publica decreta conformatę religionis, ad multitudinem incertorum hominum seuocas, & regalem maiestatem ab hac tractatione nominatim excludis. Est enim hoc in more nostro positum, vt nulli iura ferantur, quibus vniuersa respublica teneri potest, nisi plebe pri-

primum suffragante, deinde nobilitate consentiente, proceribus etiam ecclesie conspirantibus, & ad extremum iubente principe. Quapropter si quicquam est tibi secus insusurratum, authoris fuit mendacij culpa, credulitatis tua. Quod si fingis ipse exte, ius ut nostrum infames, quasi truncum sit, & mutilatum multitudinis inuentum, minime facis ingenuè, quod in ipso ingressu tuæ disceptationis tam dedecorosa legibus nostris labem inurere voluisti. Sequitur tua grauis, & in primis vehemens obtestatio, qua regalem maiestatem adoriris, ut firmitate planum facias, & probationum evidentia demonstres, quid in religione sincerum, incorruptumque sit, tum ne duram se tibi nimium, & difficilem regalis maiestas præbeat, sed manus det, veritatem agnoscat, & ab errore se patiatur abduci. Rectè tu quidem. Et ego vicissim hanc ad te petitionem non minus æquam affero, tuam ut accusationem cum ostendam criminatio-

nis habere nimium, argumenti nihil, stomacho profectam esse, non veritatis studio, calumnia niti, non ratione, conuiuium esse maledictis conflatum, non disputationem in religione fundatam, hæc inquam omnia cum peruicero, tum ut mihi de te pronunciare liceat, nimium in aliena te republica curiosum esse, & temerè ingressum ad earum rerum reprehensionem, à quarum adhuc scientia longissimè abesse videris. Ordiris ab atrocissima querela verbis conquistissimis exaggerata, multitudines hominum, nescio quas, à veritate religionis apostolica se abalienauisse, nouamque similiter, nobis ignotam, voluptatis, & libertatis ostentatricem inuexisse, sed eam esse longè pestilentissimam, & fluminibus inundare malorum innumerabilium. Deindè in authores impetum facis, contra quos tam spissis, & horribilibus conuiuiorum flammis fulminas, ut nihil illis in terris cogitari possit detestabilius. Vbi sunt hæc portenta religionis? quæ sunt?



sunt? quandiu fuerunt, & quemadmodū  
de illis constare potest? vbi reperiuntur hęc  
hominum monstra? quid moliantur, &  
quemadmodum? & vndē tibi de illis com-  
pertum est? Designa res, nota personas, ap-  
pone tempora, circumstantias adhibe, certi-  
tandē vt habeatur aliquid in quo cōsisti pos-  
sit, atq; adeò tibi resisti. Vociferaris contra  
religionē, pugnas cōtra religionis authores,  
in vtroq; magnā sermonis acerbitatē adhi-  
bes, neutrū quid sit, aut vbi sit, explicas. Mi-  
serabilis hęc quidē tua est accusatio, quam si  
verbo refellam, omnino eam statim necesse  
est obmutescere. Clamas, imò profectò ex-  
clamas, & valdē sanē lamentabiliter, esse  
recens susceptam religionem execrandam,  
auerfandam, abominandam, esse eius au-  
thores scelestos, sicarios, veneficos, euer-  
sores rerum pub. hostes humani generis.  
Ego contrā, nihil istorum esse contendo, ti-  
bi non credo, doceri postulo. Quid affers?  
quid probas? inclamas quantū potes, om-  
nia

nia flagitiorum vocabula cumulans, quæ videris ad hanc ipsam rem seposuisse, commētum vt religionē tuam illis deforma- res, & per quas confoderes, quas præter te nouit nemo. Certe quidem nobilissimam Christianæ ditionis insulam, ac tibi minime notam, ex fictis, vel maleuolorum nostrorum, vel assentatorum vestrorum rumusculis, in auribus regalis maiestatis tot contumelijs diuexare, nullum statuentem certum criminis, aut personæ nomen, hominis est parum considerati, suoq; otio ad aliorum infamiam nimium abutentis. Sed plura complectamur. Popularem esse dicis hanc, quam accusas sectam, & hominum ab illis vitia non castigari, sed incitari cupiditates, & furores inflammari, multis exemplis de veneficijs illorum & conspirationibus contra principum salutem constare. Terribilis sanè criminatio, teterrimūq; genus hominum, si vllum huiusmodi spirat in terris. Sed si nullum est, magnum est, et

et temerarium criminatoris vitium in rebus bene constitutis tam diras excitare tragœdias. Tamen vt ingenuè confitear, illata venenorum, & bellorum mentione, ad superiorem maiorum nostrorum memoriã respiciens, incipio recordari de Henrico quarto quodam imperatore, quòd stupenda quadam, ac sacrilega crudelitate monachus illi venenum in Eucharistia suffuderit, quo paulò post interierit, & cuius in eo consiliũ interuenerit, ex historia cognosci potest. Et annales nostri flagitio simili personæ non dissimilis, Ioannem Angliæ regem absumptum attestantur. Sed hæc ad te particulatim allegare minimè sanè opus est, qui cum multò sis his maleficijs propior, quàm ego sum, melius propinquorum tuorum libris scire potes, quàm frequenter pocula venenorũ inter ecclesiæ Romanæ principes, & patronos commeauerint, deindè bellorum semina quemadmodum, & à quibus per vniuersas christianæ ditionis

-019  
Ee. i. respub.



respub. perspersa fuerint. Verùm accusa-  
toriè non agam, sicut tu facis, nec suspitio-  
nibus pugnabo, sed immortalì deo manus  
supplex tendam, gratias agens maximas,  
quòd illas superiorum temporum profun-  
dissimas caligines, euangelij sole palàm in-  
ter nos exorto, dispulerit, cuius ignoratio-  
ne prius, & superstitionis fiducia, scelerum  
in sentina securè volutabamur, plumbo di-  
plomatam credentes expiatum, & precū  
demurmuratione non intellectarum, quic-  
quid admitti poterat improbitatis in vita.  
Sed intonuit in auribus nostris sacrarum  
scripturarum authoritas, & ita conscientias  
perterrefecit, vt in sola dei misericordia  
gratuita, postpositis, & abiectis hominū in-  
uentis perfugium habeamus, illud pariter  
accurantes, quod à propheta præcipitur, vt  
morum nostrorum innocentiam ad sancti-  
tatem, & iustitiam conformemus. Quæ  
cum ita sint, miror cur iam longa tibi flu-  
xerit ad regalem maiestatem oratio, qua  
pro-

prouidendum omnibus principibus, & vigilantissimè præcauendum esse scribis, ne per nouam hanc tuam, adhuc ignotam sectam, loco moueantur. Equidè regalis maiestas omni prosperitate floret, ac suos amans, amatur à suis, & ne minimam quidè horum tumultuum, de quibus tu vaticinaris, auram persentiscit. Reliquas ego respiciam diu tranquillas fuisse, et adhuc esse spero. Certè contrà nihil intelligo, nisi fortè Gallicam tempestatem obijcias, quæ & ipsa nunc placata est, et vndè primùm flare coeperit, facillimū explicatu est. Sed quoniam tu nihil nominas, ego præteribo. Sequitur in epistola tua communis, & tritus omnium scriptis sermo, de fragilitate præsentis vitæ, quam contemni vis, & aditum ad cœlos fieri, proijciendum esse quicquid est humanarum rerum, vt sempiternum ad foelicitatis statum peruehamur. Deindè mirare nouis nos ad hanc rem magistris vti velle, cum tua quidem sententia veteribus con-

tentiusse possimus: tamen addubitari cō-  
fiteris, & cōmemorari de professione qua-  
dam doctorum recens ingressorum, qui  
falsam nouitatis infamiam deprecantur, &  
hoc suscipiūt, vt ecclesiam omni fāce scho-  
lasticorum errorum resecta perpurgent, &  
ad apostolicorum institutorum syncerita-  
tem reuocent, vt veritatē in euangelio Iesu  
Christi fundatam, iamdiu quæstu, & am-  
bitione oppressam, orbi Christiano re-  
præsentēt, vt obscuratam hominum som-  
nijs dei gloriā, clara sacrarum scripturarū  
& aperta luce perfundant, vt superstitionū  
seruitute nos exoluant, deniq; purum dei  
cultum, & antiquam priscorum temporū  
disciplinam restituant. Horum tu quidem  
professionem ita laudas, vt conatum irri-  
deas, hos tota reliqua criminatione tua  
vexas, & versas arbitrati tuo, partim ludē-  
do, partim stomachando, partim declamā-  
do, partim etiam exclamando. Benè est.  
Quænam sit tua noua secta tandem intelli-  
go,



go. contra quam tantoperè tuam eloquentiam exacuiſti. Tandem aduerſarios video, quos, tanquam regni peſtes, à regali maiestate deſecari vis, & foras eijci. Mihi contrà videtur, hos euangelij profeſſores, dei ſeruos eſſe, diuinitus ad nos dimiſſos, vt ignauiam noſtrā in his periculoſiſſimis fenefcētis iam mundi temporibus expergeſciant, tarditatem incitent, errorem refellant, impietatem coarguant. Itaque conquirendos à regali maiestate, magnificiendos in vniuerſa republica. Vides quantum inter tuā interſit, & meam opinionem. Pergendum igitur eſt, & ponderandum, quid tu, magnus ſcilicet ille principum magiſter, contra venerādos dei ſeruos, aut veri proferre potes, aut falſi comminiſci. Quanquam aliorū, vt i reor, iſta fingendi crimen fuit, tuū eſt ſanè duplex vitium, in aſſentiendi temeritate primum, & alterum in ſcribendi confidentia. Nec omnes tuæ criminationis angulos excutiam, quæ maxima ex parte

sonos inanes fundit, verborum splendore decoratos: sed per capita præcipua breuiter decurram, & ipsa, si possum, accusationis tuæ cornua commouebo. Primum ad personas animaduertendū esse dicis, quoniam magnificè promittunt, & explorandum, quid in illis sit facultatis, & neruorū, quantum habeant virtutis, & sanctimonie. Deindè quæris, an perfectiores in omni laude pietatis sint, quàm Athanasius, Basilus, Ambrosius, Hieronymus, Augustinus fuerunt. Equidem multi sunt ex illis eximia doctrina, moribus integerrimis: nec tu quicquam affers, cur non pares vetustis patribus esse possint. Sed vt ab his inuidiosis te comparisonibus abducam, nego id hoc in loco quæri debere. Nostros enim doctores cum illis venerandis patribus conspirare defendo, viam eandem ingressos, summā religionis eandem tradere. Quòd si ita est, frustrà est inter concordēs comparatio. Si non est, tu dissentire doce. Queritur

tur Augustinus in suis temporibus flumina ceremoniarum sic inundauisse, deterior ut propè conditio Christianorum fuerit, quàm olim fuisset Iudæorum. Hieronymus sacras scripturas ab ecclesia vestra penitus abstrusas, & abditas, etiam à pueris, et mulierculis memoriter optat edisci. Basilus otium suum sanctissimo theologiæ negotio transmisit, & discendæ, & docendæ. Quòd si Basilicis institutis monachi vixissent nostrorum temporum, ne digito quidem illos quisquam attigisset. Athanasij symbolū iustam habet venerationem, nec ylla inter illum, & nostros est quæstio. Sed mihi satis est reuerendos patres nostros dicere, donec tu non esse planum feceris. Verùm ex antiquis hisce patribus, quoniam præter nuda nomina nihil ad institutum tuum allegare potes, ad nostrorum transis reprehensionem, & orsus à Luthero, manes eius maledictis dilaceras, audacem increpans, & popularem, &, si dijs placet, furiosum



furiosum etiam. Iste vir dei, quem tu furere calumniaris, in publico cōfessu coram imperatore Carolo, sobriam & sanam fidei suæ rationem reddidit. Iste furiosus contra sapientissimos ecclesiæ vestræ patronos saluus annos triginta constitit, illis aduersus eius salutem quantumuis insanientibus. Erasmus huic furioso singulare dat innocentiae testimonium istis ipsis verbis: Lutheri doctrinam improbant nonnulli, vitam vno ore prædicant omnes. Sed popularem fuisse Lutherum addis. Quemadmodum hoc interpretare? Si popularis est, qui respicit ad populi salutem, nemo magis. Si popularis leuitatis concitatorem intelligis, reuolue scriptum, quo populares Germaniæ tumultus exagitat, & mitte contumelias. Sed ne videaris in solo Luthero peccare, reliquos annumeras: quasi tantum in affirmatione tua pōdus sit, vt possit ex optimis viris pessimos efficere. Duos nominatim citabo præcipuos euangelij professores, Martinū  
Buce-

Bucerum, & Petrum Martyrem, ad hanc insulam summo dei beneficio delatos. Cōferāt omnes inimici capita, videamus quid in istorum vita reuerendissimorum patrū ipsa possit inuidia desyderare. O aureum par senū foelicissimæ memoriæ, quorū doctrinæ testes libri sunt ab illis confecti, morum tot habuerunt approbatores, quot vnquam conuictores inuenire potuerunt. Tu verò, si sapis, linguam posthac, & stylum cohibe, etiam atque etiam vide quò irruas, noli confidentes, & audaces, & elatos omnes appellare, cum magna sit illorum multitudo, qua nihil mansuetius possit, aut modestius, aut consyderatius reperiri. Duos proferebā, liceret eodē modo de gregibus nostrorum hominum affirmare. Sed satis est duorum eximia modestia reprehensionem vnus, nimis ipsam audacem, et confidentem refutare. Transilis rursus ad nostrorū doctrinam, & improbas in ea, quòd solas vrgent sacras scripturas, solū ad

consilium adhibent spiritum sanctum, re-  
iectis, & repudiatis authoribus humanis.  
Equidem hoc si ita esset, sequerentur in eo  
domini nostri Iesu Christi morem, seque-  
rentur apostolorum consuetudinem, &  
veterum patrum in primis ecclesiæ tem-  
poribus. Sed secus est. Assumūt enim pro-  
batorum interpretū sententias omnis me-  
moriæ, quemadmodum illorum libri testi-  
ficantur, qui tuam hanc calumniam aper-  
tissimè conuincant. Suauiter tu quidem lu-  
dis, & etiam, vt tibi videris, neruoscè dis-  
putas contra nostram, quam ostentant in  
vita, perfectionem, & tamen hanc ipsam  
dicis illorum quotidianis flagitijs coargui.  
Falsum est illos supra sortem humanam si-  
bi quicquam arrogare, contumeliosum est  
eorum mores infamare, quorum ne mini-  
mum quidem erratum proferre vis. Ostē-  
de, si potes, quicquid est, quod tam vehe-  
mentem habet offensionem. Si non potes,  
define contra personarum grauissimarum  
existi-



existimationē tam perniciosē nugari. Demonstrari postulas qua in re nostri meliorem fecerint ecclesiæ conditionem, quàm antea fuerit. Non opus est repetere nos, tu ipse commemoras, sed interpretatione differimus. Tu virginū, & monachorum coetus ad celebrandam dei gloriam, & tuendam corporum castitatē inclusos, à nostris ad libidines, & omnem vitæ licentiam emissos criminaris, ædes illorum quæstu publicatas, leges latas, ne religio libidinem impediret. O nimis procacē, & licentiosam omnia peruertendi libidinem. Fatemur, & quidem perlibenter, sanctissimis nostrorū monitis illas corruisse scelerum cauernas, in quas teneræ virgunculae detrudebantur, & miselli pueri, tanto morum detrimento, quantum verecundia mea non potest explicare. Nihil propemodum habebant illæ nequitiarum officinae, præter Pharisaicam ignota lingua precationum assiduitatem, reliqua poterant interiora cum illis priscis

Romæ bacchanalibus comparari. Quare deus nostrorum mentes excitauit, vt tam numerosæ cohortes in corruptissimis angulis delitescerent, illorum pijs cohortationibus ab otio ad negotium, à vitijs ad virtutem, ab infandis congressibus, ad honestissimum coniugium euocarentur. Nec tamen vllam in matrimonijs necessitatem facimus, sed humanum iugum conscientijs detrahentes, euangelij libertatem restitui-  
mus, in qua domini nostri Iesu Christi manifesta verborum authoritas nos colloca-  
uit. Ædes verò pios ad vsus scholarum, academiarum & xenodochiorum distributæ sunt, legibus prouisum, ne rursus sues in cœno tam inquinato se volutarent. Magnum hoc, & summum dei beneficiũ, quo plus per nostros diaboli tenebricoso regno detractũ est, quàm omnibus in vnum collectis ecclesiæ vestre constitutionibus. Deploras imaginum, & tabularum amolitionem, & demptis huiusmodi monumentis,  
nihil

nihil reliqui superesse contendis, quo mens  
ad diuinarum rerum meditationem susci-  
tari possit. Nostri verò cœcitatem recenti-  
um temporum recordantes, idololatrię de-  
liria perhorrescunt, contra quam expressũ  
dei præceptum est, & euangelium à simu-  
lacris præcaueri iubet. Hoc autem metu  
sublato, tamen doctrina domini nostri Iesu  
Christi, summam debet inter Christianos  
viros authoritatem habere, qua pronunci-  
atur deum, & ipsum esse spiritum, & illo-  
rum esse rectum precandi morem, quĩ spi-  
ritu illum, & veritate colunt, & tales etiam  
à deo patre precatōres perquiri solere. Sa-  
lutaris hæc est in primis supplicandi formu-  
la, si ponderemus vnde profecta sit, & quò  
referri debeat, nec his eget externarum re-  
rum adminiculis, quibus ad solium dei pa-  
tris ascendat. Imò verò noster externus  
homo, dum in his facrorũ adumbrationi-  
bus nimium occupatur, vis mentis interi-  
or refrigescit, & vitiosum hunc fictatæ re-



ligionis succum colligens, verum coelestis meditationis fructum amittit. Apponamus exempla. Vetus apostolorum, & martyrum ecclesia nihil habuit istorum monumentorum, & tamen erat illorum spiritus amore diuini numinis inflammatus. In deflexu sinceræ religionis, picturæ sensim irrepererunt, & elanguit ille prior in animis efferuescens religionis ardor. Tandem inuexit se degener, et superstitione deformata scholasticorum theologia. Statim omnia conferta picturis, & imaginibus, quorum externa veneratio cum omnibus in locis increbuisse, verus, & internus dei cultus recidit. Itaque philosophare quantum libet de sensuum imbecillitate, quantum potes horum signorum præstantiam exorna, tamen illud in sacrarum scripturarum auctoritate manebit, deum in scripturis perfectissime cognosci, & in spiritu sincerissime coli, vestrasque picturas vel præsentem spiritum non desiderari, vel eo absente non pro-

prodesse. Sed nimium tibi videtur ista per partes tractare, quapropter summatim ponis, sacra, ceremonias, et sacramenta omnia funditus à nostris euerti. Quid ego audio? Viuit vllū in orbe Christiano theologorū genus, quod sacra, ceremonias, & omnia sacramenta funditus euertit. Aut id ita esse necesse est, aut tuam oportet esse, sicut profectō est, nimis impudentem hyperbolen. De reliquis ecclesijs affirmare non possū, sed preclarè de illis existimo. Nostrorum autem in diuino cultu rituum hoc ipso in loco, paucissimis tibi rationē reddam, nec te diutius aut ipsum errare patiar, aut alios in errorem adducere. Primum, quoniam fides ex auditu existit, sacrarum scripturarum doctores ad vniuersas nostræ regionis oras dimittimus, vt plebem in omnibus pietatis officijs erudiant, & ad verum dei cultum informant. Deindè publicam habemus ex sacris scripturis coagmentatam precationum formulam, authoritate Parlamenti

lamenti (sic enim consensum trium nostrę  
reipub. ordinum vocamus ) corroboratā,  
à qua recedi non patimur , prospicientes in  
vtrōque, quantum potuimus, vt præcepto  
spiritus sancti pareatur, edicentis, vt qui lo-  
quitur in ecclesia, diuinas in ea voces vsur-  
pet, deindè communis vt omnium, & con-  
cors sit sententia. Sacramenta verò propin-  
quissimè curamus ad præscriptum admini-  
strari sacrarum scripturarum, & ad exem-  
plum ecclesię veteris, in qua dominus no-  
ster Iesus Christus ea primum ipse cum a-  
postolis instituit. Hęc autē omnia lingua  
nostrāte proponūtur, quoniam magna est  
amentia coram deo, quod nescias, effutire,  
pugnatq; manifestè cum saluberrima Pau-  
li doctrina, cum omnibus priscis apostoli-  
carum ecclesiarum exemplis. Impositionē  
manuum, coniugij celebrationē, puerpe-  
rarum ad ecclesiam inductionem, ægrorū  
visitationem, et funerum humationem, so-  
lennibus, & publicis officijs ad euangelij  
verita-



veritatem compositis exequimur. Tantū autem ad hæc ceremoniarum infundimus, vt omnia conuenienter in ecclesijs, & ordine gerantur, sicut in euāgelio nos admone-ri cognoscimus. Temporum, locorum, die-  
rum, & reliquarum circumstantiarum a-  
pud nos propè nulla est facta mutatio, nec  
in vniuersa religione quicquam est nostra  
nouum, quod ~~non~~ aut euidentem absurdi-  
tem, aut expressam impietatē habuit. Ex-  
posui ritus ecclesiæ nostræ, quam vides, nec  
sacris, nec sacramentis, nec ceremonijs de-  
nudatam esse, sed in omni genere tantum  
esse reseruatam, vt nimium nos iniuriosè  
sittractaturus, qui nihil horum apud nos  
remanisse calumnietur, cum nihil eorum  
absit, quibus ad verum dei cultum opus sit.  
Iugum summi pontificis à nobis excussum  
dicas. Rectè tu quidem. Grauius enim erat,  
quàm aut nos, aut patres nostri diutius su-  
stinere poterant, nec vllum agnoscimus su-  
mum pontificem, nisi dominum nostrum

Iesum Christum, cui sacre scripturę peculiarem hunc honorem assignant. Nec in eo Christi tunicam discindimus, vt tu coniectas, sed episcopi Romani pallium fortasse vellicamus, nec viam, vt tu vis, ad seditiones aperimus, sed iter occludimus, quod eius licentioso plumbo maximam ad morũ peruersitatẽ descendebat. Multas vnitates colligis, & ex illis argumentare, summam vnius potestatem interuenire debere. Nõ ita est necesse. Nam in optimis ecclesię temporibus vnus deus, vna fides, &c. tamen suam Petrus habebat prouinciam, Paulus suam, Iacobus suam, alias alij, nec tamen personarum distractio, fidei disiungebat unitatem. Succedentibus sæculis multi fuerunt episcopi Romani martyres, & à prophanis principibus immolabantur, sed coronas, nisi martyriorum, habebāt nullas, papalem hunc extraordinarium principatum ignorabant, Gregorius etiam abominabatur. Quarẽ si præstantissimus ecclesię  
status

status expers fuit huius monarchiæ, nos etiam illa facillimè carere possumus, imò verò debemus, non solū euangelio palàm interdicente, sed etiam suffragante ratione. Nec enim caput à membris tam longè cōuenienter dissidere potest, præsertim cum hæc vnica potestas, pro qua tantoperè laboras, domi nobis in Anglia præsto sit, vt minimè sit opus eam foras quærere. Regalis enim maiestatis absolutā habemus authoritatem, qua reipub. nostræ principatus integrè, & expletè continetur. Sed nimirū hoc tibi ferendum non videtur, & hoc in loco sic incalescis, vt sacrilegij crimen principibus intentes, quòd in legibus ecclesiasticis præesse velint, quòd temerè res sacras contrectent. Noli, Hieronyme, nimium conturbari, non decet tanta virum philosophum iracundia, respira paulisper, & ad te redi, rectè omnia videbis expediri. Regalis maiestas omnibus dominatur Angliæ personis. Quidni? Similiter Gallus

Gg.2.

Gallis,



Gallis, Scotus Scotis. Sed ad res sacras manum apponit. Minimè. Res enim politicas ciuilis magistratus exercet, ecclesiasticas administrant episcopi, si quid in rebus ecclesiasticis publicè constituendum sit, decernunt theologi, decretum regalis maiestas teneri iubet. Quid accusas? Reges Israelis proprium, & peculiarem dei populum his olim institutis gubernabant. Succedens euangelium, & potestates distinguens, primam collocat authoritatem regalem, & subter eam reliquas subiicit, authoribus Petro, & Paulo, quorum vos nominibus ad Romanæ sedis regnum abutimini. Verùm tu non solum pro sceptro papali pugnas, sed etiam pro sacrosanctis decretorum sanctionibus, vt tibi videntur, contendis, quorum interitu dei metum ex animis hominū euanuisse iudicas. Certè deum vt timeremus, credebam diuinis literis effici, non episcoporum Romanorum decretis, & canonibus audiui locupletatos sanè quam-

quamplurimos, sed eruditos in vero dei timore, non multos. Verum ut hoc tibi largiar, multos ex antiquis canonibus salubrem & præclaram habere morum disciplinam, sicut habent profectò mea quidem sententia, quid assequeris? Nos & decretis utimur, & decretalibus epistolis forum ecclesiasticum exercemus, & in neutro genere quicquam rejicimus, præter auctorem, & ne illum quidem ut episcopum Romanum, sed ut papam, & ecclesiæ nostræ, caput. Nullam agnoscimus supremam potestatem in Anglia, nisi regalem maiestatem: sed in externis aliorum monumentis si quid ad pietatē, aut virtutem amplifcet, asciscimus vndecunq; sit. Huius tu nostræ cōsuetudinis ignoratione, decretorum ruinas desles, quæ quidem omnia, quatenus sacris scripturis non aduersantur, apud nos viuunt, & vigent. Accusas doctores nostros, tanquam effrenis cuiusdam, & immoderatae libertatis authores, & adiungis

dei metum illos omnem auferre, & dissolutionem eis, ac nequiores orationem affingis, quàm vnquã aut Epicuri fuerit, aut Diagoræ. Deindè, cum hanc ipsam nostris hominibus commentitiam personam imposueris, longo sermone ludis, & illudis vt libet. Tu verò memineris, quid summus ille tuus eloquentiæ magister olim sapientissimè scripserit, impiam esse contra deos iocandi consuetudinem, seu seriò, seu simulate fiat. Id si natura prospicere doctrina gentilis potuit, tibi Christum professo, contra Christum ipsum facetijs exultare, cuiusmodi sit, etiam atq; etiã vide. Nunc ad rem venio. Cum Paulo confitemur in illa libertate consistendum, in qua Christus nos collocauit. Sed hanc spiritus libertatem ita modificamus, vt in carnis licentiam non erumpat, quemadmodum ille idem Paulus edixit. Euangelio credimus, nullum in illis exitij sempiterni periculum esse, qui in Iesu Christo sunt insiti: sed assumimus & illud



lud, quod in eodem contextu est, qui non iuxta carnem versantur, sed secundum spiritum. Nolo enim longè ab ipsis sacrarum scripturarū verbis abire, ne quicquam insincerè videar tractare velle. Paulus post longam, & seriam disputationem concludit, arbitrari se fide nos sine legis operibus iustificari. Cōsentiendum est (nec enim euangelio derogare possumus) sed illud ex eodem pariter asciscendum, fides per charitatem operans. Hanc igitur istarum rerū cōiunctionem si tenemus, uti profectò facimus, tu disiungere non debes, & errorem impugnare, qui præter te ipsum authorem habet neminem. Incivile est, ut verba iuris civilis vsurpem, arripere legis particulam, & totam ex ea causam iudicare. Noli præscindere de nostrorū doctrina, sed integrā repete. Quod si feceris, & iustam inuenies ab illis habitam operum rationem, & eorū reperies ad pœnitentiam grauissimas cohortationes, & te hoc in loco minimè sapienter

enter sine aduersario tamdiu litigauiſſe iudicabis. Nec tamen tua dicacitas vllum ſibi modum ſtatuit. Etenim admirabili quodam ſtupore noſtrorum hominum, & amentia, rationem alligatam vociferaris, libertatem arbitrij detractam, totum genus humanum adeò ſpoliatum & excæcatum, nihil vt interſit inter hominem, & lapidem, deum ab illis induci peccatorum authorẽ, omnia ſine discrimine confundi, & commiſceri, deniq̃ue deum etiam illos iniuſtẽ punire, quos ipſe prius peruerterit. Equidem iracundia non facilẽ ſoleo commoueri, tamen me diutius tenere non poſſum. Non ſolum hebes, & imperita, ſed etiam blaſphema iam hæceſt tua calumnia, quã ne lapides quidem ipſi, de quibus commemoras, ſi loqui poſſent, contra noſtros intorquerent. Sed animaduerte pauliſper ad ſacras ſcripturas, & reſipiſce. Deus pater in Chriſto nos elegit, antequam iacerentur fundamenta mundi, vt eſſemus ſancti, & irre-

irreprehensibiles coram ipso. Diuinam electionem audis ex euangelio, quam tuus sermo tantoperè detestatur, & tempus audis, nec id affert hæc electionis necessitas, vt in omnes libidines, & nequitias effundamur, quemadmodum tu quidem impiè iocaris, sed vt sancti simus, & irreprehensibiles coram deo per charitatem, vt in expressis euangelij verbis positum est. Deus est, qui in nobis operatur, & velle, & perficere. Paulus istis verbis & voluntatem alligauit, & astringit facultatē. Quid igitur? Nihil inter nos, & lapides interest? Obtusior sit lapide, qui sic colligat. Idem enim ipse Paulus nos dei cooperarios appellat, & in timore iubet, ac tremore propriam salutem operari. Quemadmodum, inquis, cum ad deum omnia referantur? Ex Paulo tribus verbis cognosces. Omnia possum in Christo, qui me corroborat. Et Augustinus eandem sententiam alijs verbis elegantissimè conclusit: Deus in nobis ipse sua



coronat opera. Quid est? An non vndique  
communitam cernis authoritate sacrarum  
scripturarum sacrosanctam dei prouidentiam?  
Et tamen intelligis eandem non esse pec-  
cati matrem, sed alumnā omnis officij. Sed  
fontes ipsos adeamus, ex quibus cum mel-  
la dulcissima manent, tua tamen corruptis-  
sima mens, pestilentissimum ex illis vene-  
num exuxit, & vt contra te certius proce-  
datur, ex euangelio verba repetemus. Non-  
dum natis pueris, cum neque boni quippiā  
fecissent, neque mali, vt secundum electio-  
nem dei propositum maneret, non ex ope-  
ribus, sed ex vocante, dictum est illi, maior  
seruiet minori, sicut scriptum est, Iacob di-  
lexi, Esau autem odio habui. Quid ais op-  
time vir? Ecce tibi rursus electionem, &  
eam quidem secundum dei propositum.  
Ecce tempus electionis, nimirū pueris non  
adhuc natis. Quid igitur dicemus? Num  
iniustitia est apud deum? Paulus abomina-  
tur, Hieronymus Osorius affirmare non  
dubitat,

dubitat, Dei vox est ad Moſen: Miſerebor, cuiuſcunq̃ miſereor, & commiſerabor, quemcunq̃ commiſeror. Subijcit Paulus, neq̃ue volentis eſſe, neq̃; currentis, ſed miſerentis dei. Pharaonis exemplum aſſumit, & cum illo concludit, deum cui vult miſereri, quem autem vult indurare. **Quid** nos ad hæc? Certè ſempiternam diuini numinis prouidentiam in iſtis ſacrarum ſcripturarum verbis tam manifeſtè collocatam agnoſcimus, & veneramur, & Pauli monitiſ vtētes, nos creaturas eſſe meminimus, nec cum creatore diſceptamus, in vocatione permanemus, officio fungimur, demiffiſſimè & aſſiduè ſpiritus ſancti gratiã imploramus, reliquum infinitæ dei miſericordiæ permittimus, nec in arcanis eius myſterijs plus ſapere volumus, quàm oportet. **Quid** Hieronymus Oſorius? Profectò ſi ligetur humana ratio, ſi conſilij libertas eripiat̃ur, ſi voluntas ſempiternis vinculis impediatur, ex eo ſcilicet confe-

Hh.2.

qui,

qui, totum hominem iudicio, & sensibus  
orbari, nihil inter ipsum & lapidem inter-  
esse, deum etiam malorum authorem con-  
stitui, nec id ullam habere rationem, ut pro  
illo scelere plectamur, quod sponte nostra  
non suscepimus. Num fingo quicquam?  
Num muto? Num proprias voces tuas re-  
cognoscis, partim falsas, partim impias?  
Nimirum tu ille ipse superbus responsator  
es, cuius fastum acerrimè Paulus obiurgat.  
Tu, cum vas testaceū sis, ex luto, & argilla  
factū, à figulo scire vis, quē ad usum te tem-  
perauerit. Sed in tēpore, si sapias, hanc arro-  
gantiam seda, spiritus istos minue, dei te  
creaturam esse memineris, quomodo su-  
mus omnes, dedisce tuum arbitrium, & ad  
dei arbitrium te supplicissimè, tuaque om-  
nia refer, aut si ullam habes extraordina-  
riam facultatem propriam, à qua prorsus  
diuelli non vis, illā tibi separatim habe, nos  
sine miseros, & perditos peccatores omni-  
bus humanis præsidijs, & operibus abiectis

ex



ex dei sanctissima prouidentia totos, & eius gratuita misericordia pendere. Tandem satis per bacchatus, aliquid incipis concludere, summam eorum faciens, quæ nostros quereris esse demolitos, & interrogas, quid in illorum locum successerit. Equidem vtrunque per partes antè demonstraui: tamè verbo repetam. Pro superstitioso delitescantium hypocritarum otio, necessariū Christianæ professionis negotium, pro varis libidinibus, honoratissima cōiugia, pro somnijs humanorum ihuentorum, sacras dei patris, & domini nostri Iesu Christi scripturas, & in illis omnes thesauros Christianæ perfectionis. Utinā hīc tuam abruptisses contumeliosissimam epistolam. Etenim te fortassè conuictiorū non piget sine causa coaceruatorum, me profectò tædet illa recensere. Quorsum enim attinet sine argumento, sine sale, sine vlla verisimilitudine, tuos te tam procaces, tam absurdos errores in auribus regalis maiesta-

tis, atque adeò vniuersi orbis Christiani  
toties repeteré? Verùm illud ex magistro  
Cicerone sumpsisti, cum semel verecun-  
diæ fines transilieris, vt gnauiter impudens  
esse velis. Hoc tibi cum planè constitutum  
fit, tuis ego te vestigijs sequar, & quoniam  
quidem semel sum ingressus accusationem  
tuam, ad extremum vsque mea defensione  
persequar. Oratio tuā nouo impetu in mo-  
res nostrorum incurrit, sed peccatis veteri-  
bus pugnat. Fastum illorum reprehendis,  
& impudentiam, deindè latrocinia, vene-  
na, conspirationes, & omnia genera flagiti-  
orum intexis, nunquam vt plura tuus præ-  
ceptor olim contra Verrem congesserit.  
Tandè argumentaris nostrorum dissoluta  
vita doctrinæ vitium coargui. Nam saluta-  
ri disciplina mores humanos solere corrigi;  
quod quoniam absit nostris temporibus,  
reijci debere fructus expertem theologiā.  
Falsum est, quod de puerisitate nostrorū  
assumis, & id si verum esset, ex eo, quod tu  
colli-

colligis, nunquam efficeretur. Semper zizania fuerunt in messem inspersa, semper ex vario genere semina fuerunt, partim spinis suffocata, partim aestu solis inarescentia. Prophetis opponebant se pseudo-prophetæ, dominus noster Iesus Christus Caiphas inuenit, apostoli Nerones, & Decios, qui sequuti sunt martyres. Sed hæc obsoletiora. Domum te deducam. In ecclesia vestra non publicè peccatur? Non appertè delinquitur? Annuis. Tuum igitur argumentum projice, quod aut omninò non valet, aut contra te primum, tuamque valere debet ecclesiam. Igitur, si perfectionem absolutam vrges, & innocentiam illibatam, frustra quæris in hac vita sine carne spiritum. Quod si vel nostros homines cum vestris, vel cum vestra nostrorum doctrinam comparari postulas: præstò sumus, confer quantum libet. Interim istum intermitte petulantissimum conuitiandi morem, qui probrorum plenus est, argumentorum inanis, qui



qui nihil promittit ex sacris scripturis, nihil olet ex patribus, flumen tantum habet verborum sanè per bonorum, sententiarum subtilitatem per exiguam. In hoc genere tua, quæ sequitur, antithesis est tibi tam vehementer elaborata. Nam ex altera parte constituis apostolos, & illorum, ut par est, eximiam virtutem, et doctrinam maximis verborum, & sententiarum luminibus expinxisti. Nostros autem ex altera collocas, & eorum teterrimam improbitatem infra omnes inferos demersisti. Tu verò, si rectè rem instituisses, ad aliquod aliud tempus hos eloquentiæ tuæ tam magnificos apparatus seposuisses. Nec enim hic tibi quicquam prodesse possunt. Quanquam autem verissimè licet defendere, nostrorum eandem esse doctrinam, quæ fuerit olim apostolorum, ab eodem scilicet euangelio deriuatam, & etiam sacris scripturis deuinci possit, ab ipsis apostolis in vita sæpè titubatum esse: tamen illorum singularem in utroque præstantiam ultra communem

munem humanæ conditionis fragilitatem  
euolauisse confitebimur. Magistri fuerunt  
selectissimi, conuictorem in terris habue-  
runt dominum nostrum Iesum Christum,  
primitias spiritus sancti gustauerunt. Ita-  
que nomen illorum officiosissima veneratione  
colimus. Ad recentiora tempora descende.  
Vestram exhibe nobis ecclesiam, & hoc  
inter nos certamen sit, vtra sit apostolis  
ecclesia propinquior, & synceritate mo-  
rum, & veritate doctrinarum. Hanc si  
causam recipis, statim tecum litem conte-  
stabimur, ac etiam hoc tibi amplius indul-  
gebimus, vt antitheses ad hunc statum ad-  
hibeas, quantum voles amplificatas. Sed  
nihil proficio, nec à te quicquam æqui aut  
boni impetrare possū. Rursus ad virus cō-  
uictiorum reuolueris, apertè contra no-  
strorum exclamans euangelium, & in eo  
tuam expromens vniuersam maledicentiā.  
Tu verò tumultuare quantum potes, &  
vociferare quantum fauces ferent: tamen

hac importunitate tua nunquam efficies, quin verum, & antiquum, & purum à nostris euangelium omnibus annuncietur: & hoc ecclesia vestra, nisi resipuerit, olim cum certissima clade sua sentiet, cum ad tremendum Christi iudicis tribunal sistemur, & rationem fidei nostræ reddemus, non ex decretis, & decretalibus, quæ tu tam vehementer amplexaris, non ex Iulij, & Bonifacij, in quorū authoritate vestri cōquiescunt: sed ex hoc ipso euangelio, quod tu tam procaciter irrides, quod à vestris tandiu sepultum, diuinitus interueniente nostrorum opera, publicè restitutū est. Vtū quid tibi fiet misero, qui non solum nostros violas, sed etiā Hieremiæ sanctissimo dei prophetæ vim affers, ac illū quantumvis inuitum, ac repugnantem contra nos testimonium dicere cogis. Audiamus quem citauisti diuinissimum virum, & ex eius vaticinatione quid verum sit, dijudicemus. Nolite, inquit, verba prophetarum audire,



audire, quibus iucunda prænunciant, & decipiunt vos, visionem cordis sui loquuntur, & non de ore domini. Sic enim loquuntur his, qui me probris afficiunt: Pax erit vobis. Et ijs, qui ambulant in prauitate cordis sui dixerunt: Non eueniet vobis malum. Hic planè triumphas, & nostros manifestè deprehensos affirmas. Ego contrà prophetā contendo, vestram ad ecclesiam ijs verbis digitorum intēdisse, nec id cur ita sit, cuiquā, qui scire velit, obscurū esse patiar. In vestris igitur ecclesijs, hæc tranquilla pax regnat, in vestris, inquam, ecclesijs viget & exultat hæc amœnissima malorū requies, qua sic alios consopiuistis, & ipsi estis cum illis cōsepulti, nihil vt vel ipsi malorū impēdere prouideatis, vel alijs, vt præcaueant, denunciare possitis. Publicas cōciones, quas euāgelium tantoperè flagitat, ad fraterculos, nescio quos, delegatis, & ij etiam certis temporibus more suo declamitant, in reliquis obmutescunt. Et ferè tam prolixis vtuntur, &

tritis hortationum formulis, vt vigilantes citius ad somnum inuitent, quàm dormitantes excitent. In sacris, & sacramētis suauissimum otium. Nam & populi loco submouentur, & sacerdotes per se totum negotium ignota lingua conficiunt. Quemadmodum igitur plebs ad bellum se præparabit, cum tuba quis inflarit, non intelligat, vt Pauli hac ipsa in re voces vsurpem? Intremus ad missas, in quibus religionis medullam perfundi vultis. Sacerdotum est vestrorum occupatio propria, plebs nullas habet nisi contemplandi partes. Nec interim euangelium vnquam interturbat, et omnes ex eo cohortationes omninò conticescunt. Semel fortassis ad domini mensā singulis annis acceditur, magis solenni ceremonia, quàm afflicta conscientia. Nec enim id adhibetur, quod institutio domini nostri Iesu Christi requirit, vt eius in eo mors annūcietur, donec ipse veniat. Quātuncūque vestros homines scelerum contaminet,

taminet, nullam admouetis publicam animorum medicinam, priuatim transigunt in sacerdotum auriculas immurmurantes, aut, si quid sit immanioris flagitij, plumbo redimitur. Iam ceremoniarum tam varius, tam multiplex, tam immensus apparatus: vt externa sensuū voluptas maior vix cogitari possit, interna mentis emendatio, vel nulla sit, vel perexilis. Vestrum morem exposui. Nunc ad nostrum si placet, attende. Primū ex euangelio conciones assiduæ, quarum authoritas aut legis terroribus peccatorum contumaciam frangit, aut magnitudine promissorum ad virtutē allicit. Quod si negligunt, aut non curāt aliqui, tamen magistratus illos ad sacra trahit, in quibus non hominum interpretationes auscultant, sed deum patrem, & Iesum Christum palam percipiunt, aliquando contra vitiorum turpitudinē fulminantes, nonnunquam misericordiæ thesauros offerentes. Hæ publicæ recitationes, & tantā

15081

li. 3.                      habent



habent psalmorum, hymnorum, & ytriusq;  
legis omnium librorum varietatem, vt pla-  
nè sit infœlicissimus, qui circunsonantibus  
vndiq; sermonibus diuinis, nihil ad se pri-  
uati fructus seuocare possit. Sequitur sa-  
cro sancta domini mensa, quæ perpetuum  
in festis diebus vsum habet. Euocat dei  
minister omnes publicè, qui quidem ad  
epulum tam diuinum conuenienter se  
præparauerint. Certi prodeunt, supplici-  
ter in genua subsidunt, soli, & in medio  
templo destituti, cum tempus est, palàm in  
oculis, & auribus omnium, improbitatem  
morum pariter detestantur, & communi  
voce dei misericordiam exposcunt. Mini-  
ster selectissimis illos affatur sacris scriptu-  
ris, partim minas contra vitiorum labe vi-  
brans, partim vberes diuinæ clementiæ fō-  
tes referans, vt qui mensæ participes futuri  
sunt, sæpè tremāt animis, & postea rursus,  
spe veniæ quasi recreati, reuiuiscant. Quo-  
rum autem vel contumelia periculosum  
habet

habet exemplum, vel improbitas sceleris indignitatem, eos anathemate ferimus, ut pudor illos, & destitutio rursus ad officium reuocare possit. Hic exemplo tuo liceret antithesin instruere, nec mihi verba deessent, quibus, si velim, eandem perpolire queam. Deinde ex te sciscitarer vtra sacrorum formula plus habeat contra malefacta stimulorum, & aculeorum? Vbi pax illa prophetae sit in peccatis? vbi silentium? Et ex altera parte, quanam sit inquinatarum conscientiarum crux? quibus verbis grauissime vulnerentur? & quae tandem illos maxime cruentet oratio? Sed nihil horum faciam, rem in medio posui, diiudicet, qui velit. Hoc ad extremum apponam, plus in vna, quam nostri frequentant sacrosancta domini mensa, gemituum, & suspiriorum cerni posse, quam in sexcentis vestrorum solennibus missis. Quapropter minimè fuit opus, ut iterum ex propheta repeteres, **Neminem domini consilij interfuisse, nec**  
eius

eius sermones quenquam aut vidisse, aut audisse. Nimirū tuus iste fastus est, ut ante suo loco declarabam, qui planè dei consiliarius videri laborabas. Sed vestri synce-ram sacrarum scripturarum sententiam, an nostri teneant, si quæatur, cum nostris verisimilius est veritatem facere, qui sacris in scripturis eam continenter peruestigant. Nam vestri diuersis in opinionibus interpretum, tanquam in lubrico solo vacillantes, deuium iter suscipiunt, & in magno versantur erroris periculo. Rursum Hieremiæ molestiam exhibes, nec venerandum prophetam respirare permittis. Eius hæc verba profers: Si stetissent in consilio meo, & nota fecissent verba mea populo meo, auertissent eum profectò à via sua mala, & cogitationibus suis pessimis. Bene est. Ordiamur ab ipso Hieremia, qui fuit egregius propheta, dici secus non potest. An ille Iudæos vniuersos à vitijs deterruit? an omnes ad virtutem inflexit? Inspice totam



tam vaticinationis seriem, & lamentationū  
conſydera ſanè lugubres querelas, dei qui-  
dem populum, dei vir facilè conciliauit.  
Nam oues meæ vocem meam audiunt, vt  
eſt in euangelio, reliqui prorsus obdurue-  
runt. An non idem Paulus in Corinthijs,  
& Romanis expertuſ eſt? Petrus in Aſia-  
ticis eccleſijs? dominus noſter Ieſus Chri-  
ſtus in magnis ſepè cateruis Iudeorum, no-  
minatim in Capernaitis? Quapropter di-  
mitte Hierimiam, & nugari deſine. Paulus  
plantat, Apollo rigat, deus dat incremen-  
tum, & teſtificante Paulo, ſtabit hoc ſem-  
per inconcuſſum decretum. Nouit deus  
qui ſint ſui. Nobis quidem ſumma diligen-  
tia collaborandum eſt. Sed quicquid futu-  
rum eſt boni, ſurſum eſt, & ad nos deſcēdit  
à patre luminum. Verùm adhuc iſtas, &  
vrgeſ noſtrorum infinitam improbitatem,  
hoc eſt, conuitium vrgeſ tuum, & tuam ni-  
mium in hac epiſtola tibi familiarē, et pro-  
priam calumniam. Etenim maxima pars

nostrorum integerrimis viuit institutis, & multas populorum cohortes ad verum dei cultū adiūgit, & ab ijs moribus facinorosis, quos tu cōmemoras, tam lōgè abest, quàm iste sermo tuus ab omni abest pudore, & modestia. Quod si vis aliquid agere videri, confer cum euangelij nostri luce, vestrorum temporum tenebras, & quid intersit animaduerte. Postremò distrahi nos in sectas concludis, & consilium à nostris iniri, quemadmodum omnem dei religionem dissipent. Imò summa cōsensio. Si dubitas, ad Apologiā ablego, quam ecclesia nostra tanquam cōmunem, & certam nostrę religionis obsidē, palam in oculis orbis Christiani collocauit. Illam, si potes, refelle. Sed non potes, nec fanè poterunt vlli ex tuis, vt cūque quidam recens, quomodo potuit, oblatrauit. Interitum religionis, nostri non machinantur, à quibus animarum immortalitas firmissimè creditur. Quod si quæ ratio sit in orbe Christiano, quam addubitare

tare putas, ad eam hanc tuam orationem transfer. Si ne sic quidem satisfacio, memineris nostros verum dei cultum, & synceram euangelij doctrinam, non solum linguis, & libris, sed exilio, nuditate, fame, sanguine etiam, ac spiritu sanctiuisse, quod nunquam fecissent, si praesentis seculi terrores illos à constantissimo tuendae veritatis proposito dimouere potuissent. Longius te fateris euectum quam statueras, certe quidem multò longius, quam decuerat, praesertim in doctissimis, & solertissimis auribus regalis maiestatis, cuius acumen, & iudicium reformidasses, si quantum in illa neruorum esset, tecum ipse consyderauisses. Sacras scripturas multum lectitat, interpretes optimos inter se comparat, doctissimorum theologorum vndiq; sententias colligit, scientia linguarum per se ipsa excellit, ingenio est prompto, & acri, sapientiae tantum ad haec adhibet, quantum vix est in illo sexu credibile. Denique nostrorum ad



concionēs ventitat, & sensus in his rebus  
habet partim legendo, partim audiēdo tam  
exercitatos, vt non minus te docere possit,  
quā ex te discere. Hanc tu religiosissimā  
ex omnibus, & eruditissimam principem  
laudibus corrumpi sperabas, aut verbo-  
rum lenocinijs circunueniri posse cogita-  
bas? Non est ita Hieronyme, non est, &  
nimium tua facilitate sunt abusi, quicunq;  
te hostrorum accusatorem, præsertim corā  
regali maiestate, subornauerunt. Sed ad  
conclusionem redeamus, in qua nihil, vt  
arbitror, vnquam concludetur. Rursus e-  
nim doctrinæ fructus refricas, illos inspeci-  
vis, religionem ab illis æstimari postulas.  
Quos tandem fructus ecclesia vestra tan-  
to perē flagitat, ipsa minimē omnium fru-  
ctuosa? Verū nō detrectabimus, geratur  
tuę volūtatī mos. Cōparetur Anglia quo-  
modo nūc est, euāgelij viuens institutis, cū  
illa, quæ prius fuit, inquinatissimis hominū  
traditiunculis deformata, scrutemur anna-  
les,

les, aut excutiamus memoriae nostrae monumenta, regalis maiestas iudex sedeat, temporibus collatis sententiam ferat. Hoc si non accipis, disce ex me, quae sit Angliae praesens conditio, fabulas ut infames inimicorum nostrorum posthac ab auribus repellas. Principem habemus regno praesidentem, omnibus ex partibus incomparabilem. Eius aula nullorum expers est ornamentorum, quae vel ad regalis maiestatis honorem, vel ad reipublicae salutem pertinent. Archiepiscopi, & episcopi per se concionandi munus obeunt, & ecclesiarum omnium curam praesentes suscipiunt. Nobilitas inter se valde concors, plebs omnibus modis obsequetissima, summa totius regni tranquillitas. Haec alij fortassis aliter tibi renunciauerunt. Sed Cicero te tuus admonet, a multis multa dici, non necesse esse credi omnia. Narrant maleuoli nostri non quod verum esse sciunt, sed ipsi quod verum esse vellent, quoniam egregia foelicitate nostri status dolent

illis oculi. Quapropter bono animo es, & omnis ex animo migret mœstitia, quam nostra causa suscepisse videri vis. Ah, noli vir optime tantoperè conturbari, ne te nimium afflictes. Si Lusitania benè habet, Angliæ profectò rectè est. Sed mirum non est, si vehementer laboras, quoniam necessarij vestri sumus. Equidē eam, quæcunq; est, cum regno vestro necessitudinem libenter agnoscimus, & coelestem admodū optamus propiorem cognationem. Sed heus tu? Si tui necessarij sumus, vt ego tibi affirmanti credo, cur falsis nos criminibus cooperire pergis? Cur à nostris homines ab antiquissima, sanctissimaq; religione dicis abductos, quæ Iesu Christi sanguine sancita fuerit, & eadem ad hæc vsq; tempora permanserit, & ad aliam traductos execrabilem, & perhorrescendam? Hæc tu ita esse credis, quemadmodum à te ponuntur? Profectò nō credis. Nam in priscis, & optimis ecclesiæ temporibus, nec  
papa-



papatus fuit, nec plumbeæ peccatorum redemptiones, nec purgatorij nundinationes, nec adorationes imaginum, nec vagæ diuorum visitationes, nec in missis immolationes pro viuis & mortuis, & huius consimilia. Hæc enim religionis dedecora, quibus temporibus, & per quos ad ecclesiam obrepserint, ignorare non potes, sed dissimulas, tuorum auribus inseruiens. Itaque, quantuncunque terrorum commemoratione diuinæ maiestatis, & extremi iudicii, regalis maiestatis auribus offuderis, nullâ sermo tuus, licet ardentissimis verbis inflammatus, veritatis auctoritatem habere potest. Nec enim in animum maleuolum intrare potest sapientia. Tua verò quàm dira sit, & acerba maleuolentia, non solum omnibus partibus reliquæ potest accusationis tuæ cognosci, sed in eo se nimum effert, cum oratione seditiosa tumultum indicis, ad sagga vocas, & planè classicum ad bellum civile canis. Retexi vis omnem à regali maiestate,

iestate, communi reipublicæ consensu receptam religionem, & sumi vestram, facilem ad id viam esse. Vestrâ enim esse maiorem multitudinem, gloriam fore sempiternam: totum enim terrarum orbem applausurum. Hæc est tua, nescio stupidior, an improbior ad regalem maiestatem exhortatio. Quid igitur, sacrosanctam evangelij doctrinam, in qua continenter, excepto sexennij turbulentissimo tempore, plus quàm annos triginta permansum est, in qua regalis maiestas suam traduxit omnem ætatem, in qua deum inuenit sibi tam propitium, in qua tranquillum regni quinquennium, & summa prosperitate florens habuit, in qua maximus omnium ordinũ consensus interuenit, in qua legum præclarissimarum decreta sunt consequuta, verum hunc, & syncerum diui numinis cultum, vndiquaque tam diligenter à regali maiestate septum, & vallatũ, viri Lusitani vox perfringet? Epistola Hieronymi Osorij

forij disturbabit. Hoc tu sperare poteras?  
Hoc illi poterāt expectare, qui tuam in his  
rebus operam emendicarunt. Insipienter,  
mihi crede, fiduciam hanc suscepisti, nec il-  
li satis prouidē, quicunq̃ue tibi fuerunt au-  
thores, vt has partes tam duras ageres. Scri-  
be, si libet, sexcentas Philippicarum myri-  
ades, concurrerent omnes inimici, & inuidi,  
quorum tu digitis, vt videtur, numerum  
tenes, deus regalem maiestatem ex aduer-  
sariorum faucibus eripiet, vt sæpē antehac  
eripuit, deus illam in euangelij veritate cō-  
firmabit, vt assiduē confirmat, & propter  
amplificatam ex euangelio Iesu Christi  
gloriam, honorem illi sempiternum con-  
cedet. Theatrum autem hoc tuum, quod  
pompa verborū vsq; ad cœlos extruxisti,  
quantuncunq; magnificum, & resonans,  
tanti non cōducet, vt agnitam à se, regnoq;  
suo sacrarum scripturarum veritatem, à re-  
publica sua, papisticorum triumphorum  
respectu rursus excludat. Itaque facis tu

Ll.i.

quidem



quidem more oratorio, quòd epilogum in fine collocas valdè flebilem, & ex intimo tuæ facultatis artificio depromptū, in quo per interpositam omnium sacrorum obtestationem, iterum, atque iterum regalem maiestatem inuocas, et adiuras, vt pestilentis nouitatis authores exterminet, ad vestrā se recipiat ecclesiam, in qua veluti chorum quendam omnium virtutum maxima sermonis elegātia collocas. Sed nimirum omnis iste labor tuus ad nihilum recidit. Quā enim tu nouitatem erroris appellas, eam regalis maiestas veritatis antiquitatem esse cognoscit, pro ea deo patri continuas suppliciter gratias agit, nec eam nisi cum vita deponere constituit, imò ne cum vita quidem, quoniam ex euangelio se Iesu Christo rationem administrati regni reddituram intelligit. Te verò vel hospitem in euangelio putat, & aduenam, si hæc eadem non noueris, aut si dissimulas, bona fide nō uti, quæ viro philosopho conuenientissima

ma

ma semper est habita. Quapropter ô Hieronymè, mea quidem sententia rectissimè facies, si religionis disceptationes theologis omittens, ad philosophorum, & oratorum te numerum aggredes, quorum tibi scientia magis est familiaris. Præclaram habes styli facultatem, & quemadmodum videris, natura multum vales. Accessit ars, quæ naturæ bonitatem excoluit. Hæc præsidia studiorum, si ad argumenta contuleris, quæ tibi nota sunt, & in quibus elaboraris, vberissimam ex illis laudem consequeris. Vidi tuum de nobilitate libellum, elegantem in primis. Utinam ad huiusmodi te monumenta referues, quæ nullam habeant publicam offensionem, sed communem omnibus utilitatem afferant. Quod si tuis quibusdam te venditare vis, & in nos iterum incurras, iam antè tibi denuncio, venias ut multò, quàm nunc es, instructior. Quicquid enim humanitùs mihi contigerit, plurimos in Anglia reperies non solum

in ecclesijs, & academijis, sed etiam in regalis maiestatis aula, qui doctrinarum scientia, me quidem longè superiores, tecum omni ex parte sunt comparandi. Vale.

G. HADDONVS D. ROBERTO

Dudleio, illustrissimo comiti Leicestriae

S. D. P.

Nihil est hic rerum nouarum, nisi quòd aiunt à Christianis contra Turcas rem benè gestam, trucidatis Turcarum mille sexcentis, & captiuos magno consensu fateri, classem Turcicam esse vniuersam ad sexaginta triremes redactam, & Turcarum militum à Constantinopoli profecta fuisse viginti millia, nunc superesse decem millia. Gartiam, imperatorem Hispanum, coegisse centum triremes, & aliquantò amplius, & ad triginta naues onerarias, & esse in illius exercitu, militum viginti sex millia, præter nobiles voluntarios, & extraordinarios, qui se ad illum aggregauerunt. In-  
sula Gartiam expectat cum his copijs,  
aut



aut potius expectabat nono calendas Septembris. Nunc enim dies est præteruetus. In Hungariam irruperunt supra quadraginta millia Turcarum, & omnes illas oras vehementer perterrefaciunt, Christianorum maxima spes est in Hadecco quodam, equitum duce, qui parum viæ cōficit, quoniam milites aqua destituuntur, tamen reliqui illo aduentante, spe se sustentant, & magnis animis contra Turcas pugnant, & fortuna tam prospera, nihil vtrā Turcis detrimenti acceperint, sed potius superiores fuerint. Melitenses, de quibus priore loco dixeram, in certissima sunt expectatione maximæ victoriæ, si in tempore Gartias adfuerit. Danfouilus literas, ad tertium nonas Augusti Roma profectas, ad D. Wottonū misit, quibus ista nuntiabatur. Ego cum interesssem, animo, sicut potui, collegi, vt ex me Latinè audires, quæ copiosius ab alijs ad te perscribentur Anglicè. Cur igitur ego hæc etiam? Certè non quòd opus esse

putarem, sed primùm vt scires mihi potius argumentum, quàm animũ ad te scribendi deesse, deindè, quoniam intellexi, te studijs nostris interdũ vti: gustũ quendam Latini sermonis etiam in hoc genere tibi si præberem, minimè id importunum tuis recentioribus præclarissimis institutis fore putabam, in quibus si permanebis, maximũ ex illis ornamentum reliquis præclarissimis laudibus tuis accedet. Vale, & me inter tuos beneuolentissimos numera. Sum enim, & semper ero. Brugis quinto calendas Septembris.

EIDEM,

ET si satis mihi fuit, meum in te studium, & officium, aliqua ratione testatum efficere: tamen Henneagius meus renũciauit, aliquid ad me literarum tuo nomine profecturũ esse, quod audiui sanè perlibenter. Cuius enim amo, et veneror profectò omnia, sermo ad me illius, qualiscunq; fuisset, per-

periucūdus accidisset, nō ostētatione gratiæ  
meæ, sed testimonio tui iudiciij. Spero te,  
quem cœpisti, cursum in iure ciuili tenere.  
Nec enim quicquam præclarius facere po-  
tes, cum ad id subcisiua quædam tempora  
se dabunt, quæ licet rarò incurrunt, tamen  
cum incident, amitti non debent. Quam ad  
rem ex facultatula mea nonnihil attulissē,  
nisi valetudine fuissē oculorū impeditus,  
& adhuc essē. Illos si recuperaro, de iustitia  
tibi præcipiam aliquid, non iureconsultorū  
mōre, quanquam illo etiam, sed potius phi-  
losophorum, qui propius hæc ad commu-  
nem vsum in vita deducunt, & tanquam  
in domicilijs singularum personarum col-  
locant. Interim illum Plutarchi libellum ti-  
bi valdè commendo, qui de vita virorum  
illustrum, & rebus gestis est, græcum qui-  
dem ipsum, sed ita factum latinum, vt ver-  
sio licet laudem habere non debeat, tamen  
satis possit intelligi. Duo quondam orbis  
terrarum lumina fuerunt, imperium alter-  
rum



rum erat Romanum, & Græcum alterum. Ex his propè fontibus profluxerunt, quicunque fuerunt vetustis temporibus in vilo genere virtutis, aut laudis memorabiles. Has omnes heroicas, & illustres personas, Plutarchus veluti paria quædam inter se commisit, vt singuli Romani singulis Græcis respondeant, non solum professione, & studio, sed etiam vniuersa natura, & conditione. Quam tu quasi picturam quandã virorum excellentissimorum si paulò attentius contemplabere, nihil illorum te fugiet, quæ maiorem in hac vita, seu laudem, seu reprehensionem habere possunt. Accidet ex summa varietate voluptas infinita, quæ tædium in audiendo non sinet obrepere. Postremò, cum imagines omnium, & effigies animo comprehenderis, sumes ex vniuersis, quem maximè placebit imitari, vel potius Zeufidis industriã in effingenda Venere sequutus, aliquid de singulis delibans, perfectam, & absolutam omnis præstan-

stantiæ, tanquam arcem in animo tuo ex-  
ædificabis, in qua virtus, & gloria pariter  
habitare possint. Sed me quidem si consu-  
les, Publij Scipionis Africani quàm simili-  
mus esse voles, imò profectò iam es, nec  
quicquam illius ornamentorum tibi vehe-  
menter abest, præter commendationem  
bellicam, quæ licet temporibus sit necessa-  
ria, tamen illa facillimè Christiana respub.  
carere potest. Equidem si rursus vnquam  
in Anglia constitero, & tibi ad id, tempus,  
& voluntas sit, hunc Scipionem tibi fami-  
liarissimum reddam, quem ego veræ nobi-  
litis exemplar omnibus numeris exple-  
tum, & omninò incomparabile esse consti-  
tuo. Sed oculi me deficiunt, & quando tu  
ista? Certè vt volueris. Mihi tamen ignos-  
ces, qui nihil cogito sæpius, nihil opto vehe-  
mentius, quàm vt tandem ad veram anti-  
quæ nobilitatis, & eximiam præstantiam  
aspices, vt illorum simillimus sis priscorum  
heroum, quorum memoriam eruditissi-

Mm.i. morum

morum virorum scriptis immortalitati cōsecratam esse vides. Vale. Brugis, quarto calendas Iulij. 1565.

EIDEM.

OFFICIUM meum tibi tam gratū esse vehementer lētor, & quoniam ita est, eo tantisper vtar, donec voluntas tua feret. Facultas mea quò longius à tua prædicatione abest, eò studium mihi tuum iucundius est, & esse debet. In quo, meo in te amorì nunquam ipse satisfaciam, donec publicum aliquod monumentum palam in oculis, & auribus omnium collocarim, quo sciri possit, quid à te separatim, & a præclarissima familia tua communiter acceperim. Interea quomodo possum, tibi & hortator, & adiutor ero, tantum vt literarum studijs temporis impertias, quantum publicis, & necessarijs causis supererit, quod si tantum non erit, quantum volueris, sit tamen quantum esse poterit. Vetustis Romanę reipub.  
tem-



temporibus opinio multorum inualuerat, quæ nimium adhuc in aulis principum insedit, disciplinarum cognitionem nobilibus viris minimè necessariam, nec illos huiusmodi rerum commentationibus illigari debere. Sed contra tam barbam leuitatē, grauissimus est Ciceronis, & sapientissimus sermo: personarū illustrium nec multos congressus esse debere, nec rerum colloquia leuiorum, nec quicquam esse conuenientius, quàm vt præstantiæ conditionis, intelligētia par inueniatur. Quapropter licet in studijs artiū elaborare nō possis, tamē illis ita quasi colorari debes, vt nullius omnino sis expers liberalis scientiæ, præsertim illarū, quæ populares & sunt, & habētur, vt in primis eloquētia est, ius ciuile, et historia. Sed in hoc genere nō opus est vt accuratè tibi præcipiā, quoniā domi habes, vndè sumas, quod est à te profectò sapientissimè prouisum. Nec enim vllam in vniuersa re tua familiari, tam pretiosā inuenies supel-

Mm.2. lectilem,

lectilem, si talis vir est, qualis ex literis ad me  
tuis esse videtur. Quod exemplo Neoptole-  
lemi paucis tibi philosophari placet, rectè  
est. Hæc enim pauca fructus ferent, ut est in  
eodem loco appositum. Sed Neoptolemi  
vita fuit, & occupata, & militaris, tuam e-  
quidem occupatissimam esse confiteor, mi-  
litarem nec esse video, nec profectò fore  
velim. Et tamen Iulius Cæsar, qui monar-  
cha fuit orbis terrarum, in medio bellorū  
ardore, Trebatiū in nostrā Britanniam iu-  
reconsultum deduxit, ne illud discēdi tem-  
pus amitteret. L. Lucullus in periculofissi-  
ma militia, quam contra Mithridatem sus-  
cepit, philosophum habebat perpetuū co-  
mitem itinerum, ne studiorum cursum in-  
termitteret. De Alexandro magno notum  
est, quā assiduū sectatorem habuerit  
magistrū Aristotelem. Sed hæc vetera, &  
externa. Domum te deducam, & quidem  
rectā in aulam, & illud tibi proponam ex-  
emplum, ad quod tu, sicut arbitror, quā  
pro-

propinquissimè velis accedere. Regalis  
maiestatis occupationes infinitas vides, &  
tamen studia non ignoras. Equidè sæpè cū  
in aula versor, me supputet mei. Quoties  
enim ad eam admittor, propè semper in li-  
bris est, & tamen hominū, & negotiorum  
omnis generis, tanti sunt vndique concur-  
sus, vt vix de literis cogitationem videatur  
vllam posse suscipere. Sed nimirum huius  
industriæ fructus amplissimos percipit, re-  
rum omnium scientiā, de quibus cum alijs  
est cōmunicatura, gloriā deindè maximā,  
& immortalem, quod foemina secum tan-  
tam affert maximarum causarum intelli-  
gentiam, vt eam reliqui viri principes faci-  
lius admirari, quàm imitari possint. Quā  
licet omnes certatim foras in his oris vber-  
rimè commendent, tamen eius literarum  
laus, et varietatis sermonum, ex ore sapien-  
tum, & confyderatarum personarum la-  
tissimè spargitur, & memorabiliter eluces-  
cit. Huius tu diuinissimæ principis, si dili-



gentiam, & assiduitatem imitabere, nōnullam etiam partem maximarum laudū attinges. In quo, cum melius recordor, mea sanè non opus fuit, tam longa cohortatione, quoniam amorem literarum omninò habes hæreditarium. Pater enim, licet ipse ineruditus, tamen eruditorū studiosissimus fuit. Quod etiam in eo satis apparuit, quia in me ipso, cum doctrinam non posset, tamē umbram doctrinæ quandam magni fecit. Deindè, frater natu maior Ioannes Varuicensis, ita disciplinarum amore fuit incensus, ut illis omnia propè alia posthaberet. Et licet facultate dissimili, tamen simili studio, & affectu, est tuus, qui nūc est Varuicensis, qui nullos libentius audire solet, quàm quos sapere plus, & intelligere putat, quàm alios. De te nihil, præsertim ad te, tantum hoc ad extremum apponam, cum te deus longè supra communem hominum conditionem euexerit, tibi dandam esse operam, primùm ut deo, à quo sunt omnia,  
sup-

supplices & seruias assiduè, deindè, vt illam omnium rerum vndiq; scientiam colligas, qua principi quod debes officium, & patriæ persoluas. Quam ad rem ego si quid afferre possim, aut potero, nihil eo vno mihi gratius vnquam est futurũ. Vale. Bruggis, postridiè nonas Iulij. 1565.

Heræ meæ incolumitate nihil mihi potest esse optabilius, & secundũ eam, tua. Quapropter quòd de vtroque me certiolem feceris, fecisti benignissimè, & ego vt maximè desyderare poteram. Rursus vale.

G: HADDONVS PRÆSTANTISSIMO

viro D. Thomæ Smitho equiti, & Legato in Gallia.

SCripfi secundas ad te literas ante aliquot menses, sed vel interciderunt in via, vel quoniam nihil habebant argumenti seri, fortasse negligebas. Ego verò ne hoc quidẽ tempore quicquam ad te noui ex nostra republica possum afferre, tantũ hoc mihi pro-

propositum est, meum vt vetus studium tibi priuatim representem, quod licet tibi minimè obscurum sit, tamen diuturnitate tēporis vel minui, vel reliqua ratione posset labefactari videri, nisi interueniente literarum officio renouaretur. Ego quidem eodem erga te sum animo, quo semper fui, nec vllum ex nostris prætereo, quem scire putem, quin illum studiosissimè de salute tua scisciter, deindè reliqua, quomodo possum, exquiro, quid agas, vbi sis, quos conuictores adhibeas, quantum tibi placeat Gallia, quantum tu Galliæ. Respondent optimè, & quemadmodum ego maxime optare vellem. Vnum est, in quo mihi minimè satisfieri potest, quod diutius, quàm vellem, te cariturus videor. Sed quoniam mihi quod abest, impenditur communi patriæ, cedere bono publico facilius patior priuatum desyderiū. In cœna fui superiore nocte cum Legato Gallico, literarum, vt fit, iniectus sermo, citatus ad rem, nescio quam,



quam, Cicero. Legatus illum vt summum oratorem admittebat, sed iuris scientiam detraxit penè omnem, & philosophiæ vix mediocrem reliquit. Ego contrà iureconsultum omninò bonum, et philosophum illum prorsus eximium esse contendebam. Hæc inter nos altercatio sic incaluit, vt exitum difficillimè reperiret. Tuum vtinam hæc controuersia iudicium habere potuisset, cui non minus vni tribuo, quàm Platoni poeta nescio quis, à reliquis destitutus. Non dubito quin Osorij videris ad reginā Angliæ conuitiatricem epistolam. Occursum est à quodam nostro, quem nominare nihil attinet. Cognosces enim ex orationis filo facillimè. Tu eousque defendes, & tuebere, quousque tibi probabitur, nec in lucem proferri fines, nisi quatenus iudicio tuo satisfaciet. Hic ad longum tempus hæsurī videmur, quoniam Londini non secus pestistitiū est, quàm solstitium. Si nos ver, quod mox aduentabit, in hac clade deprehendat,

Nn. I.      hendat,

hendat, ex aulicis breuifumus aratores futuri. Scribe quaeso, si nihil aliud, saltem hoc vnum, viuere te, nec Haddoni esse tui oblitum. Vale.

THOMAS SMITHVS ORNATIS-

fimo viro Gualtero Haddono.

S. D. P.

NVllas quidem certè, mi Haddone, quod sciam, abs te literas accepi, quibus non responderim. Nolo enim eiusmodi officio videri deesse, tibi vt non respondeam, amico tam suauis, & beneuolo, tuis doctissimis literis prouocatus, qui ad tot homines, non omnes forsan amicos, quasi quotidie dem literas. Et tamen non equidem excusabo me tam affirmatè, ac præcisè, vt negem fieri posse, vt responsum à me prætermisum fuerit, subitaneis fortè negotijs, & tam implicatis occupato, vt ante tabellarij digressum non vacauerit scribere, maximè si post eius etiam abitum, alijs, atque alijs opprimantibus me occupationibus, interceptus

tan-

tantisper sim, quoad prorsus tuarum literarum fuerim oblitus. De me quod tam sedulò quæras, habeo gratiam. At ego à te desydero literas nouarum rerum plenas, quid communes amici nostri agant: ecquos illorum pestis, aut morbus alius absumpsit: quos singularis eruditionis novos homines, fama claros, nūc habet Cantabrigia nostra, aut Oxonium. Scis enim illam segetem identidem crescere, & perire. Quid opinionis habent amici nostri communes, qui rebus agendis præsunt, de nostra legatione. Quid in actis nostris audis placuisse, quid displicuisse. Difficillimum enim est, agenti publicas res, ita vno, & cōtinenti tenore comparare suas actiones, vt illi perpetuò applaudatur, errata verò sua recognoscere, ei, qui se corrigere, & velit, & possit. Vtilissimum est, nec ingratum quidem, si ab illo proficiscatur admonitio, qui propter errorem admissum, aut iactatum, doleat tanquam amicus, non lætetur,



nec falsò imputet, vt maliciosus, aut inuidus. Quod quidem cum in alijs omnibus vtilitatem, et fructum magnum habet, tum in primis grandem adfert commoditatem, cum is admoneat, qui & authoritate valeat propter opinionem amoris, & docere possit, quomodo queat corrigi quod reprehendatur, si suauis, blandoq; sermone quasi dolens, non acerbè, & accusatoriè tanquàm insultans, id faciat. Quæris qui sunt mei conuictores. Aliquando quidem cōuictores habeo Petrum Ramum, philosophum non ignobilem, Ludouicum regium, historicum item nec infacundum, nec imperitum, & alium astronomum. Primum, & tertium prælectores regios. Sed hos rarissimè, quot mēsis fortassè semel, iterumue, ideò, quod nec illa tempora sunt, vt me audeant familiarius colere, bello etiānum inter principes promulgato, nec illud otium mihi datur, quòd eos vacet sæpius inuitare. Cōuictrices autem assiduas habeo, sollicitudi-

tudinem, curam, iacturam rei familiaris in Anglia, impensas maiores, quàm perferre possim in Gallia, disceptationes dubias, æmulationes hîc, existimationes isthîc varias. Quid quæris, mi Haddone? Ecquid placeant mei conuictores, conuictricesque? At anno quasi toto proximo alios habui cõuictores, partim vicinos, partim familiares, pestem, bellũ intestinum regionis, famem. Cætera paululũ emolliuerunt, prima vt intelligo ad nos concessit, alterum nunc dormit, & soporatur. Tertia, si pro fame, caritatem annonę ponas, etiam hodiẽ apud nos magis viget, valetque. Et cum his omnibus monstris, conuictoribus, cõuictrici-  
busque viuo, ac valeo. Sic superis placuit. Vt cũq; se res habeat, illo me cõsolor, quòd omnia mea mecũ portabo. Hæc verò sunt quæ tangunt propius, mi Haddone, q̃ Cicero, utrũ fuerit iureconsultus, nec ne. De qua re si quis hodiẽ iureconsultus dubitaret, quoniam sunt vt plurimũ ætatis, et tem-

porum ignorantissimi homines, non mirabor. Fuit autem Cicero sui temporis inter eos, qui ius ciuile non profitebantur, iureconsultissimus, id quod non solum multæ suæ actiones, orationesq; monstrant: sed & Topica ad Trebatium, & tantum sibi profecisse visus est, vt si stomachum sibi facerent, tri duo proximo ius ciuile se professurum iactauerit. At nec Accursiũ, nec Bartholum, nec Baldum, nec Iasonem vidit. Sed nec digesta, codicemue Iustiniani. Nõ dum enim erant. Sed ius illius temporis ita perdidicit, vt ni orator esse maluisset, iuris fuisset habitus consultissimus. Si iureconsultus eum philosophum esse pernegauerit, facile respondebitur ei, quod Apelles futuri, ne vltra crepidam suum iudicium faciat. Si philosophus, vt ex philosophia ipse quæ Cicero scripsit, siue de deo, siue de diuinatione, siue de his quæ in alijs suis philosophicis pertractata sunt, dissoluat, nõ dico, vt nũc sunt, nam causabitur corpus forsan,



san, & eloquentiæ splendorem: sed dico ego, detracto corpore, & tumore, quæ è facultate sua mutuatus est, & respondeat ad eadem nudata, & è nervis dialecticæ tantummodo constricta, atque in vtramvis partem. Hoc si irrideat, & facilè esse putet, hanc ego mihi ante alia demandatam provinciam deponere velim, vt sic tuū Ciceronem defendā, & non dubito declaraturum, plus hunc talem philosophum arrogantiae, quàm sapientiæ tenere. Vale, & Haddonam tuam quæso ex me saluta, cui si non rescripsi gratias infinitas pro subscriptione sua, debeo. Tuum, quem dissimulas, librum videre cupio. Lutetia. xxix. Decemb. 1562.

G. HADDONVS PRÆSTANTISSIMO

viro D. Thomæ Smithæ equiti, & legato in Gallia.

Q Vanquam vsura mihi nunquā placuit, præstantissime Smithe, tamen cumulari me tuarum literarum grandibus, et multipli-

tiplicibus vsuris vehementer lætor, nec de  
silentio tuo posthac conquerar. Binis enim  
tuis literis tam fructuosum, & luculentum  
fœnus accepi, vix vt sexcentæ sortes meæ  
parem æstimationem habere possint. Itaq;  
mecum ipse, quomodo possum, rationē in-  
eo, quemadmodum plenius de nostris ad te  
rebus perscribam, & in eo tu mihi præcla-  
rus adiutor es, qui ponis ferè in percontan-  
do singula, de quibus à me cognoscere vis.  
Et tamen ne sic quidem satisfacere possum,  
vel insita quadam, quam tu minimè igno-  
ras, mea negligentia, vel temporum tene-  
bris, quoniam pestis latè serpens ubique si-  
lentium affert, & solitudinem, nec tamen  
hæc clades quenquam confecit magni no-  
minis, aut quem tibi notum esse putem,  
nisi fortè meum noras Thomam A. Eu-  
clionem illum prædiuitem, cui nec aula  
defuit, nec aurum. Strophilus quidem vi-  
uo defuit, mortuo tamen superest, qui, &  
aulam eruit, et erutam breui totam abligu-  
riet.

riet. Academias intrauit pestis, sed damni dedit, quod sciam, nihil. Equidē ex illis literarum nostrarum incunabulis minus cōmemorare possum, quā vellem. Conticescunt omnes extraordinariæ cohortationes, & institutiones, quæ nostris temporibus vndique personabant. Quare si tuis illis, quos nominas, quantum velles conuietoribus frui possis, equidem non multò minus in hoc genere tibi suppeditaret Gallia, quā ex vtrisque potest academijs nostris promi. Postulas a me quantum communibus amicis in legatione tua satisfacias. Equidem horum interiorum consiliorum scis quā nō sim insolens, tamē qui meo iudicio sunt ex nostris intelligentissimi, plurimum & sapientiæ tuæ tribuunt, & moderationi, præsertim Cecilius meus, inò noster, qui semper honorificam, & peramicam tui mentionem facit. Catonem Cicerō corrigere non poterat, sicut ipse fatetur, leuiter emendare poterat, & conformare.

Oo. I.

Smithum



Smithum Haddonus nec corrigere potest,  
nec emendare quidem, imò tibi vehemen-  
ter author est, vt te ipse in consilium adhi-  
beas, tecum ipse causas pertractes, nec ru-  
musculorū ventis, aut procellis incidentiū  
aliquando terrorum, ab illis institutis de-  
ducare, quibus rempub. rectè credis admi-  
nistrari posse. Sit Flaminius qui velit, te Q.  
Fabium, & esse velim, & fore spero. Te-  
rentius Varro per omnes respub. volitat,  
sed Pauli Æmilij foelicissima celebratur  
memoria, etiam in funere infœlicissimo.  
Nec enim nobis quicquam præter culpam  
præstandum est, & quæ sapienter prouisa  
sunt, iustam laudē habere debent vtcunq;  
casus illa peruerterit. Extremū est vt Enni-  
anum illud tibi sæpè redeat in memoriam:  
Non ponebat enim rumores ante salutē.  
Nec enim animus in publicis causis confi-  
stere potest, aut cohærere consilium, nisi  
constantia factorum adhibeatur. Quan-  
quam in eo durior est tua conditio, qui le-  
gationis

gationis ab alijs leges accipis, & ex præscripto remp. procuras, tamē vt licet te ipse interpone, nec subdice, si quid esse vides, quo nos putas adiuuari posse. Funestas autem conuictrices prorsus extermina, nam acie ingenij præstringunt, nec quicquā afferunt aliud, nisi subitas corporis, & animi ruinas. Neque verò tuam vel prudentiam, vel doctrinam, vel vsum decet, hominum offensionibus, vel iracundia, vel errore nimium conturbari. Tales enim fluctus studiorum, & cogitationum æstus, in communi vita semper fuerunt, et erunt ad extremum. In quibus si ratione procedimus, et ordine quantum possumus, rectè factorum conscientia sustentabimur, nec temerarij fortunæ flatus mentem in sapientia fundatam commouebunt. Itaque tandem vir es, & exemplo Biantis te ipse recolligis. In quo nervos tuos valdè probo. Quorsum enim illæ præclaræ Smithi mei de patientia, de fortitudine, de omni animi laude conciones?

An in sola scholarum vmbra delitescunt?  
An Cantabrigiæ parietibus tectè cōcludū-  
tur? An foras se non possunt efferre? An in  
solem, & puluerē produci nolunt? An nō  
etiam in Galliam si opus erit te comitabun-  
tur? Ego verò nō magni facerem has artes,  
quibus te scio esse instructissimum, nisi nūc  
præstò sint, cum maximè illis est opus,  
nec te sapere quicquam existimem, si in his  
tuis difficilimis temporibus tibi ipse absis,  
cum maximè adesse debes. Defensio Cice-  
ronis tua perplacuit, quoniam mea licet  
prius eadem esset opinio, tamen authoritas  
me tui iudicij planè cōfirmavit. Vxor mea  
nouum mihi Gualterum Haddonum sub-  
stituit, vt nunc quid veteri fiat, minimè cu-  
randum sit. Responsum meum ad Oso-  
rium, si me amas, pondera diligenter, ne  
quid in eo secùs sit, quàm par est. Archety-  
pus est iracundior, sed aculeos expunxi, re-  
seruans in aliam disceptationem, si opus e-  
rit. Vale. Ex aula quarto nonas Ianuarij.

Eidem.



EIDEM.

**I**N fœlicitate mea, non obliuione tua factum est, vt iamdiu nihil à te literarum acciperem. Nam D. Secretarius communis noster amicus mihi renunciauit, litèras & tuas, & suas à se transmissas ad me, cum in ora Norfolciensi peregrinarer. Sed omnia in via interciderunt, nec ad me syllaba quidem vlla peruenit. Multum tibi respōsum debet Oforianum, & in eo sanè plusquam vellem, quòd impensis tuis, vt audio, praelis commissum est. Vnum abfuit, quod ego vehementer requirebam, vt Oforius apponeretur, sed alij secus iudicāt, qui plus sapiunt. Ita que facilè mihi ab illis patior satisfieri. Tempesta Halisiana multo remissior est, quàm fuit, sed adhuc planè non cōquieuit. Tu syrtes omnes, & scopulos Gallicos, vt spero, præteruectus, in tranquillo mari tutum, & incundum cursum tenes, tamen Angliam tuam albis rupibus ad lit-  
Oo.3. tora

tora prominentem fortassis aliquando desyderas, vt Ithacam olim suam Vlysses suspensam in saxis asperis. Richardus Sackuillus hoc ipso tempore valdè trepidat, & tumultuatur in excipienda regina suis in Londinensibus ædibus, quas tu cum vix lateritias reliqueris, in reditu plusquam marmoreas inuenies. Cras alunt ad Cecilianam domum profecturam, et eius filiolam recens natam baptismo consecraturam. Pestem deus ex vrbe summouit, & transtulit rus, vt ad omnes delictorum poena perueniat. Vtinam similiter omnes velint resipiscere. Nihil est aliud, quod sciã, scriptione dignum, vix quidem ipsa ista, sed magnus amor meus parua causa contentus est tecum colloquendi. Domesticum tuum, nuncium hunc meum, vt potui, reginæ commendavi, sed profeci parum. Reiecta petitio fuit in alia tempora, mihi voluntas non deerit illum adiuuandi. Collega qui tuus fuit, aut antecessor, aut alio quocunq; nomine

mine, multum in aula nobiscum est, et post  
 tot procellas otio perfruitur, ut arbitror nō  
 illibenter. Tu perge magno, & inuicto a-  
 nimo, & te ipse ad laborem vrge pro patria  
 suscipiendum, & illud vetus firmiter tene:  
 Nihil ab homine sapiente præter culpam  
 esse præstandum. Petrus Ramus, ut audio,  
 me suo nomine salutari voluit. Si ita est, aut  
 quomodocunque est, illum respectu lite-  
 rarum diligo, præsertim si magistris pareat  
 Ciceroni, & Aristoteli, cæterosq; scientia-  
 rum tibi notos professores. Nec enim ar-  
 bitror penè vllam inter homines maiorem  
 esse, quàm communium studiorum con-  
 iunctionem. Vides quàm ægrè abs te diuel-  
 lar, & tamen oculis sum multò deteriori-  
 bus, quàm vellem. Vale. Nonis Iulij. 1564.  
 Londini.

THOMAS SMITHVS ORNATIS-  
 simo viro Gualtero Haddono. S. D. P.

**T**Anti te facio, mi Haddone, ut nunquam  
 de te cogitē (cogito autem sæpius, quàm  
 tu



tu putas) quin admirer tantillum honoris  
tibi, qui infinities tantum mereris, homini  
literato dari. Tanti tuas literas facio, vt mi-  
hi propemodum esse videar in Anglia tan-  
tis per dum eas lego. Et putabam quidem  
certè naufragium tantum in mari fieri.  
Nunc audio inter Londinum, & Norfol-  
ciam fuytes esse, qui literas non modo me-  
as, sed etiā D. Secretarij possint absorbere.  
Ita nihil est, vt video, nec in mari, nec in ter-  
ra tutum. Parum autem est iacturæ in meis  
literis amittendis, nisi quod officium non  
fecerint suū in te salutādo. Et hanc quidem  
culpam Norfolcienses latrones præstabūt.  
Quo enim alio nomine tabellarios hos,  
perditores literarum, appellem? Me video  
foeliciorem, qui tuas per tot maris, & terræ  
spacia transmissas acceperim, scriptas nonis  
Iulij. 1564. datas mihi. 13. Septemb. Tem-  
pestatem Halisianam remissiorē fieri gau-  
deo. Vtinā conquiesceret penitus, vt Lon-  
dini pestis. Ita enim homo sum, vexari no-  
lim

lim quenquā, quietos esse cuperem, si fieri possit, omnes mortales, & liberè philosophari, qui velint, cæteros suam quenque rem agere. At hi philosophati sunt nimium, dicis. Credo equidem. Puto tamen quòd egerint curiositatis potius, quàm malitię vitio fecisse. Sed de tota illa re nihil certi scio, nisi quòd obscurè de vexatione, & varia relegatione certorum non obscurorum hominum, & ob librum, nescio quem, ab eo perscriptum, ab illis lectum, audiuerim. Quod quale sit nescio. Tantum video periculosum esse, in rebus arcanis principum, & regnorum, nimis velle sapere. Pestis, quæ Londini desijt sequi, Lugdunum non vexauit modò, sed quasi exhausit, & desertum reddidit. Inuasit & Viennam Allobrogum, & Valentiam, & hætenus vt odiosa, & malè grata comes, aulam hanc sequuta est, quacunque locorum diuertit. Nunc illam frigus hoc brumale, & algidus boreas refrigerauit aliquantulum, et, vt spero, tandem

effugabit. Regnum hoc aliàs quietum est, & ab anni exacti malis incipit respirare. Belli autem, & præsertim intestini, reliquie sunt, vt scis, pestis, & annonæ caritas, &, si princeps nō valdè benè prouideat, copia sicariorū, & latronum. De terræ motu circa Nicæam in finibus prouinciæ Narbonēsis, & Sabaudia, credo te audiuisse. Princeps hic, & senatus regius, occupatus est in corroganda pecunia, ad dissoluendum æs alienum, quod in bellis anteactis cōflatum est, & in componendis partium malè cohærentium animis. Hispanorum rex Mauris arcem vnā abstulit, &, vt fertur, ex victoria classem Corsicam emisit ad edomandum Sanpietrocorsum, et ceteros rebelles, & insulā Genuensibus, quæ propemodum fuit amissa, restituendā. Vos, vt audio, in Angliā nihil nisi genio, & venationibus indulgetis. Cetera nō magni facio. Volui autem Cantabrigiensibus disputationibus interfuisse, & reginam spectatricem, & specimina



na nostratium ingeniorum vidisse, totque  
nouos insolitæ faciei magistros. Benè vale,  
charissime Haddone, & Haddonæ tuæ ex  
me quàm officiosissimè salutem dicito. A-  
uenione, primo Octobris. 1564.

G. HADDONVS PRESTANTISSIMO

viro D. Thomæ Smitho equiti, & legato

in Gallia. S. D. P.]

**F**Acis peramicè, quòd tam frequenter, &  
honorificè de me cogitas, & humanitati  
tuæ mea beneuolentia respondet, & sem-  
per respondebit. Valdè lætor tam pretiosas  
tibi literas meas videri, cuius ego solo iudi-  
cio reliquorum opiniones facilimè possum  
cōtemnere. De respōso meo quid sentires,  
scire cupiebā. Sed quoniā tegis tā diligēter,  
posthac non exquirā. Equidem istis litera-  
rum vel interceptoribus, vel occultoribus  
admodum irascor. Nam illorū aut fraus,  
aut negligentia sæpè necessitudines amico-  
rum valdè peruertit, & hoc ipsum est ho-  
mini officioso peracerbū, de peregrinantis,

aut absentis amici statu, & salute non posse cognoscere. Halifianum negotium, nescio quomodo, lentū est, & adhuc magnas habet offensionis reliquias, et tamen D. Ioannes Graius, qui dignitate fuit, & natura caput, subita vi febris irruentis est absorptus. Itaque reliqua fortassè posthac molliora. Tuus autē sensus de cōmuni quiete sic cum meo cōspirat, nihil vt esse possit similis. Vtinā illi, quos in rep. præficit deus, huiusmodi suscipiāt pacis, & cōcordiæ cogitationes, et, quemadmodum spero, suscipient. Certè quidem nihil possūt facere diuinius. Pestis, aliquo grassante diro sydere, per omnes christianas nationes peruagata est, nunquam fuit mea memoria tam communis huius mali contagio. Quanquā illud accidit in hoc genere mirabiliter, quòd aulam vestram afflat tam audacter, et sēpè. Sed ita morata res est, irrumpit ad omnia, nullo vel personarum, vel temporum, vel locorum respectu. Benè est, quòd hanc calamitatem  
hyberna

hyberna frigora mitigauerunt. Reliquos illos belli ciuilis funestos comites agnosco. Spero nos, & nostris, & aliorum exemplis posse condoces fieri. Terræ motus Nicæanus multò terribilior ad nos allatus est, quàm reuera fuit. Montes, & valles, fluuios, & ciuitates narrabant infra omnes inferos demersos. Sed ita mos est in dissipandis rumoribus. Vix fieri potest, vt tam graues, et tam capitales Gallorum vestrorū intestinæ dissensiones adhuc placentur, præsertim cum ad sanguinem, & cædem exarserint. Arbitror ad perfectam medicinam longinquitate multorum annorum opus esse. Princeps rectè prouidet, quòd nūmulos cōquirat, quibus & metui potest, & amari. Nostra sunt alia quædam instituta, tibi, quemadmodum video, nō ignota. Si Cantabrigiæ fuisses, herbam, & florē vidisses. Sed à maturitate adhuc aliquantū absunt. Vnus erat Huttonus theologorū axiomatum defensor, qui mihi vehemen-



ter satiffecit, vsque eò, vix vt aliquid audierim melius. In nouis magistris ex nobilitate delectis, quid academia spectauerit, cognoscis, quid successurum sit, sciri non potest. Ego minutissimis, atq; adeò mendicissimis in causis ita conteror, vt cum nihil ab illis otij supersit, nihil tamen penè sit in illis negotij. Sed quoniam ita deo visum est, & principi, sum eo contentus quod est, nec aliquid confector amplius, aut altius. Ciceronem adhibeo, Romanamq; familiariorē habeo, quàm præsentem remp. quàm rectè nescio, minimè sanè illibenter, vt status rerum mearum est. Haddona mea te valdè diligit, & salutatur, & magnas tibi gratias agit, quòd sui mentionē feceris. Vale. Londini, domi meæ pridie calendas Decembris.

THOMAS SMITHVS ORNATISSIMO viro Gualtero Haddono. S. D. P.

QVod literis tuis, quas Barlous meus attulit, haud responderim, non negotijs meis

meis imputabis, quantumvis erant grādia,  
sed valetudini meæ. Conflictabar enim il-  
lo tempore cum febre lenta, tabifica, mole-  
stissima. Et me metus tamen magis ange-  
bat quartanæ, quam præsentis mali sensus.  
Nolebam quidem certè ad te scribere ani-  
mo tam vexato. Post Barloi discessū, qua-  
si si inducię inter nos essent ruptæ, morbus  
me inuasit acrius, ac sæuius. Iam de salute  
cœpi desperare: cum subito residere cœpit  
vis mali, & se remittere. Accessit vnà cum  
valetudine meliore quietior animus, et cœ-  
lum etiam ipsum per se mitescens, me iam  
omnis gaudij oblitum cœpit exhilarare.  
Credo ego mœstitiam, & tedium illud vi-  
tæ, quæ me dies, noctesq; dilaniabat, in san-  
guine, & venis delituisse. Nam percussa  
vena, vno plus minus die, & animo, & cor-  
pore conualescere me sensi. Die proximo  
vt aere fruerer liberiore, ac latiore, lepores  
venabar fauente Delia, quod genus exer-  
citij continuaui ad aliquot dies. A primo  
Martij

Martij ad. xij. eiusdem. xix. lepores canes nostri ceperunt. Iam me videns confirmata valetudine, Tholosam reuersus sum. Vnde rex .xviii. huius mensis discessit Burdegalam versus, quem quia consecrari oportet, hæc in itinere scripsi. Si de te, & frequenter, & honorificè mentionem non facerem, existimari quidem debeam, vel me ipso iudice, & amicitiae nostræ, & officij mei valdè esse oblitus. Literis tuis, mihi crede, nihil iucundius videtur. Sed quia rogitas, quid de responso tuo ad Olorij criminationes iudicè, vno verbo respōdebo, nihil esse quod à te proficiscatur, quod nō mihi verbis Latinum, sermone tersum, & sententijs videatur graue. Hoc vnum in illo non probabā opere. Cum nimium impari videris aduersario conflictari, qui nihil præter nudam Ciceronis imitationem adferat, rem ipsā, de qua agit, ignorat. Id quod tu sūma cum modestia, & minimè dentatis verbis, tamen quasi indice commonstras. Iudiciū,  
senten-



sententiamque de tuo libro meam iam pridem ad prætorem Galliae, quem cancellarium vocant, dedi, cuius literarum exemplar, ante aliquot menses ad D. Secretarium trāsmisi. Pestis hîc iam perfrixit prorsus, & ciuiles dissensiones consopitæ videtur, quiescunt saltem ad tempus. Dolet mihi quòd Cantabrigiæ non fuerim. Magnam enim voluptatem cepissem in illis audiendis, & fortassis agnoscerem in me veteris vestigia flamme. Sed de tota re tuo confido iudicio, & gratulor illi academiæ, quòd talem Huttonum habet, qualẽ describis. Tu cum Cicerone tuo te oblectas, & Romanam habes rempublicam familiariorem ais, quàm nostram. Quæris quid agam ego? Non sanè sum otiosus, tantisper dum esse otioso à legationis negotijs liceat. Et quia nostram rempublicam absens desydero, de eadem tres libros hîc Tholosæ conscripsi, quibus titulum feci de republica Anglorum, in quibus totam ferè formam eius explicui,

Q. q. i.

præ-

præsertim in illis rebus, vbi à cæteris differt. Differt autem ferè in omnibus, ita vt opus longius progressum sit, quàm putabam. Scripsi autem sermone nostrati, stylo inter historicum, & philosophicum medio, ad eam formam, qua scripsisse coniectabam Aristotelem de multis Græciæ rebus publicis, qui libri nunc exciderunt. Præbui argumentum vberimum illis, qui disputare philosophico more de singulis quæstionibus volūt, & problemata facere, æquumne an iniquum sit, & utrū sit melius, id quod isthîc teneatur in Anglia pro lege, an quod hîc, & in illis prouincijs, quæ Romano iure reguntur. Nam diuersa sunt ferè omnia, & ego crasse, & in summa vtrunq̃ue explicui. Quin ad me mittas librum, ais? Percupio videre quid sit quod egeris. Iacent adhuc in meorum aduersariorum lituris, vbi in mundum, & codicem sunt perscripta, mit- tam ad te. Namque tu solebas nostras ( vt ille ait ) esse aliquid putare nugas. Dices  
qui-

quidem certè, vt puto, cum perlegeris, me non incuriosè versatum in repub. nostrati. Sed necesse est in hoc còmentario hiulcose, et lacunatos nonnullos locos, quòd nostrarum legum ne vnum quidem librũ mecum attuli, hìc nec habebam iureconsultos, quos consulerem. Itaq; tantum scripsi, quantum pro tempore memoria rerũ à me visarum, aut lectarum suggessit. Quæ sunt imperfecta, domum reuersus per otium potero supplere. Benè vale, & me, vt facis, ama, & amantissimæ tuæ Haddonæ quàm officiosissimè ex me salutem dicito. Burdegalæ, vj. die Aprilis. 1565.

Quid autem agit Aschamus tuus, item ac meus? An ipse otietur solus, & eius musæ silent? Credo verò gallos suos ita illum excantasse, vt amicorum suorum prorsum sit oblitus. Iam biennium, & sex sunt menses, cum nihil ex eo audiuerim. At enim tu ad eum non scripsisti, inquis. Vter ad al-

Q. 2.

terum



terum filuistis. Quid igitur illum accusas? Quasi verò tantum sit laboris illi vni è tam multis ad me scribere, quantum mihi vni ac soli, ad tam multos rescribere. Aut perinde sit illi in Gallia scire quid rerum geratur, vbi nunquam fuit, atque mihi ex Anglia rescire quid fiat, vbi non solum omnes mei pariter amici, & inimici sunt, sed quicquid adeò sit mearum fortunarum. Excitato tu, quæso, illū, si in tanta gallorum copia etiamnum dormiat. Nam mihi nunc Galli mei non tantum facessunt negotij, neque tam molesti sunt, quàm initio fuerunt. Iterum vale, & illi quæso ex me plurimam salutem dicito.

G. HADDONVS PRÆSTANTISSIMO

viro D. Thomæ Smitho equiti, & legato

in Gallia. S. D. P.

**T**Andem tuas accepi, diu desyderatas literas, et quoniam erant pleniores, quàm expectabam, plus illis delectabar. Nam ex tuis literis longissimas quasque semper optimas

timas esse statuo, sicut ille, nescio quis, de  
Ciceronis respondit epistolis. Quauis au-  
tem aliam potius optauissem intermissio-  
nis tuæ causam fuisse, quàm eam, quæ fuit,  
præsertim si tantum apportauit anxietatis,  
& periculi, quantum ego tibi affirmanti, &  
experto credere debeo. Meum quoque ce-  
rebrum melancholici quidam spiritus ob-  
stupefecerunt, sed illos maxima ex parte  
dissipatos esse confido. Deliam tibi propitiã  
fuisse satis credibile est, cum sis alumnus  
Apollinis, sed tantum esse tibi requietis, &  
otij, nescio, mirer ne magis, an læter, an in-  
uideam. Quod in itineris labore, & strepi-  
tu tibi non exciderim, abundantia quadam  
beneuolentiæ tuæ factum est, quæ mihi  
nunquam ex animo est exitura. Ex eodem  
studio tuus ille mearum literarum amor  
existit, in quibus vtinã aliquid tuo iudicio  
dignũ apparere possit. Ignosce mihi quòd  
non nihil ambitiosius, quàm pudor meus  
fert, tuam de Osoriano responso sententiã

requisierim. Erat enim aliquid arcani, quod me permouebat, ut id curiosius expiscarer, quàm solebā, aut quàm opus erat. Nunc in responso tuo prorsus acquiesco, magnasq; tibi gratias ago, quòd rei tam minutę beneuolentissimū testimonium dederis. Deflagrauisse pestem, & extinctam esse, tibi primum gratulor, deindè etiam Gallię, cuius planè foelicitatem admirabor, si perfectam inter se concordiam in tam breui tempore recuperare possunt. Tuos de republica nostra libros multum aueo videre, quoniam non dubito quin in illis, ut soles, elaboraueris, & argumentum est præclarissimum, quod omnino talem, & authorem, & artificem postulet, qualis tu es. Sed profectò latinè scribi debuerat, ut alias respublicas habere possemus, testes nostrorum institutorum. Quæso fac ut eos, quantum potes, huc ableges. Hic enim cum hominibus litigo, quos ego simplices, & apertos existimabā, sed vafros, & captiosos inuenio, qui syllabarum



barum apices aucupantur, & finem iuris constituunt quæstum proprium. Nihil est, quemadmodum quidem adhuc res eunt, concordia nostra desperatius. Quapropter in libris tuis, cum venerint, tanquam in opportuno quodam diuersorio respirans, valdè recreabor. Nec enim quicquam hîc occurrit, quod magnoperè dignum lectione esse possit. Aschamus noster non dormit, sed tam altè stertit, vt vix experge fieri posse credam, si quis ad aurem illi inclamauerit. Nam ne ego quidem, cum minimo intervallo absim, literam ab eo vllam. Sed est credo aliquid, quo impeditus est. Scio illū vtriusque nostrū esse studiosissimum, & audio ipsum hoc tempore litibus iuris permolestè exerceri. Admonebo tamen, quoniam ita vis, & etiam increpabo. Deus nos in Angliam saluos deducat, vt ibi tecum in specula tua more meo philosophari possim. Mihi quidem nihil eo gratius accidere potest, & Cincinnatum, aratorem, semper fortuna-

fortunatiorem iudicaui, quàm dictatorem, et tu, si tuo possis arbitrato vivere, fortassis otium Laertis potius, quàm Vlyssis negotium eligeres. Sed nimirum Plato te non finit tuus, nec meus me Cicero, qui patriæ nos seruire volunt, et illi reddi omnia, vnde vniuersa prius accepta sunt. Vale. Brugis, postridie calendas Iunij.

THOMAS SMITHVS AMPLIS-  
simo Gallia Prætori. S. D. P.

**M**alui de ista re ad tuam amplitudinem, quàm aut regem, aut reginam scribere, perhonorande vir, quòd iamdudum ex omnibus nostris actionibus, & eruditio tua, & animi candor mihi perspectus esse videatur. Et si ad principem scripsissem, non dubitaui fore, quin tota res ad te referatur, quæ concertationem quandam inter duos eruditos contineat, nihil prorsus ad statum huius regni pertinentem. Scripsit epistolam, tanquam ad reginam Angliæ, meam dominam, Hieronymus Osorius,  
quæ

quæ vulgata typis per totam Galliam non Latina modò, qua lingua fuit edita, verũ etiam Gallicè traducta legitur. In hac nostros mores, leges, ac religionem traducit, non pro rei veritate, & quomodo sunt, sed pro captu suo, & vt ignorantes nostrarum rerũ homines, ad inuidiam nostrã ei forsan affinxerunt. Lusitanus, non infacũdus quidem certè, exercere in hoc argumento suũ stylum videtur voluisse, & experiri quid haberet virium in declamando de rebus theologicis, & sacris. Qui si se continuisset intra limites suos, & in vmbra sui musæi, non sibi fuisset fortassis inutilis hic labor. Nunc dum se vltro iactat, & in lucẽ venire publicam, ac se populo in hoc argumẽto nouo, & sibi inusitato venditare vult: quid aliud facit, quàm vt omnibus palam faciat, quàm non solum institutionum, morũ, & ceremoniarum, quibus hodiè vtimur in Anglia, sit ignarus, verũ etiam quàm nihil sciat earum controuersiarum, & quæ-

Rr.i. stionum,



stionum, quæ nunc vniuersum exagitant orbem Christianum, & ad quas intelligendas, omniū propè animi sunt erecti? Gualterus Haddonus reginæ meæ à supplicum libellis, amicus meus, non literis magis, & eloquētia, quàm candore animi, tam mihi, quàm omnibus, qui eum norunt charus, ad Osorium rescripsit. Sed vt est summa humanitate præditus, modestissimè tangit eos locos, in quibus fallitur Osorius. Hanc eius epistolam typis excudi cupiebā. Itaq; conueni Robertum Stephanum, vt eius vterer ad hanc rem opera. Is exemplar à me requirit, vt videat, an nihil insit, quod statū huius reipub. tangat, & vnà, vt magnitudinem libri coniectet, ac tum demum, venia prius à regina impetrata, se promisit impressurum. Extitit & alter, non ita pridem mihi notus de Valla. Hic à me rogat, vt epistolam Haddoni videat, et à Stephano, vt intelligo, ad tempus abstulit. Hic de Valla, vt audio, à latrunculario (quem præpositum

fitum regiæ vocant) arreptus est, & vna ex  
ædibus suis liber ille, siue epistola Had-  
doni in aulam defertur, & in latruncularij  
manibus est. Nunc duo sunt, quæ ab am-  
plitudine tua peto. Primum, vt postquam  
eam perlegeris, si tantum suscipere laboris  
libeat ( neque verò est longa ) Roberto  
Stephano potestatem cures dari eam im-  
primendi, cum priuilegio, vt vocant, et mo-  
ris est. Sin hoc propter aliquam rationem  
non libuerit, saltem vt ei sit talis potestas fa-  
cta, vt ei fraudi non sit eam excudisse latinè,  
gallicenè. Si nec hoc placuerit, vt exemplar  
mihi demum restituatur, quo possim alibi  
excudendum curare. Quoniam verò cam-  
pum hunc regionis Galliæ delegit Oforius,  
& illi, qui eum admirantur, in quo nos, &  
nostras religionis formulas, quas ipse igno-  
rauit, exagitaret, cū sūma videtur æquitate  
cōiunctū, vt idem et nobis ne denegetur, in  
quo calumnias eius cum summa diligentia  
refellamus. Benè valeat amplitudo tua.

Rr.2.

Me-

Melodunij. 6. Martij. 1563.

GALLIE PRÆTOR, THOMAE

Smitho. S. Angliæ reginæ legato  
in Gallia. S. D. P.

CLarissime orator, ex ijs tuis literis, quas  
ad me proximè dedisti, cognoui iustam  
querimoniam tuam de Osorij libro, quem  
dicis latinè, galliceuè, à librarijs nostris im-  
pressum, editumque, in manibus omnium  
esse, ideoque postulare te, vt de Haddoni  
libello idem liceat, qui ad illum respondit,  
aut certè restitui Haddoni librum, quem  
Valla à Stephano librario acceperat. Qua  
de re egi cum regina, quæ, vt par est, tulit  
ægrè illum Osorij librum exiisse ex officina  
nostrorum hominum, mihi que manda-  
uit, vt in eos inquirerem, animaduerti que  
iuberem, qui istud ausissent iniussu regis,  
& vt dū, sine privilegio. Id quia facere nō  
possum, nisi inspecto Osorij libello, ideo  
petierā ab eo, qui tuas mihi literas dedit, vt  
vel à te, vel ab alio Osorij librum acceptū  
mihi



mihi mitteret, quod identidem rogo te, ne impunè sit illis, simul vt intelligat regina Angliæ, bonis regibus etiam in bello curâ esse regij honoris, & existimationis. Nâ feruile magis est, quàm regium, pugnare libellis, conuitijs, maledictis. Interea boni confules, si de Haddoni libro, nihil permitimus, cum de Osorio factum improbemus. Exemplar autem Haddoni tibi reddi regina voluit, quod huic certo homini tradidi tibi perferendum. Vale clarissime orator, et me ama. 9. Martij. 1563.

THOMAS SMITHVS AMPLIS.

simo Galliæ prætori. S. D. P.

ACceptis tuis literis, vir perhonorande, euestigiò famulum Lutetiam ablegauì quæsitū exemplaria, tã Latina, quàm Gallica epistolæ Hieronymi Osorij. Retulit hanc, quam ad amplitudinem tuam misi Gallicè versã. Nam omnes latinas distractas, & venundatas esse Typographus aiebat. Plus quingentas verò excudisse se af-

Rr.3.

firma-

firmabat . Neque verò negare opus erat. Apertè nanque, & verbis disertis potestas illi facta est illas imprimendi, vt apparet ex priuilegio, toti volumini præfixo. Quod autem offert amplitudo tua vt libri supprimantur, puniaturq; , qui euulgauerit, hoc iniquū potest videri, illud frustra erit. Nam & is priuilegio tutus est a pœna, et libri semel distracti, redhiberi non possunt. Vetare autem ne amplius veneant, perindè est atque occludere caueam, postquam aues euolauerint. Restat solum vt par sit vtriusq; scriptoris conditio, & perindè audiatur, qui respondeat, atque qui primò cauerit. Neq; verò pugna est inter illos conuitijs, ac maledictis. Sed in genere suasorio nostras formulas religionis conuellit Oforius, & certorum hominū mores taxat. Nec illas, nec hos, eum nouisse docet Haddonus. Illa verò est huius rei conditio, vt meo quidem iudicio satius fuerit, ambas eorum orationes palam legi, quam vtramuis supprimi.

Nam

Nam & disertè, & latinè scribit vterque, & quod scribunt nihil vestrę reip. statum tangit. Et cum ille etiam cum priuilegio nostras formulas accusandi potestatem factā habeat, æquum sanè postulare videmur a te prætore Galliæ, vt cum simili priuilegio respondentes audiamur. Durum quidem certè debet videri, in eadem causa, alteri tantum parti perorandi libertatem dari. Benè vale vir ornatissime. Melodunij. x. Martij.

G. HADDONVS PRÆSTANTISSIMO

viro D. Thomæ Smitho equiti, & legato  
in Gallia. S. D. P.

**N**isi te multum diligere, admodum tibi inuiderem, cum tantum inter tuam præsentem fortunam intersit, & meam, quantum ego summo cum dolore sentio, tu maxima cum voluptate percipis. Etenim tu patriam, principem, coniugem, amicos, otium, & præclarissimæ legationis honorem vno tempore pariter recuperauisti, mea singularis infor-



infœlicitas hæc omnia mihi vitæ solatia detraxit, & in labyrinthum quendam coniecit tam inuolutum, & impeditum, vt ne Dædalus quidem, si reuiuifcat, vllum ex eo exitum reperire possit. Sed nec diu tu fœlix esse poteris, nec ego semper infortunatus, quoniam communi quadam humanæ fragilitatis conditione sumus ita generati, nullam vt stabilitatem vlla vitæ nostrę pars habere possit, sed infinita casuum incertissimorum varietate perpetuò iactetur. Itaq; quomodo nauium magistri cursum tenēt, quem possunt, non quem volunt, & eò sequuntur, vndè venti secundissimè flant: ita nos ad id, ad quod necesse est, studiū nostrum inflectamus, & quò sacrosancta dei prouidentia nos deduxerit, eò libenter perferamur: quoniam quantuncunq; recusauerimus, & auersemur, tamē eò pertrahi nos oportet. Deindè illa certissima spe sustentemur, quòd licet in hac ærumnosissima vita, fœdissima tempestates, & acerbis-

simæ

simæ procellæ in nos incurrant, tamen mors, quasi portus, nunquam a nobis longè abest, qui nos in illis æternis, & beatis regionibus collocabit, vbi nihil asperitatis, & offensionis est futurum. Tu interim viue, & vale in deo, cui te, & tua omnia commendo. Brugis, 15. calendas Iulij. 1566.

G. HADDONVS ORNATISSIMO

viro Thomæ Henneagio. S. D. P.

PRocuratio mei negotij celeritatem non requirit. In reditu meo tempestiuū erit, aliquid in eo moliri, si coniugis voluntas suffragabitur. Absentiam ab hera tuam nō tam molestè fero, quàm absentiae causam, vxoris tuæ morbum. Sed hæc communis est vitæ nostræ conditio. Quapropter eam sapienter debemus, & moderatè ferre, sicut coniugem tuam spero facturam esse. Quam licet natura corpore muliebri procreauerit, tamen animū inspirauit firmū, & virilem, quo nunc eam maximè decet vt, cum est opus, idque vt ita faciat, rogare

Ss. I.

me,

me, quæso illi renuncia. De Haddona mea, hoc est, de me ipso, benignissimè promittis, & ego tibi tum facilè credo, tū valdè gratias ago, nec benevolentiam in eo tuam repudiabo, nisi vxor fortè non vult. Etenim ab hac ciuitate videtur esse, sicut ego etiam ipse sum, alienior. Sed videbimus. Interim vale, nostramque dominam, tuam domesticam, sui simillimam, & Corneliam nostri temporis, meo nomine saluta. Deindè, Neutronum, et sororem, quibus ingeniū, et virtutem opto, qualia in ipso exemplari insunt, in quod intuentur. Reliqua tēpus secum afferet, cum deus voluerit. Sed heus tu? Quomodo te ualere iubeo, qui iam es, vt scribis, subægrotus? Equidem licet secus esse malim, tamen cum morbum vxoris cogito, satis conuenire videtur, vt quorum omnia sunt alia communia, valetudo etiam inter eos esse debeat. Seriò, diligēter cura te ipsum, et in primis coniugi prouide, ne frigus ad eam irrepat. Est enim exitiale.

Præ-



Prætereaumat aliquid, quod sudorem elicere possit. Nam donec eruperint hi interni ardores, qui intus æstuant, sanitatem nunquam recuperabit. Sed ecce magnâ benevolentia vim, qua non solum rhetor factus sum, sed etiam theologus, & ad extremum medicus, si dijs placet. De testamento socrus tua ne dubitet, ego perficiam. Vale cū omnibus tuis. Vale.

## EIDEM.

SI vlla esset alia tuæ absentia causa, quàm ea, quæ est, vxor tibi subirasceretur. Sed in hera tua, vel ( vt aptius ad voluntatem meam loquar ) nostra, tot officia concurrunt, tot illigatae sunt suauitates, vt mirum sit quenquam ab ea posse diuelli. Quàm augustum, & tacita quadam veneratione suffusum os? Quàm serena sine supercilio frons? Quantam habet gratiam comis verborum grauitas, quantum commendationis, sobria, sed dulcis tamen mo-

rum elegantia? Deindè tam demissi spiritus, tam pudens, & generosè verecunda mens, tam appetens aliorum laudis, & suæ negligens, denique omnia sanè huiusmodi, qualia, nec cerni profectò paria, nec optari meliora possunt. Deus hanc exquisitissimā reipub. nostrę gemmam, parietibus vestris inclusam, ad meliora tempora saluam, & florentem referuet, & saluberrimis optimorum consiliorum monitis ad omnem fortunæ varietatem præmuniat, vt hæc in illa tam egregiæ virtutis efflorescens stirps, perpetuis adolescat ornamentorum incrementis, & tandem maturam per omnes reipublicæ nostræ partes ex se frugem effundat. Equidem ego quanquam omnibus in rebus tibi tantum debeo, quantum nunquam obliuisci possum: tamen hoc à te separatim habeo summum, & singulare beneficium, quòd ad illam exilem, quæ mihi prius cum hac excellentissima principe nostra consuetudo fuit, amplius aliquantum influxisse

influxisse videtur. Itaq; de eo quod superest, fac vt diligenter accures, quemadmodum ego tecum loquutus sum. In quo tamen illud etiam, atque etiam prouide, ne longius progrediare, quàm principis nostræ sūma voluntas feret. Sed cur hæc tibi præcipio digredienti. Certè quidē infinita principis nostræ laus ita stylum meū incitauit, vt cum initio nihil ad te cogitarem, aut parum, tantum effuderim verborū, quantum vides. Sed nunc finis sit. Familia tua valet, et te expectat, & ego in eadem coenatus, hæc valdè vesperi. Vale.

EIDEM.

**N**ihil mihi debes, Henneagi charissime, nisi studium, & beneuolentiā, quā mihi velim à te perpetuò deberi. Merita nostra si ponderentur, tua sunt, & genere ipso, & tempore præstantiora. Sed in amicitijs beneficia numerari non debent, animus considerandus est, quem vtrinq; reor illa ne-

Sf. 3.

celsi-



cessitudine dignū esse, quam inter nōs diurnitas temporis, & multarum rerum cōiunctio confirmauerunt. Quòd soceri memoriam diligenter custodis, rectè mihi facere videre. Multo autem rectius, quòd suam illi propriam personam imponis, non affingis alienam. Nunquam enim illorū mihi vanitas placuit, qui suos necessarios assentatiunculis mortuos posteritati commendāt, quasi de mortuis viui non meminerint, quales in vita fuerint, aut quasi mēdacio post mortem delectentur manes, cū id in vita nemo ferat, qui liberali natura sit. Solitudo tua mihi valdè placet, quoniam vel Scipionis solitudinem imitatur, qui nunquam minus erat otiosus, quàm cū erat otiosus maximè, vel si nihil agis, multa vitas incommoda cuiusque generis, in quæ maxima pars tuæ conditionis adolescentū incurrit. Cras vesperite videbo, si domi fueris. Interim fruire libris, & solitudine, quibus duobus præter suauissimam coniugis

iugis consuetudinem, & amicorum, nihil inuenies in hac vita melius. Vale.

EIDEM.

QVanti est hæc vita, mi Henneagi, quæ plena morborum est, & molestiarum ipsa per se, quàm diu est, & præterea continuum habet impendentem mortis terrorem, vel nostræ, vel coniugum, vel propinquorum, vel liberorum, vel amicorum. Et quanquam amicos in postremo loco posui, nescio tamen, an in primo collocari debeant. Magnum enim, & certè præcipuum est in hac vita talem aliquam personam ex multis gregibus populorum ad intimam familiaritatem assumere, quicum omnia tractare possis non secus, quàm ipse tecum, quæ mutuum habeat studium, officium, voluntatem, cupiditatem, fidem, benevolentiam. Talẽ (inquam) si vitæ, vel ducem, vel comitem, vel sodalem reperiās, ingenio valentem, constantia firmum, amore coniunctum,

iunctum, & morū similitudine consentientem, illo præsente quàm libenter fruaris, quàm dolenter absente careas, quantum semper optes saluum, quantū periclitantē adiuues, deniq; quantum ames viuum, & lamentaris mortuum. Scis, hæc oratio quò pertineat, nec ego præ lachrymis nominare possū beneuolentissimam meam, & amicissimā tuam, aulæ florem, ornamentum Angliæ. Dolorem, & angorem tuum metior ex meo. Quantū mœreas cognosco, quoniā non ignoro quantum dilexeris, & hoc pariter cognosco, quantam habueris, et quàm iustam amoris causam. Sed abeamus ab hoc tam lugubri loco, relinquamus hoc tam funestum argumentum, quod ipsa commemoratione cum acriter animum meum pungat, te vehementer in eo sauciari necesse est. Deus illam nobis alteram Elisabetham reseruet, heram beneficentissimā, principem clementissimam, sexus sui lumen, non Angliæ, sed orbis terrarum stellā  
omni-



omnibus modis incomparabilē. Vxorē tuā audiui grauius afflicta. Ecce alius terror. Sed deus propitius tot te ruinis cumulari noluit. Audio esse recreatam et releuatam. Deus id stabile, & diuturnū esse velit. Nec enim aliam inuenias, qui te tam sollicitē curet, tam sapienter admoneat, tam suauius soletur, tam intīmē amet. Illam quæso meis verbis saluta, & iube viuere, ac bono animo esse, mihi vt mortuæ loco esse possit, quæ licet sit mortua, mihi tamen viuit, & semper viuet. Quod vt aliqua ratione palā testatius esse possit, paucis aliquot pessimis versiculis illius licet acerbissimā, tamen optimam memoriam custodire, sicut potui, volui, quos inclusos ad te mitto. Vale. Brugis, idibus Aprilis. 1565.

EIDEM.

SCio te nimio mei studio peccare, sed peccas tamen, cum principi representas, quæ tecum ego de rebus nostris familiariter cō-

Tt.1.

men-

mentor, ad cuius aures nihil nisi perfectū,  
& elaboratum afferridebet. Audio Nor-  
thamptoniensem nostram, magnis impen-  
sis, & solemni ceremonia elatam. Gaudeo  
principem ne in morte quidem amicitia  
memoriam deponere, & inest in eo ipso  
generosa, & heroica natura. De rebus tuis,  
quas tantoperè scire vis, sæpè scripsi, sed ad-  
huc crudæ sunt, si aliquid erit suspicionis,  
aut periculi, denunciabo. Leicestrensem  
aiunt, equo lapsum, aliquid habere incom-  
modi. Quicquid est ex te certò scire velim.  
Hic enim variè narratur. Deus illum con-  
firmet. Nec enim habet Anglia quicquā  
elegantius, consyderatius, aut moderatius.  
Præclare de statu tuo philosopharis. Vellē  
ad omnia, sed occupatio non sinit, & etiam  
exiliter, & ieiunè scribens, hoc ipsum pro-  
video, ne delinquas, vt soles. Vale. Coniu-  
gem optimam saluta, & nostros. Brugis,  
postridiè calendas Maias. 1565.

## EIDEM.

**A**Mor tuus, tam pertinaciter delinquens, præmione dignus sit, an poena, nondū statui. Scies in reditu, quem non procul abesse auguror, nisi noui aliqui ex Anglia vēti flent. Si Leicestrensis me numerat inter suos, sicut illum facere spero, rectissimè sentit, nec vnquam ab illa me familia viuum disiungi patiar, à qua sum adolescens auctus, & ornatus. Heræ nostrę beneficentissimæ, & augustissimæ, quid aliud optem, nisi omnia, quæ velit. Vult enim omnia optima, & præclarissima, nec vnquam maiorem habuit potentia cum modestia coniunctionem. Scoticas nuptias valdè procliuiter processuras arbitror, quoniam illas natura multis modis conciliat, cui, cum ad aliquam rem multum incubuit, vix resisti potest. Quod est in literis tuis extremum, mihi verisimile non fit, non quòd non sūmè cupiā, sed propterea tardè credo, quo-



niam vehementer volo. Deus prouidebit, cui te commendo, tuamque coniugem optimam, & tua omnia. Vale. Brugis, 14. calend. Iunij. 1565.

## EIDEM.

**F**Ebricula tua valdè fecit inhumaniter, quòd in his temporibus obrepfit, quæ vndique sunt occupatissima. Sed ita morata res est, vt nec tempora, nec locos, nec personas distinguat. In eo certè fuit propitia, quòd tam citò deuolauit. Nostra sunt hîc adhuc impeditissima, nec tamen vllâ video propinquam reditus nostri spem, quo multum conturbor. Etenim hæc longinqua mora rem meam affligit domesticam, & delectatione me priuat amicorum, & valetudinem atterit, & nihil habet nisi cōtinuas controuersias, summa legationis penè desperata. Cū aliquid apud vos constabit, imperties. Turcici apparatus in littoribus Italicis volitantes nos hîc perterrefaciunt.

unt. Vale. Nā oculi sunt affectissimi. Bruggis, tertio calendas Iunij. 1565.

EIDEM.

**C**Aufa tua propior est periculo, quā antē fuit, adhuc tamen omnia sunt salua. Si res feret, te admonebo. Novus iste vester praeceptor mihi valdē probatur, & illū cōmendarē vberius, nisi meis me laudibus videretur corrupisse. Rescripsi ad clarissimū Leicestrensem, quemadmodum laetor pedes recuperauisse, vtinam ego oculos iidem possem. Reditus meus est adhuc incertissimus, quem tu quōd tam vehementer expetis, mihi iucundissimū est. Nec enim ita faceres, nisi te nostra consuetudo delectaret. Et ego tua vicissim libentissimē perfrui velim, cum deus voluerit, ad quem de omnibus absolutē referendum est. Amicos saluta, quos censebis, & vale. Sum enim hoc tempore exercitus, & planē distentus, tamē vxorem nominabo tuam, vt

Tt.3.

intelli-

intelligat, sicut re vera est, se non vulgariter à me diligi, sed præcipua quadam, & eximia beneuolentia. Rursus vale. Nonis Iulij, Brugis. 1565.

## EIDEM.

Silentium tu meum accusas, ego tuum. Et tamē credo nuntiorum esse culpā, literas nostras non perferentiū. Sed in literis parū est, si mutua nobis constet amicitiae fides, quæ sic in omni cōsuetudine nostra iam inueterauit, vt minimè debeat nisi in morte occidere. Valetudo præsens multò deterior est, quàm vellem. Caput ita frigoribus perfluit, vt propè vox interciderit. Breuē te videbo, si deus voluerit, & heram nostram excellentissimā, aut id si longius erit, meo cum magno fiet rei familiaris, & valetudinis detrimento. Sed principi seruiō tam libenter, & patriæ, vitam vt in eo si ponere debeam, non recusē. Summam esse gratiam tuam, & audio, & gaudeo. Tu ex deo esse



esse memineris, & eam ad dei honorem, & patriæ salutem accommoda. Non nihil sollicitus videris. Ne sis. Nihil sapienti præstandum præter culpam. Gratiam semper invidia comitatur, sed obtrectationem ad extremum vincit innocentia. Noli nimium suspitionibus indulgere. Quidam sunt retexendarum amicitiarum artifices, & rumorum fingendorum. Sufurros illorum vita, deum cole, principem honora, patriæ serui, comitatem omnibus exhibe, familiariter vtere paucissimis, reliqua ipse per te. Vale. Saluta coniugem, & iube meo nomine, vt valetudinem suam diligenter curet. Brugis, pridie nonas Septembris. 1565.

EIDEM.

ET si prius ad te satis plenè scripseram: tamen Papam inanem ad te sine literis meis dimittere non potui, vel quoniam nomine tam celebri nuntius est, vel quia tam opportunus, nimirum ad te cum rectà se per-

perrecturum ostenderit. Tuum manet saluum negotium, & ita mansurum videtur. Nostri reditus oblata est præclara conditio, quam hera nostra si repudiarit, mihi molestum erit, non tam mea, quanquam & mea etiam, quàm negotij suscepti causa, quod hoc interuallo poterit omnibus mēbris perpoliri. Memini te postremis ad me tuis literis filioli mei nomen inseruisse, quē etiam illa veteri Pythagoreā lege nostrum vocas. Iocarīs tu quidem. Sed ego, si vita cessero, non abundantiore fortuna, quàm adhuc sum, equidem seriò confido te memoriam in eo nostrę necessitudinis conseruaturū, et id, vt ita facias, à te vehementer peto. Vale. Postridiē nonas Septembris. 1565. Brugis.

EIDEM.

**R**Vrsus hīc rumores, & literæ, nostros contra Turcas foeliciter pugnauisse, & vires Turcicas sic esse imminutas, & attritas,

tas, vt Melitenses summam habeant victo-  
riæ fiduciam. Sed omnia tam plena sunt  
mendaciorum, vt vix inuenias quod affir-  
mare possis, aut in his certè rebus, ne vix  
quidem. Tamen hoc summatim te scire  
volui, spem hîc ostendi, quam antè dixerã.  
Legationis nostræ negotia sic trahuntur,  
vt planè nullam de reditu firmam, & certã  
cogitationem suscipere possim. Tua quidẽ  
adhuc salua, & credo fore, quomodocunq;  
res ceciderint, tamen in eo volui, vt ad me  
nõ nihil scriberes, quod à te prætermissũ mi-  
rarer, nisi ista tempora scirem tantũ habere  
venationum, et voluptatũ, vt vtilitas tua ti-  
bi facilè possit excidere. Vtcunq; est, lite-  
ras tuas expecto, quibus tuam, & optimæ  
coniugis tuę valetudinem cognoscere pos-  
sim, cui secundum heræ nostræ prosperi-  
tatem, propè nihil est, quod antepono. Ego  
Antuerpiam aduolaui cum D. Montacu-  
to, nec ibi constitimus amplius quàm vnũ  
diem. Iter sole fuit, & puluere molestissi-  
mu.



mum. Ibi Sackuildium inueni, reditum in Angliam adornantem. Ædificiorum ibi species egregia, nihil ferè aliud, quod mihi probaretur. Subiras cor tibi, quòd iamdiu nihil a te literarum acceperim. Sed nimirum gratia tua si tantum crescit apud principem, quantum audio, fortasse breui nos tenues homunculi in obliuionem veniemus. Hoc ego tecum iocor quidem meo more, sed tamè de gratia tua, nescio quàm mirifica, seriò mihi fuit renunciatùm. Vale. Saluta coniugem, & mutuò, sicut soletis, amate, & uiuite. Brugis, quinto calendas Septembris, fessus, & languens ex itinere.

## EIDEM.

BE nè est, quòd officium meum rectè accipis, quod sola beneuolentia susceptum fuit, & singulari quadam cura tuæ salutis. Tu, qui propius omnia vides, certius iudicabis, ego illud vnum apprecabor, vt te saluum in reditu, & incolumem offendam, quo si caren-

carendum sit, & paucissimis alijs, vix inuenirem in patria, quo frui possem. Latina quòd interponebas, mihi valdè probatum fuit, quoniam ex illis intelligo plus adhuc in eo genere facultatis tibi remanere, quàm existimabam. Et si posthac te ad ea nonnunquam assuèris, quò longius in ætate procedes, eò te minus illius instituti poenitebit. Nunc enim tibi tempus iuueni, & aulico, varijs delectationibus abit, et euolat. Sed cum posthac grandior in fundo proprio viues, magnum, atq; adeò maximum in libris, & literis, solatium inuenies. Credo Germaniæ legationes non multum festinationis habituras, & nostris etiam negotijs magna hîc iniecta est mora, collegarum nostrorum tarditate, qui nunc demùm apparent, & cras ad colloquiũ descēdimus. Præcipuus illorũ, qui pro Montueio succedit, longo capillitio, & tergo incuruo, grauem senectutis personam secum affert. Fuerunt in aduentu nostro quidam susurri

rerum nouarum, & turbulentarū, sed rursus refrixerunt, & nunc omnia pendere videntur ex responso regis, ad quem Marchio de Barges, & Monteneius noster in Hispaniam proficiscuntur, nec illi quidem tam celeriter, quàm constitutū erat, quoniam in ludo grandium pilarum, quas hīc machinis torquēt, crus Marchioni de Barges ante paucos dies contusum est. Vxorē saluta meo nomine, quam mihi subiratam puto, quòd mihi in literis tuis salutem non ascripserit. Deus vobis omnia det optima. Vale. Brugis, tertio Maij. 1566.

EIDEM

NON dubito quin amicitia nostra deuincita tot officijs iamdiu ad summū peruenierit, & tam altè radices egerit, vt nulla vis eam viuētibus euellere possit. Scio tibi dolere, quod causæ nostræ non melius procedunt. Etenim publicæ sunt, & tibi cognosco res publicas esse charissimas, & cōmenda-



mendatissimas, & nimirum optimo cuiq;  
ita esse debent. Coniecturis tuis vehemen-  
ter assentior, sed ita, vt D. ipsum existimẽ  
maximum his rebus impedimentum in-  
ferre, quo viro si quicquam turbulentius,  
aut peruersius esse credis, erras. Quod ex  
Germania renũcias, magis opto, quàm ex-  
pecto. Veterem in hac re meam opinionẽ  
non ignoras, à qua nihil me deducere po-  
test, nisi vnum, quod vtinam præsens intue-  
ri possim. Hac enim in re sum planè Didy-  
mus, nihil vt certò credam, nisi quod vide-  
ro. Interim spem aliquam ostendi rectè est,  
& ego certè perlibenter audio. Non tam  
mea causa, qui propediem sum ex hac vita  
migraturus, quàm reip. quã ego, si queam,  
immortalem efficere velim. De filio meo  
tibi gratias ago, cui nihil melius exoptare  
possum, quàm vt matri sit similis, qua, meo  
iudicio, nihil vnquam fuit iucundius, aut  
melius. Vtinam, vtinam illa vixisset, & ego  
fuissẽ mortuus. Quanquã viuit illa qui-  
dem,

Vu.3.

dem, & semper viuet, ego verò ex illo tempore sum omninò mortuus, & adhuc quotidie morior tanto præsidio rerum mearum orbatus, & vitæ solatio, quantum tu recordari potes, & ego nunc, si possim, obliuisci velim. Sed nec possum, nec vnquam poterò, nec de illa sine lachrymis cogitare licet. Sed etiam heræ nostræ valetudo, sicut videtur, aliquantum tentata est. O miserabilem, & funestam præsentis vitæ conditionem, quæ quotidie vel mortes illarum personarum, vel morbos affert, sine quibus omninò viui non potest. Itaque; vel in mœrore, vel in metu semper sumus, & nimirum futuri sumus, donec illa suprema dies illuxerit, quam vulgus tristem, & horribilem, ego bonis omnibus, & verè sapientibus letissimam, & maximè opportunam esse iudico. Deus propter infinitam misericordiã, omni ratione præstantissimam heram tueatur, in cuius occasu foeminei sexus lumen extinguetur, & Anglia plagam accipiet acerbis-

cerbissimam, & sempiternam. Vos iuvenes videritis, ego maxima spe sum, me mihi huius vitæ perfunctum, illam in cœlis expectaturum esse. Saluta coniugē optimā. Vale. Brugis. 15. calendas Iulij. 1566.

EIDEM.

VIdi literas ad coniugem, in quibus amicitiae principatum quendam apud te videor obtinere. In quo rectissimè tu quidē, cum mihi nullus sit ex omnibus, quem tibi possum anteferre. Tuam tot dierum absentiam obiurgarem, nisi plena esset humanitatis, & officij. Quid enim melius, aut natura tua dignius, quàm luctum leuare tam illustris personæ, & peramantis tui? Scripsissem etiam ego aliquid ad minuendam illi moestittiam, nisi deus illum in hoc genere calamitatis toties exercuisset, vt nunc sibi ipse non solum doctrina, sed etiam experientia magister esse possit, præsertim cū tanta ingenij, & pietatis habeat adiumenta, quanta



quanta vix in eius annis credibilia esse possunt. Reliquum est, ut se ipse colligat, & his utatur dei donis nunc, cum tempus fert, & illam animi magnitudinem adhibeat, quā causa requirit, & dei voluntas postulat. Quæso me ut illi diligenter commendes, & operam omnem offeras, quatenus ea uti voluerit. Vtinam ibi essem, ubi tu es, ad aliquot dies. Sed hæc est miserrima seruitutis meæ conditio, quam tamen heræ nostræ summa comitas, non solum tolerabilem faciet, sed etiam facilē, si aliquando finem inuenire possit, qualem expeto. Sed ad deū refero, cui te etiam atque etiam commendo. Vale. Decimoquarto calendas Octobris.

G. HADDONVS THOMÆ WIL-  
sono legum doctōri. S. D. P.

Amo amorem tuum, qui te de valetudine mea tam sollicitum facit. Conditio corporis multò deterior est, quàm tu velles, sed animus, ut spero, firmior. Nā hæc summa  
foli-

solitudo, in qua nunc viuo, nihil est aliud, quàm perpetua mortis commentatio, Scerati tantoperè probata, diuinissimo viro. In qua quoties cogito (cogito autem sæpissimè) quàm propè tempus adsit, quod totum corpus meum in terram dissipabit, multò mollius has eius ruinas fero, præsertim cum vniuersa vita, quam post mortem suauissimæ coniugis extraxi, mors potius fuerit, quàm vita. Quòd si deus me ad se illo tempore assumpsisset, quo propè dysenteria Cantabrigiæ sum absumptus: quantum malorum, & quàm incredibilem vim effugissem, quam longiore vita exhausti, et adhuc exhaurio. Sed dei sumus, illi viuamus, & illi moriamur, & eo christianissimo decreto simus cõtenti. De morbo meo plura cum vnà erimus, quod erit in huius mensis exitu, si deus voluerit. Nam medicus meus omnem consumpsit suâ scientiâ, et solitudo bilè auget. In Anglia tu, & pauci aliquot ex intimis meis aliquando interuenie-

XX.I.

menietis, & sollicitudinem leuabitis. Oxoniensem sementem, si valerem satis, libenter inspicerem, patriæ causa, cui posthac prodesse poterit, cum maturuerit, & fruges fuderit. Sed utcunq; magnificè de illis prædicatur, nec Smithi ibi simile quicquam, aut Checi occurreret, quos nos audiuius, tamen ibi te omninò esse velim, vt si deus me reuerti velit, existat aliquis, cui illa narranti, possim credere. Nam omnes omnia mentientur, vel fauore, vel inuidia, vel infscientia, & in hoc vltimo genere aula vehementissimè peccabit, sicut & Cantabrigiæ fecit. De proprijs rebus tuis libèter audire vellem. Licet enim me planè mei tædeat, tuis tamen rebus prosperis recrearer. Vale. Brugis, secundo idus Augusti. 1566.

G. HADDONVS EXCELLENTISSIMO

in literis viro Joanni Sturmio.

S. D. P.

SÆpè ad te scribere volueram, ornatissime Sturmii, meis vt literis intelligeres, quan-



quantum scientiam omnium disciplina-  
rum admirarer tuam, pietatem amarem, et  
comitatem approbarem. Sed, nescio quo-  
modo, nunquam, ad id, tempus fuit, quale  
desyderabam. Nunc verò noster Ascha-  
mus, qui te tantum diligit, quantum tu fa-  
cilimè intelligis, allatis, vt mihi visus est, op-  
timis rationibus peruicit, non solum vt li-  
teras ad te darem, sed etiam vt peterem abs  
te aliquid. In quo licet nimis audacter fa-  
cere videbor, cum nulla inter nos notitia  
sit, tamen propterea minori sum, ad rogan-  
dum, verecundia, quoniam hoc, quod re-  
quiram, tibi gloriosissimum est ad concedē-  
dum, & mihi longè gratissimum ad accipi-  
endum. Cum mihi dico, parum est, sed v-  
niuersam doctorum virorum nationem  
comprehendo, quam tibi permagni esse  
necesse est. Duo clarissima literarum mo-  
numenta tuis studijs elaborata residere te-  
cum audio, imò verò penè scio. Nam Ari-  
stotelicę rhetorices exēplar Aschamus no-

ster mihi iam pridem exhibuit, & idem de  
Ciceronis analysi tantoperè affirmavit,  
vt mihi res sit planè certissima. Nec meli-  
us comparari potuit, quàm vt Aristoteles,  
& Cicero, qui te perpoliuerunt, ad vsum  
communem omnium scientiarum tua  
potissimum opera traducerentur. Et est  
hoc etiam personæ tuæ consequenter ap-  
tissimum, vt sicut ipse luminibus excel-  
lentissimorum virorū, & omnis memoriæ  
principū illustratus es, ita tu nobis vicissim  
de splendore tuo tantum impertias, quan-  
tū nobis in caliginoso loco palpantibus, ad  
disciplinarū cognitionem prelucere possit.  
Adiuua nos igitur, ornatissime Sturmi, per  
musas, per vniuersam naturæ tuæ bonita-  
tem, nec illos diutius in tenebris iacere pa-  
tiaris, à quibus tua existimatio summam ad  
celebritatem perducta est. Imitare Cice-  
ronem tuum, qui, veluti scis, cum Luceio  
vehementer egit, vt actorum suorum hi-  
storiam texeret. Ita enim futurum, vt ali-  
qua

qua viuis rerum gestarum gloriola perfrueretur. Sunt multa fateor inter manus nostras obambulantia, quibus tuum nomen ad immortalitatem ascendit: tamen cum ista duo sint ex omnibus alijs præcipua, minimè illa omnium suppressi, & abstrudi debent. Nam quæ per se bona sunt, non solum alios cõmunicata meliores reddunt, sed etiam ipsa fiunt eadem illa cõmunicatione meliora. Quapropter in hac optima causa te facilè præbe, quem nulla in re difficilem esse dicunt, qui te maximè norunt. Nec id meis precibus tribue, quamquam & meis etiam, sed literis, & virtuti, & reipublicæ, & tibi ipsi denique. Nam & omnium eruditorum interest, & etiam tui ipsius inprimis. Quod si mihi affirmanti non credis, Aschamo nostro assentire, qui iuramentum, si postulas, in hac re, minimè dubitanter exhibebit, cui ego iam pridem illam, quæ tecum est, necessitudinem subiungo. Quamquam enim nunc primùm



ad te scribo, tamen nō te nunc primū di-  
ligo, sed ante aliquot annos tuorū inuētorū  
suauitate, & eloquētia sic allectus, & etiam  
incensus sum, vt nihil magis optauerim,  
quā aliqua via, tuam ad interiorem fa-  
miliaritatem intrare. Nec in vllō tempore  
mihi quicquam gratius accidere poterit,  
quā vt tibi, vel tuorum rebus, aliqua  
ratione, quantum possum, inserui-  
am. Vale optime Sturmi.


Londini, ex regia no-  
stræ principis.

vj. Decēb.

1566.

*FINIS.*







D. GVALTERI HAD-  
DONI, LEGVM DOCTO-

ris, serenissimæ reginæ Elisabethæ,

*à supplicum libellis, Poëmata, studio*

*& labore Thomæ Hatcheri*

*Cantabrigiensis sparsim*

*collecta, &*

*edita.*



LONDINI, APVD

*Gulielmum Sereſuum.*

1567.

Gualterus Haddonus  
pio Lectori.

*Q*uisquis es, has domini leges qui scire laboras,  
Disce mori mundo, viuere disce deo.  
*N*amq̃ licet Christum fecit mea musa poëtam,  
Attamen est idem, qui fuit antè, deus.  
*N*on animi causa versus percurrere debes:  
Sumitur hinc vitæ regula certa tuæ.  
*R*egula, quæ numeris currens, vt promptior esset,  
Carminis hæc nobis unica causa fuit.  
*S*ubsequitur domini vocem doctrina Iacobi:  
Discipulus domino conuenit iste suo.  
*Q*uæ legis, in vitam transfer præcepta beatam,  
Ut sit idem cordis semper & oris, iter.  
*S*ic tibi certa tui constabunt lucra laboris:  
Sic mihi certa mei lucra laboris erunt.

Præterit habitus huius mundi.

Oratio Iesu Christi, qua populum  
affatus est, cū ascendisset in mon-  
tem, comprehensa versibus, au-  
thore D. Gualtero Haddono.

Math. v.

A Stitit, & populum cernens concurrere Christus  
In tumulo sedit, circumfususq; sedenti  
Discipulis, praecepta dabat, sic ora resoluens.  
Pectore summisso qui sunt, animisq; modestis,  
Fœlices ibunt patriæ cœlestis ad oras.

Fœlices etiam, vitæ qui crimine, mœrent:

Namq; pium sequitur solatio læta dolorem.

Mitia mansuetè, qui degunt tempora vitæ,  
Suscipit hos gremio, sanctissima terra beato,  
Iustitiæ sitis, atq; fames quos sacra tenebit,  
Illorum fœlix, satiabit copia fauces.

Qui teneris animis sunt, & mollescere possunt:

Mutua fœlices illos miseratio reddet.

Pura quibus mens est, & cor sine labe malorum,  
Et dominum cernent, et erunt cernendo beati.

Aspera concordī, qui sedat praelia pace,

A.2.

Fœlix



*Fœlix diuinæ florebit nomine prolis.  
Iustitiæ causa quotquot tormenta dolorum  
Intrepidè subeunt, cœlestia regna tenebunt.*

*Impia pestiferis quoties conuitia linguis,  
Natio praua vomēs, ad pœnas corpora quæret:  
Et quoties puros mores infamia falsa  
Conspuet, eximio quia me celebratis honore,  
Vos, ô vos toties verè censete beatos.*

*Tempora lætitiæ sunt hæc plenissima vestra,  
Præmia quæ summo deducunt maxima cœlo.  
Namq̃ fuit quoddā qualis fortuna Prophetis,  
Talis & in vobis hodiè succedere debet.  
Pectora vos insulsa decet condire salubri  
Doctrinæ succo, putridas purgare lacunas  
Corruptæ vitæ: quia sal cœlestis in omnes  
Spargimini terras, sal si tabescere cæpit,  
Interit, atq̃ foràs conculcat turba iacentem.*

*Lumina vos estis toto lucentia mundo.  
Non igitur cæcis debet lux vestra cauernis  
Obruta demergi, sed ut vrbes monte locatæ  
Ostendunt longè muros, & tectâ domorum:  
Utq̃ ardens lucerna solet diffundere lucem,*

*Quando*

Quando micans sursum conclauia lumine complet:  
Sic benefactorum vestrorum flamma refulgens  
Igne pio feriat sensus, & corda perurat:  
Possit ut exemplis vestris reuirescere virtus,  
Gloria cœlestem sequitur sic maxima patrem.

Tollere præteritas nolo, sed figere leges,  
Tollere non statuo, statuo reuocare Prophetas.  
De quibus affirmo, dum mundi machina durat  
Syllaba nulla cadet, sed iustum pondus habebit.  
Hæc minima qui parte sui conuellere tentat,  
Aut alijs culpæ fuerit temerarius author,  
Non poterit regni cœlestis ciuis haberi.  
Qui tenet, ac alijs suadet mandata tenere,  
Fœlix in cœlo magna mercede fruëtur.  
Nam nisi iustitiæ maiores edere fructus  
Vestra potest pietas, quam Scribæ regula possit,  
Aut Phariseorum solennis formula legum,  
Non licet in regno cœlesti ponere sedem.

Lex antiqua fuit, quæ non occidere mandat,  
Atq; reos cædis iusto quæ iudice punit.  
Sed mea lex iram, si sit temeraria damnat:  
Iudicioq; notat commoti iurgia fratris.

*Si furor exarsit linguae, conuitia iactans,  
Concilio subiectus erit, qui crimen habebit.  
Stultitiae probrum crescens insania fratris  
Si iaciat contra fratrem, mittetur in ignem.*

*Ergo tuum sacra si munus ponitur ara,  
Iamq; deo tendens palmas, offerre pararis:  
Et subit interea mentem iustissima causa,  
Quam tuus aduersus te frater sustinet, illum  
Concilia primum: placato fratre, reuerte.*

*Carcere si iusto te frater claudere tentat,  
Tollito maturè lites: ac inter eundum  
Quas tuus obijciat frater sedato querelas:  
Iudice sub iusto nè causam dicere cogat:  
Isq; tuis meritis succensens ire ministrum  
Imperet, ac duris te deuincire catenis.  
Crimen enim si iusta tuum sententia damnet  
Iudicis, ex illo te carcere nemo mouebit,  
Omnia quæ debes donec sunt ritè soluta.*

*Punit adulterij pollutum crimine corpus  
Formula priscarum legum: sed sanctio nostra  
Aspectum facit esse reum, quem cæca libido  
Concitat, & mentes aliena in coniuge figit.*

*Ergo*



Ergò tibi quaecunq̃ tui pars corporis obstat,  
 Siue oculus sit, siue manus, præcidere cures,  
 Putria Sincero remouens à corpore membra.  
 Mancus enim melius cœlestia regna subibis,  
 Integer æternum quàm detruderis ad ignem.

Legibus antiquis satis est, si quando maritis  
 Coniugij sanctum fœdus placet esse solutum,  
 Mittere coniugibus scriptis diuortia libris.  
 Sed mihi non satis est, qui sic edico maritis,  
 Ut nisi sit stupri rea, sponsam nemo relinquat.  
 Namq̃ relicta nouum thalamũ quaecunq̃ sequetur,  
 Est in adulterio, par est & culpa mariti.

Legibus antiquis periuria sola vetantur,  
 Sufficit atq̃ deo iuratum reddere votum.  
 Lege mea, nulli prorsus iurare licebit.  
 Si iuras cœlum, iuras cœlestia regna:  
 Si iuras terram, iuras subsellia patris.  
 Hierusalem iurare nefas, quia regia summi  
 Principis est, cuius reuereri limina debes.  
 Atq̃ caput proprium, quia nō formare licebat,  
 Nec iurare licet: domino sua facta relinque.  
 Est: non est: vestrae sit simplex regula linguae.

A.4.

Quicquid

*Quicquid erit maius, vitio confine videtur.*

*Lex vetus est oculos oculis, & dentibus esse  
Pensandos dentes: sic par erat ultio culpæ.  
Sed mea vindictam patitur clementia nullam.  
Iniiciat si fortè manus tibi frater iniquas:  
Vis quantum crescit, tantum patientia crescat.  
Pro tunica frater si causam dicere cogat,  
Spontè tua chlamydem facilis sine lite remitte.  
Hospes in ignotis si quis regionibus erret,  
Teq; ducem, comitemuè viæ desideret esse:  
Plenius officium præsta, quàm postulat hospes.  
Ex opibus quicquam si frater poscat egenus,  
Fac tribuas: si quærit mutua, mutua sumat.*

*Lex antiqua iubet, magni faciamus amicos,  
Ac odijs iustis inimicos ultio figat.  
Vos tamen & vestros inimicos semper ametis,  
Et probra cum iactant, illis optate salutem,  
Quando ruent odijs, studio pensate benigno,  
Lædere quando parant, illos orando iuuare  
Pergite: sic patrem proles bonitate sequetur:  
Qui tempestiuos dimittit nubibus imbres,  
Atq; salutare diffundit sole calorem:*

*De*

De quibus humani generis promiscua turba,  
 Maxima præsens conquirat commoda vitæ.  
 Nam studium studio si pensat amicus amico,  
 Gratia tam paribus meritis est nulla relictæ.  
 Si colitis solos fratres, exilis amoris  
 Fructus erit: vulgus sua sic commertia tractat.  
 Gratuitus sit vester amor, dimanet ad omnes,  
 Non meritis emptus, non utilitate reuinctus.  
 Deniq̃ sit vitæ talis perfectio vestræ,  
 In patre cœlesti qualem reperitis inesse.

## MATH. VI.

Cum miseros fratres largitio vestra leuabit,  
 Non oculos vulgi, nec plausus querere debet:  
 Non medio tuba rauca foro tua dona sonabit.  
 Sic simulatores faciunt, quos gratia vulgi  
 Commouet, ac fragilis popularis gloria laudis.  
 Hoc genus, humanæ quia captat præmia linguae,  
 Præmia de cœlo venientia, nulla reportat.  
 Sed tua cum pietas fratri succurret egeno,  
 Ibit ab humanis oculis, & teste carebit:  
 Ut pater in cœlis, qui secretissima cernit,

B.I.

Munera



*Munera muneribus manifestis abdita penset.*

*Nec simulatorum debetis more precari :*

*Quos licet in plateis stantes, cætuq; videre,*

*Vota deo coram, magno dum murmure fundūt.*

*Hos deus ut seruos hominum, dimittit inanes.*

*Supplice tu dominum quoties vis ore precari :*

*Fn conclaue tuum secedens ostia claude :*

*Solus ibi dominum secretum flecte precando,*

*Solus ut è cælo tibi munera fundat aperta.*

*Garrula quæ currit multis oratio verbis,*

*Æthnica, se longo credit sermone probari.*

*Non opus est multis verbis extendere vota :*

*Scit pater in cælo, quid vestrum quisq; requirat.*

*Quandò meos seruos orandi cura subibit,*

*Omnibus ista piæ ponetur formula vocis.*

*O pater, ô nôster, qui supra sydera regnas,*

*Semper in eximio sanctum sit nomen honore.*

*Magna tui veniat maturè gloria regni.*

*Quomodò stat cælo terra stet firma voluntas.*

*Continuis epulis animos, & corpora nutri.*

*Ut condonamus, condona crimina nobis.*

*Sustenta miseros vitiorum mole ruentes :*

*Et*

*Et præsta saluos in tempestate malorum.*

*Cuius habet nullas ditio latissima metas,*

*Cuius habet nullum diuina potentia finem.*

*O pater in cœlis, natorum suscipe vota.*

*Quam petitis culpæ veniā, concedite vestris*

*Fratribus, atq; pater vobis peccata remittet.*

*Pectore qui duro nolunt ignoscere fratri,*

*Pectore pro duro plectentur iudice patre.*

*Turpis hypocriseos fucus ieiunia vestra*

*Non linat, & vultus atros fuligine reddat,*

*Ut facies cernens vulgus ieiunia laudet.*

*Corpora quando deo vultis subiecta domare,*

*Emineat læto vultus placidissimus ore :*

*Sic caput & facies niteant, ieiunia solus*

*Ut pater in cœlis vester secreta videre*

*Possit, & is vobis mercedem reddet apertam.*

*Deuia fortunas non condant terra sepultas :*

*Aut rapiant fures, tineæ vel ab ore terentur.*

*Astra facultates scandant, cœloq; locentur :*

*Quo neq; fur penetrat, tineæ neq; morsus edacis :*

*Nam thesaurus ubi situs est, ibi pectora sidunt.*

*Est oculi duplex lumen sub fronte locatum,*

B.2.

Corpore

Corpore quod toto lucem diffundere debet.  
Hanc igitur lucem purgari fœce malorum  
Conuenit, vt puro perspergat lumine vitam.  
Nam vitij nubes, oculorum lumine merso,  
Corporibus tenebras inducit nigra profundas.

Nemo potest dominis plene seruire duobus.  
Seruiet alterutri, famulum desyderat alter.  
Sic ego vos solus, solus vel Mammon habebit.

Sollicitudo cibi, potus, & vestis, ab ægris  
Pectoribus cedat: patri committite curas,  
Corpora qui pascit, qui collocat ordine vitam.  
Corpora quis volucrum toto labentia cœlo  
Libera sustentat, nullo vexata labore?  
Si volucrum viles animas clementia patris  
Seruat, an in vestra poterit cessare salute?  
Quantalibet te cura premat, tibi crescere cura  
Nō poterit corpus, noua nec procedere mēbra:  
Sed pater in cœlis qui iunxit corporis artus,  
Ille creaturas omnes & pascit, & ornat.  
Lilia procero quæ candida vertice surgunt,  
Ipsa sibi nullas, possint contexere vestes:  
Et tamen illorum folijs florentibus alta

Gloria



Gloria se tollit, sursùmq<sup>3</sup> cacumina iactat.  
 Non Salomon tam cultus erat, cùm regia pompa  
 Ornamenta sui collegerat omnia regni.  
 Gramina camporum, quæ post mittetur in ignem,  
 Si deus exornat, vos non sine veste relinquet.  
 O homines fractis animis, cur cura fatigat  
 Pectora, vestigans timide vestemq<sup>3</sup>, cibumq<sup>3</sup>?  
 Æthnica turba, deũ quæ non habet, ista sequatur.  
 Vos pater indulgens curat: quantumq<sup>3</sup> cuiq<sup>3</sup>  
 Conueniat, nouit, tantumq<sup>3</sup> cuiq<sup>3</sup> reponit.  
 Mente deum, regnũq<sup>3</sup> dei fac supplice quæras:  
 Cætera diuino tibi fundet copia cornu.  
 Pectora venturi non tangat cura diei:  
 Nanq<sup>3</sup> satis præsens secum feret ipse doloris.

## MATH. VII.

Iudicijs duris fratres iugulare cauete:  
 Iudicium durum sequitur sententia dura.  
 Pondere quo fratrum vestrorum facta libratis,  
 Pondera vestra, pater cælestis, librat eodem.  
 Parua vides fratris, propriæ te crimina vitæ  
 Magna latent: alios semper purgare laboras

*In minimis, tua sit vitij cum vita referta.  
Cur ita dissimulas? primum peccata tuorum  
Grandia de leto morum, tunc corrige fratrem.*

*Eximias fidei canibus desistite gemmas  
Promere, vel porcis: illis odiosa tyrannis  
Efferat, hos carnis demergit fœda libido:  
Ergo prophanabit fidei mysteria vestra,  
Vel ruet in vestras teterrima natio clades.*

*Si petitis, dabitur: si quæritis, inuenietis:  
Janua, pulsanti, fuerat quæ clausa, patebit.  
Vos homines quos sola facit natura parentes,  
Filius à vobis si panem fortè rogarit,  
An dabitis lapidem? si pisces ille requirat,  
An dabitis fœui serpentis dira venena?  
Vos igitur, quos culpa malos innata reliquit,  
Si bona, quando petunt, gnatis conferre potestis  
Munera, cœlestis pater optima quando rogatur,  
Munera perpetuæ donabit maxima vitæ.*

*Quomodò tractari vultis, tractate vicissim  
Vos alios: in ea constant lex, atq; Prophetæ.*

*Sunt geminae portæ, quarum latissima multos  
Altera descensu facili sub Tartara mittit:*

*Altera*

*Altera quæ sursùm sublimia tendit ad astra,  
Difficiles habet introitus, & limina parua.  
Porta capit paucos, sed quos angusta recepit,  
Collocat in cælis arctissima semita tutos.  
Effundet falsos ætas ventura Prophetas,  
Quos simulatorum mansueta modestia morum  
Occulet, illorum vos declinate furorem.  
Simplicitas ostendit oues externa, sed intus  
Pectora sæuorum flagrant feritate luporum.  
Si pietas animos vestros fucata mouebit,  
Cernite quos fructus illorum vita profundat.  
Nec tribulus ficos unquàm, nec spina dat vuas.  
Qualis enim fuerit fructus, quæ procreat arbor,  
Talis erit semper, quem sumis ab arbore fructus.  
Putrida corruptos fructus, quæ fuderit arbor,  
Ceditur, ardentes & inutilis ibit in ignes.  
Ergò sit in vobis morum perfectio summa.  
Nam dominum frustra, quantumuis sæpè vocabit,  
Cuius erit domini pæceptis vita repugnans.  
Tempora iudicij cum vos postrema supremi,  
Ante meum trepidos cogent astare tribunal,  
Impia sic sese iactabit lingua malorum:*



O deus, ô venerande deus, nos esse Prophetas  
Nominis in virtute tui scis, atq; ligatas  
A Satana miseras animas exolvere posse.  
Nominis atq; tui cognoscis numine sacro,  
Cætera virtutis quot sint miracula nostræ.  
Sit licet illorum tam stulta superbia lingua,  
Non tamē agnoscam, miseros migrare iubebo,  
Ignotosq; mihi, vitam qui crimine mergunt.

Dogmata diuinæ quisquis præsentia vocis  
Audit, & in sanctos mores transmittere curat,  
Ædificatori par est, qui prima domorum  
Firma super petram vult fundamenta locare.  
Nanq; procellosis cum stillāt nubibus imbres:  
Quando ruit Boreas, & sæuo tecta tumultu  
Concutit, has ædes tempestas nulla mouebit:  
Fūdamenta petræ quia sunt stabilissima duræ.

Sed mea, quæ posui vobis, mandata tenenda,  
Discere qui velit, & vita discedit ab illis,  
Est homini fatuo similis, qui ponit arena  
Fundamenta domus, quam turbine concitus imber  
Quando quatit, molles magna vi soluit arenas,  
Et domus ingenti, procumbit tota, ruina.

Sic

*Sic fatur Christus. Magno defixa stupore,  
Turba silet, sacra mirans oracula linguae.  
Grandia diuinus quia traxit pondera sermo,  
Nec sine momento, scribarum more, strepebat.*

## EPISTOLA SANCTI IACOBI.

*Seruus ego, patrisq; dei, Christi q;, Iacobus,  
— Communem sparsis Iudaeis mitto salutem.  
Quando ferit miseros tempestas saeva malorum,  
Anxia diuersae cum vexant pectora curae:  
Gaudia tunc animis, fratres, surgentia laetis,  
Aspera vestrorum pellant tormenta dolorum.  
Crescit enim certando fides, & saepe ferendo  
Difficiles vitae discit tolerare labores.  
Colligat aeternum patientia firma vigorem,  
Et stabilis virtus in nulla parte vacillet.*

*Quando deest vobis sapientia, quaerite sursum,  
Unde deus pleno cumulo dispertit acumen  
Omnibus, atq; datum munus non exprobrat ulli.  
Qui petit, accipiet, si spes sit firma petentis.  
Nam titubans animus, dubitas quae distrahit error,  
Fluctibus hybernis par est, quos aequora iactant,  
Concitus & ventus rapido cum turbine voluit.*

*Talis erit voti nunquam dubitatio compos.*

*Simplicitas placeat, duplex astutia mentes  
Dissipat, atq; vias incertas lubrica versat.*

*Conditio tenuis magna mercede futura  
Crescat, & è cœlo thesauros sumere speret.*

*Cuius erit contrà nummorum plenus aceruus,  
Contrahat is animum : quoniam sic vita caduca  
Præterit, ut siccis flos defluit aridus herbis.*

*Quando suos Phœbus radios diffundit in orbem,  
Decoquit herbarum succos, morientibus illis,  
Vertice stat nudo gramen sine flore relictum.*

*Sic tibi diuitias paulatim vita recedens  
Deterit, atq; iaces putris sine nomine truncus.*

*Pectore qui firmo vitiorum tela refutat,  
Ille erit, ille sua tandem virtute beatus.*

*Induet æternam victoria læta coronam,  
Crimine cum pulso morum præstantia lucet.*

*Nam deus, ista pijs promittit munera seruis,  
Quando suum numen iusto venerantur amore.*

*Mens tua si vitij scintillas cœpit habere,  
Non deus has affert, affert tibi praua libido.  
Criminis hæc labem cum pectore concipit intus,*

*Parturit,*



*Parturit, & fœdum peccati dedecus edit.*

*Filia peccati mors est horrenda nefandi.*

*Deuius, ô fratres, animos non auferat error.*

*Quicquid enim recti, quicquid virtutis habetur,*

*Muneris & quicquid perfecti vita requirit,*

*Maxima cœlestis donat clementia patris,*

*Pectora diuino qui solus lumine complet,*

*Cuius habet nullos constans perfectio motus,*

*Cuius habet nullas lux immutabilis umbras.*

*Patris enim nostri, nos, defnita voluntas,*

*Pondere diuinæ vocis, quasi semina prima*

*Constituit rerum, quas post effudit in orbem.*

*Sæpè tuas aures discendi magna cupido*

*Arrigat, at linguam ratio non sæpè relaxet.*

*Consilij pestis, mentem non obruat ira,*

*Namq̃ dei iustis præceptis cæca repugnat.*

*Ex animis culpæ sordes, & spissa malorum*

*Agmina truantur, subeat pia corda beatus*

*Sermo dei, certam sermo dabit ille salutem.*

*Transseat in vitam virtus, quæ fluxit ad aures.*

*Quisquis enim præcepta dei veneranda tremendi*

*Audiit, & vitam non conformauit in illis,*

Errat; vt ad vitrum qui vultus quandò locauit,  
 Exijt, & propriam dimisit mente figuram.  
 Ergò tibi legis perfectio mente notanda  
 Semper erit, semper morum sit norma tuorum.  
 Nam pia perpetuò quisquis vestigia legis  
 Seruat, eum reddet constantia firma beatum.

Currere qui patitur stolidam sine pectore linguam,  
 Qui finit ad vitij latebras diuertere mentem,  
 Religionis habet falsum sine pondere nomen.  
 Religio sincera, deo quæ sola placebit,  
 Hæc erit, afflictis quæ vult succurrere membris,  
 Quæ, sine patronis ullis fortuna reliquit,  
 Quæ vitij fæces sincero corde repellit,  
 Nec finit in mundi cæno sordescere mentem.

## CAPVT. II.

Vestra fides paribus, fratres, se subuehat alis,  
 Nec sibi sit dispar, in fratrum dispare sorte.  
 Nobilis ingreditur gemmis ornatus, & auro:  
 Pauper adest, laceris malè tectus corpora pannis.  
 Diuite si sumpto, fratrem secludis egenum,  
 Non tua, quo debet, proficiscitur ordine, virtus.

Nam

Nam deus elegit, quos vos calcatis, egenos.  
Atq̃ licet mundus sordes contemnat eorum,  
Grata deo pietas nudo de corpore manat.  
Cuius erit cœli, quantumuis pauper oberret,  
Pectora sancta, dei quisquis complebit amore.  
Quos deus assumit, vos fastidire cauete.  
Diuitias sequitur magnas furiosa tyrannis,  
Et trahit insontes ad sæuum dira tribunal.  
Diuitias sequitur blasphemia, dente cruento  
Dilacerans domini sanctissima nomina summi.  
Regia diuino lex promanauit ab ore,  
Fratribus ut talem nos exhibeamus amorem,  
Qualis amor nostri nobis sentitur inesse.  
Vos ita si facitis, laus est virtutis in illo.  
Vestra sed in causis fratrum si regula dispar  
Claudicat, admittens illum, qui fulget in auro,  
Paupere summoto, qui nudo corpore friget,  
Ista trahit secum tam magna superbia culpam,  
Atq̃ reos spretæ legis, vos arguit esse.  
Sancta deinde dei sic omnia iussa coherent,  
Legis ut vnius violatio distrahat omnes.  
Author enim nobis legum deus vnus, & idem,  
Exitit,



*Exitit, à quarum minima qui parte recessit,  
Obligat hunc iuris totius culpa soluti.*

*Tanta sit in vobis moderatio cordis, & oris,  
Ut libertatis vos lex absolvere possit.*

*Quisquis enim summo contendit iure severus,  
Sentiet is summi durissima vincula iuris.*

*Iudicij nervos frangit miseratio clemens,  
Et debellato valdè letatur in hoste.*

*Sola fides, operum si sit sine laude piorum,  
Interit, atq; potest nihil utilitatis habere.*

*Nudus enim frater, soror & cum nuda sedebit,  
Si iubeas miseros, ut sunt, sine vestibus ire,*

*Atq; parare sibi quò vivere corpora possint,  
Ecquid eos ista pereuntes voce leuabis?*

*Sic sterilis benefacta fides si nulla ministrat,  
Occidit, & succo, moritur, virtutis adempto.*

*Nec benè distinguit pariter nascentia membra,  
Qui secat, alterutrum sumens, sociumq; relinquens.*

*Esse deum credis, qui mundo solus, & unus  
Imperat? hoc rectè credis, sed spiritus illud*

*Impius agnoscit tecum, trepidatq; fatendo.  
Qui lenis ad fidei vocem subsistet inanem,*

*Credit*

Credit & expertem factorum, posse valere :  
 Ad generis nostri patrem respectet Abramum.  
 Filius, hunc iustum reddebat, victima factus.  
 Certa fides eius sanctissima pectora mouit,  
 Et fidei motum succedens actio complet.  
 Propterea iustum scriptura vocauit Abramum,  
 Est & in hoc facto domini numeratus amicus.  
 Iustitiæ laudem, sinceræ gloria vitæ  
 Colligit, atq; fides ex se non sufficit ipsa.  
 Namq; Raab meretrix, quando collegit in ædes,  
 Quos populus sanctus furtim dimisit ad urbem,  
 Rursus & in montes diuerso tramite misit :  
 Non credendo fuit, sed erat faciendo beata.  
 Spiritus ægroto cum frigidus exit ab ore,  
 Defluet ad terram corpus, vitaq; carebit.  
 Sic benefacta, fidem cum solam fessa relinquunt,  
 Interit, atq; iacet nulla cum laude sepulta.

## CAPVT. III.

Magna magistrorum non debet crescere turba,  
 Grandius est crimen, cū summa scientia peccat,  
 Labitur in multis errans in scitia rebus.

Qui celeres linguae motus ratione gubernat,  
Illius ad summum sapientia maxima venit,  
Et facili reliquum disponit in ordine corpus.  
Fræna caballorum flectunt durissima colla,  
Clauus & exilis naues, quas dissipat Auster,  
Dirigit, accedens quò ducit cura magistri.  
Maxima sic paruae feruent conuitia linguae:  
Concitât ingentes flammâs scintilla minuta.  
Lingua suas flammâs verborum turbine vibrat.  
Lingua vomit, rerum quicquid sentina malarum,  
Hausit, & in nostro sibi certam corpore sedem  
Præparat, vt tetro suffundat membra veneno.  
Quicquid habet volucrum, quicquid natura ferarum,  
Et mare quos pisces, quos tellus procreat angues,  
Ingenij præstans sibi subijcit omnia virtus.  
Lingua tamen nunquam regitur moderamine certo.  
Voluitur hæc pestis, rationis vincula frangens,  
Et, quod habet virus capitale, per omnia spargit.  
Lingua deo patri persoluit debita vota:  
Cum venit ad fratres, quos patris vœstit Imâgo,  
Perfurit, ac illos maledictis figit acerbis.  
Sic fluit ex vno sermo contrarius ore.

Hæc



*Hæc ita non debent vobis contingere, fratres.  
Si puteus de fonte fluens, tibi dulcia præbet  
Flumina, non undas idem tibi fundit amaras.  
Non eadem fructus diuersos procreat arbor,  
Gurgite nec salso, fons si decurrere cæpit,  
Ille potest riuus manare recentibus idem.*

*Eius habet veras sapientia sobria laudes,  
Cuius habet mores sanctissima vita probatos.*

*Inuidiæ stimuli cum torquent pectora sæui,  
Cum lacerat vestras acris contentio mentes:  
Crimina cur falsum virtutis nomen habebunt?*

*Non etenim rixosa venit sapientia cælo,  
Fæcibus exhalat terræ, quam spiritus affert  
Impius, & prauum dictat rationis acumen.*

*Æmula mens, pugnae studio quæ feruida fertur,  
Ipsa sibi dispar, oneratur mole malorum.*

*Quæ venit è summo diuina scientia cælo,  
Integra, perpetuo flagrabit pacis amore.*

*Iudicio dubias causas determinat æquo,  
Iure suo cedens, gaudet componere litem,  
Fratribus offensas omnes mansueta remittit,  
Deniq̃ factorum cumulatur laude piorum,*

D.I.

Inuida

*Inuida non fratrum condemnat facta suorum,  
 Non simulat quicquam, sed aperto pectore viuit.  
 Qui pia tranquille transmittit tempora vitæ,  
 Pacis erit tandem magna mercede beatus.*

## CAPVT. IIII.

*Q* Vis furor horribiles pugnas, belliq; tumultus  
 Concitat? & turpi lacerat certamine fratres?  
 Occupat insanas mentes impura voluptas,  
 Corporis & fœdi corrumpit putrida membra.  
 Cur hiat, & nunquam satiatur vœstra cupido?  
 Cur habet optatum nunquam mens æmula votum?  
 Excitat atroces lites contentio vœstra,  
 Nec tamen attingit, quam vellet figere, metam,  
 Et meritò, coram domino quia turba scelestæ  
 Fundere vota negat, vel sunt, quæ fundit, iniqua.  
 Quærit enim luxus, quod postea perdere possit,  
 Et sequitur prædam sceleris furiosa libido.  
 Progenies Satanae, stupris demersa nefandis,  
 Impia pollutæ non sentis gaudia vitæ,  
 Quomodo cum iussis domini contraria pugnent?  
 Delitias mundi fragiles qui mente sequetur,  
Perdidit

Perdidit æterni certissima prælia cœli.  
Terribilis domini non frustra sermo tonabat,  
In vitium prono semper nos pectore ferri.  
Sed corrupta suæ qui purgat semina mentis,  
Crescit in illius iustissima gloria laude.  
Ergo deo patri mentes summittite vestras,  
Et Satan ex animis migret, cum fæce malorum.  
Iungite vos patri, pater ut se iungere vobis  
Possit, & in stabili mentes componere pace.  
Diluat integritas prauorum crimina morum,  
Simplicitas duplices depellat pectoris astus.  
Impia supplicijs diuellite corpora iustis,  
Concipiant vultus lachrymas, & corda dolorem.  
Gaudia lætitiæ, præsens quæ vita ferebat,  
Auferat in regno cœlesti cura locata.  
Mens resupina dei se coram numine sternat,  
Eriget abiectam rursus diuina potestas.  
Non premat in fontem mentita calumnia fratrem.  
Fratris enim falso violat qui crimine famam,  
Js violat legem, iuris qui vincula frangit,  
Ille potest dominus iuris, non seruus haberi.  
Tu deus in cœlis, legum venerabilis author,



*Solus es, & solus dominus, vitæq, necisq.*

*Nemo potestatem diuini sumat honoris,  
Nec domini famulum tua vox temeraria damnet.*

*Crimen habet magnum mētis stupidissimus error,  
Cum sibi promittit longæuæ tempora vitæ,  
Per varias vrbes quando se iactat iturum,  
Atq, reuersurum lucri cum fœnore certo.*

*Quin minuis fastum miser, & te respicis ipse?*

*Namq, diem certum, nec habet tua vita, nec horâ.  
Est etenim fumo similis, qui tempore paruo  
Cernitur, atq, statim tenues discedit in auras.*

*Ergò deo patri vitam committite vestram,  
Et quæ vita solet secum commertia ferre.*

*Namq, potestatem domini, cum sermo superbus  
Transmouet in proprias vires audacia fastum  
Talis habet, vestro qui pectore debet abesse.*

*Nam tua cum ratio, culpæ discrimina cernit,  
Postea peccantem sequitur iustissima pœna.*

CAPVT. V.

*Magnus opum quibus est arcis differtus aceruus,  
Argenti cumulos qui congeßistis, & auri,*

*Plangite*

Plangite vos miseri, lachrymarum fundite riuos,  
Corda futurorum configat cura dolorum.

Tempore thesaurus, tiniae consumitur ore

Vestis, & abrosi pereunt ærugine nummi.

Testis auaritiæ turpis rubigo citatur,

Et tacitè vestras depascit sæua medullas.

Tempore postremo, cum mors meditanda fuisset:

Extruis immenso thesauros pondere grandes,

Pauper & interea frater, qui messuit agros,

Præmia iusta sui sudoris sæpè requirit,

Sed tua, quam debet mercedem, dextera differt.

At deus è cælo clamores pauperis audit,

Atq; tibi duras feret hæc iniuria pœnas.

Mollia delitijs impleuit corda voluptas,

Ebria corruptas soluit lasciuiæ mentes,

Festa dies tanquam conuiuia læta frequentet.

Iudicio fratres condemnavistis iniquo,

Vadet & ad mortem tacitus sine crimine frater.

Firma sit, ô fratres, animi patientia vestri,

Dum redit è cælo Christus, terrasq; reuisit.

Agricolæ, fruges telluris, mente quieta,

Quamlibet has optent, tamen expectare videmus,

Donec

Donec oportunus de cœlo defluat imber,  
Atq̃ salubris eas, solis concoxerit æstus.  
Sic stabilis vestras vallet patientia mentes,  
Christus adest, Christus iam iam descēdit ab astris.  
Aspera concordem non frangant murmura pacem,  
Fudicio ne vestra cadat discordia iusto,  
Prospicit è cœlo iudex, sedemq̃ cape scit.  
Cernite, quàm fuerit patientia magna Prophetis,  
Numine diuino qui prædixere futura.  
Sic erit illorum tandem fortuna beata,  
Qui subeunt duræ discrimina maxima vitæ.  
Fulminat, & Iobum prosternit mole malorum  
Spiritus impurus, sed rursus subleuat ægrum,  
Omnia restituens cum fœnore, dextera patris,  
Cuius habet nullum clemens misratio finem.  
Præcipuè vobis sunt iuramenta cauenda,  
Nec licet hæc vlla sermonis parte locari.  
Te deus in cœlo sursum, terraq̃ deorsum  
Audiet, & pœnas scelerato sumet ab ore.  
Non igitur terram iures, nec sidera cœli,  
Nec deus immensum quicquid produxit in orbem.  
Est, non est, semper linguæ sint fræna modestæ,  
Sic



*Sic cadet in vestros nunquam simulatio mores.*

*Quando deus meritis affligit corpora pœnis,  
Supplice voce deum veniam deposce malorum.*

*Prosperitas rerum quoties est læta tuarum,  
Pectora diuinas decantent grata camœnas.*

*Corpora quando graui decumbunt languida morbo,  
Presbyteros sanctos, sibi quos ecclesia legit,  
Congreget ægrotus, lapsam reuocare salutem  
Qui precibus possint, oleumq; infundere membris.*

*Nomina sacra dei concors oratio summi  
Inuocet, ac firmis adsit fiducia votis.*

*Sic deus illorum precibus flectetur, & ægro  
Restituet vires, & crimina cuncta remittet.*

*Mutua communes promat confessio culpas,  
Criminis & veniam communia vota requirant,  
Vos deus vt saluos possit, sanosq; tueri.*

*Pondera magna preces iustorū semper habebunt.  
Vir fuit Helias communi sorte creatus:  
Et tamen illius potuit suspendere cælo,  
Et potuit pluuias oratio reddere terris.*

*Qui poterit cæco fratres errore ruentes  
Ad rectam reuocare viam, qui crimina fratrum*

*Corrigit,*

*Corrigit, ac illos in veri tramite ponit :  
 Vulnere curando fratrum, sua vulnere curat.  
 Nam tibi vita licet vitijs impura redundet,  
 Eluet ex vita maculas dilectio fratris.*

PRECATIO MANASSIS REGIS

Israelitarum, captiui.

*O Deus, ô patrum nostrorum gloria sola,  
 Seminis ô iusti, summe patrone deus,  
 Numine qui magno cœlum, terramq̃ creasti,  
 Et quod habet tellus, & quod olympus habet,  
 Alme deus, clemens, & iustam tardus ad iram,  
 Ad veniam facilis, crimina nostra dolens,  
 Ecce miser merui vindictæ fulmina sæuæ,  
 Criminis & faciem sum reus ante tuam.  
 Grandia deliqui, deliqui multa, diuq̃,  
 Creuit & ex veteri crimine, culpa recens.  
 Pœnitet heu scelerum, flexis tibi supplico cordis  
 Poplitibus, veniæ quæso memento deus.  
 Peccaui fateor, peccaui, crimina damno,  
 Execror & sceleris probra nefanda mei.  
 Me mea culpa reum, faciat tua gratia saluum,  
 Tendo manus, supplex obsecro, parce deus.*

*Parce*

Parce deus, noli vitiorum mole grauatum  
Perdere, peccati nec memor esse velis.  
Et licet indignus venia miser ipse videbor,  
Gratia pro merito sit tua quaeso meo.  
Sic mea vita tibi laudes seruata rependet,  
Atq[ue] tuum iusto nomen honore colam.

## PSALMVS DAVIDIS. XXXIIII.

Tempus in omne dei laudes mea lingua sonabit,  
Semper ego dominum commemorabo meum.  
Spiritus ad dominum referet praeconia iusta,  
Vir pius audito gaudet honore dei.  
Coelica communi celebremus numina voce,  
Summus honos domini nomen ad astra ferat.  
Inueni tandem dominum, qui multa querentem  
Audiit, & clemens abstulit omne malum.  
Quaerite diuini radiantia lumina vultus,  
Semper & ex illo lumine, lumen erit.  
Undiq[ue] depressus pauper sua vota profudit,  
Venit, & erectum iussit abire deus.  
Angelus è caelo, domini praeccepta timentes,  
Seruat, & in medio stans, mala quaeq[ue] fugat.

E.L.

Delitias



*Delitias domini dulces, gustando probate,  
Qui domino fidunt, omnia tuta tenent.  
Sit timor in sanctis, reuerentia numinis adsit,  
Sic tibi quo viuas sufficienter erit.  
Diuitiæ magnæ pereunt in tempore paruo,  
A domini seruis non remouentur opes.  
Huc ades ô fili, proprius mea percipe verba,  
Vt timeas dominum, disce, docebo viam.  
Qui cupit expertem curarum ducere vitam,  
Cogitat & læta prosperitate frui,  
Sermones vitet prauos, linguamq; refrænet,  
Ne struat occultos, insidiosa, dolos.  
Defugiat vitium, recti vestigia seruet,  
Gaudia tranquillæ pacis amœna colat.  
Nam deus ad iustos clementia lumina flectit,  
Atq; pijs facili percipit aure preces.  
Lumine sed toruo sceleratos aspicit omnes,  
Agmen vt infelix tempus in omne ruat.  
Vox pia iustorum diuinas excitat aures,  
Om nibus atq; malis liberat ille bonos.  
Afflictis dominus seruis solet esse propinquus,  
Ac animas humiles anxietate leuat.*

*Magna*

Magna licet iustos incurrat turba malorum,  
Efficit ut non sint hæc nocitura deus.  
Omnia seruorum numerauit membra suorum,  
Nec deus ex illis vlla perire sinit.  
Exitus infelix vitiosis omnibus instat,  
Qui malè vult iustis, in sua damna ruit.  
Quotquot habet seruos, dominus redimendo relaxat,  
Qui domino fidet, crimine liber erit.

## PSALMVS DAVIDIS. CIII.

Magnificas domini laudes mens grata reuoluat,  
Intima corda dei nomen honore colant.  
Spiritus ô noster, dominum celebrare memento,  
Cuius habes summo munere, quicquid habes.  
Qui tibi condonat sceleratæ crimina vitæ,  
Corpore morborum qui genus omne fugat.  
Cuius ab interitu vitam clementia seruat,  
Cuius abundantes dextera fundit opes.  
Tempora florentis qui reddit læta iuuentæ,  
Corpora qui senio cana virere facit.  
Omnibus oppressis domini sententia iusta  
Subuenit, ac illo iudice vera valent.

E.2.

Ille

Ille salutari deduxit tramite Mosen,  
Ille dedit populo iura beata suo.  
Parcere procliuis dominus, concedere promptus,  
Multa diu patitur, fertq; benignus opem.  
Non inimicitias seros transmittit in annos,  
Criminis & nostri non solet esse memor.  
Pœna minor culpam sequitur, quàm culpa meretur,  
Improbilas iusto fulmine nostra caret.  
Ut caua sub vastum tellus subsidit Olympum,  
Ut minor est magna terra minuta polo:  
Sic domini nostram vincit clementia culpam,  
Pectora quando, dei plena timore, tremunt.  
Tempora temporibus, quàm distant prima supremis,  
Quando diem Phœbus fert, tenebrasq; refert,  
Tam deus à nobis longè delicta remouit,  
Et vitij's iram fecit abesse suam.  
Ac pater ut gnato summisso parcere gaudet:  
Sic dominus nunquàm pectora fracta ferit.  
Nox enim nostros ortus, quod puluere nati  
Repimus in terris, & sepelimur humo.  
Tempora demesso sunt nostra simillima fœno,  
Prætereunt anni, flos ut agrestis abit.

Qui



Qui cadit ad terram iactatus turbine venti,  
Nec locus apparet, quo prius herba fuit.  
Sed domini viuax semper clementia durat,  
Si metuas semper corde tremente deum.  
Et dominus iustus defendet teq, tuosq,  
Viueres si domini legibus ipse velis.  
Condidit in cælo sedem diuina potestas,  
Omnia sunt regno, subdita regna, dei.  
Angelus in cælo diuinum nomen honoret,  
Qui domini fœlix iussa minister obit.  
Concinat eximios domini gens sancta triumphos,  
Quæ solet ad nutus esse parata dei.  
Tota suum dominum collaudet machina mundi,  
Tuq, deum celebres, ô mea vita, tuum.

## PRECATIO EX PSALMO XXXI.

O Deus, ô nostræ spes indubitata salutis,  
Iustus es, haud seruum præcipitare fines.  
O deus ad nostras, aures demitte, querelas,  
Et mihi maturam ferto benignus opem.  
Protege me trepidum, quem multa pericula cingunt,  
Arx mea sis, quando vis inimica premit.

E.3.

Per-

*Perfugium solum, tu tota potentia nostra es,  
 Dirigat errantem nominis aura tui.  
 Eripe me laqueis, quos callidus abdidit hostis,  
 Nam mihi patronus, tu deus, unus ades.  
 In manibus mea vita tuis, meus ecce redemptor  
 Ponitur, ô verax, & venerande deus.*

## EX PROPHETA IOB.

*Fæmineo mortalis homo de ventre profectus,  
 Aspicit hanc lucem, progrediturq; foras.  
 Et licet exiguo dimittat tempore vitam,  
 Est tamen immensis vita referta malis.  
 Funditur in terras, ut flos in tempore verno,  
 Illicò languescit, conteriturq; brevi.  
 Lubrica perpetuis iactatur motibus ætas,  
 Atq; statum variè mutat, ut umbra locum.  
 Tu deus ad fragilem massam tua lumina flectes?  
 Ac hominis iudex tu deus esse paras?  
 Ecquis homo purus non puro semine factus  
 Esse potest? Ecquis talis in orbe fuit?  
 O deus, humane si vitæ tempora certa  
 Digeris, & menses annumerare placet,*

Si

*Si tuus ordo manet stabilis, si fixa voluntas,  
 Si queat ad positos addere nemo dies:  
 Attamen indulge spatium, quò spiritus aeger  
 Vivere dediscat, discat & inde mori.  
 Sic homo promptus erit venienti cedere fato,  
 Cum memor antè suæ conditionis erit.  
 Nam quasi mercedem, sic vitam sumimus omnes,  
 Semper ut arbitrio stetq̃, cadatq̃ dei.*

DISCIPLINA CHRISTIANORVM  
 morum. Tobiz. 4.

*P*Ercepe, mi fili, vocis præcepta paternæ,  
 Sermo meus, vitæ sit tibi norma tuæ.  
 Me cum fata vocant, corpus compone sepulchro,  
 Non tibi sit vilis, sed veneranda parens.  
 Semper honorato matrem, sic dirige vitam,  
 Ut facias, mater quæ tua facta velit.  
 Fac animo repetas, cum te gestavit in aluo,  
 Temporis illius quanta procella fuit.  
 Quando deus statuit vita discedere matrem,  
 Corpora cum nostro corpore iuncta cubent.  
 In domino maneat semper tibi fixa voluntas,  
 Et tua peccati crimine vita vacet.



Quæ dominus præcepta dedit, contemnere noli,  
Iustitiæ placeat cultus, iniqua fuge.  
Donec enim purus viues sine labe malorum,  
Omnia diuino numine læta fluent.  
Iustitia quisquis vitam traducit honestam,  
Eius erunt summa prosperitate dies.  
Sparge facultates, ut fratrum postulat usus,  
Quamq̃ ferēs inopi, ferto libenter opem.  
Pauperibus noli duros auertere vultus,  
Ne deus auertat lumina sancta tibi.  
Ut patiuntur opes, fratri largire petenti,  
Tempore pro duro, sic tibi condis opes.  
Liberat interitu clemens largitio vitam,  
Nec tenebris mergi te tua dona sinent.  
Munera largiri domino gratissima res est,  
Semper & authores præmia certa ferunt.  
Moribus à sanctis absit scortatio fœda,  
Sola tuo coniunx sit tibi iuncta thoro.  
Uxor ab antiquis veniat maioribus orta,  
A duena, coniugio non erit apta tuo.  
Spirps etenim sanctis descendit nostra Prophetis,  
Nous erat noster, poster Abramus erat.  
Noster

*Noster Isacus erat, nostris adiunge Iacobum,  
Hæc vetus est nobis annumerata tribus.  
Omnibus vxores propria de stirpe fuerunt,  
Prole fuit fœlix turba fauente deo.  
Dilige cognatos, & cum vis esse maritus,  
Ex propria sponsam fac tibi gente legas.  
Pectore pellatur fastus, pellatur ab ore,  
Fastus ad interitum præcipitare solet.  
Fastus habet lites, offensis fastus abundat,  
Atq; ferox tandem fastus egere facit.  
Namq; nimis tumidum quem res fecere secundæ,  
Hunc sequitur duro tempore nuda fames.  
Soluere mercedem nunquàm differto merenti,  
Sic deus ipse tibi, quando merere, dabit.  
Omnibus in factis omnes circumspice partes,  
Consilio, vitæ fac modereris iter.  
Quod tibi tu velles nunquàm contingere posse,  
Hoc fratri nunquàm feceris ipse tuo.  
Vina nec ad luxum sumas, sumantur ad vsum,  
Ebrietas nunquàm sit tibi iuncta comes.  
Quando fames urget fratres, apponito mensam,  
Corpora quando rigent frigore, nuda tege.*

Ex opibus quicquid superest, tribuatur egenti,  
 Læta sit in donis dextera larga suis.  
 Maxima iustorum maneat tibi cura virorum,  
 Non tamen assuescat pascere mensa malos.  
 Consilio sapiens semper tua facta gubernet,  
 Quæ sapiens fieri præcipit, illa tene.  
 Supplice mente tuum dominum fac semper adores,  
 Et pete, te recta ducat ut ille via.  
 Dirigat ut recto cursu vestigia cæca,  
 Tempora consilijs donet ut apta tuis.  
 Consilio gens nulla valet, deus omnia solus.  
 Suggestit, ex solo sunt bona quæq; deo.  
 Deicit & dominus, cum fert sua sancta voluntas,  
 Quoslibet, & qua vult nos ratione premit.  
 Hæc igitur, fili, mea pectore verba reconde,  
 Hæc tibi non animo deleat ulla dies.

## ORATIO DOMINICA.

O Pater noster, pater ô verende,  
 Qui tenes cælum, dominans in astris,  
 Sit tuum nomen veneratione  
 Supplice plenum.

Qui



Qui regis reges, subigisq; regna,  
Cuius in toto volat orbe virtus,  
Præsto sit regnum, tua sit propinqua

Summa potestas.

Quo modo cælum tibi seruit omne:  
Terra sic sese tibi dedat omnis,  
Et suo semper tua stet voluntas

Firma vigore.

Da tuis gnatis, pater ô benigne,  
Indies quicquid ratio requirit  
Debilis vitæ, tua nos perennis

Copia pascat.

Crimen & clemens miseris remitte,  
Quo modo nos cum violamur, illis  
Parcimus, quorum meruere iustam

Crimina pœnam.

Nec sinas, quos ex nihilo creasti,  
Nos, tuam prolem, pretio redemptam  
Sanguinis Christi, vitijs nefandas

Dedere mentes.

Sed tuos seruos dominus tuere,

F.2.

Et

*Et pater gnatos reuoca ruentes,  
 Culpa ne mentem, simul atq; corpus  
 Turpis obumbret.*

PRECATIO EX AVGVSTINO.

*O Mnipotēs, clemensq; deus, miserere querentis,  
 Ad gemitus oculos quæso reflecte meos.  
 Sum miser, & reus, & quoniam peccata placebant,  
 Conueniens vitijs hæc mihi pœna venit.  
 Quæq; dies aliqua culpa facit esse nocentem,  
 Debita peccatis dat mala quæq; dies.  
 Quando ego, quæ feci, mecum peccata reuoluo,  
 Criminibus minor est, quam fero, pœna meis.  
 Vita mihi vitijs est omni parte referta,  
 Supplicium meritis mitius esse scio.  
 Iustus es ô deus, & non est vindicta seuera,  
 Tardior est nostris ultio lenta malis.  
 O pater omnipotens, homo cum nihil esset in orbe,  
 Voce tua est tellus facta repente caro.  
 Quæ caro, peccatis cum perdita tota fuisset,  
 Est mirabiliter carne redempta dei.  
 Non temerè ferimur, nec nos fortuna gubernat,  
 Tu deus es vitæ, dux es & ipse viæ.*

*Ergò*

Ergò creaturas clemens nos respicis omnes,  
 Præcipuè seruos speq̃, fideq̃, tuos.  
 O deus exaudi, supplex tua numina posco,  
 Ne sint peccatis æqua flagella meis.  
 Subueniat potius misero clementia summa,  
 Namq̃ malis hæc est omnibus vna salus.  
 Et quoties iustis plectis mea crimina pœnis,  
 Me toties firmo pectore redde deus.  
 Semper ut inflictam vincat patientia cladem,  
 Et dolor ut laudes possit habere tuas:  
 O miserere deus, miseri miserere petentis,  
 Siuè deest anima, corpore siuè deest.  
 Omnia tu supple. Nam solus & omnia nosti,  
 Solus & es, nobis qui dare cuncta potes.

## ALIA PRECATIO EX EODEM.

Ne venias iustus iudex, ô dulcis Iesu,  
 Nam mea me faciunt crimina multa reum.  
 Propitius venias nobis mansuete redemptor,  
 Atq̃ creaturæ tu miserere tuæ.  
 Ira reo parcat, miserum clementia seruet,  
 Nec memor offensæ, sed memor esto precum.



Deprecor ecce tuas iras, ô mitis Iesu,  
Nomine, seruator, re, manifesta salus.  
Nominis ergò tui memor, & virtutis Iesu,  
Anchora sis animæ non remouenda meæ.  
In bonitate tua residet fiducia nostra,  
Nam mihi sperandi tu deus author eras.  
Querere nos seruos, pulsare, rogare iubebas,  
Quæq; petissemus te bona velle dare.  
Obsequor, & pulso iussus, quæroq; petoq;  
Tu deus hæc serui fac rata vota tui.  
Me deus infirmum recrea, fulciq; ruentem,  
Restitui vitæ mortua membra iube.  
Instrue tu sensus, ac omnia dirige facta,  
Vita voluntatis sit mea serua tuæ.  
Hoc satis agnosco, quòd me tua dextra creauit,  
Mancipiumq; tuum, me deus esse scio.  
Compedibus satanæ strictus, cum iure trabebar,  
Tu mea soluiſti vincula, factus homo.  
Sic ego me certè tibi plus quàm debeo totum,  
Sed mihi, qua possem reddere, nulla via est.  
Sum tuus, atq; tamen tibi consecrare me ipsum  
Non queo, ni tua sit gratia præsto mihi.

Suscipe

*Suscipe me deus, & quando vis vlla resistit,  
Mancipio sanctas iniice quæso manus.  
Sic in amore tuus fuero, studioq̃ placendi,  
Ortu sicut ego sum tuus, atq̃ statu.*

## ALIA EX EODEM.

*Ecce meus plastes, video me multa rogasse,  
Pauca sed ex multis non meruisse scio.  
Heu fateor, meritis non sunt bona debita nostris,  
Est potius sceleri, debita pœna meo.  
Omnibus ex donis, tamen est clementia summa,  
Præcipueq̃ tibi gratia sola placet.  
Non etenim spernis quenquam, non abijcis vllum,  
Sed resipiscenti porrigis vltro manus.  
Ergo deus, cornuq̃ meæ, portusq̃ salutis,  
Perditus ante tuos, ecce, procumbo pedes.  
Crimina detestor, quibus es mihi redditus hostis,  
Illa mihi dominum surripuere meum.  
Sed tamen hoc noui, quòd si resipiscere possum,  
Tu deus ad veniam spontè paratus eris.  
Ad te si redeo, redeuntem sumis in vlnas,  
Si moror, expectas quando venire velim.*

*Corrigis*

Corrigis errantem, detrectantemq̄ propellis;  
Extimulas tardum, nescia corda doces.  
Suscipis afflictum, sustentas atq̄ ruentem,  
Et tua prostratum gratia tollit humo.  
Quod petimus, dabitur, quod quærimus, inuenietur,  
Et cum pulsamus, ianua laxa patet.  
Tu mihi monstrasti rectæ vestigia vitæ,  
Ne loca deflectens per tenebrosa vager.  
Si bene seruiro, Paradysi gaudia spondes,  
Si malè, me Satanae flammea regna manent.  
O deus indulgens, nostræ patrone salutis,  
Concute quæso tuo pectora nostra metu:  
Prouidus horribiles vt pœnas ante repellam,  
Quas tua peccatis ultio iusta feret.  
Gratia diuinis accendat pectora flammis,  
Gaudia quæ spondes, vt mihi donet amor.  
Instrue corda deus, linguæ sua suggere verba,  
Facta, tibi quæ sint complacitura, doce.  
Nunc etiam noui, te mens summissa iuuabit,  
Ac anima est humilis, res pretiosa deo.  
Hæc igitur concede mihi tibi munera grata,  
Firmus & in nostro pectore duret amor.

Tempora



Tempora si fuerint belli, defende timentem,  
 Spes mea sis, quando sæua procella venit.  
 Deniq; quando premit subuersum turba malorum,  
 Tu mihi sis illo tempore certa salus.  
 Ecce deus, mea vota tibi, mea vulnera pandi,  
 Me deus ad cœli regna beata vehe.

## ALIA EX EODEM.

O Deus emolli cor, vt resipiscere possit,  
 Spiritus afflictus sit, fugiensq; mali.  
 Exhibeant oculi verum lachrymando dolorem,  
 Ac animi testis sit mea dando manus.  
 O deus accensas carnis restringito flammâs,  
 Et tuus in nostro pectore flagret amor.  
 Gratia debellet fastum, mansuete redemptor,  
 Mens summissa mihi sit, metuensq; tui.  
 Irarum tollas æstus, seruator Iesu,  
 Quicquid erit duri, mens patiendo ferat.  
 Non odium nostro confidat pectore fixum,  
 Tota mihi mens sit candida, felle carens.  
 Da mihi, summe pater, fidei impenetrabile scutum,  
 Spes animo maneat constabilita meo.

*Semper amor fratrum tantus mea corda pererret,  
Illis vt proſim, non ſecus atq̃ mihi.  
Non ego ſim vanus, nec mens incerta vacillet,  
Nec peregrinetur cor leuitate vagum.  
Sermo verecundus fugiat ſcurrilia verba,  
Prætere à faſtu lumina noſtra vacent.  
Ingluuiſ ventris, ſpargendi falſa libido,  
Moribus omnino ſint aliena meis.  
Non ego detractor, nec opum ſim magnus amator,  
Nec quid agant alij, ſit mihi ſcire labor.  
Gloria nec fuco mentem titillet inani,  
Diſſimulatoſis fraude carere velim.  
Cura mihi maneat, quæ debet fratris egeni,  
Et manus infirmos ſubueniendo leuet.  
Deniq̃ non miſeram claudat blaſphemia vitam,  
Hoc ſcelus horrendum, ſpe veniaq̃ caret.  
Ne temerè per iniqua ruam, me, ſumme creator,  
Dirige, ſit menti pax requieſq̃ meæ.  
Excute torporem, deſtilla mentis acumen,  
Flexilis ac animus prouida verba notet.  
O pater, obteſtor te, natum propter Ieſum,  
Effice clementem me, rogo, redde pium.*

*Sic*

Sic & amabo tuum nomen, numenq̄ timebo,  
 Sic etiam læsis fratribus ipse querar.  
 Fastus & absistat fratres contemnere promptus,  
 Aggreger adiustos, auferar atq̄ malis.  
 Fac, vt in aduersis rebus patientia constet,  
 Rebus & in lætis, mens moderata detur.  
 Lingua malo careat, quo contra numina peccem,  
 Vel contra fratres, quo reus esse queam.  
 Gratia cœlestis minuat mihi gaudia mundi  
 Lubrica, quæ parui temporis aura tenet.  
 Gratia cœlestis Christi me quærere regnum,  
 Permoueat solum, quod sine fine manet.

QVIBVS REBVS CONSISTAT  
 vera precatio.

VT pia diuinas oratio manet ad aures,  
 Sex ea præcipuas debet habere notas.

- 1 Sit stabilita fide, nec in vlla parte vacillet,
- 2 Sit brevis, & fugiat tædia longa moræ.
- 3 Et vehemens animi magno feruore feratur,
- 4 Ac repetat varias multiplicata vices.
- 5 Nomina per Christi, placemus numina patris,
- 6 Plena sit officio vita, maloq̄ vacet.



## DE RATIONE RECTE CON-

stituendæ vitæ.

*VT tibi præceptis mens confirmetur honestis,  
Sex animo semper sunt repetenda tuo.*

1 *Principio deus est noster seruator, & author,*

2 *Hostis in opposita stat regione, Sathan.*

3 *Tertiæ res præsens est vita, simillima ventis,*

4 *Mors sequitur, nobis quæ propè semper adest.*

5 *Ordine sunt quinto, cœli palatia summi,*

6 *Tartara sunt sexto constituenda loco.*

*Hæc animo tacitè secum qui sæpè reuoluit,*

*Miror in hoc, vitij si quid inesse potest.*

## DE VINDICTA DIVINA.

*VLtio peccatum sequitur, delinquere noli,*

*Nam scelus admissum pœna seuera premit.*

*Quod si fortè dei clementia differat iram,*

*Sera licet veniat, certa venire solet.*

*O nimium fœlix, hæc quisquis vera putabit,*

*Et timet irati fulmina iusta dei.*

## CONTRA EVANGELICORVM

hostes, precatio.

*SUrge deus, dextra seruos attolle cadentes,*

*Impius irato fulminat ore Satan.*

*Tempora*

Tempora terribili iactantur dira tumultu,  
 Vi trahitur virtus, induit arma furor.  
 Lex oppressa filet, regnat pro iure libido,  
 Fastus & insanis territat astra minis.  
 Nos, tua progenies, Christi quos gloria tangit,  
 Qui colimus vero nomen honore tuum,  
 Cædimur, & trahimus per mille pericula vitam,  
 Vndiq; nos agitat sanguinolenta manus.  
 Strangulat hos laqueus, rota ferrea distrahit illos,  
 Pars perit in flammis, obruta pars in aquis.  
 Hic gladios, illic vibrat tormenta tyrannis,  
 Et varia tepidam strage cruentat humum.  
 Quis furor, o fratres, tantas exuscitat iras?  
 Undè venit nostri sanguinis ista sitis?  
 Est pater in cælis vnus, seruator & vnus,  
 Vna caro est, vnum nomen, & vna fides.  
 Vincula sed pacis, matrum discordia rumpit,  
 Proh dolor, ex isto tot mala fonte fluunt.  
 Nos colimus matrem cælesti patre creatam,  
 Quam sibi pro chara coniuge, Christus habet.  
 Cuius ab uberibus suxerunt verba Prophetæ,  
 Cuius erat soboles, turba vetusta patrum.

Primitiua  
 Ecclesia.

Christus

Christus eam veniens tenero nutriuit amore,  
 Discipulis eius cura relicta fuit.  
 Huius erant matris testes, & Apostolus omnis,  
 Et veteri quisquis tempore Martyr erat.  
 Huius adhuc durant custodes Biblia sacra,  
 Quæ stabilem faciunt inuiolata fidem.  
 Moribus ista pijs incorruptissima mater  
 Floruit, ad sponsum respiciendo suum.  
 Sancta, benigna fuit, clemens, & plena pudoris,  
 Officij retinens, integritatis amans,  
 Omnia distribuens, condonans omnia, verax,  
 Immemor offensæ, sed benefacta notans,  
 Deniq; virtutis mater fuit ista repertrix,  
 Atq; manet vitæ fixa columna piæ.  
 Altera nomen habet matris, Romana nouerca,  
 Sol nihil hoc monstro tetrius esse videt.  
 Fastus inest, luxuq; fluit, sectatur honores,  
 Cura boni non est ulla, nec ulla dei.  
 Verborum fumos, & rerum venditat umbras,  
 Atq; nisi fucum nil pietatis habet.  
 Ipsa sibi leges ponit, positasq; retexit,  
 Helluo nummorum, munera magna vorat.

Ecclesiæ.  
 Romanæ



Se iubet orari, coram se prona iacere  
Omnia, quantumuis aurea sceptragerant.  
Degener hoc animal sanctorum sanguine gaudens,  
Membra venenato sauciat ore dei.  
Pelle lupam, reuerende pater, quæ dente cruento,  
Dilacerat sparsos, non saturata, greges.  
Te sequimur, sponsamq; tuam, tua iussa tenemus,  
Integra de cælo, spesq; salusq; venit.  
Summe deus, tua nos miseros clementia seruat,  
Unicus es pastor, nos & ouile sumus.  
Prospice de cælo, tumidos disperde gygantes,  
Sacrilega cupiunt vi tua templa rapi.  
Nos licet indigni, Christum tamen aspice dignum,  
Sanguine qui lauit vulnera nostra suo.  
Dira nouerca fremit, vitiorum septa cohorte,  
Nosq; tuas, nullo vindice, mactat oues.  
O deus, huc oculos ad seruos flecte ruentes,  
Occidat in medijs impia turba minis.  
Vel tua præteritam condonet gratia culpam,  
Una sit & nobis, ut fuit antè, parens.  
Sic erit ex Saulo Paulus, sic bella sequetur  
Tristia, iucundæ pacis amanda quies.

O vtinam

*O vtinam dignos tali nos fœdere ducas,  
O pater, ô nôster ter venerande deus.*

SCOTIA DEBELLATA.

*Anglia cantet Io, claris euecta triumphis,  
Cantet Io, Scoticis subuersis Angliarebus.  
Euge Scotus cecidit, vi debellatus, & armis,  
Nunc cecidit, rapitur, trahitur, nunc Anglia vincit,  
Anglia præstanti nunc præstantissima rege,  
Anglia regina florens, & milite summo,  
Anglia quæ ducibus magnis, & milite forti  
Affluit, & partas post se trahit inclyta terras.  
Nobilis ingenio gens, Anglia, nobilis armis,  
Anglia nunc lætis effundat gaudia rebus.  
Sæpè Scotos fregit, fractos & sæpè fugauit,  
Anglia nunc fractos strauit, stratosq; peremit.  
Sæpè resurrexit clades oblita priores,  
Sæpè relictæ Scotus victus remeauit ad arma.  
Nunc iacet, & nostro semper sub rege iacebit.  
O homines, ô gens semper durissima flecti,  
Heu quoties vobis rex clementissimus vnus  
Parcit, & inducto sanciuit fœdere pacem.*

*Heu*

Heu quoties miseri, perrupta pace, fideq;  
 Arma resumpsistis, vobis funesta futura,  
 Et patriæ, vestro vitio, culpaq;, ruenti.  
 Discite nunc tandem regi seruire Britanno,  
 Anglia quo fœlix fœlici rege triumphos  
 Sæpè tulit claros, & nunc fert, sæpè feretq;.  
 Viuat rex, regum lumen, reginaq; viuat,  
 Viuat & eximius princeps, viuatq; Senatus.  
 Anglia postremò concisis inclyta Francis,  
 Ulta Scotos, Francosq; domans, inuicta sit armis.

DE EDOVARDO  
 principe.

Exigit eximios, princeps clarissime, versus,  
 Debita virtutum meritis laus summa tuarum.  
 O puer excellens, patriæ flos, gloria patris,  
 Viribus ipse tuis, ô princeps maior, & annis:  
 Alta deus regni prouidit sceptrum futuri,  
 Regis bonorandi princeps ut nobilis esses.  
 Dotibus egregijs tibi mens conferta relucet,  
 Vt generi summo par sit natura beata.  
 Sic stirpem virtus, virtutem stirpsq; sequetur.

H. I.

Perge



P erge puer, patris diuini gemmea proles,  
 R umpe moras, extolle tuos, puer auree, vultus.  
 I to per insignes, insignior ipse, triumphos.  
 N aturam patris, fortunam, pectus, & annos,  
 C lara dehinc tibi regna patris, sed sera, precamur.  
 E st pater, est regnum, par est insigne sororum.  
 P er multos annos, momentaq; maxima rerum,  
 S it tua, sit generisq; tui fortuna beata.

## DE TRIUMPHO PROPTER

pacem suscepto.

T Empora temporibus succedunt prospera duris,  
 In medias lachrymas gaudia magna cadunt.  
 Horrida præteriti sanantur vulnera belli,  
 Occupat & veterem pax reuocata locum.  
 Impia ferrati consedit militis ira,  
 Nec tuba dat vasto murmura rauca sono.  
 Non quatiunt muros bombardæ fulmina diræ,  
 Barbarus in cultos non ruit hostis agros.  
 Tristia non metuunt gnatorum fata parentes,  
 Non metuit formæ damna puella suæ.  
 Horrea securus distendit plena colonus,  
 Adnatat ex omni merx sine clade loco.

Non

Non hominum iugulos gladiator percutit audax,  
Imbuit armatas nulla rapina manus.  
Ferreæ sanguinei ceciderunt prælia Martis,  
Obruta bellorum fax, sine luce, iacet.  
Aurea se paribus librans concordia pennis,  
Colligat in studium pectora nostra pium.  
Intrat in eximias vrbes, & rura peragrat,  
Nobilis à cæli pax reuoluta polo.  
Festa volat studijs pax optatissima nostris,  
Quaq; venit plausus, lætitiâq; vebit.  
Sceptra tenens folio se pax imponit auito,  
Et fora perfundens corda quiete rigat.  
Omnia florescunt, tellus, & pontus, & aër,  
Commoda tranquillæ maxima pacis habent.  
Classica qui tenuit claro resonantia ferro,  
Ponitur ad cultæ dulcia plethra lyre.  
Peruigil in castris tota qui nocte cubabat,  
In propria lectum nunc habet ille domo.  
Qui metuens alios, author fuit ipse timoris,  
Vulnera nulla capit, vulnera nulla facit.  
Sanguine mercedem qui collegere cruentam,  
Ex opibus vinit turba quieta suis.

Alea quos pavit, quos nutrijt impia cædes, nec no  
 Nunc facit hos proprius vivere posse labor.  
 Mutua funestis sternentes corpora campis,  
 Mutua concordi commoda mente parant.  
 Humida, quæ fuerat multorum cæde virorum,  
 Incipit in segetes terra redire novas.  
 Atq; cadaueribus proiectis, nubilus aer  
 Sese aperit, cupiens quod fuit esse statu.  
 Pontus erat totus telis constratus, & armis,  
 Nunc mare propitio flumine vectat opes.  
 Omnis erat classis periuro milite plena,  
 Nunc socios iungit classis amica viros.  
 Deniq; Saturni perierunt tempora dira,  
 Et viget hæc ætas principe digna Ioue.  
 O deus, ô vero qui nomine Iupiter esse  
 Diceris, in celsa qui præis arce poli,  
 Summe deus, venerande deus, spes unica vitæ,  
 Cuius ab æterno numine cuncta fluunt.  
 Quod tua sustulerit nostros clementia luctus,  
 Horrida quod pacis prælia vincit amor,  
 Marte quod extincto, nos mutua fœdera iungunt,  
 Quod peregrina venit pax renovata domum.

Supplice



Supplice quanta potest tibi gloria voce rependi,  
Tanta tibi nostro manat ab ore deus.  
Summe deus, pacem, nostros miserate labores,  
Qui facis, hanc facias posse manere diu.  
Proximus es Christo, rex præstantissime regum,  
Nominis octauum qui diadema geris.  
Sit tua maiestas, rex inuictissime, salua,  
Cuius inest omnis nostra salute salus.  
Gallia te, nostra causa, conspexit in armis,  
Anglia te lætum, est læta sequuta ducem.  
Nunc populi verus pastor, post bella remota,  
Das iterum pacis iura quæta sacra.  
O decus armorum, clavis Henrice triumphis,  
O etiam puræ gloria prima togæ:  
Viue diu sælix, sælices viuere seruos  
Qui facis, o regni dux patriæq; pater.  
Sis etiam sælix Noruici turba beata,  
Commoda quæ regni pacis alumna foues.  
Quas ego te vidi lætam iactare corollas?  
Gaudia quæ vidi? quanta trophæa tua?  
Templa, domus, vici, pretioso splendida cultu,  
Musica præclaro sparsa sonora foro.

Canitiæ

Canitię veneranda cohors, florensque iuventus,  
 Signa dabant animi memoranda pij.  
 Digna tuis certę pax est pręclara triumphis,  
 Atque tuus dignus pace triumphus erat.  
 Nos deus, & regnum, regemque in pace gubernet,  
 Et Noruice tibi commoda multa ferat.

DE PACE BRITANNICA ANNO  
 primo Edouardi sexti.

T Ende deo lætas, o felix Anglia, palmas,  
 Anglia concordigens felicissima pace.  
 Gallia bellorum sæuis concussa procellis,  
 Horrida sanguinei deponit fulmina Martis.  
 Et tandem sapiens, Scotiae vicinia facta,  
 Optatae cepit paci summittere fasces,  
 Aurea supremo veniens concordia cælo.  
 Salve dux nostris o præstantissima rebus,  
 O salve niueis pax formosissima pennis,  
 Grata deo, iucunda viris, terręque marique,  
 Tempestiua, tuos quæ fundis ad omnia fructus.  
 Obsita funestis bellorum nubibus omnis  
 Anglia, perplexis fuerat depressa tenebris.  
 Hinc Scotus insiluit, tacit illinc fulmina Gallus,

Mania

Mœnia bombardis quatiens amissa cruentis.  
 Sed tamen & bello fœlix, & pace beata,  
 Viribus vsa suis, se nobilis Anglia texit.  
 Gallia pone minas, communia fœdera iunge,  
 Vicinusq; Scotas, vicinos diligat Anglos.  
 Pande sinus, reseraq; tuos, pax gemmea, vultus,  
 Virtutis custos, & religionis alumna.  
 O deus, o veræ pacis venerabilis author,  
 Cuius ab æterno concordia numine fluxit,  
 Fac maneat stabilis, fac robur tempore sumat,  
 Quæ venit ad nostram pax diuinissima gentem.  
 O deus, asserua regem, regisq; senatum,  
 Et fac perpetuos conclusæ pacis alumnos.

## PERPETVA EST MUTATIO TVM

animi tum corporis.

L'ubricus incertis iactatur motibus orbis,  
 Posteriora novos apportant tempora casus.  
 Ipse homo, diuinum, solers, ratione refertum  
 Est animal, partes & circumspêctat in omnes.  
 Sydereis mens lapsa polis, est numine plena.  
 Iungitur humorum concordî semine corpus,  
 Ordine membrorum præstans, formæq; decor.

Tempora



Tempora sed tacitis præterlabentia pennis.  
 Forma ruit, vires languent, artusq; fatiscunt.  
 Sanguine miscetur bilis, bilisq; cruore.  
 Frigida viscosam fundit pituita salivam.  
 Liuida tum febris, gregibus comitata dolorum,  
 Æstibus interdum flagrans, modò frigore torpens,  
 Agmina succedunt morborum multa novorum,  
 Hæc caput infestant, & tentant sæua cerebrum,  
 In manibus quædam volitant, in poplite quædam  
 Confidunt, omnes in partes corpora versant.  
 Hæc iugulis hærent, hæc vsq; ad pectora manant.  
 Dura fames ventrem premit, & sitis arida guttur  
 Urit, & in tacitos labuntur lumina somnos.  
 Succedunt operæ somno, curæq; quieti,  
 Tristia iucundis miscentur, prospera duris,  
 Atq; adeo totum nihil est in corpore firmum.  
 Mens, magis ipsa sibi dissentit, concipit audax  
 Vota, per ancipites fertur non territa casus.  
 Cum timet, exiguos pæuet exanimata susurros.  
 Nunc amat, ac orbem totum postponit amori,  
 Orat, & oratur rursus, terretq; timetq;  
 Cogitat, & meminit, quæ sunt præsentia curat,

Præ-

*Præteritos voluit casus, voluitq̃ futuros.  
Ergò deus mentes nobis, & corpora iunxit,  
Per quæ continui fluxus, motusq̃ peragrant.*

QVÆ FIERI NON POSSVNT,  
ne concupiscas.

*QVi vult esse miser suapte spontè,  
Hunc verè miserum licet vocare,  
Ergò, qui sibi multa concupiscunt,  
Quæ nulla ratione comparari  
Possunt, hos miseros licet vocare.  
Nam sunt hi miseri suapte spontè.*

TE IPSVM NE NEGLIGAS.

*MUlta quidem multis tribuamus, at omnia nobis,  
Ille sapit verè, qui sapit ipse sibi.  
Propria natura quæ sunt, sint propria fructu,  
Sitq̃ tibi semper maxima cura tui.*

TALIS FIT QVISQVE, QVALES  
ij sunt, quibuscum vivit.

*SI cum bonis vivunt viri,  
Qui nec boni sunt, nec mali,  
Ii sunt citò boni viri.*

*Si cum malis viuunt viri,  
Qui nec boni sunt, nec mali,  
Ii sunt citò mali viri.*

*Si cum bonis viuunt boni,  
Vtriq̃ sunt optimi.*

*Si cum malis viuunt mali,  
Vtriq̃ sunt pessimi.*

*Sic & boni faciunt bonos,  
Sic & mali faciunt malos.*

*Ergo bonus si vis fieri,  
Cum his viuito, qui sunt boni.  
Rursus malus si vis fieri,  
Cum his viuito, qui sunt mali.*

COGIMVR AD SVSCIPIENDVM

Pub. munera.

*EST homini cognatus homo, mens omnibus vna,  
Dispar doctrinis, discendi munere par est.  
Corpora corporibus respondent, sensus eadem  
Itq̃ reditq̃ via, simili sunt ordine membra.  
Nec magis ipsa sibi similis res vlla videtur,  
Quam similes natura viros, facit omnibus omnes.  
Quos igitur iunxit, naturæ prouida cura,*

*Fœdere*



*Fœdere perpetuo iungat sententia concors.*  
*Nemo suum quærat, nec enim sibi nascitur ullus,*  
*Commoda communi tractemus publica mente.*  
*Ponderibus librata suis, & robore florens,*  
*Priuatís certos fundit respublica fructus.*  
*Saucia cum fractas perdit respublica vires,*  
*Singula cum toto labuntur corpore membra.*  
*Providet, has vitans plagas, sapientia iuris,*  
*Ut qua quisq̃ potest communia munera parte*  
*Suscipiat, nec ab his vlla se segreget arte.*  
*Prætor enim iussus, vel consul Titius esse,*  
*Vel iudex, frustra de se depellit honorem.*

## AD ELISABETHAM PRINCIPEM.

*FOelix rege parente virgo, fœlix,*  
*Fœlix principe fratre virgo, fœlix,*  
*Fœlix & Maria tua sorore,*  
*Fœlix relligione puriore.*  
*Fœlix moribus, innocentiaq̃,*  
*Fœlix corpore, mente virgo fœlix.*  
*Fœlix Elisabetha quæ fuisti,*  
*Fœlix sis sene patre rege posthac,*

*Fœlix principe fratre grandiore,  
 Fœlix coniuge sis tuo futuro,  
 Fœlix prole, scientiaq̃ fœlix,  
 Fœlix corpore cresce, mente cresce,  
 Fœlix Elisabetha sic maneto.*

AD SVFFOLCIENSEM DUCEM.

*C*orpore non possum, sed possum mente venire,  
 Qualicet, hac venio, dux venerande, via.  
*O*mnibus in rebus me pressit morbus acerbè,  
 Sed tamen in vobis durior ille fuit.  
*N*am neq̃, cum vellem, poterat me frater habere  
 Carolus, ingenio clarus, & arte, puer,  
*N*ec te nunc præsens præsentem cernere possum,  
 Cuius inest formæ, forma decora patris.  
*E*xulat ex oculis etiam, lectissima mater,  
 Fœmina doctrinæ vera figura piæ.  
*F*erreus ô morbus, qui tot mihi commoda tollit,  
 Omnibus officijs qui mihi claudit iter.  
*O*pto tamen vobis, & matri cuncta secunda,  
 Et maneat vestrum, me pereunte, decus.  
*I*modò charta, meæ fidissima nuncia mentis,  
 Corporis & causam fac sapienter agas.

## IN MARCVM TVLLIVM

Ciceronem.

O Decus, ô splendens. Romanæ gloria gentis,  
 Virtutis specimen, vitæ præceptor honestæ.  
 O Cicero doctos inter doctissimus omnes,  
 Cur tua, temporibus nostris, non iuncta fuerunt?  
 Cur tua non licuit præsentis ora videre  
 Præsentis? cur non tecum nos viximus vnâ?  
 Cur tua verba deus sacrum non vertit ad vsum?  
 Cur tua non venit seruator Christus in ora?  
 O quantum nostram iuuisses religionem?  
 Gloria quanta deo, per te, quæsita fuisset?  
 Viuere dignus eras, nostris, ô Marce, diebus,  
 Digna fuit rebus summis facundia summa.  
 Sed quoniam deus, hoc nunc sic effecit vt esset,  
 Quod domino placuit, nobis placet, ergò valeto.

## IN EVNDEM.

VIS eloquentiam tibi?  
 An vis sapientiam dari?  
 Utramq; Tullius tibi,  
 Solus dabit facillimè.



**Q** VI simul prudens velit, & disertus  
 Esse, præsentis peragret libellos.  
 Sic enim prudens, simul & disertus,  
 Efficietur.

AD NOBILEM QVENDAM PVERVM.

**A**Ccepi paruum, tibi paruum mitto libellum,  
 Utq; tuus nouus est, sic tibi mitto nouum.  
 Das mihi Germanum, Germanum reddo vicissim,  
 Ut tuus est varius, sic etiam meus est.  
 Non dubito magnum studiū quin paruus haberet  
 Hæssus, item Charion plenus amore venit.  
 Fælicem fælix annum iubet esse pœta,  
 Historiæ Charion imperat author idem.  
 Ergo liber libro respondet, vota q; votis  
 Conueniunt, annus par sit utriq; nouus.  
 Sic ego præclarus prodibo repente pœta,  
 Sic & in historia, te licet esse ducem.  
 Cresce puer, versa q; manu virtutis auxilæ  
 Maxima, quæ præsens dat, monumenta, liber.  
 Nam Charion patrios repræsentatq; labores,  
 Maioremq; tuo te docet esse patre.

De

M<sup>U</sup>sicen primū docuit voluptas,  
Musices auxit studium voluptas,  
Musices vsū retinet voluptas,  
Gaudia fundens.

Musicen lusit placidus Cupido,  
Musicen lusit Cytherea mollis,  
Musicen lusit cithara suavi  
Clarus Apollo.

Musice mentes tenuit virorum,  
Musice sensus tenuit ferarum,  
Musice montes, & aquas, & ornos  
Sede remouit.

Musice summis dominatur astris,  
Musice terræ dominatur imæ,  
Musice ponto dominatur alto,  
Cuncta pererrans.

Musice mentis medicina mæstæ,  
Musice multum minuit malorum,  
Musice magnis, medijs, minutis  
Maxima mittit.

Uxor

## VXOR NON EST DUCENDA.

Omnis ætatis comitem proteruam,  
 Omnium morum sociam dolosam,  
 Omnium rerum dominam superbam  
 Sumere durum est.

Quæ tuum secum cupiat dolorem,  
 Quæ tuas risu lachrymas sugillet,  
 Quæ minas, fletus, & acerba tecum  
 Iurgia tractet.

Quæ tuam pœnam redimat salutis  
 Proprie lucro, pariatq; prolem,  
 Quæ patris falso titulum sonabit  
 Ore, molestum.

Quæ tuas iras, strepitus inanes,  
 Quæ tuas voces, sine mente verba,  
 Quæ tuos lusus, aconita dira  
 Credere possit.

Quæ tuas muris putet esse vires,  
 Quæ tuos corui putet esse cantus,  
 Quæ tuas musas putet esse agrestis  
 Carmina Fauni.

Quæ



## VXOR EST DUCENDA

O Mnis ætatis comitem perennem,  
 Omnium morum similem sodalem,  
 Omnium rerum dominam fidelem

Sumere suaue est.

Quæ tuum tecum doleat dolorem,  
 Quæ suas tecum lachrymas profundat,  
 Quæ iocos, risus, & amœna tecum

Gaudia tractet.

Quæ tuum vultum redimat salutis  
 Propriæ damno, parietq; prolem,  
 Quæ patris nomen tenero sonabit

Ore, iucundum.

Quæ tuas iras, Iouis esse fulmen,  
 Quæ tuas voces, Iouis esse nutus,  
 Quæ tuos lusos, Iouis esse nectar

Credere possit.

Quæ tuas Martis putet esse vires,  
 Quæ tuos Phœbi putet esse cantus,  
 Quæ tuas musas putet esse sacras

Palladis artes.

K.I.

Quæ

Quæ tuam linguam putet esse rana,  
 Quæ tuas vrsi putet esse carnes,  
 Quæ tuum scrophæ timidæ pedorem  
 Iudicet esse.

Quæ tibi charos Stygia palude,  
 Quæ tuos fructus Acheronte nigro,  
 Quæ tuam vitam magis expauescat  
 Manibus ipsis.

Uxor temporibus, moribus, & locis,  
 Naturam variè distribuit suam,  
 Nunquam prospiciens coniugis vsibus.  
 Ergo si tibi vis omnia progredi,  
 Vitæ perpetuo fac careas malo.

## PRÆCEPTA CONIVGII.

## MARITI POSTVLATA

Vxor, si cupias mihi placere,  
 Semper prima dei, secunda nostri,  
 Tum sit tertia cura liberorum.  
 Aedes fac sine sordibus nitere.  
 Mensæ prospice, prouide puellis.  
 Vultu sis hilari, tamen modesto.  
 Mores sint faciles, tamen pudici.

Vestis

Quæ tuam linguam putet *Hermis ora*,  
 Quæ tuam formam *Veneris figuram*,  
 Quæ tuum sacræ *Triuiæ pudorem*  
*Iudicet esse.*

Quæ tuos hostes *Stygia palude*,  
 Quæ tuas clades *Acheronte nigro*,  
 Quæ tuum funus magis *expauescat*  
*Manibus ipsis.*

*Uxor temporibus, moribus, & locis,*  
*Naturam variè distribuit suam,*  
*Semper prospiciens coniugis vsibus.*  
*Ergo si tibi vis omnia progredi,*  
*Vitæ perpetuo ne careas bono.*

## PRÆCEPTA CONIVGII.

## VXORIS RESPONSA.

**M**I vir, si mihi charus esse curas :  
*Me solum colito quasi teipsum.*  
*Sic tu proximus es deo futurus,*  
*Sic nostros ego liberos fovebo.*  
*Fac ut tuta domus sit, & salubris.*  
*Nec defint ea, quæ requirit vsus.*  
*Exercere tuos stude ministros.*



*Vestis sobria sit, vacetq; labe.  
Cum latus fuero, dolere noli,  
Nec cum tristis ero, decet iocari.  
Et quemcunq; vides mihi placere,  
Fac hunc esse tibi putes amicum.  
Quicquid dixerò, ne palam refelle.  
Clam, quod displicet, admonere debes.  
Arcanum tibi si reuelo, cæla.  
Nec te suspicio sinistra vexet.  
Si te læsero, vulnus indicabis.  
Me si commoueas, fatere crimen.  
In lectum veniat nihil querelæ.  
Somnus sit modicus. Precare manè.  
Cum surrexeris, occupata viue.  
Non credes nimium, parum loquere.  
Nec coram tibi disputare fas est.  
Responsare caue, caueq; murmur.  
Te coniunge bonis, malos relinque.  
Sit vitæ probitas, fidesq; linguæ.  
Morum deniq; sit pudor magister.  
Hæc si feceris, in sinu iacebis.*

Sit comis tibi vox, sit os serenum.  
Si vis temporibus tuis ut utar :  
Et tu tempora nostra scire debes.  
Quantum vis tribui tuis amicis,  
Tantum fac tribuas meis amicis.  
Seruis iurgia dura fac reserues :  
Et me leniter admoneto solam.  
Mecum liberius licet iocari,  
Nec me reijcies nimis seuerè,  
Tecum lætior esse, si requiram.  
Et me non satis est tibi placere,  
Sed sciri volo te bonum maritum.  
Me si non sinis esse suspicacem :  
Causam suspicionis amoueto.  
Quantumcunq̃ dies tulit laborum,  
Nox secum placidam ferat quietem.  
Non absis temerè domo, diuue.  
Quicquid pollicitus procus fuisti,  
Nunc præstare maritus id memento.  
Si me Penelopen habere speras,  
Fac ut te mihi præbeas Ulysses.

## EX ANGLICO IN LATINVM.

*S*Obria virgo, sibi quæ vultu menteq; constat,  
*E*t Iuuenis frugi, veneris naufragia vitans,  
*F*idus, & aduertens coniunx, non pessima credens,  
*E*t mulier prudens, tractabilis, atq; pudica:  
*Q*uatuor hæc quærunt omnes, vix reperit ullus.  
*M*axima sic nostræ bona sunt rarissima vitæ.

## IN REBELLES NORFOLCIENSES.

*O*Ccasura tuo, *N*orfolcia cæca, furore,  
 Quæ rabies humeris induit arma tuis?  
*I*mpetus à solita quis torfit corda quiete?  
 Quis grauis astringit pectora dura stupor?  
*A*n quia vicinos fregit vis vestra colonos,  
 Sparsaq; sunt subitis oppida pauca minis?  
*A*ngulus an vnus quia tecum fœdera iunxit,  
 Venit & ad prædas nuda caterua nouas?  
*P*ropterea latè regni volitare per oras,  
 Ausa es, & in summo celsa sedere loco?  
*A*n, quia digna tuo tardabat crimine pœna,  
 Distulit & clemens iusta flagella deus?

Idcirco



Idcirco dormire deum, regemq̃ putabas ?  
Et quia sera forent verbera, nulla fore ?  
Desine vana tuis promittere gaudia rebus,  
Numinis irati fulmina celsa time.  
Horrisono venit tempestas magna tumultu,  
Incidit in vestrum plaga cruenta solum.  
Fervidus irarum tristes effudit habenas,  
Quaq̃ venit, latè funera mœsta facit,  
Ille Comes, ille, ille Comes Dudleius heros,  
Et Varuicensis gloria summa soli.  
Hunc præclara cohors animis insignis, & armis  
Insequitur, ducibus subdita quæq̃ suis.  
Quid faciat miserum vulgus ? quò terga reflectat ?  
Nunc via prostratis nulla salutis erit.  
Latebra non abdet montis, non sylva recondet,  
Vndiq̃ te vindex implicat ira dei.  
Pone animos vulgus miserandum, tendito palmas,  
Sæpè truces frangunt lenia verba minas.  
Proijce ferratos fustes, adrepito supplex,  
Vis eat, & virtus barbara corda domet.  
Sit licet horribilis vestri violentia motus,  
Fortè ducis nostri gratia maior erit.

Gratia

Gratia fortassis, quantumvis maxima, vincet  
 Crimina, si veniam, quo decet ore, petas.  
 Spiritus ille ferox, & ad omnia iura rebellis;  
 Vultibus ex vestris pectoribusq; migret.  
 Discite tranquillam pacem, dediscite bellum,  
 Discite plebs, plebem quo decet esse loco.  
 Tu verò regni, rex inuictissime, nostri,  
 Tuq; simul summi, turba beata, ducis:  
 Patria læta sinus pandens vos excipit omnes,  
 A quibus est patriæ publica parta quies.

## AD PURIVM.

Armen tibi fœlix fluit,  
 Annus tibi fœlix fluat.

Annus novus si sit tibi  
 Fœlix, mihi fœlix erit.

Artes putas veras opes,  
 Ego dabo veras opes.

Artes enim dabo tibi.

Purum tibi puro, Puri,

Librum dabo multiplici

Scientia præstabilem.

Tantum stude quantum potes,

Tantum

*Tantum potes quantum velis.*

*Sic, mi Puri, felix eris,*

*Et sic ego felix ero.*

*Quia tuos fructus meos*

*Puto futuros, mi Puri.*

AD N. I.

*Munera si faustos annos transmittere possunt,*

*Et venit ex paruo gratia tanta loco:*

*Munera muneribus coniungat amicus amicis,*

*Sic ibit felix annus utriq; novus.*

AD I. N.

*Auspicium felix, venturi mittimus anni,*

*Auspicium, solo quod valet auspicio.*

*Exiguum pretio, sed votis dives habebis*

*Auspicium, solo quod valet auspicio.*

AD BRVDNELLVM.

*Fertilibus felix agris, opibusq; beatus,*

*Felici felix coniuge, prole, domo,*

*Et studijs felix, quæ dat tibi musa prophana,*

*Et studijs, affert quæ sacra musa tibi,*

*Præteritis felix annis, Brudnelle, recente*

*Sis felix anno, quem vebit ista dies.*

L.I.

Ad



**V**ix caput attollens è lecto scribere carmen,  
Qui velit, is voluit scribere plura, vale.

RESP. D. COXI AD HADDONVM.

**T**emagis optarem saluum, sine carmine fili,  
Quàm sine te saluo, carmina multa, vale.

IN ANGLICAM DIALECTICAM

Thomæ Wilsoni.

**G**rammaticæ lingua nos est affata Britanna,  
Curreret ut latij lingua Britanna rotis.

**N**unc Logice venit, & nostris se vocibus affert,  
Ut ratio nostros possit habere sonos.

**A**nte peregrinis linguis instructa fuisti  
Anglia, nunc propria discere voce potes.

**G**rammaticen laudant omnes, quia verba poliuunt:  
Qualis erit Logice nos ratione regens?

**A**ttulit hanc nostras Thomas Wilsonus ad aures,  
Utilis & patriæ sic fuit ille suæ.

IN ANGLICAM RHETORICAM

eiusdem Thomæ Wilsoni.

**R**hetorice, Logice soror est affata sororem,  
Quem didicit nuper, sermo Britannus erat.

Rhetorice

Rhetorice tacuit, magna perculsa dolore :  
 Nam non dum nostro nouerat ore loqui.  
 Audiit hæc, Logices Wilsonus fortè magister  
 Qui fuerat, nostros addideratq̃ sonos.  
 Rhetorice mutam, verbis solatus amicis,  
 Seuocat, & rogitat num esse Britanna velit ?  
 Deiciens oculos respondit velle libenter :  
 Sed se, qua possit, non reperire, via.  
 Ipse vias, inquit, tradam, legesq̃ loquendi,  
 Quomodo perfectè verba Britanna loces.  
 Liberat ille fidem, nostro sermone politur  
 Rhetorice, nostra est utraq̃ facta soror.  
 Anglia, nobilium si charus sermo sororum  
 Est tibi, sermonis charus & author erit.

IN LIBRVM PARTITIONVM  
 sagittariorum Rogeri Aschami.

Mittere qui celeres summa velit arte sagittas,  
 Ars erit ex isto summa profecta libro.  
 Quicquid habent arcus rigidi, neruiq̃ rotundi,  
 Sumere si libet, hoc sumere fonte licet.  
 Aschamus est author, magnum quem fecit Apollo  
 Arte sua, magnum Pallas & arte sua.

*Docta manus dedit hūc, dedit hūc mens docta libellū:  
 Quæ videt ars, vsus visa parata facit.  
 Optimus hæc author quia tradidit optima scripta,  
 Conuenit hæc nobis optima velle sequi.*

IN LIBRVM ALCHYMIE THOME  
 Nortoni Bristolienfis.

*Maximus ingenio, scribendi maximus arte  
 Thomas Nortonus, primarum semina rerum,  
 Atq; metallorum venas tellure sepultas  
 Eruit, ac imæ subit intima viscera terræ.  
 Mellea secretos promit facundia sensus,  
 Atq; vias omnes cudendi colligit auri.  
 Ars licet hæc, auri fontes opulenta recludat,  
 Attamen est auro longè pretiosior author.*

IN NVPTIAS RODOLPHI ROV-  
 leti, & Thomæ Hobæi, qui duas D. Antonij  
 Coci filias, duxere vxores eodem die,

*Margaritam Roulete tuam fac mente recondas,  
 Gemma sit vt tuto tam pretiosa loco.  
 Sit frater fratri similis, sit filia patri,  
 Sic vir erit dignus coniuge, sponsa viro.*

*Virtute*



## VIRTUTE NON VI.

*Vis trahit inuitos, virtus facit esse volentes,  
 Vis furit, at virtus cum ratione mouet.  
 Corpore vis regnat, virtus in mente triumphat,  
 Vis pecudes, virtus nos facit esse viros.  
 Vis igitur valeat, virtus super omnia vincat,  
 Aut vis virtutem, serua sequatur heram.*

## HOMINVM ETATES.

*IN cunis infans sine sensu, & mente recumbit,  
 Inde puer lenitate sua bona tempora perdens,  
 Post adolescentis temeraria cernitur ætas,  
 Et ruit in luxum iuuenis, vir captat honores,  
 Quærit opes senior, magnos & cogit acervos.  
 Vulnera naturæ sunt hæc inimica nouercæ.*

PRECATIO AD TEMPORA IL-  
 lustrissimæ reginæ Mariæ accommodata.

*AN glia, sæpè tuis diuina potentia rebus  
 Adfuit, & sæuis te tempestatibus actam,  
 Impulit in portum saluam, terraq; locauit.  
 Ista tamen postrema dei clementia, miris  
 Luminibus fulsit, radijsq; illustribus arsit.*

*Ambitione volans, cæcâq; cupidine regni,  
 Exacuit ferrum nimis immoderata potestas.  
 In tenebris miseri iacuerunt obruta regni  
 Sceptra, ruit vario discordia mista tumultu.  
 Ipse sibi dispar secum pugnare senatus,  
 Frendere nobilitas, incerto murmure ferri  
 Vulgus, & ancipites turbarum voluere fluctus.  
 Cum ratione furor pugnat, cum iure libido,  
 Vis trahit inuitos, armis terretur honestas,  
 Officium pavor, & verum violentia frangit.  
 O tenebras regni spissas, ô tempora dura,  
 Turbine quis tanto raptatos colliget artus  
 Anglia? quis laceris corpus componere membris,  
 Quis solitum poterit representare decorem?  
 Tu deus, æterno qui dirigis omnia cursu,  
 Cuius inexhaustis manat clementia riuis.  
 Tu deus è cælo spectans, nostriq; misertus,  
 Aspera magnorum tollis tormenta malorum.  
 Classica ciuile belli tu concita frangis,  
 Tu reuocas lætam pacem, tu pectora sedas  
 Turbida, discordes animos tu fœdere iungis.  
 Fœmina virgo venit, descendeus stemmate regum,  
 Fœmina*

Fœmina virgo venit, Mariæ prænomine digna.  
Salve flos regni, salve lectissima gemma,  
Salve de cœlo lapsum venerabile sydus.  
Optima sis nobis, & foelicissima princeps,  
Auxilium fractis fer mansuetissima rebus.  
Fratris ut es regni, sic sis pietatis & hæres.  
Iustitiam serua, demissis parce, superbos  
Contere, virtuti sit bonos, doctrina colatur.  
Fac tueare bonos, nec falsa calumnia quenquam  
Opprimat, ipsa tuos & ames, & ameris ab illis.  
Rex tibi frater erat, mors illum funere merfit,  
Morte cades regina soror, mortalia durant  
Nulla diu, proprio se carpit tempore vita.  
Hanc supreme deus, regno qui ponis auito,  
Anglia cui fasces summittit læta supremos,  
Imbue diuino sanctissima pectora succo,  
Semper ut ad cœlos sursum sua lumina tollat.  
Vinciat & pietas, communis & alliget ardor  
Mutuus in Christo, studijs consentiat omnis  
Nobilitas rectis, populus tractabilis artes  
Suscipiat pacis, regniq; statuta sequatur.  
Aurea perpetuis omnes concordia vinclis

Nectat,



*Nec lat, ut ad patrem communem supplice voce,  
Iunctorum fratrum communia vota ferantur.*

CARMEN CONSOLATORIVM IN  
rebus afflictis S. Principis Elisabethæ.

*Est deus, estq̃ deo certissima cura suorum,  
Semper habent iustæ pondera magna preces.  
Sæpè suum differt diuina potentia numen,  
Crescat ut in tardo tempore prompta fides.  
Sæpè deus cessat, sed tandem surgit, & audit,  
Corporis & curat saucia membra sui.  
Obsidio miseros Iudæos dura premebat,  
Atq̃ suo caruit iusta querela deo.  
Ingreditur tandem votis, & vindice dextra  
Iudith, Olopherni demit, & ense, caput.  
Sæpè Susanna manus supplex tendebat ad astra,  
Sed medicina tamen nulla doloris erat.  
Truditur ad mortem stupri damnata cruentam,  
In media Daniel morte patronus ades.  
Elisabetha parens Baptistæ, mater ut esset,  
Sæpè precata fuit, sæpè repulsa fuit.  
Distulit in longum tempus diuina potestas  
Vota, sed est tandem, reddita mater, anus.*

*Elisa-*

*Elisabetha diu multorum mole malorum*  
*Obruta, sæpè pio voluis in ore preces.*  
*Sæpè deo tristes casus, & acerba dolorum*  
*Vulnera proponis, sæpè requiris opem.*  
*Non venit ad votum subito: tibi crescat ut ardor*  
*Mentis, & in cælo discat habere locum.*  
*Distulit auxilium, sed tandem numine pleno*  
*Spiritus adueniens, pectora mœsta leuat.*  
*Spiritus ille leuat, qui Christi membra beati,*  
*Multa premi patitur, nulla perire sinit.*  
*Fide deo, succurre bonis, reuerere sororem:*  
*Sic tibi perpetuus cursus honoris erit.*  
*Elisabetha vale, Christo gratissima virgo,*  
*Chara pijs princeps, Elisabetha vale.*

IN QVANDAM NOBILEM FOEMINAM.

*Est Venus in vultu, docto tibi Pallas in ore*  
*Præsidet, ad digitos clarus Apollo venit,*  
*Mercurius linguam moderatur, Cynthia mores,*  
*O dea digna deo, digna q̃ Iuno Ioue.*

IN EANDEM.

*Si maneas virgo, liber est te virgine dignus,*  
*Si fueris coniux, coniuge dignus erit.*

M. I.

Si

*Si tua te viduam fors tristis fecerit esse,  
 Aptus erit viduæ tum liber iste tibi.  
 Sic quæcunq; tibi fuerit fortuna parata,  
 Conueniens omni parte libellus erit.*

## IN MORTEM THOMÆ

Withedi Stochienfis.

*IN cineres tandem Thomas Withedus abiuit,  
 Finijt & vitæ tempora longa suæ.  
 Vixerat ille diu, sed semper viuere dignus,  
 Si quisquam semper viuere dignus erat.  
 Sed quia non potuit, mortali mole grauatus,  
 Corpore deposito, viuere mente parat.  
 Vita diu præsens fecit te viuere Thoma,  
 Mors veniens semper viuere posse facit.*

## IN OBITVM D. MARTINI BVGERI.

*Germanis ô flende tuis, ô flende Britannis,  
 Omnibus ô terris flende Bucere iaces.  
 Te schola nostra suum desyderat orba magistrum,  
 O schola sublato debilitata duce.  
 Membra quidem Christi sunt nobis multa relictæ,  
 Sed caput his membris quod fuit, illud abest.*

Et



Et caput excellens, quo toto doctius orbe  
 Non fuit, & non est, nec fore, credo, potest.  
 Vita fuit similis doctrinae, sancta probata,  
 Vtraq; laus illi propria semper erat.  
 Summe deus, lucem nostris infunde tenebris,  
 Pectora scripturis, imbue caeca sacris.  
 Qui fuit & tuus, & noster, nunc desijt esse  
 Noster, & in caeli parte Bucerus inest.  
 O Martine vale, Christi praeclare minister,  
 O Cantabrigiae gemma, Bucere, vale.  
 Est tua conditio foelix, qui facibus aegri  
 Corporis abiectis, gaudia mentis habes.  
 Nos miseri, nostro qui te pastore remoto,  
 Ibimus incertis inscia turba vijs.  
 Tu deus, o nostri communis pastor ouilis,  
 Martino similem praefice, quaeso, virum.  
 Sic simul in caelo ciuis potes esse Bucere,  
 Et simul in terris esse Bucere potes.

IN OBITVM SVFFOLCIENSIVM  
 fratrum, ducum illustrissimorum.

NObile par fratrum, matris dulcissima cura,  
 Hinc ruit Henricus, Carolus inde ruit.

M.2.

Quid

Quid faciat mater, si non deus esset in illa?  
 Clamet, & abijciat se, cupiatq; mori.  
 Quid facit, ut nunc est? Christum patienter adorat,  
 Et benè cum Christo pignora iuncta putat.  
 Viue diu foelix, longa dignissima vita,  
 Cuius inauditum gratia robur habet.  
 Antea iure tuis gnatis, es dicta beata,  
 Maius in illorum funere nomen erit.  
 Gloria viuorum, præsens gloria mundi  
 Et fuit, & mundi casibus apta fuit.  
 Sed quòd in illorum veneraris funere Christum,  
 Hæc tibi de cælo gloria missa venit.  
 Vos etiam dulces pueri, dum mundus habebat,  
 Arbitrio mundus voluerat ipse suo.  
 Nunc simul in gremio patris recubatis Abrami,  
 Qui locus æterna vos requiete beat.  
 Ergo vale vita foelix, & funere foelix,  
 Atq; pia proles matre beata, vale.

IN EOSDEM.

ET viuos colui meos alumnos,  
 Et nunc prædico mortuos alumnos.

Vos

Vos dulces pueri, valere vester  
Haddonus iubet, vt potest iubere.  
Feci, quæ potui, licere plura  
Vellem, plura libenter exhiberem.  
En, charis mihi charior puellis  
Excellens Catarina, viue fœlix.  
Et quos non poterant habere gnati,  
Hos annos tribuat deus parenti.  
Hoc debet pietas tibi precari,  
Doctrinam decet hoc & apprecari.  
Nam communis es utriusq; mater.

## AD ANGLOS VT RESIPISCANT.

Anglia, cur saccos differs, cineresq; recusas?  
Anglia, terribili fulmine tacta dei.  
Forsitan expectas Ionam, iam venit, & aures  
Verberat, & sacro detonatore minas.  
Sed tibi non profunt oracula sancta prophetae,  
Ludis, & in luxu tempus abire sinis.  
Insequitur Ionam iusto deus ipse furore,  
Spargit & horribili tela cruenta manu.  
Tu tamen in crapula stertis, scelerumq; sepulchro,  
Et nimis infœlix euigilare nequis.



Cum populi rabies fodit tua viscera ferro,  
Principis & fregit iussa verenda sui,  
Cum tibi de toto manavit corpore sanguis,  
Et proprijs fluxit viribus ille cruor:  
An tibi de cælo non visa est virga venire,  
Ferreæ, supplicio quæ fera còrda domet?  
Sed tibi dura manent, & pectora plena malorum,  
Oblinis & vitijs te scelerata novis.  
Indè venit miseranda fames, & turpis egestas,  
Altera contempti virga tremenda dei.  
Negligis, & rides, totoq; ex orbe rapinas  
Colligis, & partas ebria fundis opes.  
Colligis, & quæris, quæ post malè perdere possis,  
Luxus auaritiæ est duxq;, comesq;, tuæ.  
Quò ruis ob demens, mundi ludibria captans?  
Cur fugienda petis? cur cupienda fugis?  
Imminet iratus duris cervicibus ultor,  
Librat & in cladem spicula prompta tuam.  
Pestifer obuolitat sudor, subitoq; peragrat  
Corpora, lethali pectora tabe terens.  
Et prius obrepit, quàm præsentiscere possis,  
Et prius extinguit, quàm tua damna vides.

*Sed*

*Sed tamen est summi clementia maxima patris,  
Fumigat, at flammæ non sinit ire faces.  
Anglia tolle caput, funestas cerne ruinas,  
Ad dominum tandem respice cæca tuum.  
Est pater, est dominus, pater est, si diligis illum,  
Neglige, tum domini te grauis ira premet.  
Ter deus è cælo tonuit, ter fulmina tor sit,  
Ne sine supplicio, te sinat esse malam.  
Ter deus intentos posuit lenissimus arcus,  
Ut, monitam pœna, te sinat esse bonam.  
Anglia fac vigiles, hæc ultima tempora vitæ  
Sunt data, vel melior, vel fore nulla potes.  
Si melior fueris, decedent undiq̃ nubes,  
Atq̃ dabit lucem lux tibi vera nouam.  
Sed tua peccatis si pectora stricta tenentur,  
Miles eris Sathanae, mors tibi finis erit.  
Mors animæ sequitur, peccati debita merces,  
Exitus undè tibi nullus adesse potest.  
O deus, humani generis, mundi, monarcha,  
Cuius in imperio condita regna latent,  
Parce tuo regno, quod si non ipse gubernes,  
Dextera deiectum nulla leuare potest.*

Tu

*Tu deus es noster, vitæ morumq̃ magister,  
 Tu pia virtutis semina solus habes.  
 Tu nisi custodis vrbes, nisi mœnia seruas,  
 Utilitas nostri nulla laboris erit.  
 Anglia de sacris scripturæ fontibus hausit,  
 Integra sermoni vita sit apta sacro.  
 Abfuit hæc, & abest, hæc te reuocante redibit,  
 Hanc nisi tu dederis, reddere nemo potest.  
 Sed dabis hanc nobis, & tum reuirescere nostra,  
 Instaurata tua, corda videbis ope.  
 Anglia tunc hymnos supplex, & carmina fundet,  
 Atq̃ tuum vero nomen honore colet.  
 Anglia regnorum princeps, reginaq̃ mundi  
 Tunc erit, & domino grata ministra suo.*

IN DOMINVM IOHANNEM

Clerum, Equitem.

*CLarus Ioannes, gentili nomine Clerus,  
 Ex varia belli laude citatus eques,  
 Ad mare descendit præfectus classis, & hostes  
 Persequitur Gallos, vrit & igne rates.  
 Indè alios vicit ponto congressus aperto,  
 Atq̃ freta tutam fecerat esse viam.*

*Sed*



Sed nimis infelix animo maiora volutans,  
In Scotiae portu seq̃, ratesq̃, locat.  
Kirkina iuncta fuit, quò mercatura Scotorum  
Undiq̃ conuebitur, turris & intus erat.  
Irruit hic audax Clerus, biduum q̃ remansit,  
Interea nostris Kirkina præda fuit.  
Clere quid expectas, victor, terraq̃ mariq̃:  
Cur teris hostili tempora longa solo?  
Non semper fortuna fauet, quos sæpè leuauit,  
Obruit, & tandem sæua perire finit.  
Cur nimium speras? non semper dormiet hostis,  
Verus honor, iustum debet habere modum.  
Venit acerba dies, fatalis & imminet hora,  
Iam Scotus armatus rure profectus adest.  
Diffugiunt nostri, desertis undiq̃ signis,  
Clerus & in vacua stat propè solus humo.  
Obsecrat, hortatur, clamat, quò perfide miles,  
Quò ruis? hic Scotus est, huc tua tela volent.  
Patria te reuocat, dux te tuus inioco miles,  
Et tua te prohibet prodere signa fides.  
Dum queritur, frustra vires clamando profundens,  
Et Scotus adueniat tristia fata minans:

*Aduolat ex seruis vnus, prenditq̃ lacertum,*

*Immemoremq̃ sui littus adire monet.*

*Rettulit ille nihil, sed pectora vertere turmas*

*Imperat, hanc vnā rem repetendo petit.*

*Ut vidit certamq̃ fugam, turbasq̃ Scotorum,*

*Quo sua sit, quærit, cymba relicta loco.*

*Subsidium vitæ solum, fortuna remorat,*

*Cymba petita fuit, nulla reperta fuit.*

*Tunc animo magno curis oppressus, & armis,*

*Ingreditur pontum solus, & æquor arat.*

*Voluitur ad cymbam, poteras hîc viuere saluus,*

*Sed tibi successus fors inimica negat.*

*Gravius enim merfos humeros ex æquore tollit,*

*Pondere sed rursus decidit ipse suo.*

*Cæcula demersum tenuerunt æquora Clerum,*

*Nec potuit vitæ post reperire viam.*

*Sed dedit egregium Clero fortuna sepulchrum,*

*Et pia iactari fluctibus ossa vetat.*

*Præsul enim mortis sortem miseratus acerbam,*

*Condidit in sacra nobile corpus humo.*

*Et quoniam corpus patriæ seruiuit honori,*

*Spiritus in cælo stet tuus ante deum.*

## IN MORTEM COMITIS VARVICENSIS.

**C**Larus Ioannes, Dudleia gloria gentis,  
 Quem natura bonum fecit, fortuna beatum,  
 Exijt è vita, primis ereptus in annis.  
 Gratia, nobilitas, vires, prudentia, virtus,  
 Et pudor ingenuus, custosq; modestia morum,  
 Omnibus & comis sese clementia præbens,  
 Lumina viuentis comitis præclara fuerunt.  
 Ergo vale propria fœlix virtute, paterna  
 Infœlix culpa, crudelibus obrute fatis.  
 O iuuenis miserande vale, quem viuere iussit  
 Principis excellens clementia, sæua sed atra  
 Iniecit mors atra manus, & funere merfit.

## IN MORTEM DOMINI

Matrauersi, comitis.

**N**obilis Henricus qui Matrauersius heros,  
 Stirpis Arundelia maiorum nomine prisco,  
 Dictus erat, genus atq; suum de gente traherat  
 Fitzallenorum, comitum virtute potentum,  
 Quem pater excellens florentem viderat armis,  
 Artibus, ingenio, dulci sermone fluentem,  
 Consilio plenum, cuius transcenderrat annos



Ante diem virtus veniens, gravitasq; virilis,  
 Claderuit subita, generosam gloria mentem.  
 Dum subit, & nimium iuuenili pectore feruet.  
 Cæsaris ad fratrem, Maria huic regina Britonum,  
 Legavit, iuuenem clarum, lectissima princeps.  
 Fertur equis, volitansq; via peruenit ad aulam  
 Cæsaris, & summa commissum laude peregit  
 Munus, & ad magnam profluxit gloria famam.  
 Sed venit in medios febris funesta triumphos,  
 Tabificaq; lue teneros depascitur artus.  
 O miserande puer, nimiumq; oblite salutis  
 Ipse tuæ, nimium patriæ memor, atq; parentis,  
 Cur ita festinas? magnum est, moderare laborem.  
 Sic patriæ servire decet, servire frequenter  
 Ut liceat, seroq; tuo succrescere patri.  
 Sed tibi fortè placet vitam pro laude pacisci,  
 Nec metuis mortem, tanto quæ splendet honore.  
 Gloria non poterat certè contingere maior,  
 Si tibi sexcentos donasset Iupiter annos.  
 Primæ causa viæ fuit, & tibi causa laboris,  
 Funeris atq; comes processit Cæsaris aula.  
 Sic, ô sic superi, iuuenis dignissimus astris,

Fælicem

*Fœlicem vitam conclusit morte beata.*  
*Cum Mariæ regnum quarto processerat anno,*  
*Iulius extremam lucem quam mensis habebat,*  
*Illa eadem, claro iuueni, lux ultima fulsit.*  
*Quattuor à lustris vnum si dempseris annum,*  
*Hæc Matrauersi morientis habebitur ætas.*  
*Sic Titus est Cæsar primis ereptus in annis,*  
*Sic puer est princeps Eduardus, morte reuulsus.*  
*Parce pater lachrymis: ô Anglia siste dolorem.*  
*Fata fauent nulli, mors imminet omnibus hostis.*  
*Quod licet, hoc vnum Shelleius ore diserto*  
*Præstitit, ut grato nomen sermone celebret:*  
*Et tuus Haddonus, magnus viuentis amator,*  
*Ista tibi ponit studij monumenta prioris.*  
*Iamq; vale, pubis nostræ lectissima gemma,*  
*Quo post Eduardum maius nil Anglia vidit.*

## IN OBITVM DOMINI IOANNIS

Checi, Equitis.

*Doctrinæ lumen Checus, morumq; magister,*  
*Aurea naturæ fabrica, morte iacet.*  
*Non erat è multis vnus, sed is omnibus vnus*  
*Profuit, & patriæ lux erat ille suæ.*

*Gemma Britanna fuit, tam magnum nulla tulerūt  
Tempora thesaurum, tempora nulla ferent.*

EPITAPHIVM MARIE BACONÆ.

*PRimitias ventris Mariam dedit Anna Baconā,  
Sed venit in Mariæ parua Susanna locum.  
Huc deus adde nouem, decimum tibi sumito partum,  
Sic decimas mater, primitiasq̃ dabit.*

IN OBITVM IACOBI HAD-

*doni, fratris sui.*

*OMnibus in rebus mihi coniunctissime frater,  
Cuius erat vitæ vita medulla meæ,  
Quomodo, quos similis mundi fortuna premebat,  
Nos tua diuersis mors facit ire vijs?  
Terrea me religant constrictum vincula carnis.  
Spiritus & tuus est liber in arce poli.  
Anxia durarum me rerum cura fatigat,  
Nauiat in portu mens tua, iuncta deo.  
Me status excruciat præsens, metus atq̃ futuri,  
Sed tibi parata manet tempus in omne quies.  
O tempestiua felicem morte Iacobum,  
O vtinam fratri iungar & ipse meo.*



## IN EXHVMATIONEM, ET

restitutionem D. Mar-  
tini Bucer.

**E**Rgò tuos cineres effodit dira tyrannis?  
 Credidit & nullos esse Bucere deos?  
**N**on ita, sed deus est summus virtutis amator,  
 Et grauis admissi criminis vltor erit.  
**F**rende Satan, iaculare minas, & concute dentes,  
 Nulla dies Christi lædere membra potest.  
**T**ristia præclari flagrabant busta Bucer,  
 Cum Satan igniuomo sparserat ore faces.  
**S**ed domini clemens extinxit dextera flammæ,  
 Atq̃ nouo cineres fecit honore coli.  
**S**ic pietas tandem victrix super æthera scandit,  
 Subijcit & Christo colla superba Satan.

## EPITAPHIVM LODOVICI

Viuis Valentini.

**V**ixit adhuc Viues, æternum viuere dignus,  
 Nec poterit virtus tam memoranda mori.  
**F**œlices Brugæ, talis quas hospes amauit,  
 Atq̃ solum fœlix, quo pia membra cubant.

Fœlices

*Fœlices illum qui progenuere parentes,  
 Fœlices tantum qui coluere virum.  
 Notior hoc uno est præclara Valentia ciue,  
 Corduba quam Senecis nota duobus erat.  
 Stoica iactabant Seneca ludibria cæci,  
 Omnia sunt Viuis dogmata, plena deo.  
 Doctior aut melior fuerit dubitatur, at illo  
 Doctior aut melior, nemo profectò fuit.  
 Mors saturam studijs vitam matura peremit,  
 Sic mihi, sic claudant fata suprema dies.*

EPITAPHIUM THOMÆ MASONI.

*T* *Homæ Masono dederat natura, decoris  
 Quicquid habet, dederat gratia, quicquid habet.  
 Prouida cura patris claras adiunxerat artes,  
 Atq; peregrino fecerat ore loqui.  
 Flos erat ætatis per tertia lustra pererrans,  
 Cum venit in thalamos, sponsa decora, pares.  
 Undiq; vita fuit rebus cumulata beatis,  
 Absuit à summa prosperitate nihil.  
 Inuida mors plenas lethali frigore palmas  
 Inijcit, & cinis est, qui puer antè fuit.*

*Et*

Et puer eximius, multis dignissimus annis,  
 Aspera si meritis cedere fata velint.  
 Sed via fatorum cursu pocedit eodem,  
 Et sua quemq̃ dies non reuocanda trahit.  
 Concidit beu teneris princeps Eduardus in annis,  
 Nullus erat toto talis in orbe puer.  
 Nobile par fratrum cecidit, Suffolcia proles,  
 Atq̃ dies binos sustulit una duces.  
 Obruit & tristi Matrauersum funere casus,  
 Clarius hoc puero vix tulit vlla dies.  
 Tu Masone pater, doctrina fretus, & vsu,  
 Desine mæsta tuæ vulnera flere domus.  
 Mortuus est Thomas, iuuenili laude refertus,  
 Tollere plus potuit, quàm dare longa dies.  
 Nascendi lex est communis, & est moriendi  
 Lex eadem, tempus ponit vtrumq̃ deus.

## IN OBITVM DOMINÆ

Ianz Somersetensis.

Ingenio præstans, & vultu Iana decoro,  
 Nobilis arte fuit vocis, & arte manus.  
 Hinc Venus, & Pallas certant vtra debet habere,  
 Vult Venus esse suam, Pallas & esse suam.

O.I.

Mors



*Mors fera virgineo figens in pectore telum,  
 Neutrius (inquit) erit, sed mihi præda iacet.  
 Corpore Iana iacet, tellurem terra subibit,  
 Sed pius in cæli spiritus arce sedet.*

IN OBITVM N. POINTZI EQVITIS,  
 ex Anglico clarissimi viri Th. Henneagij.

*P*ER medios mundi strepitus, cæcosq; tumultus,  
 Turbida transégi tempora, Pointzus eques.  
*N*ullus erat terror, qui pectora frangere posset,  
 Mens mea perpetuò quod quereretur, erat.  
*N*unc teneo portum, valeant ludibria mundi,  
 Vita perennis aue, vita caduca vale.

IN OBITVM DOMINÆ ELISABETHÆ,  
 Marchionissæ Northamptoniensis.

*E*Lisabetha fuit naturæ iure Cobama,  
 Coniugis & proprio nomine Parra fuit.  
*F*orma, pudor, pietas, facundæ gratia linguae,  
 Ingenium, virtus, inuiolata fides,  
*C*um gravitate lepos, cum simplicitate venustas,  
 Larga manus, pectus nobile, firmus amor,  
*D*eniq; quicquid habet natura quod addere possit,  
 Addere quod possit, gratia quicquid habet,

*Omnia*

Omnia viuentem Parram comitata fuerunt,  
 Omnia mors atrox obruit ista simul.  
 Obruat ista licet tristi mors sæua sepulchro:  
 Attamen illorum fama superstes erit.

## IPSE DE SE.

Non mihi corpus erat, viuum fuit antè cadauer,  
 Mors veniens, morbi sustulit omne genus.  
 Terra tegit terram, mens summis mentibus hæret,  
 Optima mors, salue, pessima vita, vale.

## ANGLIÆ PROSOPOPOEIA.

Anglia littoribus quamuis inclusa marinis,  
 Non habeo magnos insula parua sinus:  
 Me tamen illustrem maiorum fama meorum  
 Fecit, & vt celebri nomine digna forem.  
 Non ego me iacto, proprias non efferò laudes,  
 Sed mea, quam refero, gloria, numen habet.  
 Terra mihi segetes effundit diuite vena,  
 Pascua præpingui fertilitate tument.  
 In gremio fluuijs riui miscentur amænis,  
 Gurgitibus rapidis & vada pura meant.

*Nobilis antiquo nutat cum robore quercus,  
 Et nemorum grato spirat odore viror.  
 Visceribus medijs errant pretiosa metalla,  
 Diuitiæ crescunt intus, opesq; foris.  
 Maxima diuini sunt hæc monumenta fauoris,  
 Sed bona sunt alijs ista minora bonis.  
 Me deus eripuit terris, cæloq; locauit,  
 Discipulum Christi fecit & esse sui.  
 Depulit errores, quos tempora cæca vehebant,  
 Prisca fides, veteri cum pietate, redit.  
 O venerande pater, parui miseratus ouilis,  
 Tendo tibi lætas, supplice voce, manus.  
 Sit mihi, quæ nunc est, scripturæ regula sacra,  
 Atq; meo maneat nomen in ore tuum.  
 Excitet ardentes virtus in pectore flammæ,  
 Æmula doctrinæ sit pia vita piæ.  
 Floreat Elisabeth exoptatissima princeps,  
 Præsit & in membris hoc sine labe caput.  
 Hoc caput excellens tua præstet gratia saluum,  
 Sic erit in toto corpore tuta quies.  
 Nobilitas concors viuat, concorsq; senatus,  
 Iura locum teneant, artibus & sit honos.*

*Moribus*



Moribus emineant puris, qui sacra gubernant,  
 Sermo pius dux sit, sit proba vita comes.  
 Factio non laceret plebem, nec bella fatigent,  
 Pax maneat, nostri dulcis amica soli.  
 Non ego plura rogo, quāquam sunt plura roganda,  
 Tu deus ancillæ quæso memento tuæ.  
 Christe deus, filiūq; dei, mea dirige vota,  
 Qui patris ad dextram plenus honore sedes.  
 Spiritus è cœlis quassatos erigat artus,  
 Pectora sic vires sunt habitura nouas.  
 Multa licet peccem, nec adhuc sine crimine viuam,  
 Leniat offensas mœsta querela graues.  
 O deus exaudi, supplex te serua precatur  
 Anglia, præsentem flendo requirit opem.  
 Non ego sum, fateor, tam magno digna fauore,  
 Filius est dignus, victima nostra, tuus.  
 Sic ego grata tuum reuerenter nomen habebo,  
 Sic erit & gentis gloria summa meæ.

IN AVSPICATISSIMVM S. REGI-  
 næ Elisabethæ regimen.

Anglia, tolle caput, sæuis iactata procellis,  
 Exagitata malis Anglia tolle caput.

O.3.

Aurea

Aurea virgo venit, roseo venerabilis ore,  
Plena deo, princeps Elisabetha venit.  
Quaę venit, festos circumfert undiq; ludos,  
Undique, quā graditur, gaudia læta ciet.  
Stella salutaris salve, præsentia serua,  
Splendeat ex radijs terra Britannia tuis.  
Formosum sydus, patriam caligine mersam,  
Admotā propius luce leuato noua.  
Frigidus horribili Boreas terrore strepebat,  
Atq; diu terras aspera læsit hyems.  
Nunc Zephyrus mollis iucundas commouet auras,  
Anglia vere nouo nunc recreata viret.  
Tu deus ista facis, tu summi rector Olympi,  
Prospiciens cælo vulnera nostra vides.  
Tu deus es solus, nostri medicina doloris,  
Atq; tuis seruis tempore semper ades.  
Tu deus in solio gemmam componis auito,  
Quæ patriæ lucem sola referre potest.  
Rettulit, atq; refert, poteritq; deindè referre,  
Lumine si posthac luceat illa tuo.  
Anglia tende deo palmas, & supplice voce  
Spiritus ad dominum sæpè precando meet:

Elisa-

*Elisabetha tuis seruis præfecta magistra,  
Ut domino maneat fida ministra deo.  
Sit pia, sit clemens, & sit virtutis amatrix,  
Semina doctrinæ non peritura serat.  
Iustitiam colat, & disponat in ordine certo  
Res, homines, terras, Anglia quicquid habet.  
Consilij rectis attentam præbeat aurem,  
Et ferat oppressis, quando rogatur, opem.  
Fulminet in vitijs, & corda rebellia frangat,  
Supplicibus parcat, quos meliora mouent.  
In domini iusto maneat cultuq̃, metuq̃,  
Sit similis princeps Elisabetha sui.  
Et similem matri prolem moritura relinquat,  
Viuerè sic patriæ post sua fata potest.  
Nos miseri, ferro, flamma, morboq̃, fameq̃,  
Quos meritò tristis punijt ira dei.  
Nos miseri, clemens domini quos dextra leuauit,  
Et quibus ad cælum est rursus aperta via.  
Pectore sincero domini mandata tenere  
Conuenit, & vera relligione frui.  
Exeat ex regno libertas impia carnis,  
Spiritus est liber, res placitura deo.*

*Mutua*



*Mutua nos firmo concordia pectore iungat,  
 Sic soboles patri grata futura sumus.  
 Inuide liuor abi, mendax infamia musset,  
 Turpis auaritiæ sordida lucra migrent.  
 Seditio fileat, tollatur iniqua rapina,  
 Sanguinis & sitiens, dira tyrannis eat.  
 Mentibus in nostris reuerentia principis insit,  
 Et populo faueas Elisabetha tuo.  
 Sic deus in regno tibi prospera tempora mittet,  
 Patria sic tecum viuere læta potest.*

D. NICOLAO BACONO MAGNI  
 sigilli Angliæ custodi, amico honoratissimo.

*VT valeas, primum capitis sit cura tegendi,  
 A stomacho crudos & remoueto cibos.  
 Sume bono succo vinum, panemq; salubrem,  
 Ne sedeas, donec sis comedendo satur.  
 Nec Venus exhaustos absumat corporis artus,  
 Bacchus & à lecto debet abesse tuo.  
 Sit modus in victu, tibi sit modus atq; laboris,  
 Non animum vexet mœsta querela tuum.  
 Vulnera fortunæ constans patientia frangat,  
 Tempora cum fuerint tristia, lætus eris.*

*Quam*

Quam deus assignat, contentus viuito sorte,  
In tenui censu, corda quæta tene.  
Credula non omnes admittant pectora voces,  
Pauperibus non est iniicienda manus.  
Sermo sit in mensa comis, moderare palatum,  
Nec varios auida fauce vorato cibos.  
Verba tibi non multa fluant, sed verba sequatur  
Prompta fides, nulli sit tua lingua malo.  
Ora, sibi quæ sunt contraria, semper abhorre,  
Plena sit innocuo mensa faceta sale.  
Nec domus in varias sectas diuisa trahatur,  
Quos tibi vicinos sors tua fecit, ama.  
Talis erit vestis, qualem fortuna requirit,  
Crassa licet, membris sit tamen apta tuis.  
Lis tibi semper obest, opibus te ditior vrget?  
Cuius eras socius, turpiter hostis eris.  
Si cadat inferior, nullam victoria laudem  
Obtinet, officijs est retinendus amor.  
Mane profecturum, Vulcanus nocte cubantem  
Visitet, is cæli dira venena fugat.  
Dum vigilas, domino supplex tua vota profunde,  
Sic tibi res saluas efficit esse deus.

*Pauperibus tua sit pietas, succurrere prompta,  
Quosq; vides miseros esse, leuare para.  
Sic tibi diuitias dominus cumulabit in arcis,  
Et noua, cum magno fœnore, lucra dabit.  
Crapula nocturno quæ diffluit ebria luxu,  
Protinus est lectis eiicienda tuis.  
Somnia seruorum caueas, & lumina sera,  
Concitat ingentes flamma minuta faces.  
Otia te lecti non matutina morentur,  
Erige maturè corpus, & ito foras.  
Ædibus emigrent, os mendax, tetra libido,  
Lubrica nec partas alea iacet opes.  
Lætitiâ mensæ comitem seruare memento,  
Fercula non debent somnia longa sequi.  
Planta, caput, stomachus, sint contra frigus operta,  
Nulla tuo sedeat pectore cura diu.  
Vt tua res patitur, sumptus ratione gubernes,  
In vitio semper plus erit, atq; minus.  
Tempora quando negant, debes seponere causam,  
Tempora quando ferant, indubitanter agas.  
Fallere iurando quenquàm scelus esse putabis,  
Sis alacris, faciet cura repente senem.*

*Pocula*



*Pocula manè caue, ni te sitis vsserit ingens,  
 Aura salutaris sit, facilisq̃ labor.  
 Tempora mensarum potus legitima seruet,  
 In reliquis cesset, sit nisi magna sitis.  
 Sal nimius succos solet exhaurire salubres,  
 Ergo tuos modicè condiat ille cibos.  
 Deniq̃ quicquid erit tua quod natura repellit,  
 Vel licet indè nihil, vel licet indè parum.  
 Ista meæ musæ si vis præcepta tenere,  
 Mens erit in sano corpore sana. Vale.*

IN COLLEGIVM WESTMONAS-  
 teriense restauratum nuper ab Elisa-  
 betha regina.

*NObilis hæc domus antiquo memorabilis ortu,  
 Temporis ad varias est reuoluta vices.  
 Elisabeth tandem cælo regina profecta,  
 Fecit ut æternum possit habere statum.*

IN S. REGINÆ ELISA-  
 bethæ effigiem.

*HEi mihi, quòd tanto virtus perfusa decore,  
 Non habet æternos inuiolata dies.*

IN EFFIGIEM THOMÆ CRANMERI  
 Archiepiscopi Cantuariensis.

ET pius, & doctus, Thoma Cranmere fuisti:  
 Tempora læta deus, tempora dura dedit.

IN EFFIGIEM SVAM.

QVid facis ô demens, cur ora fugacia pingis?  
 Aut novus, aut nullus cras mihi vultus erit.

IN EANDEM.

NON ego sum tanti, sed mos est gestus amicis,  
 Cum tabula formam tollet auara dies.

IN EFFIGIEM SPECTATISSIMÆ  
 feminae Annæ Henneagiae.

IN genio præstans, muliebri plena decore,  
 Ac, nisi quod laudes, hæc habet Anna nihil.

IN EFFIGIEM EDMUNDI  
 Halli Gretfordiensis.

CORporis effigies pictoris cernitur arte,  
 Mens latitat soli conspicienda deo.

DOMINO ROBERTO DUDLEIO,  
 illustrissimo Leicestriae comiti.

OBuia te læto comitem Leicestria vultu  
 Suscipit, & potius vellet habere ducem.

Sed

Sed tamen, ut verum fatear, præclare Roberte,  
 Est via, qua comes, & dux simul esse potes.  
 Te comitem fortuna comes prosperrima fecit,  
 Et tibi dux virtus, te facit esse ducem.  
 Dux maneat virtus, comes & fortuna sequatur,  
 Sic patriæ fies gloria summa tuæ.

EIDEM.

T Ende deo palmas supplex, & vota profunde,  
 Siue vigil surgis, vespere siue cubas,  
 Et quoniam patriæ caput est, sit cura secunda  
 Principis, hanc vero pectore fidus ama.  
 Patria succedat, communia commoda quære,  
 Patria patronum te sciat esse suum.  
 Proxima sit tibi cura tui, propriæq; salutis,  
 Invidia nunquam gratia magna caret.  
 Viuito syncerè, veris sis fidus amicis,  
 Nil temere credas, quæ facis, antè vide.  
 Suspicio vanis fallax rumoribus absit,  
 Amolire malos, auxiliare bonis.  
 Hostibus ignosces, illis sed fidito solis,  
 Quos tibi vel sanguis, vel sociavit amor.



Sis animo magno, vultu sis semper eodem,  
 Dissimilem nemo te probet esse tui:  
 Deniq; te qualem vulgò vis esse videri,  
 Perfice re vera, talis vt esse queas.  
 Viue, vale, multos numera foeliciter annos,  
 Vita tamen vitæ sit memor ista noua.

IN NVPTIAS GENEROSISSIMI  
 Thomæ Cecilij.

Ceciliana suos arbor diffundere ramos  
 Incipit, & claro fructificare solo.  
 Sic, ô sic superi, magno de nomine nomen  
 Crescat, & in multis perpetuetur auis.  
 Omnia præclarum memorabunt sæcula patrem,  
 Gloria de tanto fonte perennis eat.  
 Quàm patriæ foelix pater est, tam prospera patri  
 Sit soboles, voti summa sit ista mei.

AD LECTVM.

Lædula curarum requies, & meta laborum,  
 Otia qui tecum dulcia nocte vehis,  
 Da faciles somnos, in somnia vana repelle,  
 Fac grauis ex tristi corde querela migret.

Omnia

*Omnia deletō miseri ludibria mundi,  
Hospitio gratus sic potes esse tuo.*

## RESPONSIO.

*VT sim curarum requies, & meta laborum,  
Sit vacuum pectus quando cubile petis.  
Ut faciles habeas somnos, in somnia nulla,  
Sit modus in victu, sit sine nube caput.  
Deniq̃ fac lectum tibi credas esse sepulchrum,  
Sic licet hospitio te recreare meo.*

## IN WOLFGANGI MUSCVLI LOCOS

*communes Anglicè versos, & insignia R. D.*

*Cantuariensis archiepiscopi.*

*INtegra diffusi soluetur machina mundi,  
Tollitur & toto quicquid in orbe placet.  
Viuuīt in æternum dominus, quem nosse labora,  
Musculus, vt possis nosse, magister erit.  
Hunc tibi commendat commendatissimus ipse  
Officio primas, primus & ingenio.  
Natura clauēs habuit Parkerus auitas,  
Præsul adoptiuas religionis habet.  
Addidit huc princeps stellas siue nube serenas,  
Luceat vt morum lumine sancta fides.*

*In*

## IN OBITVM DOMINI GVL. PAGETI

**N**obilis ingenua descendens stirpe Pagetus,  
 Aulicus in magno vixit honore diu.  
 Quis melior? veteri patris qui laude triumphat,  
 Colligit an factis, qui decus omne suis?

## EPITAPHIVM THOMÆ

Chalineri equitis.

**N**atura Thomas Chalinerus, & arte valebat,  
 Utilis & patriæ vir fuit ille suæ.  
 Publica cum magna suscepit munera laude,  
 Laude pari libros scripserat ille domi.  
 Sic patriæ vixit magno, dum vixit, honore,  
 Sic patriæ magno concidit ille malo.

## IN D. THOMAM HOBÆVM EQVITEM,

Parisijs dum legatione fungeretur, extinctum.

**M**ors licet in Thoma multum properarit Hobæo,  
 Non tamen ante suum concidit ille diem.  
 Ingenio præstans, doctrina cultus, & annis  
 Integer, ingenuis moribus usus erat.  
 Diues, & instructus, præclara coniuge felix,  
 Quam faciat Phœbus si queat, esse suam.

Egredi-



Egregiam prolem sexus utriusq; reliquit,  
 Gratia tam magnas magna tegebat opes.  
 Addiderat princeps equitis memorabile nomen,  
 Ut meritis iustum possit adesse decus.  
 Gallia legatum lætis susceperat vlnis,  
 Atq; suum coniunx est comitata virum.  
 Sic Mithridatæis coniunx errabat in armis,  
 Uxor Pompeio sic sociata fuit.  
 Dispare sed fato. Vis hos inimica premebat,  
 Mortuus est Thomas, hoste, minisq; carens.  
 Dum patriæ seruit, sors dum prosperrima fulget,  
 Ad gremium positus coniugis, æger obit.  
 Et placidam mors est vitam tranquilla sequuta,  
 Sic ego, sic vellem vivere, sicq; mori.

## FLOSCVLI EX IESV

Sirach decerpti.

Qui sapit, assidue diuina volumina versat,  
 Audit & attentè dogmata sancta dei.  
 Qui domini voces iusto veneratur honore,  
 Ille deo seruit, gratus & ille deo.  
 Est domini verus res augustissima cultus,  
 Excitat is mentes, pectora læta facit.

Q. I.

Qui

Qui domino servire studes, sis iustus, & ante  
Horrida fortunæ fulmina disce pati.  
Sobria tranquillæ præsit moderatio vitæ,  
Sic bonus ipse bonis charior esse potes.  
Quæ ratio penetrare nequit, perquirere noli,  
Quod superat vires non subeatur onus.  
Aspice mansuetus fractorum vulnera fratrum,  
Pauperibus promptam ferto rogatus opem.  
Sis animo constans, nec te circumferat aura  
Quælibet, & varijs ire caueto vijs.  
Ne doceas alios quod non perceperis ante,  
Lingua potest decori, dedecoriq; fore.  
Vana leues nunquam sectetur lingua susurros,  
Falsa nec in quoquam crimina sermo notet.  
Allicit humanos animos oratio blanda,  
Comis amicitias undiq; sermo legit.  
Sit tibi quæ faueat quamuis numerosa caterua,  
Sed tamen ex illis unus amicus erit.  
Qui sapit, illius te consuetudo iunabit,  
Eius & haud pigeat sæpè subire domum.  
Pectora non inflat fastu pretiosus amictus,  
Nec tibi, cum flores prosperitate, place.

IN OBITVM MARIÆ, PRIMÆ CON-  
iugis Thomæ illustris ducis Norfolciensis.

**M**E Mariam Thomas, adolescens ipse, puellam,  
Participem clari fecerat esse tori.  
Nobilitas utrinq̃ fuit, fuit ardor utrinq̃  
Mutuus, annorum cursus & æquus erat.  
Quicquid habet, nobis dederat natura benigna,  
Contulit & virtus aurea, quicquid habet.  
Inuida mors, rebus nunquam contenta secundis,  
Me tibi, teq̃ mihi, chare marite, rapit.  
Viue memor nostri Thoma, Surreia proles  
Magna mei pars est, pars quoq̃ magna tui est.  
Cresce puer, patriq̃ seni succedito fœlix,  
Sic mihi post mortem vita redire potest.  
Tuq̃ vale Thoma, fies qui sæpè maritus,  
Prima tibi, sed non vltima cura fui.

IN OBITVM MARGARITÆ, SECVNDÆ  
coniugis Thomæ ducis Norfolciensis.

**M**argaritam natura bonam, fortuna beatam  
Fecit, erat partu nobilis, atq̃ toro.  
Nupta duci Thomæ summos conscendit honores,  
Addidit & claro pignora chara patri.

Q.2.

Sed



*Sed nimium felix optat dum mater haberi,  
 Desinit & coniunx, mater & esse simul.  
 Pallida mors, lætis semper contraria rebus,  
 Inuolat in partus inuidiosa novos.  
 Et puero saluo, matrem crudeliter aufert,  
 Ah maneat potius mater, eatq; puer.  
 Fata vetant, sua quenq; dies ad funera raptat,  
 Nobilis ô Thoma, te quoq; fata trahent.*

IN ELISABETHAM TERTIAM  
 coniugem.

*Cumbria me sponsam, sponsam Norfolcia vidit,  
 Illic eram comitis, hic ego sponsa ducis.  
 O me felicem, mea dum fortuna manebat,  
 Sed fortuna diu nulla manere potest.  
 Sis animo magno mi Thoma, præterit ætas,  
 Lubricus annorum cursus, ut umbra, volat.  
 Est sua cuiq; dies, quæ vitæ tempora claudit,  
 Me tulit illa dies, te feret illa dies.  
 Interea serui patriæ, nostriq; memento,  
 Quæ tibi non longo tempore iuncta fui.  
 Gaudia cœpta deus lugubri funere mersit,  
 Sed tua restituent te mihi fata, Vale.*

Tho

THOMAS DVX NORFOLCIVS DE  
tribus vxoribus vno sepulchro conditis.

*Coniugibus tribus hoc posui cōmune sepulchrum,  
Quas mihi viuentes iunxerat vnus amor.*

*Nescio quæ melior mihi, vel iucundior esset,  
Optima quæq̃ fuit, intima quæq̃ fuit.*

*Coniugio triplici fœlix, ter coniugis expers,  
Heu nimium varias conqueror esse vices.*

*Parce deus, satis est, ter funera tristia vidi,  
Funus ego quartum, si licet, esse velim.*

IN NOBILEM PVELLAM EX  
Suctia aduectam in Angliam.

*Virgo per incertos casus, terraq̃, mariq̃  
Vecta diu, tandem facta Britanna fui.*

*Anglia promisit fessæ solatia vitæ,  
Sed tamen ijs vti fata sinistra vetant.*

AVES INCLVSE IN  
caueam.

*Avrea libertas toto pretiosior orbe  
Fugit ab inclusis, serua caterua sumus.*

*Sed tamen hoc tutas septum nos vndiq̃ servat,  
Omnis abest isto vis inimica loco.*

Q. 3.

Scilicet

*Scilicet interdum caueæ custodia prodest,  
Et melius votis est caruisse tuis.*

*Ergo voluntatis motus ratione gubernas,  
Sic tibi conditio nulla nocere potest.*

IPSE DE SE.

*NONa mihi vitæ cœperunt currere lustra,  
Cum patriæ feci commoda nota meæ.*

*Tempora doctrinæ studijs iucunda peregi,  
Sed fortuna tamen sæpè nouerca fuit.*

*Semper eram magnus clari Ciceronis amator,  
Otia dilexi, quæ sine lite forent.*

*Simplice natura vixi, neglector honorum,  
Lingua silens, animus res agitando frequens.*

*Sum quatuor rebus fœlix, in principe, matre,  
Coniuge, synceram præstat amicus opem.*

*Me duo perturbant hostes, calumnia, morbus,  
Tertia crux, nomen non habitura, necat.*

*Fortè meos quisquam si vult cognoscere cursus,  
Ultima cum primis iungere fata placet.*

*Est Cantabrigiæ studiorum regia sedes,  
Nomine digna suo, digna parente suo.*

Fontibus



Fontibus ex illis manarunt flumina nostra,  
Quicquid & in nobis extitit, inde fuit.  
Seruus ad extremum regali versor in aula,  
Quæ sit fortunæ meta suprema meæ.  
Salua sit Elisabeth, multos longæua per annos,  
Anglia diuina tuta fruatur ope.  
Spiritus Haddoni fessos cum deseret artus,  
Corpore deposito, regna suprema petat.

## AMATORIVM, INCERTO

authore.

QVem tibi dant cursum fortunæ vela secundæ,  
Hic tibi, dum venti flant, capiendus erit.  
Nam benè nunc spirans, si post fortuna reflarit,  
Omnis erit votis ianua clausa tuis.  
Sæpè dies dabit vna tibi, quod sumere velles,  
Quod nisi tunc sumas non dabit vlla dies.  
Tempus abit, tua vota manent, quod habere licebat,  
Dum potes, haud cupis, at cum cupis, illud abest.  
Euolat incertas quatiens occasio pennas,  
Quæq; ijt, hac rursus non solet ire via.  
Tempora cum nostris rebus sunt apta gerendis,  
Omnia sublato sunt facienda metu.

Qui.

Qui cupit ex portu soluens conscendere nauem,  
 Quò reuocat ventus, flectere vela solet.  
 Qui sua mercator vult multum crescere lucra,  
 Tempora vendendis mercibus apta notat.  
 Miles in aduersos qui telum dirigit hostes,  
 Antè videt tempus vulneris, atq; locum.  
 Temporibus certis medicus sua pharmaca miscet,  
 Tempora dicendi propria rhetor habet.  
 Tempora piscator, sua tempora nouit & auceps,  
 Tempora scindendi nouit arator humum.  
 Solus ego nauta sum, mercatoreq; solus,  
 Milite sum solus stultior, & medico.  
 Rusticus, & rhetor, vanus piscator, & auceps,  
 Ingenium vincunt, sordida turba, meum.  
 Tempus erat quando poteram placuisse puellæ,  
 Hei mihi quod non est, & quia tempus erat.  
 Tempus erat quando dominae mihi iuncta voluntas,  
 Omnia quæ velle, vellet & ipsa sequi.  
 Tempus erat quando solus, totusq; placebam,  
 Quando fui dominae, spesq;, decusq;, mea.  
 Tempus erat quando dulcissima murmura fundens,  
 Conseruit labris labra puella meis.

Tem-

Tempus erat, quando mea me si forte puella  
Aspiceret, toto corpore mota foret.

Tempus erat, quando si solum nata fuisset,  
Venit in amplexus læta, lubensq; meos.

O me fœlicem nimium, bona si mea nossem,  
Tempore si scissem se mihi dante frui.

Multa quidem volui, sed cur non omnia feci,  
Quò mea mens cupijt, cur vetat ire pudor?

O pudor infœlix, cur nos disiungis amantes?  
Cur facis ex vno pectore corda duo?

Sed neq; solus erat pudor, aduolat altera pestis,  
Quæ mihi te tollit, meq; puella tibi.

Dum ruit in collum virgo cultissima nostrum,  
Oscula dum sua dat multa, capitq; mea,

Dum studijs ferimur Veneris, dum ludimus vna,  
Dum venit ad nullum cæca Cupido modum:

Deficit is ardor sensim, seseq; retexit,  
Flammaq; quod fuerat, nunc propè fumus erat.

Subtraho paulatim me, suffurorq; puellæ,  
Oscula quæ fuerant, nunc ea verba volant.

Senferat, atq; caput virgo demittere cœpit,  
Pallet, & aspectu proditur ipsa suo.

R. 1.

Aduoco,



Aduoco, discedit, reuoco, se proripit intus,  
Oscula vel non dat, vel quasi nulla daret.  
O mea non ullas in partes pectora firma,  
Cur mea mens nunquam se capere ipsa potest.  
Antè quasi crapula, Veneris fastidia sensi,  
Nunc quasi ieiunus sum, cupioq; cibum.  
Sensit & hoc, moremque mihi pulcherrima gessit,  
Et redit ad nostrum, nostra puella sinum.  
Sed tamen & dubitans venit, & quasi nollet adesse,  
O nimis ad latus ingeniosa meos.  
Sæpè quasi cupiat discedere, plurima dicit,  
Sæpè meis manibus prensa, repente fugit.  
Hæc mihi calliditas, ardentes excitat æstus,  
Quo magis hæc non vult, hoc magis ipse volo.  
Hæc ego dum meditor, dum tota mente peragro,  
Ut dominae menti, mens sit amica mea:  
Exoritur subito matris non dura seueræ,  
Dura tamen nobis visa querela fuit.  
Seuocat, & rogat, an liceat sibi quærere pauca,  
O mihi quam libuit dicere, quæso, tace.  
Sed quia me captum vidi, ceruice reflexa,  
Atq; rubens dixi, hoc sit modo vt ipsa voles.

Inci-

Incipit, ut facile matronam agnoscere possis,

Sermo fuit, qualis matribus esse solet.

O utinam sapiens minus, aut grauis illa fuisset,

Aut utinam sapiens, & grauis ipse forem.

Mater ait, gnatae rationem cogor habere,

Cuius ego fructus, commoda credo mea.

Dicitur hæc uxor tua vulgi voce futura,

Inq̃ manum dicunt, hanc coisſſe tibi.

Multa quidem multi narrant, mihi mira videntur,

An mea iam gnata, est uxor amabo tua?

Hic ego deiiciens vultumq̃, caputq̃ pudore,

Vix potui, non est, dicere, dico tamen.

Illa statim recitat multorum facta dierum,

Fœmina tam meminit, quæ miminisse velit.

Tempora percenset ludorum, colloquiorum,

Et quoties solos viderit esse simul.

Quomodo non vnquam nostrum turbauerit vsum,

Libera concedens gaudia, verba, iocos.

Tempus ait, nunc est tacitos expromere sensus,

Iam satis est ludo, delitijsq̃ datum.

Seria tractemus, vero mihi dicito vultu,

Qua ratione tibi filia nostra placet.

R.2.

Per-

Perplacet hæc, inquam, sed nulla in fœdera veni.  
 Non ea congressus causa frequentis erat.  
 Nescio quid titubans addit perplexa dolore.  
 Lingua, nimis luctus causa parata mei.  
 Summa fuit, sponsam non esse, nec esse futuram.  
 Hei mihi, quas turbas ista futura dedit.  
 Impia vox, scelerata, nequam, stupidissima, bruta,  
 Grammaticen unquam me didicisse piget.  
 Vae mihi, vae libro, vae præceptoribus illis,  
 A quibus erudior posse futura loqui.  
 Intumuit mater, stimulisq; elata doloris,  
 Iurgia iam parat, & spargit acerba minas.  
 Ergo tibi quoniam non est mea gnata futura  
 Uxor, in his posthac ædibus, hospes eris.  
 Obterit is rumor famam gnataeq; tuamq;  
 Non decet ut frustra talia verba valent.  
 Filia multorum votis optata procorum,  
 Quem vult ex multis eliget. Ergo vale.  
 Hæc ubi, me toruè spectans, effata fuisset,  
 Auribus aut quæ sunt talia visa meis,  
 Illico discedit mihi mens, & lingua stupebat,  
 Et, quasi me somnus deliget, asto tacens.

Proti-



*Protinus, et memet collegi, sede relicta,  
Exilii, multum tristia fata querens.*

## CONFESSIO PECCATORIS,

*incerto authore.*

*ET merui, & fateor, vel si tua sæuior ira,  
Putria sulphureo fulmine membra cremet.  
Omnia peccaui, cælum mea crimina vidit,  
Dedecoris nostri conscia terra fuit.  
Prodigus ille ego sum, probri sum filius ille,  
Qui patrias luxu proiebat opes.  
Corpus erat iuueni firmum, nec gratia formæ  
Defuit, ingenij vis mediocris erat.  
Cultus & accessit doctrinæ, regula vitæ,  
Prouida si normam vitæ tenere velit.  
Sed mea feruentem cum tertia lustra inuentam  
Prouerberent, rapidis in vada cæca rotis:  
Crapula frangebat corpus, formæq; decorem,  
Crebra valetudo depopulata fuit.  
Corporis has labes, mentis comitata ruina,  
Dissimilem fecit me nimis esse mei.  
Singula quid memorem? Nosti deus omnia, nosti,  
Omnia sunt oculis obuia facta tuis.*

*R. 3.*

*Plus*

Plus ego deliqui primis peccator in annis,  
Tempora quam propè sunt talia visa pati.  
Longa dies misero luxu, ludoq; peribat,  
Nequitij nox est accumulata nouis.  
Otia, fastus, amor, gula, corruptela placebant,  
Mollities, plusquam foemina, nostra fuit.  
Iamq; ita regnabat victrix in carne voluptas,  
Ut nisi peccatum, nil mea vita foret.  
Sed pater indulgens, cælo miseratus ab alto,  
Tabifica fixit membra soluta lue.  
Ilia perpetuò binos fluxere per annos,  
Omnia manabant, spiritus, esca, cruor.  
Exuias spectans tennes, matieq; peresas,  
O ego quam vellem tunc potuisse mori.  
Sed deus auertit cladem, morboq; fugato,  
Perfudit succis languida membra nouis.  
Et mihi restituit plenas in corpore vires,  
Adfuit ex omni reddita parte salus.  
Sic ope diuina media de morte reuixi,  
Sic, fugiens longo tempore, vita redit.  
Addidit uxorem domini clementia talem,  
Qualis erat summo foemina digna toro.

Nil

*Nil melius toto, toto moratus orbe,*

*Nil erat, ô sexus gloria magna tui.*

*Te nimium fœlix viuebam coniuge coniunx,*

*Nunc nimium sine te coniuge, viuo miser.*

*Magna mihi fuit cœlestis gratia patris,*

*Nam sat opum fuit, & sat benè culta domus.*

*Principis & seruus mediocri nomine vixi,*

*Et reliqua fœlix conditione fui.*

*Sed deus immemori rursus mihi pectore fluxit,*

*In veteri cœno mens reuoluta iacet.*

*Otia sectabar molli plenissima luxu,*

*Clamat Iô Bacchus, clamat Iôq; Venus.*

*Tu deus è cœlo prospectans, omnia cernis,*

*Supplicium differs, ad meliora vocas.*

*Cumq; diu veniam spreuisset culpa rebellis,*

*Nec leuitas vllum nosset habere modum:*

*Pallida mors subito teneræ per coniugis artus*

*Permeat, & telo guttura rauca fodit.*

*Exclamo, iactôq; manus, & numina testor,*

*Numina peccatis aspera facta meis.*

*En ego peccaui, tua mors huc spicula transfer,*

*Ille ego sum dextræ victima iusta tuæ.*

*Nil*



*Nil ea commeruit, proh dilectissima coniunx,  
Vulnere cur tanto crimina nostra luis?  
Posco deum supplex veniam, peccataq; damnans,  
Ingemo, suspiro, deprecor, atq; fleo.  
Sera venit miseræ nostri medicina doloris,  
Instat anhelanti mors, animamq; rapit.  
Et mihi præteriens, uxoris fata querenti,  
Protulit horribili verba timenda sono.  
Stulte, quid uxorem tibi lamentaris ademptam?  
Viuit, & est eius mens sociata deo.  
Fœmina casta fuit, melioreq; digna marito,  
Cuius habet cœli præmia, pœna tua est.  
Tu tibi flendus eris, peregrinas missus in oras,  
Accipies vitæ præmia iusta tuæ.  
Sæpè mori cupies, me nomine sæpè vocabis,  
Non veniam, pestis lurida membra teret.  
Principia ista mali, dixit, torueq; reflectens  
Lumina, discessit, mi pavor ora premit.  
Ut me collegi tandem, & lux reddita menti est,  
Sic cœpit timidis hiscere lingua sonis.  
Ergo meæ coniunx pars optatissima vitæ  
Solueris in cineres, nec reditura fugis?*

*Non*

Non licet amplecti, non vltima perdere verba?  
Inq̃ sinus lachrymas non licet ire tuos?  
Sed lachrymæ valeant, serò quas fundere cœpi,  
Vindicis ira dei cum manifesta fuit.  
Tuq̃ simul coniunx æternum chara valeto,  
Quàm tua, quàm vellem funera posse sequi.  
Sed mihi plura deus culpæ tormenta parauit,  
Mors abiens diras est minitata cruces.  
Vt potero patiar, fiat diuina voluntas,  
Ecce creaturam, me deus alme, tuam.  
Sic fatus, proprias ædes, & cuncta relinquo,  
Coniugij nimium tristia signa mei.  
Iudicium domini iustum, quia rebus abusus  
Antè meis fueram, nunc aliena sequor.  
Auehor huc, illuc, o beo modò rusticus agros,  
Urbs in rure iuuat, sors mihi neutra placet.  
Solutus in abstrusam correpo sæpè latebram,  
Expleor & mœrens, & gemitu, & lachrymis.  
Cum mihi sic vnus transisset mensis, & alter,  
Visaq̃ sunt vitæ tædia longa meæ.  
Principis externas iussu delegor in oras,  
Qua melior non est vlla, nec esse potest.

*Naui go spumosi contemnens murmura ponti,  
Naufragus in terris æquora tutus aro.  
Ut tetigi terram, meq̃ intra tecta recepi,  
Abijciens viduo languida membra toro:  
Tum nimium longo notus mihi tempore cæpit  
Humor, in assuetis luxuriare locis.  
Ut licet occurro, diuersa remedia tentans,  
Et res successus cæpit habere bonos.  
Publica conclusum commissa negotia finem,  
Omnia post longas cum reperere moras,  
Cumq̃ sua iam quisq̃ via procedere cæpit,  
Et mihi migrandi maxima cura foret:  
Ecce nouis subito flammis succensa fuerunt  
Membra, furens vrit corpora sicca calor.  
Decolor est facies bilis suffusa veneno,  
Spargit & inuisas morbus ubiq̃ notas.  
Occupat indè manus, & ibi sua vulnera pingit,  
Et propriam ponunt brachia tincta cutem.  
Corpus & oblinitur totum fuligine nigra,  
Nil vt erat superest, omnia bilis habet.  
Deijcio vultum, lachrymas & spontè cadentes  
Fundo, deum tacitus supplice voce precor.*

*O pater*



O pater in cœlis, qui solus numine seruas,  
Quicquid habet tellus, quicquid & aer habet:  
Parce pater, miseros non audeo tollere vultus,  
Occupat infectas pœna seuera manus.  
Lingua mihi propè sola vacat, sunt cœtera iusto  
Fulmine vindictæ saucia facta tuæ.  
Lingua quoq; ex merito debebat muta manere,  
Nequitiaë nimium prompta ministra meæ.  
Sed deus hanc voluit testem superesse malorum,  
Ut propria fierem voce fatente reus.  
Sum reus, ô fateor, veniam pater omnia fasso  
Da, superet nostrum gratia magna scelus.  
Est scelus immensum, tamen est tua gratia maior,  
Gratia peccatis sit medicina meis.  
Nil medici prosunt artes, nil pharmaca præstant,  
Nec nisi placato spes erit ulla deo.  
Non ego te possum, Christi te victima placet,  
Victima pro nostris est ea sola malis.  
Christe deus, fili q; dei, tua numina posco,  
Effice propitium tu mihi, quæso, patrem.  
Ignoscat planè fasso, vereq; dolenti,  
Pœnitet, hæc misero vox mihi sola manet.

Scilicet hoc nihil est, nisi quòd clementia patris,  
Hoc bonitate sua sanciat esse satis.  
Omnibus hoc satis est, qui te seruator Iesu,  
Supplice mente colunt, intrepidaq̃ fide.  
Talia cum lachrymis fatus, me dedo dolori,  
Mæstus & in lectum me reuoluto meum,  
Multa querens, mortemq̃ petens, vitamq̃ perosus,  
Conditus in tenebris, mæstitiaq̃ fruens.  
Gratia sed domini non desertura fideles,  
Gratia, fœlices quæ sine fine facit,  
Astitit afflicto, sensi noua gaudia mentis  
Attonitus, tandem vox ita visa loqui.  
Te deus, ærumnasq̃ tuas, verosq̃ dolores  
Respicit, & culpam displicuisse videt.  
Scilicet hoc voluit patris clementia summa,  
Cum quateret sæuas bilis adusta faces:  
Vt vitij sordes, flammis exureret ignis,  
Pelleret vt turpi crimina corde dolor.  
Multa deus dederat magni monumenta fauoris,  
Et nisi quòd nolles esse, beatus eras.  
Et deus erranti multumq̃, diuq̃ pepercit,  
Iustitiæ cupiens immemor esse suæ,

Tempore

Tempore si veniam voluisses poscere culpæ,  
Tempore si posses displicuisse tibi.  
Sed quia nolueras, loris vindicta flagellat  
Tristibus, & pœnas accumulando furit.  
Sed tu fide deo, nec cura corporis æstus.  
Corpus enim cinis est, in cineresq̃ redit.  
Spiritus ascendet cœlestes liber ad oras,  
Inter & æternos distribuere choros.  
Sit tua mens sursum, terrestres abijce curas,  
Crux facit hæc, dignum te magis esse deo.  
Filius est verus domini, quem virga coercet,  
Spurius est, pœnis si malefacta carent.  
Sis animo magno, vincat patientia morbum,  
Afferat æternos vita futura dies.  
Dixit, & internos sensi recalescere sensus,  
Et redit in proprium mens recreata locum.  
Spiritus est hylaris, reuirescit pectoris ardor,  
Reddor & ex omni parte renatus homo.  
Omnia præsentis sperno ludibria vitæ,  
Vita nec ista iuuat, sed magis opto mori.  
N velut antè, dolent morbo deformia membra,  
Nescio quo morbus iam placet ipse modo.



Si valeam rursus, rursus languere necesse est,  
 Mors hodiè parcens, cras reditura necat.  
 Non ego vel menses posthac numerabo, vel annos,  
 Hora sit interitus illa, vel illa mei.  
 Corpora debentur morti, mens quærat olympum,  
 Semper & authorem cogitet illa suum.  
 Qui legis hos versus, nostras aduerte ruinas,  
 Disce carere malo, disce timere deum.  
 Sera licet veniat, veniet (mibi crede) cruentis  
 Passibus, & pœnas ultio iusta feret.

## FINIS.

Cum sit ætatis tibi cunctis ætas?  
 Quid nubat, nūmos cumulare, nūm?  
 Divus est Plato, satius q̃ chæroni  
 Placuisse? aut?

Qui suū censū cupidus petivit,  
 ponet in vitæ, cupidus petitu,  
 Jam fœnefcenti satis est, pœnatis  
 pœnatis boni.

# ERRATA GRAVIORA IN- ter excudendum commissa.

## *In orationibus.*

| <i>Folium.</i> | <i>Linea.</i> | <i>Erratum.</i> | <i>Correctio.</i> |
|----------------|---------------|-----------------|-------------------|
| 7              | 8             | Multiplicum     | Multiplicium.     |
| 37             | 8             | Scientia        | Sententia.        |
| 41             | 6             | Saguinis        | Sanguinis.        |
| 56             | 17            | Metuamus        | Metuimus.         |
| 76             | 8             | Adhibere        | Adhiberi.         |
| 94             | 15            | Præparauerim    | Præparauerim.     |
| 105            | 22            | Præcatum        | Peccatum.         |
| 113            | 11            | Spondimus       | Sponsodimus.      |
| 121            | 16            | Erztus          | Eretus.           |

## *In epistolis.*

|     |    |           |             |
|-----|----|-----------|-------------|
| 150 | 20 | Præcipiat | Perecipiat. |
| 173 | 10 | Disputari | Disputari.  |
| 264 | 19 | Diui      | Diuini.     |
| 329 | 6  | Qui       | Qua.        |

## *In Poematibus.*

|    |    |         |            |
|----|----|---------|------------|
| 1  | 8  | Crimine | Crimina.   |
| 77 | 6  | Reperit | Repperit.  |
| 85 | 12 | Cades   | Cadis.     |
| 99 | 22 | Profuit | Præstitit. |